



Presented to
The Library
of the
University of Toronto
by

Paul Halm Esq.,

UND
AT THE



UNIVERSITY OF
TORONTO PRESS

8469 2
H 8113Ze

Q. HORATII FLACCI

O P E R A O M N I A.

—

AD

OPTIMORUM LIBRORUM FIDEM EDITA

CUM

VARIARUM LECTIONUM DELECTU.

=====
CURAVIT

CAROLUS ZELL,

PHILOSOPHIAE DOCTOR ET ANTIQVARVM LITERARVM
IN UNIVERSITATE FRIBURGensi PROFESSOR.




TOMVS PRIOR.

400205
11.2.42

STVTTGARTIAE,

SVMTIBVS CAROLI HOFFMANN.

MDCCCXXVII.



P R A E F A T I O.

De huius editionis consilio et ratione non est cur denuo exponam, cum id iam in primi voluminis praefatione factum sit. Sed de Horatio, qui nunc curis nostris denuo prodit, hoc tantum teneri velim. In variarum lectionum delectu eos interpretes singulis locis indigitavi, qui mihi aptissime de lectionis diversitate iudicare visi sunt; quod quidem in eorum gratiam feci, qui pluribus editionibus stipati aut ipsi accuratius auctorem legunt, aut aliis legentibus explicant, ut continuo et uno quasi obtutu, qui potissimum editores consulendi sint, in tanta librorum copia perspiciant. In odarum et epodon argumentis id maxime spectavi, ut totius carminis consilium apte et brevissime significaretur; in satiris argumenta ab Heindorfio conscripta, elegantissimi iudicii viro, quem olim audire mihi contigit, latine verti; epistolarum argumenta ipse confeci.

I

EXPLICATIO NOTARUM,

QUIBUS CODICES ET EDITIONES IN LECTIONIS VARIETATE
SIGNIFICANTUR ORDINE ALPHABETICO DISPOSITARUM.

A.) CODICES.

BENTL. A Bentlio collati viginti sex, quos ut omnes
reliquos, qui hic nominantur, accuratius recenset
Mitscherlich. pag. VII. seqq.

BÈRSM. Bersmanni.

BLANDIN. Codices Blandiniani a Cruquio adhibiti.

BROD. Brodaeii, cuius collationem adscriptam exemplo
Torrentianae editionis habuit Gesnerus.

COLL. SAX. Variantium lectionum sylloge a Christophoro
Saxio descriptarum, quam adhibuit Gesnerus.

COMB. Codices Musei Britannici a Combio collati.

FABR. Codices a Georgio Fabricio collati.

GOTTING. Codex Gottingensis in bibliotheca academica
asservatus, quem in usum suum contulit Gesnerus.

HANOV. Codicum duorum Hanoveranorum fragmenta
a Gesnero adhibita.

IAN. Codices, quibus Ianus in editione sua usus est.

LAMBIN. Codices a Lambino collati.

OBERL. Codices Oberlini.

PULM. Codices a Theodoro Pulmanno adhibiti.

TALB. Talboti.

TORR. Torrentii.

B.) EDITIONES.

ALD. Editio Aldina, quae primum prodiit Venetiis 1501.

ASCENS. Ascensii commentariis instructa, prima prodiit 1503. Parisiis, pluribus vicibus repetita.

ANTWERP. Antwerpiensis cum Theod. Pulmanni notis. 1557 et 1564.

BASIL. Basilienses ex officina Valentini Curionis 1524. 1527. 1531.

BAXT. Willielmi Baxteri 1701. 1725.

BENTL. Richardi Bentlei. Prodiit prima eius editio 1711. emendatior repetita Amstelodami 1713. 1728. item Lips. 1764.

BERSM. Greg. Bersmanni, quae primum prodiit Lipsiae 1602. pluries repetita.

BOTH. Editio Gesneriana a Bothio curata Lips. 1822. Sed Both. Annotatt. sunt annotationes, quas editioni Feae Heidelbergensi addidit.

BURM. Petri Burmanni, qui edidit Horatium primum 1699. Trai. Batav. cum Rutgersii lectionibus Veneris; deinde 1713.

CRUQ. Iacobi Cruquii 1578. Antwerp. deinde 1602. 1611, quae optima est.

CUXING. Alexandri Cuningamii. 1711. Hagae Comit. et London.

DOER. Doeringii. Vol. I. Lips. 1824. Ed. 3. Vol. II. Ibid. 1824.

VIII

FAB. Tanaquilli Fabri. 1671.

FABRIC. Georgii Fabricii. Lips. 1570. post saepissime repetita.

FEA. Editio Feae. Rom. 1811. Repetita Heidelb. 1819. et 1822.

GESN. Io. Matth. Gesner. 1752. nuper admodum repetita a Bothio.

GLAREAN. Glareani. Friburg. Brisg. 1523. saepius repetita.

HEIND. L. F. Heindorfii Editio Satirarum. Vratisl. 1815.

HENRICOPET. Henricopetrina Basiliensis 1545.

IAHN. Ioa. Christiani Iahn. Lips. sumtib. Teubneri. 1824.

IAN. Christ. Dav. Iani. Lips. Tom. I. 1778. Tom. II. 1782.

IUNTIN. a Philippo Iunta expressa 1503.

LAMBIN. Dionysii Lambini 1561. 1567. certatim repetita, in quibus optima est. an. 1605.

MEDIOL. Mediolanensis per Antonium Zarottum. 1474.

MITSCHERL. Christian. Guil. Mitscherlich. Lips. 1800.

OBER. Ier. Iac. Oberlin. Argentor. 1788.

PRINC. Editio princeps, sine editoris, loci, temporis notatione anno 1470 plerumque assignata.

PULM. Theodori Pulmanni. Antwerp. 1557.

RUTGERS. Vid. Burmann.

SANAD. Sanadoni. Paris. 1728.

STEPHAN. Henrici Stephani. 1577. novissima an. 1600.

TORRENT. Torrentii. Antwerp. 1608. aliquoties repetita.

VALART. Ioseph. Valart. Paris. 1770.

WAD. Georg. Wadii. Lond. 1731.

WAKEF. Gilb. Wakefieldii. Lond. 1794.

Q. HORATII FLACCI

V I T A

A SÜETONIO TRANQUILLO

CONSCRIPTA.

Q. Horatius Flaccus, Venusinus, patre, ut ipse tradit, libertino et exactionum coactore, ut, vero creditum est, salsamentario, quum illi quidam exprobrasset in altercatione: quotiens ego vidi patrem tuum brachio se emungentem? Bello Philippensi, excitus a M. Bruto imperatore, tribunus militum meruit; victisque partibus, venia impetrata, scriptum quaestorium comparavit, ac primo Maecenati, mox Augusto in gratiam insinuatus, non mediocrem in amorum amicitia locum tenuit. Maecenas quantopere eum dilexerit satis testatur illo epigrammate:

*Ni te visceribus meis, Horati,
Plus jam diligo, tu tuum sodalem
Nunio videas strigosiores.*

sed multo magis, extremis judiciis, tali ad Augustum elogio: Horatii Flacci, ut mei, esto memor. Augustus epistolarum quoque ei officium obtulit, ut hoc ad Maecenatem scripto significat: Ante ipse sufficebam scribendis epistolis amicorum; nunc occupatissimus et infirmus Horatium nostrum te cupio adducere. Veniet igitur ab ista parasitica mensa ad hanc regiam, et nos in epistolis scribendis adjuvabit. Ac ne recusanti quidem aut succensuit quidquam, aut amicitiam suam ingerere desiit. Exstant epistolae, e quibus argumenti gratia pauca subjeci: Sume tibi aliquñd juris apud me, tanquam si convictor mihi fueris: recte enim et non temere feceris: quoniam id usus mihi tecum esse volui, si per valetudinem tuam fieri potuisset. Et rursus: Tui qualem habeam memoriam poteris ex Septimio quoque nostro audire; nam incidit, ut illo coram fieret a me tui mentio. Neque enim, si tu superbus amicitiam nostram sprevisi, ideo nos quoque ἀνθυπερφρονούμεν. Praeterea saepe eum inter alios jocos putissimum penem, et homuncionem lepidissimum appellavit, unaque et altera liberalitate locupletavit. Scripta quidem eius usque adeo probavit, mansuraque perpetuo opinatus est, ut non modo saeculare carmen componendum injunxerit, sed et Vindelicam victoriam Tiberii Drusique privignorum suorum; eumque coegerit propter hoc tribus carminum libris ex longo in-

tervallo quantum addere: post sermones vero quosdam lectos nullam sui mentionem habitam ita sit quæstus: Irasci me tibi scito, quod non in plerisque ejusmodi scriptis mecum potissimum loquaris. An vereris, ne apud posteros infame tibi sit, quod videaris familiaris nobis esse? Expressitque eclogam, cujus initium est:

*Quum tot sustineas et tanta negotia solus,
Res Italas armis tuteris, moribus ornes,
Legibus emendes: in publica commoda peccem,
Si longo sermone morer tua tempora, Caesar.*

Habitu corporis brevis fuit atque obesus, qualis et a semetipso in Satiris describitur, et ab Augusto hac epistola: Pertulit ad me Dionysius libellum tuum, quem ego, ne accusem brevitatem, quantuluscunque est, boni consulo. Vereri autem mihi videris, ne majores libelli tui sint, quam ipse es. Sed si tibi statura deest, corpusculum non deest. Itaque licebit in sextariolo scribas, ut circuitus voluminis tui sit ὀγκοδέστωρ, sicut est ventriculi tui.

Vixit plurimum in secessu ruris sui Sabini aut Tiburtini, domusque eius ostenditur circa Tiburni luculum. Venerunt in manus meas et elegi sub eius titulo, et epistola prosa oratione, quasi commendantis se Maecenati. Sed utraque falsa puto. Nam elegi vulgares, epistola autem obscura; quo vitio minime tenebatur. Natus est VI Idus Decembres, L. Cotta et L. Torquato

Coss. [anno U. C. 688]. Decessit V Kal. Decemb. C. Marcio Censorino et C. Asinio Gallo Coss. [U. C. 745] post septimum et quinquagesimum annum, herede Augusto palam nuncupato, quum urgente vi valetudinis non sufficeret ad obsignandas testamenti tabulas. Humatus et conditus est extremis Esquiliis juxta Maccenatis tumulum.

Q. HORATHI FLACCI
C A R M I N U M

LIBER PRIMUS.

CARMEN I.

AD MAECENATEM.

Alios aliis studiis, se poëseos unice delectari, in eoque genere Maecenatis iudicium plurimi aestimare ostendit.

Metrum Asclepiadeum primum, versum Asclepiadeum minorem usque repetens.

Maecenas, atavis edite regibus,
O et praesidium et dulce decus meum,
Sunt quos curriculo pulverem Olympicum
Collegisse juvat, metaque fervidis
Evitata rotis palmaque nobilis
Terrarum dominos evehit ad Deos;
Hunc, si mobilium turba Quiritium
Certat tergeminis tollere honoribus;
Illum, si proprio condidit horreo,
Quidquid de Libyeis verritur areis.
Gaudentem patrios findere sarculo
Agros, Attaliciis conditionibus
Nunquam demoveas, ut trabe Cypria
Myrtoum pavidus nauta secet mare.

5

10

Luctantem Icariis fluctibus Africum	15
Mercator metuens, otium et oppidi	
Laudat rura sui: mox reficit rates	
Quassas, indocilis pauperiem pati.	
Est qui nec veteris pocula Massici,	
Nec partem solido demere de die	20
Spernit, nunc viridi membra sub arbuto	
Stratus, nunc ad aquae lene caput sacrae.	
Multos castra iuvant, et lituo tubae	
Permixtus sonitus, bellaque matribus	
Detestata. Manet sub Jove frigido	25
Venator, tenerae coniugis immemor,	
Seu visa est catulis cerva fidelibus,	
Seu rupit teretes Marsus aper plagas.	
Me doctarum hederæ præmia frontium	
Dīs miscent superis; me gelidum nemus	30
Nympharumque leves cum Satyris chori	
Secernunt populo, si neque tibiae	
Euterpe cohibet, nec Polyhymnia	
Lesbourn refugit tendere barbiton.	
Quodsi me lyricis vatibus inseris,	35
Sublimi feriam sidera vertice.	

CARMEN II.

AD AUGUSTUM CAESAREM.

Varias calamitates Urbis et Orbis Romani insecutas post mortem Iulii Caesaris describens spem omnem restituendae salutis in Augusto repositam dicit.

Metrum Supplicum.

Jam satis terris nivis atque dirae
Grandinis misit Pater, et rubente

v. 17. Acidalius Gronovio, Benth. Both. probantibus coniecit *tuta pro rura*. Cf. Benth. et Both. Annotatt. — v. 29. *Me.* Hare, Wakef. Fea, F. A. Wolf (Analect. litt. I, 2. p. 262) alii *Te.* — v. 36. *Sublimis.* Fea.

- Dextera sacras iaculatus arces
Terruit urbem,
- Terruit gentes, grave ne rediret
Saeculum Pyrrhae, nova monstra questae,
Omne quum Proteus pecus egit altos
Visere montes,
- Piscium et summa genus haesit ulmo,
Nota quae sedes fuerat palumbis,
Et superiecto pavidae natarunt
Aequore damae.
- Vidimus flavum Tiberim, retortis
Litore Etrusco violenter undis,
Ire deiectum monumenta Regis
Templaque Vestae,
- Iliae dum se nimium querenti
Iactat ultorem, vagus et sinistra
Labitur ripa, Iove non probante, u-
xorius amnis.
- Audiet cives acuisse ferrum,
Quo graves Persae melius perirent;
Audiet pugnas vitio parentum
Rara iuventus.
- Quem vocet Divûm populus ruentis
Imperi rebus? prece qua fatigent
Virgines sanctae minus audientem
Carmina Vestam?
- Cui dabit partes scelus expiandi
Iupiter? Tandem venias, precamur,
Nube candentes humeros amictus
Augur Apollo;

II. v. 10. *palumbis* Ita Codd. Benth. et Valart. Vetus Scholiast. Edd. Sanad. Cuning. Fea. In reliquis *columbis*. Cf. Benth. et Fea. — v. 31. *candentes*. Fea e suis aliisque aliquot MSS. et veteribus Edd. *candenti*.

Sivè tu mavis, Erycina ridens,
 Quam Jocus circumvolat et Cupido;
 Sive neglectum genus et nepotes
 Respicias auctor 35

Heu! nimis longo satiate ludo,
 Quem juvat clamor galeaeque leves,
 Acer et Mauri peditis cruentum
 Vultus in hostem; 40

Sive mutata juvenem figura
 Ales in terris imitaris, almae
 Filius Maiae, patiens vocari
 Caesaris ultor:

Serus in coelum redeas, diuque
 Lactus intersis populo Quirini,
 Neve te nostris vitiis iniquum
 Ocior aura 45

Tollat. Hic magnos potius triumphos,
 Hic ames dici Pater atque Princeps,
 Neu sinas Medos equitare inultos,
 Te duce, Caesar. 50

CARMEN III.

AD VIRGILIUM.

Virgilio Athenas proficiscenti faustam navigationem precatur.

*Metrum Asclepiadeum secundum, in quo primus versus Glyconeus,
 alter choriambicus Asclepiadeus.*

Sic te Diva potens Cypri,
 Sic fratres Helenae, lucida sidera,
 Ventorumque regat pater,
 Obstrictis aliis praeter Iapyga,

v. 39. Ita tantum non omnes Codd. et Edd. vett. Sed recentiores plurimae *Marsi* ex coniectura Fabri Benthleio probata.

III. v. 4. *obstructis* Cod. Bersm. Cod. Vanderb.

Navis, quae tibi creditum	5
Debes Virgilium finibus Atticis;	
Reddas incolumen, precor,	
Et serves animae dimidium meae.	
Illi robur et aes triplex	
Circa pectus erat, qui fragilem truci	10
Commisit pelago ratem	
Primus, nec timuit praecipitem Africum	
Decertantem Aquilonibus,	
Nec tristes Hyadas, nec rabiem Noti,	
Quo non arbiter Hadriae	15
Major, tollere seu ponere vult freta.	
Quem Mortis timuit gradum,	
Qui siccis oculis monstra natantia,	
Qui vidit mare turgidum et	
Infames scopulos Acrocerania?	20
Nequidquam Deus abscidit	
Prudens Oceano dissociabili	
Terras, si tamen impiae	
Non tangenda rates transsiliunt vada.	
Audax omnia perpeti	25
Gens humana ruit per vetitum nefas.	
Audax Iapeti genus	
Ignem fraude mala gentibus intulit:	
Post ignem aetherea domo	
Subductum Macies et nova Febrium	30
Terris incubuit cohors;	
Semotique prius tarda Necessitas	
Leti corripuit gradum.	
Expertus vacuum Daedalus aëra	
Pennis non homini datis.	35
Perrupit Acheronta Herculeus labor.	

v. 8. *Ut pro et Fca e 2 Codd.* — v. 18. *rectis oculis* Benth. coni. Doering. *fixis ocul.* — v. 19. *turbidum* Codd. Bersm. alii, Benth. — v. 20. *alta Ceraunia* Baxter. e Codd. Lactantii, a quo hic locus laudatur. Cf. Benth. — v. 22. *dissociabilis* Benth. *dissociabiles* Fca. Cf. Mitscherl.

Nil mortalibus arduum est:

Coelum ipsum petimus stultitia, neque

Per nostrum patimur scelus

Iracunda Iovem ponere fulmina.

40

CARMEN IV.

AD L. SEXTIUM.

L. Sextium vere incunte ad carpenda gaudia hortatur.

*Metrum Archilochium quartum, compositum ex versu Archilochio
maiore et versu iambico trimetro catalecto.*

Solvitur acris hiems grata vice veris et Favonî,

Trahuntque siccas machinae carinas.

Ac neque jam stabulis gaudet pecus, aut arator igni;

Nec prata canis albicant pruinis.

Iam Cytherea choros ducit Venus, imminente Luna, 5

Iunctaeque Nymphis Gratiae decentes

Alterno terram quatunt pede; dum graves Cyclopum

Vulcanus ardens urit officinas.

Nunc decet aut viridi nitidum caput impedire myrto,

Aut flore, terrae quem ferunt solutae. 10

Nunc et in umbrosis Fauno decet immolare lucis,

Seu poscat agna, sive malit haedo. "

Pallida Mors aequo pulsat pede pauperum tabernas

Regumque turres. O beate Sexti,

Vitae summa brevis spem nos vetat inchoare longam. 15

Iam te premet nox, fabulaeque Manes,

Et domus exilis Plutonia: quo simul mearis,

Nec regna vini sortiere talis,

Nec tenerum Lycidan mirabere, quo calet juvenus

Nunc omnis, et mox virgines tepebunt. 20

IV. v. 8. *visit off.* Rutgers. e MSS. Bersm. item Benth. e Codd. et 5. Codd. Vanderb. — v. 12. *agnam - haedum.* Fea e Codd. suis, aliisque. — v. 19. Emendavit Benth. e Codicibus *Lycidan*, cum priores Edd. ferrent *Lycidam*.

CARMEN V.

AD PYRRHAM.

Miseros esse, qui illius amore infido teneantur; se ex eo
tanquam naufragio enatasse.

Metrum Asclepiadeum quartum. Duo priores versus sunt Asclepiadei minores, tertius Pherecraticus, quartus Glyconeus.

Quis multa gracilis te puer in rosa

Perfusus liquidis urget odoribus

Grato, Pyrrha, sub antro?

Cui flavam religas comam

Simplex munditiis? Heu! quoties fidem

5

Mutatosque Deos flebit, et aspera

Nigris aequora ventis

Emirabitur insolens,

Qui nunc te fruitur credulus aurea;

Qui semper vacuum, semper amabilem

10

Sperat, nescius aurae

Fallacis. Miseri, quibus

Intentata nites! Me tabula sacer

Votiva paries indicat uvida

Suspendisse potenti

15

Vestimenta maris Deo.

CARMEN VI.
AD AGRIPPAM.

Se iocosis versibus natum, bellicis virtutibus celebrandis minime parem esse.

Metrum Asclepiadeum tertium, constans ternis versibus Asclepiadeis minoribus cum Glyconeo.

Scriberis Vario fortis et hostium
Victor, Maeonii carminis aliti,
Quam rem cunque ferox navibus aut equis
Miles te duce gesserit.

Nos, Agrippa, neque haec dicere, nec gravem 5
Pelidae stomachum cedere nescii,
Nec cursus duplicis per mare Ulixei,
Nec saevam Pelopis domum

Conamur, tenues grandia: dum pudor 10
Imbellisque lyrae Musa potens vetat
Laudes egregii Caesaris et tuas
Culpa deterere ingenti.

Quis Martem tunica tectum adamantina
Digne scripserit? aut pulvere Troico
Nigrum Merionen? aut ope Palladis 15
Tydiden Superis parem?

Nos convivia, nos proelia virginum
Sectis in iuvenes unguibus acrium
Cantamus, vacui, sive quid urimur, 20
Non praeter solitum leves.

VI. v. 2. vulgo *alite*, recentiores tamen Edd. fere omnes *aliti*; Passeratio et Lambino auctoribus. Cf. Gesner. et Jahn. — v. 7. Veteres quique codices *duplicis* habent, recentiores plerique cum Ed. pr. *duplices*. Cf. Benth. — v. 14. *Troïo* coni. Heinsius ad Ovid. Her. 1, 28. idque adsciverunt Jani, Mitscherl. Fea alii. — v. 18. *Strictis* pro *sectis* coni. Benth. assumpsit Doering. Cf. Jahn.

CARMEN VII.

AD MUNATIUM PLANCUM.

Munatium Plancum, postquam Augusti gratia excidisset, prae animi moerore voluntarium exilium minitanti a consilio revocare conatur, laudato Tibure prae omnibus Graeciae civitatibus.

Metrum Alcmanium, in quo hexametrum heroicum subsequitur dactylicus versus tetrameter catalectus.

Laudabunt alii claram Rhodon, aut Mitylenen,
 Aut Epheson, bimarisque Corinthi
 Moenia, vel Baccho Thebas, vel Apolline Delphos
 Insignes, aut Thessala Tempe.
 Sunt quibus unum opus est, intactae Palladis arces 5
 Carmine perpetuo celebrare,
 Undique decerptam fronti praeponere olivam.
 Plurimus in Iunonis honorem
 Aptum dicit equis Argos ditiesque Mycenae.
 Me nec tam patiens Laedaemon 10
 Nec tam Larissae percussit campus opimae,
 Quam domus Albuniae resonantis,
 Et praeceps Anio, ac Tiburni lucus, et uda
 Mobilibus pomaria rivis.
 Albus ut obscuro deterget nubila coelo 15
 Saepe Notus, neque parturit imbres
 Perpetuos: sic tu sapiens finire memento
 Tristitiam vitaeque labores
 Molli, Plance, mero, seu te fulgentia signis
 Castra tenent, seu densa tenebit 20

VII, v. 5. *arces*. Ita Benth. quem vide, dedit e Codd. aliquot Lambini et suo Reginensi, quibus accedunt Vandy. 2. *arcem* Cod. Bersm. *urbem* plerique Codd. et Edd. Cf. Fea. — v. 7. Erasmus, Lambin. alii invitis Codicibus *decerptae frondi*. Schrader. coni. *Indeque*, recepit Mitsch. Döring. Cf. Benth. — v. 9. *dicet* magnus Codd. numerus; recepit Benth. quem V.

Tiburis umbra tui. Teucer Salamina patremque
 Quum fugeret, tamen uda Lyaeo
 Tempora populea fertur vinxisse corona,
 Sic tristes affatus amicos:
 Quo nos cunque feret melior Fortuna parente, 25
 Ibinus, o socii comitesque.
 Nil desperandum Teucro duce et auspice Teucro;
 Certus enim promisit Apollo,
 Ambiguam tellure nova Salamina futuram.
 O fortes, pejoraque passi 30
 Mecum saepe viri, nunc vino pellite curas:
 Cras ingens iterabimus aequor.

CARMEN VIII.

AD LYDIAM.

Monet eam, ne Sybarin adolescentem amore suo pēnitus perdat.

Metrum Sapphicum maius. Habet versum Aristophanicum sive Choriambicum dimetrum catalecticum in amphibrachyn aut bacchiam; et Sapphicum versum maiorem, qui constat ex epitrīto secundo, duobus choriambis et bacchio.

Lydia dic, per omnes
 Te Deos oro, Sybarin cur properes amando
 Perdere; cur apricum
 Oderit campum, patiens pulveris atque solis.
 Cur neque militaris 5
 Inter aequales equitat, Gallica nec lupatis
 Temperat ora frenis?
 Cur timet flavum Tiberim tangere? cur olivum.

v. 27. *auspice Teuceri* quidam Codd. Lamb. Benth. Jan. Feae, qui in textum recepit. Cf. Benth. et Jahn. — Ceterum inde a vers. 15. plures Codd. novum carmen ordiuntur. Cf. Bothe.

VIII, v. 2. *Hoc deos* Cod. Gotting. Graev. Vandd. tres. — *properes* Cod. Graev. et Vandd. fere omnes, Edd. Venet. Lamb. Benth. Cf. Both. — v. 5. *militares* duo Codd. Bersin.

Sanguine viperino

Cautius vitat; neque jam livida gestat armis

10

Brachia, saepe disco.

Saepe trans finem jaculo nobilis expedito?

Quid latet, ut marinae

Filium dicunt Thetidis sub lacrimosa Trojae

15

Funera, ne virilis

Cultus in caedem et Lycias proriperet catervas?

CARMEN IX.

AD THALIARCHUM.

Hortatur ad hiemem hilare transigendam.

Metrum Alcicum. Duo priores versus sunt Alcaici, qui constant e penthemimeri iambici et duobus dactylis; tertius dimeter iambicus hypercatalecticus; quartus Pindaricus dactylicus e duobus dactylis et duobus trochaeis constans.

Vides, ut alta stet nive candidum

Soracte, nec jam sustineant onus

Silvae laborantes, geluque

Flumina constiterint acuto:

Dissolve frigus, ligna super foco

5

Large reponens, atque benignius

Deprome quadrimum Sabina,

O Thaliarche, merum diota.

Pernitte Divis cetera, qui simul

Sravere ventos aequore fervido

10

Deproeliantes, nec eupressi

Nec veteres agitantur orni.

Quid sit futurum cras, fuge quaerere, et

Quem Fors dierum cunque dabit, lucro

Appone, nec dulces amores

15

Sperne puer, neque tu choreas,

Donec virenti canities abest

Morosa. Nunc et Campus et áreae,

Lenesque sub noctem susurri

Composita repetantur hora;

20

Nunc et latentis proditor intimo

Gratus puellae risus ab angulo,

Pignusque dereptum lacertis

Aut digito male pertinaci.

CARMEN X.

AD MERCURIUM.

Mercurio, deo suo tutelari (Od. II, 17, 29.) ex imitatione
Alcaei hymnum canit.

Metrum Sapphicum.

Mercuri, facunde nepos Atlantis,

Qui feros cultus hominum recentum

Voce formasti catus, et decorae

More palaestrae,

Te canam, magni Iovis et Deorum

5

Nuntium, curvaeque lyrae parentem;

Callidum, quidquid placuit, jocosum

Condere furto.

Te, boves olim nisi reddidisses

Per dolum amotas, puerum minaci

10

Voce dum terret, viduus pharetra

Risit Apollo.

Quin et Atridas, duce te, superbos,
 Illo dives Priamus relicto,
 Thessalosque ignes et iniqua Troiae
 Castra fefellit.

15

Tu pias lactis animas reponis
 Sedibus, virgaque levem coërees
 Aurea turbam, superis Deorum
 Gratus et imis.

20

CARMEN XI.

AD LEUCONOEN.

Ab artibus eam divinatoriis deterret, monetque ut laete vivat.

*Metrum Asclepiadeum maius, constans spondeo, tribus choriambis
 et iambo vel pyrrhuchio.*

Tu ne quaesieris, scire nefas, quem mihi, quem tibi
 Finem Dì dederint, Leuconoë; nec Babylonios
 Tentaris numeros. Ut melius, quidquid erit, pati!
 Seu plures hiemes, seu tribuit Iupiter ultimam,
 Quae nunc oppositis debilitat pumicibus mare 5
 Tyrrhenum. Sapias, vina liques, et spatio brevi
 Spem longam reseces. Dum loquimur, fugerit invida
 Aetas. Carpe diem, quam minimum credula postero.

CARMEN XII.

AD AUGUSTUM.

Splendidissimo carmine Caesaris Augusti laudes celebrat.

Metrum Sapphicum.

Quem virum aut heroa lyra vel acri
 Tibia sumis celebrare, Clio?

- Quem Deum? cuius recinet jocosa
 Nomen imago,
 Aut in umbrosis Heliconis oris, 5
 Aut super Pindo, gelidove in Haemo?
 Unde vocalem temere insecutae
 Orphea silvae,
 Arte materna rapidos morantem
 Fluminum lapsus celeresque ventos, 10
 Blandum et auritas fidibus canoris
 Ducere querens.
 Quid prius dicam solitis Parentis
 Laudibus? qui res hominum ac Deorum,
 Qui mare ac terras, variisque mundum 15
 Temperat horis;
 Unde nil maius generatur ipso,
 Nec viget quidquam simile aut secundum;
 Proximos illi tamen occupavit
 Pallas honores. 20
 Procliis audax, neque te silebo,
 Liber, et saevis inimica Virgo
 Belluis, nec te, metuende certa?
 Phoebe sagitta.
 Dicam et Alciden, puerosque Ledaë, 25
 Hunc equis, illum superare pugnis
 Nobilem; quorum simul alba nautis
 Stella refulsit,

v. 3. *recinit* Gotting. plerique Codd. Feae, aliquot Vand. et Edd. vett. — v. 13. Ita Bentl. e Codd. optimae notae. Sed plerique Codd. habent *parentum*. Cod. Palmanni *parentem*, eamque lectionem recepit Fea transposito interrogationis signo inter *prius* et *dicam* Cf. Jahn. — v. 14. Codd. quidam Lambin. *rex hominum* Cf. Bentl. — v. 15. *terram* Cod. Vand. — v. 19. *occupabit* coni. Pateani, ab Heinsio aliis, in quibus et Fea recepta. Cf. Bentl. — v. 28. *refulget* Fea e Cod. Eiusdem duo Codd. et quaedam Edd. vett. *Sidera fulgent*.

Defluit saxis agitatus humor,
 Concidunt venti, fugiuntque nubes,
 Et minax, di sic voluere, ponto
 Unda recumbit. 30

Romulum post hos prius, an-quietum
 Pompili regnum memorem, an superbos
 Tarquinî fascēs, dubito, an Catonis
 Nobile letum. 35

Regulum, et Scauros, animaeque magnae
 Prodigum Paullum, superante Poeno,
 Gratus insigni referam Camēna,
 Fabriciumque. 40

Hunc, et incomitis Curium capillis,
 Utilem bello tulit, et Camillum,
 Saeva paupertas et avitus apto
 Cum lare fundus.

Crescit, occulto velut arbor aevo,
 Fama Marcelli; micat inter omnes
 Julium sidus, velut inter ignes
 Luna minores. 45

Gentis humanae pater atque custos,
 Orte Saturno, tibi cura magni
 Caesaris fatis data; tu secundo
 Caesare regnes. 50

Ille, seu Parthos Latio imminantes
 Egerit justo domitos triumpho,
 Sive subiectos Orientis orae
 Seras et Indos, 55

Te minor latum reget aequus orbem;
 Tu gravi curru quaties Olympum,

v. 31. Ita Fea ex uno suorum Codd. et Cod. Laurentiano
 Torrentii. Bentleius dedit sic *Di vol.* Reliqui Codd. et Edd. has
 lectiones sequuntur: *quā sic, quod sic, nam sic voluere.* —
 v. 35. Benth. pro *an Catonis* coniecit *ante Carti.* Cf. Jahn. —
 v. 57. Codd. plures Lamb. Pulm. Benth. Feac, alii *laetum.* Cf.
 Benth. et Bothius.

Tu parum castis inimica mittes
Fulmina lucis.

60

CARMEN XIII.

A D L Y D I A M.

Poeta dolet sibi Telephum anteponi.

Metrum Carm. 2.

Quum tu, Lydia, Telephi
Cervicem roseam, cerea Telephi
Laudas brachia, vae, meum
Fervens difficili bile tumet iecur.
Tum nec mens mihi nec color
Certa sede manet, humor et in genas
Furtim labitur, arguens
Quam lentis penitus macerer ignibus.
Uror, seu tibi candidos
Turparunt humeros immodicae mero
Rixae, sive puer furens
Impressit memorem dente labris notam.
Non, si me satis audias,
Speres perpetuum, dulcia barbare
Laedentem oscula, quae Venus
Quinta parte sui nectaris imbuit.
Felices ter et amplius,
Quos irrupta tenet copula, nec malis
Divulsus querimoniis
Suprema citius solvet amor die.

5

10

15

20

XIII, v. 2. Vetus Grammaticus Flavius Caper hunc versum laudans legit *lactea* pro *cerea*, idque recepit Benth. — v. 6. *manet* Benth. reposuit e Codd. aliquot Lambini et Pulmanni, quibuscum consentiunt Gotting. alii et Ed. Veneta antiqua; sed plurimi libri *manent*. Cf. Both.

CARMEN XIV.

AD REMPUBLICAM.

Sub imagine navis monet eam, ne nova adeat bellorum civilium pericula.

Metrum Carm. 5.

O navis, referent in mare te novi
 Fluctus? O quid agis? fortiter occupa
 Portum. Nonne vides, ut
 Nudum remigio latus,
 Et malus celeri saucius Africo 5
 Antennaeque gemant? ac sine funibus
 Vix durare carinae
 Possint imperiosius
 Aequor? Non tibi sunt integra lintea,
 Non Dî, quos iterum pressa voces malo, 10
 Quamvis Pontica pinus,
 Silvæ filia nobilis,
 Jactes et genus et nomen inutile.
 Nil pictis timidus navita puppibus
 Fidit. Tu, nisi ventis 15
 Debes ludibrium, cave.
 Nuper sollicitum quae mihi taedium,
 Nunc desiderium curaque non levis,
 Interfusa nitentes
 Vites aequora Cycladas. 20

XIV, v. 1. *referunt* libri aliquot, idque praetulit Both. quem Cf. in Annotatt. et Jahn. ad h. l. — v. 6. *gemunt*, et mox *possunt* Codd. Benth. Feae et Servius. Cf. Jahn. Reliqui fere omnes *gemant*, *possint*. — v. 6. *Iam sine fun.* Fea et Both. ex Edd. vet.

CARMEN XV.

NEREI VATICINIUM DE EXCIDIO TROJAE.

Metrum Carm. 6.

Pastor quum traheret per freta navibus
 Idacis Helenen perfidus hospitam,
 Ingrato celeres obruit otio
 Ventos, ut caneret fera
 Nereus fata: Mala ducis avi domum, 5
 Quam multo repetet Graecia milite,
 Conjurata tuas rumpere nuptias
 Et regnum Priami velus.
 Heu, heu, quantus equis, quantus adest viris
 Sudor! quanta moves funera Dardanae 10
 Genti! Jam galeam Pallas et aegida
 Curusque et rabiem parat.
 Nequidquam, Veneris praesidio ferox,
 Pectus caesariem, grataque feminis
 Imbelli cithara carmina divides, 15
 Nequidquam thalamo graves
 Hastas, et calami spicula Gnosii
 Vitabis, strepitumque, et celerem sequi
 Aiacem: tamen, heu, serus adulteros
 Cultus pulvere collines 20
 Non Laërliaden, exitium tuae
 Gentis, non Pylum Nestora respicis?
 Urgent impavidi te Salaminii
 Teucer, te Sthenelus sciens

XV, v. 2. *Helenen* dant aliquot libri Cruq. Vand. etc. Vulgo *He-*
lenam. Cf. Both. Annotatt. — v. 9. Ita plurimi Codd. Feae, alii-
 que. Vulgo *Eheu*. Cf. Both. Annotatt. — v. 20. *Cultus* plurimi et
 meliores Codd. Feae, aliorum. Vulgo *crines*. Cf. Fea. Vett. Edd.
vultus. — v. 22. *Genti* Codd. quidam Lamb. Benth. Feae. Cf.
 Benth. — v. 24. *Teucerque et Sthen.* Benth. quem V: e Cod. —

Pugnae, sive opus est imperitare equis, 25
 Non auriga piger: Merionen quoque
 Nosces. Ecce fuit te reperire atrox
 Tydides, melior patre;
 Quem tu, cervus uti vallis in altera
 Visum parte lupum graminis immemor, 30
 Sublimi fugies mollis anhelitu;
 Non hoc pollicitus tuae.
 Iracunda diem proferet Ilio
 Matronisque Phrygum classis Achillei;
 Post certas hiemes uret Achaïus 35
 Ignis Pergameas domos.

CARMEN XVI.

PALINODIA AD AMICAM.

Metrum Alcaicum.

O matre pulchra filia pulchrior,
 Quem criminosis cunque voles modum
 Pones iambis: sive flamma
 Sive mari libet Hadriano.
 Non Dindymene, non adytis quatit 5
 Mentem sacerdotum incola Pythius,
 Non Liber aequae, non acuta
 Si geminant Corybantes aera,
 Tristes ut irae: quas neque Noricus
 Deterret ensis, nec mare naufragum, 10
 Nec saevus ignis, nec tremendo
 Iupiter ipse ruens tumultu.
 Fertur Prometheus, addere principi
 Limo coactus particulam undique

v. 35. *Achivius* Codd. Fæae, quem Cf. Alii Achaicus. — v. 36.
 Ita Codd. Glarean. et Pulm. antiquissimi. Vulgaris lectio *Ilivus*
 adversante metro.

XVI, v. 8. *Si*. Emendavit Benth. Codd. omnes et vett. Edd. *Sic*.

Descetam, et insani leonis	15
Vim stomacho apposuisse nostro.	
Irac Thyesten exitio gravi	
Stravere, et altis urbibus ultimae	
Stetere causae, cur perirent	
Funditus, imprimeretque muris	20
Hostile aratrum exercitus insolens.	
Compesce mentem: me quoque pectoris	
Tentavit in dulci iuventa	
Fervor, et in celeres iambos	
Misit furem; nunc ego mitibus	25
Mutare quaero tristia, dum mihi	
Fias recantatis amica	
Opprobriis, animumque reddas.	

CARMEN XVII.

AD TYNDARIDEM.

Invitat eam ad villam suam in Sabinis, quam elegantissime describit.

Metrum Alcaicum.

Velox amoenum saepe Lucretilem	
Mutat Lycae Faunus, et igneam	
Defendit aestatem capellis	
Usque meis pluviosque ventos.	
Impune tutum per nemus arbutos	5
Quaerunt latentes et thyma deviae	
Olentis uxores mariti;	
Nec virides metuunt colubras,	
Nec martiales haeduleae lupos.	
Utcunque dulci, Tyndari, fistula	10

XVII, v. 5. *totum* Bentl. c Codd. quibusdam Lamb. Sed Vid. Jahn. — v. 9. Codd. *hocdilia* vel *haediliae*. Emendavit *haeduleae* Bentl. quem Vid.

Valles et Usticae cubantis
 Laevia personuere saxa.
 Dì me tuentur: Dis pietas mea
 Et Musa cordi est. Hic tibi copia
 Manabit ad plenum benigno
 Ruris honorum opulenta cornu. 15
 Hic in reducta valle Caniculae
 Vitabis aestus, et fide Teïa
 Dices laborantes in uno
 Penelopen vitreamque Circeen. 20
 Hic innocentis pocula Lesbii
 Duces sub umbra, nec Semeleïus
 Cum Marte confundet Thyoneus
 Proelia, nec metues protervum
 Suspecta Cyrum, ne male dispari 25
 Incontinentes iniiciat manus,
 Et scindat haerentem coronam
 Crinibus, immeritamque vestem.

CARMEN XVIII.

A D V A R U M.

Moderatum vini usum commendat.

Metrum Carm. 11.

Nullam, Vare, sacra vite prius severis arborem
 Circa mite solum Tiburis et moenia Catili.
 Siccis omnia nam dura Deus proposuit, neque
 Mordaces aliter diffugiunt sollicitudines.
 Quis post vina gravem militiam aut pauperiem crepat? 5
 Quis non te potius, Bacche pater, teque, decens Venus?

v. 14. *hic* Ed. Loscheri. Lectio vulgaris: *hinc*. Vid. Benth. qui recepit *hic*, et Both. in vulgari lectione acquiescens.

XVIII, v. 5. *increpat* Novem Codd. Vanderb. alique.

At ne quis modici transsiliat munera Liberi,
 Centanrea monet cum Lapithis rixa super mero
 Debellata; monet Sithoniis non levis Evius,
 Quum fas atque nefas exiguo fine libidinum- 10
 Discernunt avidi. Non ego te, candide Bassareu,
 Invitum quatiā, nec variis obsita frōndibus
 Sub divum rapiam. Saeva tene cum Berecynthio
 Cornu tympana, quae subsequitur caccus Amor sui,
 Et tollens vacuum plus nimio Gloria verticem, 15
 Arcanique Fides prodiga, perlucidior vitro.

CARMEN XIX.

DE GLYCERA.

Se eius amore denuo incendi.

Metrum Carm. 3.

Mater saeva Cupidinum,
 Thebanaeque iubet me Semeles puer,
 Et lasciva Licentia
 Finitis animum reddere amoribus.
 Urit me Glycerae nitor 5
 Splendentis Pario marmore purius;
 Urit grata protervitas,
 Et vultus nimium lubricus adspici.
 In me tota ruens Venus
 Cyprum deseruit; nec patitur Seythas, 10
 Et versis animosum equis
 Parthum dicere, nec quae nihil attinent.

v. 7. *ac ne quis* plures Codd. Benth. et Vand. V. Benth. —
 v. 13. *dium* Ed. Glareani. — v. 15. *extollens* pro *et toll.* Cod.
 Graev. Coll. Sax. *sui et Adtollens* Cuning. et Ed. Glar.

XIX, v. 2. *iubent* Codd. aliquot Benth. Cf. supra ad I, 13, 6. et
 Benth. ad Od. I, 24, 8. — v. 12. *attinet* Cod. Brod. et Bland.

Hic vivum mihi cespitem, hic
 Verbenas, pueri, ponite, thuraque
 Bimi cum patera meri:
 Mactata veniet lenior hostia.

15

CARMEN XX.

AD MAECENATEM.

Invitat Maecenatem ad convivium.

Metrum Carm. 2.

Vile potabis modicis Sabinum
 Cantharis, Graeca quod ego ipse testa
 Conditum levi, datus in theatro
 Quum tibi plausus,

Care Maecenas eques, ut paterni
 Fluminis ripae, simul et jocosa
 Redderet laudes tibi Vaticani
 Montis imago.

5

Caecubam et prelo domitam Caleno
 Tu bibes uvam: mea nec Falernae
 Temperant vites, neque Formiani
 Pocula colles.

10

v. 14. Vulgaris scriptio *turaque*. Sed V. Fea.

XX, v. 5. *Clare* Bentl. e Codd. quem Cf. et Feam. — v. 9. Ita Codd. Lambin. Alii *Caecubum*. Ante hunc vers. Bothius interrogationis signo orationem interpungit.

CARMEN XXI.

HYMNUS IN DIANAM ET APOLLINEM.

Metrum Carm. 5.

Dianam tenerae dicite virgines;
 Intonsum, pueri, dicite Cynthium,
 Latonamque supremo
 Dilectam penitus Iovi.

Vos laetam fluviiis et nemorum coma,
 Quaecunque aut gelido prominet Alcido,
 Nigris aut Erymanthi
 Silvis, aut viridis Cragi;

Vos Tempe totidem tollite laudibus,
 Natalemque, mares, Delon Apollinis,
 Insignemque pharetra
 Fraternaue humerum lyra.

Hic bellum lacrimosum, hic miseram famem
 Pestemque, a populo et principe Caesare, in
 Persas atque Britannos
 Vestra motus aget prece.

XXI, v. 5. *comam* quatuor Codd. Blandin. Cod. Graev. Gotting. Vand. idque praetulit Bentl. quem V. — v. 13. *haec bellum* coniecit Bentleius, eamque lectionem aliquot Edd. receperunt. Sed Cf. Fea. — v. 14. Ita omnes fere Codd. Edd. vett. *Populo principe* sine et pauci Codd. ac Edd. recentiores. Cf. Both. Annotatt.

CARMEN XXII.

AD ARISTIUM FUSCUM.

Nihil timendum esse viro innocenti suo exemplo in magno discrimine nuper mirifice servatus ostendit.

Metrum Sapphicum.

Integer vitae scelerisque purus
Non eget Mauris iaculis, neque arcu,
Nec venenatis gravida sagittis,
Fusce, pharetra;

5

Sive per Syrtes iter aestuosas,
Sive facturus per inhospitalem
Caucasum, vel quae loca fabulosus
Lambit Hydaspes.

Namque me silva lupus in Sabina,
Dum meam canto Lalagen, et ultra
Terminum curis vagor expeditis,
Fugit inermen;

10

Quale portentum neque militaris
Daunias latis alit aesculetis,
Nec Iubae tellus generat, leonum
Arida nutrix.

15

Pone me, pigris ubi nulla campis
Arbor aestiva recreatur aura;
Quod latus mundi nebulae malusque
Iupiter urget:

20

Pone sub curru nimium propinqui
Solis, in terra domibus negata:
Dulce ridentem Lalagen amabo,
Dulce loquentem.

XXII, v. 2. *Mauris* omnes fere Codd. et vett. Edd. Al. *Mauri*. V. Benth. — v. 11. *expeditus* multi Codd. inter quos plures Feae et Vand. et Edd. vett. idque praetulit Benth. quem V. coll. Doering. — v. 14. *Daunias* omnes fere libri MSS. et Edd. vett. *Aliae* Edd. inde a Stephan. *Daunia in.* V. Benth.

CARMEN XXIII.

A D C H L O Æ N.

Ab amore adhuc abhorrentem delinire studet.

Metrum Carm. 5.

Vitas hinuleo me similis, Chloë,
 Quaerenti pavidam montibus aviis
 Matrem, non sine vano
 Aurarum et silvae metu;

Nam seu mobilibus veris inhorruit
 Adventus foliis, seu virides rubum
 Dimovere lacertae,
 Et corde et genibus tremit,

Atqui non ego te, tigris ut aspera
 Gactulusve leo, frangere persequor:
 Tandem desine matrem
 Tempestiva sequi viro.

5

10

CARMEN XXIV.

A D V I R G I L I U M.

Monet, ut Quinctilii mortem aequo animo ferat.

Metrum Carm. 6.

Quis desiderio sit pudor aut modus
 Tum cari capitis? Praecipe lugubres
 Cantus, Melpomene, cui liquidam Pater
 Vocem cum cithara dedit.

XXIII, v. 5. Muretus c Codd. *vitis inhorruit Ad ventum*. Inde coniecit Bentl. *repris inhorruit Ad ventum*. Tuetur hanc lectionem Doeringius, plurimi reiiciunt.

Ergo Quinctilium perpetuus sopor 5
 Urget! cui Pudor, et Iustitiae soror,
 Incorrupta Fides, nudaque Veritas
 Quando ullum inveniet parem?
 Multis ille bonis flebilis occidit;
 Nulli flebilior, quam tibi, Virgili, 10
 Tu frustra pius, heu, non ita creditum
 Poscis Quinctilium Deos.
 Quod si Threïcio blandius Orphea
 Auditam moderere arboribus fidem,
 Non vanae redeat sanguis imagini, 15
 Quam virga semel horrida,
 Non lenis precibus fata recludere,
 Nigro compulerit Mercurius gregi.
 Durum! Sed levius fit patientia,
 Quidquid corrigere est nefas. 20

CARMEN XXV.

A D L Y D I A M.

Insultat ei, quod olim arrogans, iam vetula, merito ab amatoribus spernatur.

Metrum Carm. 2.

Parcius iunctas quatiunt fenestras
 Ictibus crebris iuvenes protervi,
 Nec tibi somnos adimunt, amatque
 Ianua limen,
 Quae prius multum facilis movebat 5
 Cardines. Audis minus et minus iam:
 Me tuo longas pereunte noctes,
 Lydia, dormis!

XXIV, v. 8. Ita Bentleius, quem Vid. ex plus 10. Codd. et Edd. vet. Lectio vulgata est *invenient*. Cf. Both.

XXV, v. 1. *vinctas* pro *iunctas* Codd. Bentl. quem V.

Invicem moechos anus arrogantes
 Flebis in solo levis angiportu, 10
 Threcio bacchante magis sub inter-
 lunia vento;

Quum tibi flagrans amor, et libido,
 Quae solet matres furiare equorum,
 Saeviet circa jecur ulcerosum; 15
 Non sine questu

Laeta quod pubes edera virenti
 Gaudeat pulla magis atque myrto,
 Aridas frondes Hiemis sodali
 Dedicet Hebro. 20

CARMEN XXVI.

DE AELIO LAMIA.

Omni cura solutus, ut poëta, Lamiam Musae celebrandum
 commendat.

Metrum Carm. 9.

Musis amicus, tristitiam et metus
 Tradam protervis in mare Creticum
 Portare ventis, quis sub Arcto
 Rex gelidae metuatur orae,

Quid Tiridaten terreat, unice 5
 Securus. O, quae fontibus integris
 Gaudes, apricos necte flores,
 Necte meo Lamiae coronam,

v. 20. Pro *Hebro* sive *Ebro* quae lectio est codicum, multae
 Edd. e Bentlei sententia *Euro*. Vid. Bentr. et Fea.

XXVI, v. 3. *qui sub* Cod. Bentr. — v. 5. Ita Bentr. Lectio
 vulg. *Tiridatem*. Quidam Codd. Lambin. *Mithridatem*.

Pimplei dulcis: nil sine te mei
Possunt honores; hunc fidibus novis, 10
Hunc Lesbio sacrare plectro,
Teque tuasque decet sorores.

CARMEN XXVII.

A D S O D A L E S.

Carmen convivale, quo sodales a rixis et tumultu revocat.

Metrum Carm. 9.

Natis in usum laetitiae scyphis
Pugnare Thracum est: tollite barbarum
Morem, verecundumque Bacehum
Sanguineis prohibete rixis.
Vino et lucernis Medus acinaces 5
Immane quantum discrepat! impium
Lenite clamorem, sodales,
Et cubito remanete presso.
Vultis severi me quoque sumere
Partem Falerni? dicat Opuntiae 10
Fratr Megillae, quo beatus
Vulnere, qua pereat sagitta.
Cessat voluntas? non alia bibam
Mercede. Quae te cunque domat Venus,
Non erubescendis adurit 15
Ignibus, ingenuoque semper
Amore peceas. Quidquid habes, age,
Depone tutis auribus. — Ah miser,

v. 9. Emendavit Bentr. quem V. Codicem enim *Pimplea* aut *Piplea*. — v. 10. Ita Bentr. e codd. aliquot; plerique tamen *prosunt*.

XXVII, v. 1. Cod. Vand. *nactis in*, quem V. coll. Bothio in Annot.

Quanta laborabas Charybdi,
Digne puer meliore flamma!

20

Quae saga, quis te solvere Thessalis
Magus venenis, quis poterit Deus?

Vix illigatum te triformi
Pegasus expediet Chimaera.

CARMEN XXVIII.

ARCHYTAS ET NAUTA.

Inter Archytæ umbram et nautam dialogismus, quo vanitas studiorum humanorum contra fortunam et mortem significatur.

Metrum Carm. 7.

Nauta.

Te maris et terrae numeroque carentis arenae
Mensorem cohibent, Archyta,
Pulveris exigui prope litus parva Matinum
Munera, nec quidquam tibi prodest
Aërias tentasse domos, animoque rotundum
Percurrisse polum, morituro.

5

Archytæ umbra.

Occidit et Pelopis genitor, conviva Deorum,
Tithonusque remotus in auras,
Et Iovis arcanis Minos admissus, habentque
Tartara Panthoiden, iterum Oreo
Demissum; quamvis clypeo Troiana refixo
Tempora testatus, nihil ultra
Nervos atque cutem Morti concesserat atrae;
Iudice te non sordidus auctor
Naturæ verique. Sed omnes una manet nox,
Et calcanda semel via leti.

10

15

v. 19. *laboras* Codd. Benth. alii et Edd. primæ; *laboras in* Edd. Ven. Lambin. Benth. quem Vid. et Doering.

Dant alios Furiae torvo spectacula Marti,
 Exitio est avidum mare nautis:
 Mixta senum ac juvenum densentur funera, nullum
 Saeva caput Proserpina fugit. 20
 Me quoque devexi rapidus comes Orionis
 Illyricis Notus obruit undis.
 At tu, nauta, vagae ne parce malignus arenae
 Ossibus et capiti inhumato
 Particulam dare: sic, quodcunque minabitur Eurus 25
 Fluctibus Hesperiiis, Venusinae
 Plectantur sylvae, te sospite, multaque merces,
 Unde potest, tibi defluat aequo
 Ab Iove, Neptunoque sacri custode Tarenti.
 Negligis immeritis nocituram 30
 Postmodo te natis fraudem committere? Fors et
 Debita iura vicesque superbae
 Te maneant ipsum: precibus non linquar inultis;
 Teque piacula nulla solvent.
 Quamquam festinas, non est mora longa, licebit 35
 Iniecto ter pulvere curras.

CARMEN XXIX.

AD ICCIUM.

Facete carpit Iccium, qui studio philosophiae, quod ambitiose ante affectaverat, repente abiecto, militare instituerat spe lucri.

Metrum Carm. 9.

Icci, beatis nunc Arabum invides
 Gazis, et aerem militiam paras
 Non ante devietis Sabaeae
 Regibus, horribilique Medo

XXVIII, v. 18. *avidum* Cod. Benth. multique alii, quos enumerat Fea. Olim vulgo *avidis*. Vid. Benth. et Jabn. — v. 19. Ita plurimi iique optimi Codd. Sed olim in plerisque Edd. *densantur*. Vid. Benth. et Fea. — v. 31. Codd. Vand. alii *forsan*, et mox Cod. Benth. *superbe*.

- Nectis catenas? Quae tibi virginum,
 Sponso necato, barbara serviet? 5
 Puer quis ex aula capillis
 Ad cyathum statuatur unctis,
 Doctus sagittas tendere Sericas
 Arcu paterno? quis neget arduis 10
 Pronos relabi posse rivos
 Montibus, et Tiberim reverti,
 Quum tu coëmtos undique nobiles
 Libros Panaeti, Socraticam et domum,
 Mutare loriceis Iberis, 15
 Pollicitus meliora, tendis?

CARMEN XXX.

A D V E N E R E M.

Rogat eam, ut domestico Glycerae sacrificio intersit.

Metrum Carm. 2.

- O Venus, regina Cnidi Paphique,
 Sperne dilectam Cypron, et vocantis
 Thure te multo Glycerae decoram
 Transfer in aedem.
 Fervidus tecum Puer, et solutis 5
 Gratiae zonis, properentque Nymphae,
 Et parum comis sine te Iuventas,
 Mercuriusque.

XXX, v. 1. *Cnidi* Codd. Graev. Vand. alii. Vulgo *Gnidi*. Cf. Fea.

CARMEN XXXI.

AD APOLLINEM.

Preces ad Apollinem, quibus poëta nil praeter mentem sanam in corpore sano sibi exoptat.

Metrum Carm. 9.

Quid dedicatum poscit Apollinem	
Vates? quid orat, de patera novum	
Fundens liquorem? Non opimae	
Sardiniae segetes feraces;	
Non aestuosae grata Calabriae	5
Armenta; non aurum, aut ebur Indicum;	
Non rura, quae Liris quieta	
Mordet aqua, taciturnus amnis.	
Premant Calena falce, quibus dedit	
Fortuna, vitem; dives et aureis	10
Mercator exsiccat culullis	
Vina Syra reparata merce,	
Dis carus ipsis; quippe ter et quater	
Anno revisens aequor Atlanticum	
Impune. Me pascant olivae,	15
Me cichorea, levesque malvae.	
Frui paratis et valido mihi,	
Latoë, dones, et, precor, integra	
Cum mente; nec turpem senectam	
Degere, nec cithara carentem.	20

XXXI, v. 3. Sic Codd. tantum non omnes. Sed plurimae Edd. *opimas Sardiniae segetes feracis*. Vid. Fea. — v. 10. Benth. e Codd. *suis ut pro et*; itemque quatuor Vanderb.

CARMEN XXXII.

A D L Y R A M.

Alloquitur Iyram, cum ad solennius carmen scribendum invitatus esset, ne sibi desit.

Metrum Carm. 2.

Poscimur. Si quid vacui sub umbra
Lusimus tecum, quod et hunc in annum
Vivat et plures: age, die Latinum,
Barbite, carmen,

Lesbio primum modulate civi; 5
Qui, ferox bello, tamen inter arma,
Sive iactatam religarat udo
Litore navim,

Liberum et Musas, Veneremque, et illi 10
Semper haerentem Puerum canebat,
Et Lycum, nigris oculis nigroque
Crine decorum.

O decus Phoebi, et dapibus supremi
Grata testudo Iovis, o laborum
Dulce lenimen, mihi cunque salve 15
Rite vocanti.

CARMEN XXXIII.

AD ALBIUM TIBULLUM.

Consolatur eum aliorum exemplo amantium non redamatorum.

Metrum Carm. 6.

Albi, ne doleas plus nimio, memor
Immitis Glycerae, neu miserabiles

XXXII, v. 1. *Poscimur*, Benth. e Cod. Graev. itemque Codd. aliquot Vanderb. — *Mox antro pro umbra* e Cod. Galei Benth. quem Vid.

Decantes elegos, cur tibi iunior
 Laesa praeniteat fide.

Insignem tenui fronte Lycorida 5

Cyri torret amor; Cyrus in asperam
 Declinat Pholoën: sed prius Appulis
 Iungentur capreae lupis,

Quam turpi Pholoë peccet adultero.
 Sic visum Veneri, cui placet impares 10
 Formas atque animos sub iuga aënea
 Saevo mittere cum ioco.

Ipsam me melior quam peteret Venus,
 Grata detinuit compede Myrtale
 Libertina, fretis acrior Hadriae 15
 Curvantis Calabros sinus.

CARMEN XXXIV.

A D S E I P S U M.

Dicit, se antea parcum Deorum cultorem, nunc sententiam
 mutare non inani eorum metu perterritum.

Metrum Carm. 9.

Parcus Deorum cultor et infrequens,
 Insanientis dum sapientiae

Consultus erro, nunc retrorsum
 Vela dare, atque iterare cursus

Cogor relictos. Namque Diespiter 5
 Igni corusco nubila dividens

Plerumque, per purum tonantes
 Egit equos volucremque currum,

Quo bruta tellus, et vaga flumina,
 Quo Styx, et invisi horrida Taenari 10
 Sedes, Atlanteusque finis

Concutitur. Valet ima summis

Mutare, et insignem attenuat Deus,
Obscura promens. Hinc apicem rapax
Fortuna cum stridore acuto
Sustulit, hic posuisse gaudet.

15

CARMEN XXXV.

A D F O R T U N A M.

Hymnus in Fortunam Deam, quo simul ut Caesarem servet
in Britanniam iturum precatur.

Metrum Carm. 9.

O Diva, gratum quae regis Antium,
Praesens vel imo tollere de gradu
Mortale corpus, vel superbos
Vertere funeribus triumphos:

Te pauper ambit sollicita prece
Ruris colonus; te dominam aequoris,
Quicumque Bithyna lacessit
Carpathium pelagus carina.

5

Te Dacus asper, te profugit Seythae,
Urbesque, gentesque, et Latium ferox,
Regumque matres barbarorum, et
Purpurei metuunt tyranni,

10

Iniurioso ne pede prornas
Stantem columnam, neu populus frequens
Ad arma cessantes, ad arma
Concitet, imperiumque frangat.

15

XXXIV, v. 13. *insigne* Benth. e Codice.

XXXV, v. 6. F. A. Wolfius post *ruris* commate interpungi iubet, ut *dominam* etiam ad hunc genitivum pertineat. Vid. Both. Annotatt. et Iahn.

- Te semper anteit saeva Necessitas,
 Clavos trabales et cuneos manu
 Gestans aëna; nec severus
 Uncus abest, liquidumque plumbum. 20
- Te Spes et albo rara Fides colit
 Velata panno; nec comitem abnegat,
 Utcunque mutata potentes
 Vestē domos inimica linquis.
- At vulgus infidum et meretrix retro 25
 Periura cedit; diffugiunt cadis
 Cum faece siccatis amici,
 Ferre iugum pariter dolosi.
- Serves iturum Caesarem in ultimos
 Orbis Britannos, et iuvenum recens 30
 Examen Eois timendum
 Partibus, Oceanoque rubro.
- Heu heu, cicatricum et sceleris pudet
 Fratrumque. Quid nos dura refugimus
 Aetas? quid intactum nefasti 35
 Liquimus? unde manum iuventus
- Metu Deorum continuit? quibus
 Pepercit aris? O utinam nova
 Incude diffingas retusum in
 Massagetas Arabasque ferrum. 40

v. 17. serva Necess. Codd. aliquot Cruq. et Vanderb. fere omnes. Sed vid. Benth. — *v. 33.* Ita Coll. Sax. et Fea. Vulgo *Eheu* Vid. Both. Annotatt. — *v. 39.* Benth. e Codd. quibus nunc accedunt Feae aliquot et Vand. *defingas.* Idemque coniecit *re-coctum* pro *recusum*, quod habet Cod. Cruq.

CARMEN XXXVI.

AD PLOTIUM NUMIDAM.

Ob eius ex Hispania reditum gaudio exultans sacrificandum laetiusque parandum convivium esse dicit.

Metrum Carm. 3.

Et thure et fidibus iuvat	
Placare et vituli sanguine debito	
Custodes Numidae Deos,	
Qui nunc Hesperia sospes ab ultima	
Caris multa sodalibus,	5
Nulli plura tamen dividit oscula,	
Quam dulci Lamiae; memor	
Actae non alio rege puertiae,	
Mutataeque simul togae.	
Cressa ne careat pulchra dies nota,	10
Neu promptae modus amphorae,	
Neu morem in Salium sit requies pedum;	
Neu multi Damalis meri	
Bassum Threïcia vincat amystide,	
Neu desint epulis rosae,	15
Neu vivax apium, neu breve lilium.	
Omnes in Damalin putres	
Deponent oculos, nec Damalis novo	
Divelletur adultero,	
Lascivis ederis ambitiosior.	20

XXXVI, v. 10. *Thressa ne con.* Erasmus. Vid. Bentl.

CARMEN XXXVII.

A D S O D A L E S.

Publicam lactitiam indicit ob voluntariam Cleopatrae necem.

Metrum Carm. 9.

Nunc est bibendum, nunc pede libero
 Pulsanda tellus; nunc Saliaribus
 Ornare pulvinar Deorum
 Tempus erat dapibus, sodales,
 Antehac nefas depromere Caecubum 5
 Cellis avitis, dum Capitolio
 Regina dementes ruinas,
 Funus et imperio parabat,
 Contaminato cum grege turpium
 Morbo virorum, quidlibet impotens 10
 Sperare, fortunaque dulci
 Ebria. Sed minuit furorem
 Vix una sospes navis ab ignibus,
 Mentemque lymphatam Mareotico
 Redegit in veros timores 15
 Caesar, ab Italia volentem
 Remis adurgens: accipiter velut
 Molles columbas, aut leporem citus
 Venator in campis nivalis
 Haemoniae; daret ut catenis 20
 Fatale monstrum; quae generosius
 Perire quaerens, nec muliebriter
 Expavit ensem, nec latentes
 Classe cita reparavit oras;

XXXVII, v. 10. *Opprobriorum* pro *Morbo virorum* coni. Bentr. quem Vid. — v. 24. Pro *reparavit* unus Feae Cod. *repetivit*; Bentr. coni. *penetravit*; Wakefield. *repedavit*. Cf. Bentr. Both. Iahn.

- Ausa et iacentem visere regiam 25
 Vultu sereno, fortis et asperas
 Tractare serpentes, ut atrum
 Corpore combiberet venenum,
 Deliberata morte ferocior:
 Saevis Liburnis scilicet invidens 30
 Privata deduci superbo
 Non humilis mulier triumpho.

CARMEN XXXVIII.

A D P U E R U M.

Iubet coenam minime sumtuosam apparari.

Metrum Carm. 2.

- Persicos odi, puer, apparatus;
 Displicent nexae philyra coronae;
 Mitte sectari, rosa quo locorum
 Sera moretur.
 Simplici myrto nihil allabores 5
 Sedulus curae; neque te ministrum
 Dedecet myrtus, neque me sub arcta
 Vite bibentem.

XXXVIII, v. 6. Ita Cod. Bodleian. apud Benth. qui ipse
 coni. *cura*. Vulgo: *curo*.

Q. HORATII FLACCI
C A R M I N U M.

LIBER SECUNDUS.

CARMEN I.

AD ASINIUM POLLIONEM.

Hortatur eum, ut omissis aliquando tragoediis, in scribenda historia bellorum civilium pergat.

Metrum Alcaicum.

Motum ex Metello consule civicum,
Bellique causas et vitia et modos,
Ludumque Fortunae, gravesque
Principum amicitias, et arma

Nondum expiatis uncta cruoribus, 5
Periculosae plenum opus aleae,
Tractas, et incedis per ignes
Suppositos cineri doloso.

Paulum severae Musa tragoediae
Desit theatri: mox, ubi publicas 10
Res ordinari, grande munus
Cecropio repetes cothurno,

Insigne moestis praesidium reis,
 Et consulenti, Pollio, curiae,
 Cui laurus aeternos honores
 Dalmatico peperit triumpho. 15

Iam nunc minaci murmure cornuum
 Perstringis aures; iam litui strepunt;
 Iam fulgor armorum fugaces
 Terret equos equitumque vultus. 20

Audire magnos iam videor duces
 Non indecoro pulvere sordidos,
 Et cuncta terrarum subacta
 Praeter atrocem animum Catonis.

Iuno, et Deorum quisquis amicio 25
 Afris inulta cesserat impotens
 Tellure, victorum nepotes
 Retulit inferias Iugurthae.

Quis non Latino sanguine pinguior
 Campus sepulcris impia proelia 30
 Testatur, auditumque Medis
 Hesperiae sonitum ruinae?

Qui gurgēs, aut quae flumina lugubris
 Ignara belli? quod mare Daunia 35
 Non decoloravere caedes?
 Quae caret ora cruore nostro?

Sed ne, relictis, Musa proeas, iocis,
 Caeae retractes munera naeniae;
 Mecum Dionaeo sub antro
 Quaere modos levioꝛe plectro. 40

v. 21. *Fidere magn.* Benth. e coniectura. — v. 28 *Rettulit* Fea. — v. 33. *Quis gurgēs* Ed. Veneta.

CARMEN II.

AD SALLUSTIUM CRISPUM.

De recto et liberali divitiarum usu, quo quidem ipso Sallustius excellebat.

Metrum Sapphicum.

Nullus argento color est, avaris
Abdito terris; inimice lamnae
Crispe Sallusti, nisi temperato
Splendeat usu.

Vivet extento Proculeius aevo, 5
Notus in fratres animi paterni:
Illum aget penna metuente solvi
Fama superstes.

Latus regnes avidum domando
Spiritus, quam si Libyam remotis 10
Gadibus iungas, et uterque Poenus
Serviat uni.

Crescit indulgens sibi dirus hydrops,
Nec sitim pellit, nisi causa morbi
Fugerit venis, et aquosus albo 15
Corpore langnor.

Redditum Cyri solio Phraaten
Dissidens plebi numero beatum
Eximit Virtus, populumque falsis
Dedocet uti 20

Vocibus; regnum et diadema tutum
Deferens uni propriamque laurum,
Quisquis ingentes oculo irretorto
Speetat acervos.

II, v. 2. Ita interpunximus cum Bentl. quem V. — v. 7. *agit* Codd. apud Bentl. et Vanderb. Cf. Bentl. Both. Iahn. — v. 18. *plebis* Codd. Blandin. et Bentl. quem V. — *beatum* multi Codd. Iahn. Feae. Vand. Vulgo *beatorum*, quod glossema videtur Feae.

CARMEN III.

A D D E L L I U M.

Vitae felicitatem in mentis aequabilitate et honestis voluptatibus quaerendam esse praecepit.

Metrum Alcaicum.

Aequā mēmentō rēbūs in arduis
Servare mentem, non secus in bonis
Ab insolenti, temperatam
Lactitia, moriturē Delli,

Seu moestus omni tempore vixeris,
Seu te in remotō gramine per dies
Festos reclinatum bearis
Interiorē notā Faleri.

Qua pinus ingens albaque populus
Umbra hospitalem consociare amant
Ramis, et obliquo laborat
Lympha fugax trepidare rivo:

Huc vina et unguenta et nimium breves
Flores amoenae ferre iubē rosae,
Dum res et aetas et Sororum
Fila trium patinatur atra.

Cedes cōmītis saltibus et domo,
Villaque, flavus quam Tiberis lavit:
Cedes, et exstructis in altum
Divitiis potietur heres.

III, v. 2. *secus ac bon.* Benth. e duobus Codd. Lamb. — v. 9. *Qua* Codd. Lambin. sed reliqui fere omnes *Quo*. Cf. Fea et Both. Annotatt. — v. 13 et 14. Haec lectio est vulgata et plurimorum Codd. Sed *brevis flor. amoenos rosae* Codd. Cruq. Schol. Acron, Ed. Venet. — v. 18. *lavat* Cod. duo Vind.

Divesne, prisco natus ab Inacho,
 Nil interest, an pauper, et infimā
 Dē gentē, sub divō mōrēis,
 Victima nil miserantis Orei.

Omnes eodem cogimur; omnium
 Versatur urna serius ocus
 Sors exitura, et nos in aeternum
 Exsilium impositura cymbae.

25

CARMEN IV.

AD XANTHIAM PHOCEUM.

Amicum ancillariolum lepide exemplo magnorum heroum, verum
 etiam forma et virtutibus ancillae amatae excusat.

Metrum Supplicum.

Ne sit ancillae tibi amor pudori,
 Xanthia Phoeu! Prius insolentem
 Serva Briseis niveo colore
 Movit Achillem;

5

Movit Aiace Telamone natum
 Forma captivae dominum Tecmessae;
 Arsit Atrides medio in triumpho
 Virgine rapta,

Barbarae postquam cecidere turmae
 Thessalo victore, et ademtus Hector
 Tradidit fessis leviora tolli
 Pergama Graiis.

10

Nescias, an te generum beati
 Phyllidis flavae decorent parentes:
 Regium certe genus et Penates
 Moeret iniquos.

15

Crede non illam tibi de scelesta
 Plebe dilectam; neque sic fidelem,
 Sic lucro aversam potuisse nasci
 Matre pudenda.

20

Brachia et vultum teretesque suras
 Integer laudo: fuge suspicari,
 Cuius octavum trepidavit aetas
 Claudere lustrum.

CARMEN V.

Ab amore virginis immaturae, quam Lalagen vocat, dehortatur vel amicorum quempiam, vel (ut quidam suspicantur) se ipsum.

Metrum Alcaicum.

Nondum subacta ferre iugum valet
 Cervice, nondum munia comparis
 Aequare, nec tauri ruentis
 In venerem tolerare pondus.

Circa virentes est animus tuae
 Campos iuvencae, nunc fluviis gravem
 Solantis aestum, nunc in udo
 Ludere cum vitulis salicto

5

Praegestientis. Tolle cupidinem
 Immitis uvae: iam tibi lividos
 Distinguet Auctumnus racemos
 Purpureo varius colore.

10

v. 18. *dilectam* omnes fere Codd. *delectam* duo Codd. Vand. et aliquot Edd. Cf. Benth.

V, v. 5. *Venerem* maiori litera initiali plurimae Edd. Sed V. Both. Annotati. — v. 12. *Purpureus vario* Codd. quidam ap. Lambin. et unus Vand. *Purpureo varios* coniecit. Benth. Sed conferes Doeringii explicationem h. l.

Iam te sequetur: currit enim ferox
 Aetas, et illi, quos tibi demserit,
 Apponet annos; iam proterva
 Fronte petet Lalage maritum,
 15
 Dilecta, quantum non Pholoë fugax,
 Non Chloris, albo sic humero nitens
 Ut pura nocturno renidet
 Luna mari, Cnidiusve Gyges,
 20
 Quem si puellarum insereres choro,
 Mire sagaces falleret hospites
 Discrimen obscurum solutis
 Crinibus ambiguoque vultu.

CARMEN VI.

AD SEPTIMIUM.

Invitat eum Horatius ad vivendum secum in senectute vel Tibure, vel si hoc fieri nequeat Tarenti, quorum amoenitates dilaudat.

Metrum Sapphicum.

Septimi, Gades aditure mecum, et
 Cantabrum indoctum iuga ferre nostra, et
 Barbaras Syrtes, ubi Maura semper
 Aestuat unda,
 5
 Tibur, Argeo positum colono,
 Sit meae sedes utinam senectae;
 Sit modus lasso maris et viarum
 Militiaeque.
 Unde si Parcae prohibent iniquae,
 Dulce pellitis ovibus Galaesi
 10

v. 13. *velox aet.* Cod. unus Feae. Wakefield e versu 17. *fugax* huc transponit, ibique *Pholoe ferox* legit. Cf. Doering. —
 v. 20. *Cnidiusque* Fea. Cf. Iahn.

VI, v. 10 *Galesum* Zurk. in variis lectt. Cf. Both. Annotatt. —

Flumen et regnata petam Laconi
Rura Phalanto.

Ille terrarum mihi praeter omnes
Angulus ridet, ubi non Hymetto
Mella decedunt, viridique certat
Bacca Venafro:

15

Ver ubi longum tepidasque praebet
Iupiter brumas, et amicus Aulon
Fertili Baccho minimum Falernis
Invidet uvis,

20

Ille te mecum locus et beatæ
Postulant arces; ibi tu calentem
Debita sparges lacrima favillam
Vatis amici.

CARMEN VII.

AD POMPEIUM.

Suo olim commilitoni reditum e militia in patriam gratulatur.

Metrum Alcaicum.

O saepe mecum tempus in ultimum
Deducte, Bruto militiae duce,
Quis te redonavit Quiritem
Dis patriis Italoque coelo,

Pompei, meorum prime sodalium,
Cum quo morantem saepe diem mero
Fregi, coronatus nitentes
Malobathro Syrio capillos.

5

Tecum Philippos et celerem fugam
Sensi, relictæ non bene parmula;
Quum fracta Virtus, et minaces
Turpe solum tetigere mento.

10

v. 19. *Fertilis* Codd. Benth. Fææ aliique. Cf. Both. Annotatt. et Iahn.
VII. Vanderburg. cum Stephano aliis inscribit *Ad Pompeium*
Varrum adstipulante Both. Annotatt. Alii *Ad Pompeium Grosphum*.

Sed me per hostes Mercurius celer
 Denso paventem sustulit aëre;
 Te rursus in bellum resorbens 15
 Unda fretis tulit aestuosus.
 Ergo obligatam redde Iovi dapem,
 Longaque fessum militia latus
 Depone sub lauru mea, nec
 Parce cadis tibi destinatis. 20
 Oblivioso laevia Massico
 Ciboria exple, funde capacibus
 Unguenta de conchis. Quis udo
 Deproperare apio coronas
 Curatve myrto? quem Venus arbitrum 25
 Dicet bibendi? Non ego sanius
 Bacchabor Edonis: recepto
 Dulce mihi furere est amico.

CARMEN VIII.

A D B A R I N E N.

De levitate eius et venustate victrice.

Metrum Sapphicum.

Ulla si iuris tibi peierati
 Poena, Barine, nocuisset unquam;
 Dente si nigro fieres vel uno
 Turpior ungui:
 Crederem. Sed tu, simul obligasti 5
 Perfidum votis caput, enitescis
 Pulchrior multo, iuvenumque prodis
 Publica cura.

VIII, v. 2. Codd. hoc loco et in inscriptione *Barine*, *Barrine*, *Varine*, *Iarina*. Withof. coni. *Iberine* e Iuvenal. VI, 53. V. Benth. Vanderb. Both. Annotatt.

Expedit matris cineres opertos
 Fallere, et toto taciturna noctis
 Signa cum coelo, gelidaque divos
 Morte carentes. 10

Ridet hoc, inquam, Venus ipsa, rident
 Simples Nymphae, ferus et Cupido
 Semper ardentes acuens sagittas
 Cote cruenta. 15

Adde, quod pubes tibi crescit omnis,
 Servitus crescit nova; nec priores
 Impiae tectum dominae relinquunt
 Saepe minati. 20

Te suis matres metunt iuvenis,
 Te senes parci, miseraeque nuper
 Virgines nuptae, tua ne retardet
 Aura maritos.

CARMEN IX.

A D V A L G I U M.

Hortatur eum, ut Mystae pueri mortem aliquando flere desinat.

Metrum Alcaicum.

Non semper imbres nubibus hispidos
 Manant in agros, aut mare Caspium
 Vexant inaequales procellae
 Usque; nec Armeniis in oris,
 Amice Valgi, stat glacies iners 5
 Menses per omnes, aut Aquilonibus
 Querceta Gargani laborant,
 Et foliis viduantur orni.

Tu semper urges flebilibus modis
 Mysten ademtum: nec tibi Vespero 10
 Surgente decedunt amores,
 Nec rapidum fugiente Solem.
 At non ter aevo functus amabilem
 Ploravit omnes Antilochum senex
 Annos: nec impubem parentes 15
 Troïlon, aut Phrygiae sorores
 Flevere semper. Desine mollium
 Tandem querelarum; et potius nova
 Cantemus Augusti tropaea
 Caesaris, et rigidum Niphaten, 20
 Medumque flumen, gentibus additum
 Victis, minores volvere vertices;
 Intraque praescriptum Gelonos
 Exiguus equitare campis.

CARMEN X.

AD LICINIUM.

Mediocritatem ei in utraque fortuna servandam commendat.

Metrum Supplicum.

Rectius vives, Licini, neque altum
 Semper urgendo, neque, dum procellas
 Cautus horrescis, nimium premendo
 Litus iniquum.
 Auream quisquis mediocritatem 5
 Diligit, tutus caret obsoleti
 Sortibus tecti, caret invidenda
 Sobrius aula.

tices Codd. Feae plurimique alii et Edd. vett. Alii *vortices*. V. Vanderb. Fea et Both.

X, v. 3. Wakefield post *nimum* incidit cum antecedentibus hac ratione coniungendum. Cf. Fea.

Saepius ventis agitatur ingens
Pinus; et celsae graviore casu
Decidunt turres, feriuntque summos
Fulgura montes. 10

Sperat infestis, metuit secundis
Alteram sortem bene praeparatum
Pectus. Informes hiemes reducit
Iupiter, idem 15

Summovet. Non, si male nunc, et olim
Sic erit. Quondam cithara tacentem
Suscitat Musam, neque semper arcum
Tendit Apollo. 20

Rebus angustis animosus atque
Fortis appare: sapienter idem
Contrahes vento nimium secundo
Turgida vela.

CARMEN XI.

AD QUINCTIUM.

Omissis curis tam publicis quam privatis iucunde vivendum esse.

Metrum Alcaicum.

Quid bellicosus Cantaber et Scythes,
Hirpine Quincti, cogitet, Hadria
Divisus obiecto, remittas
Quaerere; nec trepides in usum
Poscentis aevi pauca. Fugit retro 5
Levis Inventas et Decor; arida
Pellente lascivos Amores
Canitie facilemque Somnum.

v. 9. *saepius vent.* unus tantum Cod. sed plures Edd. Cf. Fea. Both. Annot. Iahn. — v. 10. *excelsae* Codd. Feae et Cod. Brod. — v. 12. *fulmina montes* Plures Codd. Lamb. Torrent. Feae et pleraeq. vett. Edd. Sed plurimi Codd. *fulgure*. V. Benth. et Fea. — v. 18. *citharae* ex aliquot Codd. Benth. quem Cf.

Non semper idem floribus est honor Vernis; neque uno Luna rubens nitet	10
Vultu: quid aeternis minorem Consiliis animum fatigas?	
Cur non sub alta vel platano vel hac Pinu iacentes sic temere, et rosa	
Canos odorati capillos, Dum licet, Assyriaque nardo	15
Potamus uneti? Dissipat Evius Curas edaces. Quis puer ocius	
Restingnet ardentis Falerni Pocula praetereunte lympa?	20
Quis devium seortum eliciet domo Lyden? eburna, dic age, cum lyra	
Maturet, in contum Lacaenae More comas religata nodum.	

CARMEN XII.

AD MAECENATEM.

Se Augusti victoriis et eiusmodi rebus gravioribus carmine celebrandis imparem, amores et res ludicras solas canere,

Metrum quod I. 6.

Nolis longa fera bella Numantiae,
Nec dirum Hannibalem, nec Siculum mare
Poeni purpureum sanguine, mollibus
Aptari citharae modis:

XI, v. 24. *comas* Codd. aliquot Feae et Vand. Vulgo: *comam* Totum locum Bentleius e Cod. quodam Torrent. ita constituit: *incomtam Lacaenae more comam religata nodo*. Plures Codd. *incomtum* unica voce.

XII, v. 2. *dirum* Codd. Feae, alii et plurimae Edd. *durum* Codd. plurimi et Edd. vett. Cf. Bentl. et Fea.

Nec saevos Lapithas, et nimium mero 5
 Hylaeum, domitosve Herculea manu
 Telluris iuvenes, unde periculum
 Fulgens contremuit domus

Saturni veteris; tuque pedestribus
 Dices historiis proelia Caesaris, 10
 Maecenas, melius, ductaque per vias
 Regum colla minacium.

Me dulces dominae Musa Licymniae
 Cantus, me voluit dicere lucidum
 Fulgentes oculos, et bene mutuis 15
 Fidum pectus amoribus;

Quam nec ferre pedem dedecuit choris,
 Nec certare ioco, nec dare brachia
 Ludentem nitidis virginibus, sacro
 Dianae celebris die. 20

Num tu, quae tenuit dives Achaemenes,
 Aut pinguis Phrygiae Mygdonias opes,
 Permutare velis crine Licymniae,
 Plenas aut Arabum domos?

Dum flagrantia detorquet ad oscula
 Cervicem, aut facili saevitia negat, 25
 Quae poscente magis gaudeat eripi,
 Interdum rapere occupat.

v. 12. *minacium* plerique Codd. *minantium* alij Codd. et ple-
 raeque Edd. recentiores Cf. Benth. et Both. Annotatt. — v. 25.
 Variant Codd. et Edd. vet. quarum aliae *flagrantia*, aliae *fra-*
grantia. Cf. Benth. — v. 28. Ita Cod. Benth. quatuor Vand. alij.
 Sed *occupet* plurimae Edd. inde ab antiquissimis Cf. Benth.

CARMEN XIII.

IN ARBOREM, CUIUS CASU PAENE OPPRESSUS
FUERAT.

Exsecratus arborem improvisa fatorum pericula memorat factaque inferorum mentione Sappho et Alcaeum laudat.

Metrum Alcaicum.

Ille et nefasto te posuit die,
 Quicumque, primum, et sacrilega manu
 Produxit, arbos, in nepotum
 Perniciem opprobriumque pagi;
 Illum et parentis crediderim sui 5
 Fregisse cervicem, et penetralia
 Sparsisse nocturno cruore
 Hospitis; ille venena Colcha,
 Et quidquid usquam concipitur nefas,
 Tractavit, agro quit statuit meo 10
 Te triste lignum, te caducum
 In domini caput immerentis.
 Quid quisque vitet, nunquam homini satis
 Cautum est, in horas. Navita Bosporum
 Poenus perhorrescit, neque ultra 15
 Caeca timet aliunde fata;
 Miles sagittas et celerem fugam
 Parthi; catenas Parthus et Italum
 Robur: sed improvisa leti
 Vis rapuit rapietque gentes. 20

XIII, v. 1. Ita omnes libri. Nicol. Heins. coni. *Illum et*, Bentl. *Illum o*. De interpunctione, qua loco subveniri poterat Cf. Both. et Iahn. — v. 8. *Colcha* Codd. Cruq. Bentl. Vand. Feac. *Colchica* maior pars Codd. et Editt. ante Bentl. fere omnes. Cf. Bentl. — v. 17. *reducem* pro *celerem* coni. Bentl. Cf. Iahn.

- Quam paene furvae regna Proserpinae,
 Et iudicantem vidimus Aeacum,
 Sedesque discretas piorum, et
 Aeoliis fidibus querentem
- Sappho puellis de popularibus; 25
 Et te sonantem plenius aureo,
 Alcaeae, plectro dura navis,
 Dura fugae mala, dura belli.
- Utrumque sacro digna silentio
 Mirantur Umbrae dicere: sed magis 30
 Pugnas et exactos tyrannos
 Densum humeris bibit aure vulgus.
- Quid mirum? ubi illis carminibus stupens
 Demittit atras bellua centiceps 35
 Aures, et intorti capillis
 Eumenidum recreantur angues;
- Quin et Prometheus et Pelopis parens
 Dulci laborum decipitur sono,
 Nec eurat Orion leones
 Aut timidos agitare lyncas. 40

CARMEN XIV.

AD POSTUMUM.

Deflet humanae vitae brevitatem et Postumo, re familiari, ut videtur, nimis attento, suadet, ut sibi, non heredi vivat.

Metrum Alcaicum.

Heu Heu fugaces, Postume, Postume,
 Labuntur anni, nec Pietas moram

v. 23. Aliquot Codd. Cruq. aliorum *Sedesque descriptas* Cf. Benth. — v. 38. *laborem* Aliquot Codd. ap. Benth. et Vand. Cf. Benth. — v. 40. *timidas* aliquot Codd. Cf. Benth.

XIV, v. 1. *heu heu* Fea; olim lectio vulgata *eheu*. —

Rugis et instanti Senectae
Afferet, indomitaeque Morti.

Non, si trecentis, quotquot eunt dies, 5
Amice, places illacrimabilem
Plutona tauris; qui ter amplum
Geryonen Tityonque tristi

Compescit unda, scilicet omnibus
Quicumque terrae munere vescimur, 10
Enaviganda, sive reges
Sive inopes erimus coloni.

Frustra cruento Marte carebimus,
Fractisque rauci fluctibus Hadriae;
Frustra per auctumnos nocentem 15
Corporibus metuemus Austrum:

Visendus ater flumine languido
Cocytos errans, et Danaï genus
Infame, damnatusque longi
Sisyphus Aeolides laboris. 20

Linquenda tellus, et domus, et placens
Uxor; neque harum, quas colis, arborum
Te, praeter invisas cupressos,
Ulla brevem dominum sequetur.

Absumet heres Caecuba dignior 25
Servata centum clavibus, et mero
Tinguet pavementum superbo
Pontificum potiore coenis.

v. 10. *munera* Wakefield Cf. Doering. — v. 18. Sic e Codd. Bentr.; nam vulgo est *Cocytus*. — v. 23. *cupressus* Jahn. e Codd. — v. 27. Ita Codd. longe plurimi; pauci *superbum*. Fea ex uno Cod. *superbis*; alter eiusdem Cod. *superbus*. Cf. Bentr. Fea. Jahn.

CARMEN XV.

IN SUI SEculi LUXURIAM.

Antiquorum parcimoniam et frugalitatem recenti luxui opponit.

Metrum Alcaicum.

Iam pauca aratro iugera regiae	
Moles relinquent, undique latius	
Extenta visentur Lucrino	
Stagna lacu, platanusque caelebs	
Evincet ulmos; tum violaria, et	5
Myrtus, et omnis copia narium,	
Spargent olivetis odorem	
Fertilibus domino priori;	
Tum spissa ramis laurea fervidos	
Excludet ictus. Non ita Romuli	10
Praescriptum et intonsi Catonis	
Auspiciis, veterumque norma.	
Privatus illis census erat brevis,	
Commune magnum: nulla decempedis	
Metata privatis opacam	15
Porticus excipiebat Arcton;	
Nec fortuitum spernere cespitem	
Leges sinebant, oppida publico	
Sumtu iubentes et Deorum	
Templa novo decorare saxo.	20

XV, v. 5. Fabricii Cod. *violaria Myrtusque et*, quo scilicet metro subveniretur; sed *myrtus* est pluralis. V. Benth. — v. 10. *Excludet aestus* Codd. apud Lambin. Benth. Vand. Cf. Benth.

CARMEN XVI.

AD GROSPHUM.

Tranquillitatem vitae optari ab omnibus; eam vero non congerendis opibus, honoribusve, sed coercendis cupiditatibus comparari.

Metrum Sapphicum.

Otium Divos rogat in patenti
 Pressus Aegaeo, simul atra nubes
 Condidit Lunam, neque certa fulgent
 Sidera nautis;

Otium bello furiosa Thrace, 5
 Otium Medi pharetra decori,
 Grophe, non gemmis neque purpura venale
 neque auro.

Non enim gazae neque consularis
 Summovet lictor miseros tumultus 10
 Mentis, et Curas laqueata circum
 Tecta volantes.

Vivitur parvo bene, cui paternum
 Splendet in mensa tenui salinum,
 Nec leves somnos timor aut cupido 15
 Sordidus aufert.

Quid brevi fortes iaculamur aevo
 Multa? quid terras alio calentes
 Sole mutamus? Patriae quis exsul
 Se quoque fugit? 20

XVI, v. 1. *impatenti* unica voce aliquot Codd. Cf. Benth. et Jahn. — v. 2. *Pressus* aliquot Codd. Vand. alii. — v. 17. *sontes iaculam*. Codd. aliquot apud Benth. et var. lect. in uno Vand. — v. 18. Vir doctus apud Benth. *mutamus patria?* itemque Wakefield. *mutamus patriae?* distinxit Both. in Annotatt. qui Cf. cum Benth. et Jahn.

Scandit aeratas vitiosa naves
 Cura, nec turmas equitum relinquit,
 Ocior cervis, et agente nimbos
 Ocior Euro.

Laetus in praesens animus, quod ultra est 25
 Oderit curare, et amara lento
 Temperet risu. Nihil est ab omni
 Parte beatum.

Abstulit clarum cita mors Achillem,
 Longa Tithonum minuit senectus: 30
 Et mihi forsán, tibi quod negarit,
 Porriget Hora.

Te greges centum Siculaeque circum
 Mugunt vaccae; tibi tollit hinnitum
 Apta quadrigis equa; te bis Afro 35
 Murice tinctae

Vestiunt lanac; mihi parva rura, et
 Spiritum Graiae tenuem Camenae
 Parca non mendax dedit, et malignum 40
 Spernere vulgus.

CARMEN XVII.

AD MAECENATEM.

Maecenatem velut assidens alloquitur, pro praesenti statu
 valetudinis vitae pertaesum.

Metrum Alcaicum.

Cur me querelis exanimas tuis?
 Nec Dis amicum est, nec mihi, te prius
 Obire, Maecenas, mearum
 Grande decus columenque rerum.

v. 26. *leni risu* coní. Benti. quem V. — v. 33. *circum mu-*
giunt uno verbo placet Both. in Annotatt.

Ah! te meae si partem animae rapit	5
Maturior vis, quid moror altera?	
Nec carus aequae, nec superstes	
Integer. Ille dies utramque	
Ducet ruinam. Non ego perfidum	
Dixi sacramentum: ibimus, ibimus,	10
Utcunque praecedes, supremum	
Carpere iter comites parati.	
Me nec Chimaerae spiritus igneae,	
Nec, si resurgat centimanus Gyas,	
Divellet unquam. Sic potenti	15
Iustitiae placitumque Parcis.	
Seu Libra, seu me Scorpius adspicit	
Formidolosus, pars violentior	
Natalis horae, seu tyrannus	
Hesperiae Capricornus undae:	20
Utrumque nostrum incredibili modo	
Consentit astrum. Te Iovis impio	
Tutela Saturno refulgens ³	
Eripuit, volucrisque Fati	
Tardavit alas quum populus frequens	25
Laetum theatri ter crepuit sonum:	
Me truncus illapsus cerebro	
Sustulerat, nisi Faunus ictum	
Dextra levasset, Mercurialium	
Custos virorum. Reddere victimas	30
Aedemque votivam memento:	
Nos humilem feriemus agnam.	

XVII, v. 6. *moror alteram* Vet. schol. et aliquot Edd. Cf. Both. Annott. cui coni. *quid moror? altera*. — v. 14. Quidam Codd. *Gyas*, alii *Gyges*, sed plurimi *Gigas*. Cf. Benth. et Both. Annott. — v. 19. *letal*is horae Codd. aliquot Cruq. et Vand. — v. 21. *Utcunque nostrum* legisse videtur Schol. Cruq. idque praefereudum videtur Both.

CARMEN XVIII.

Felicem suam in re tenui sortem cum insano opulentorum
et irrita luxu poëta comparat.

*Metrum Hipponacteum; primus versus trochaicus dimeter cata-
lecticus, alter iambicus trimeter catalecticus.*

Non ebur neque aureum
Mea renidet in domo lacunar,
Non trabes Hymettiae
Premunt columnas ultima recisas
Africa, neque Attali 5
Ignotus heres regiam occupavi,
Nec Laconicas mihi
Trahunt honestae purpuras clientae.
At fides et ingenî
Benigna vena est, pauperemque dives 10
Me petit: nihil supra
Deos lacesso, nec potentem amicum
Largiora flagito,
Satis beatus unicus Sabinis.
Truditur dies die, 15
Novaeque pergunt interire Lunae:
Tu secunda marmora
Locas sub ipsum funus, et sepulcri
Immemor, struis domos.
Marisque Baiis obstrepentis urges 20
Summovere litora,
Parum locuples continente ripa.
Quid? quod usque proximos
Revellis agri terminos, et ultra
Limites clientium 25
Salis avarus; pellitur paternos

In sinu ferens Deos
 Et uxor, et vir, sordidosque natos.
 Nulla certior tamen,
 Rapacis Orci fine destinata 30
 Aula divitem manet
 Herum. Quid ultra tendis? Aequa tellus
 Pauperi recluditur
 Regumque pueris: nec satelles Orci 35
 Callidum Promethea
 Revexit auro captus. Hic superbum
 Tantalum, atque Tantali
 Genus coercet; hic levare functum.
 Pauperem laboribus
 Vocatus atque non vocatus audit. 40

CARMEN XIX.

I N B A C C H U M.

Bacchi laudes dithyrambico furore correptus canit Poeta.

Metrum Alcaicum.

Bacchum in remotis carmina rupibus
 Vidi docentem (credite posteri!)
 Nymphasque discentes, et aures
 Capripedum Satyrorum acutas.
 Evoe! recenti mens trepidat metu, 5
 Plenoque Bacchi pectore turbidum
 Laetatur.. Evoe! parce, Liber,
 Parce, gravi metuende thyrsos!

v. 30. *sede destinata* Codd. Crnq. Sunt qui post *fine* incidunt auctore Bentl. quem V. — v. 34. *regumque natis* Codd. Lamb. et unus Bersm. — v. 36. *Revexit auro* Codd. Lamb. *de-*
vexit Cod. Vand. — v. 40. *audet com.* vir doctus apud Cuning. probante Both. in Annot.

Fas pervicaces est mihi Thyiadas, Vinique fontem, lactis et uberes Cantare rivos, atque truncis Lapsa cavis iterare mella.	10
Fas et beatæ coniugis additum Stellis honorem, tectaque Pentheï Disiecta non leni ruina, Thracis et exitium Lycurgi.	15
Tu flectis amnes, tu mare barbarum: Tu separatis uvidus in iugis Nodo coercēs viperino Bistonidum sine fraude crines.	20
Tu, quum parentis regna per arduum Cohors Gigantum scanderet impia, Rhoetum retorsisti leonis Unguibus horribilique mala,	
Quamquam, choreis aptior et iocis Ludoque dictus, non sat idoneus Pugnae ferebaris; sed idem Pacis eras mediusque belli.	25
Te vidit insons Cerberus aureo Cornu decorum, leniter atterens Caudam, et recedentis trilingui Ore pedes tetigitque crura.	30

XIX, v. 9. *sit mihi* coni. Benth. idemque vindicavit scriptio-
nem *Thyiadas*, cum vulgo esset *Thyadas*. — v. 15. *non leni*,
quod requirit versus multi Codd. Lamb. Benth. Vand. alii. Olim
vulgo *non levi*. — v. 23. *Rhoecum* Cod. Graev. et unus Cruq.
reliqui omnes conspirant in *Rhoetus*. Cf. Benth. et Both.

CARMEN XX.

AD MAECENATEM.

Nominis sui immortalitatem vaticinatur poeta sub imagine cynci, in quem transformatum se terras relinquere et in coelum ferri, fingit.

Metrum Alcaicum.

Non usitata, non tenui ferar
 Penna biformis per liquidum aethera
 Vates, neque in terris morabor
 Longius, invidiaque maior
 Urbes relinquam. Non ego pauperum 5
 Sanguis parentum, non ego, quem vocas,
 Dilecte Maecenas, obibo;
 Nec Stygia cohibebor unda.
 Iam iam residunt cruribus asperae
 Pelles, et album mutor in alitem 10
 Superna, nascunturque leves
 Per digitos humerosque plumae.
 Iam Daedaleo ocior Icaro
 Visam gementis litora Bospori,
 Syrtesque Gaetulas canorus 15
 Ales Hyperboreosque campos.
 Me Colchus, et qui dissimulat metum
 Marsae cohortis Dacus, et ultimi

XX, v. 1. Ita Codd. aliquot Bentl. et Vand. plurimi tamen *nec tenui*. — v. 6. *quem vocant* con. Bentl. *quem vetas* scil. *obire* Both. in Annotatt. Nonnulli, ut nuper Jahnus coniungunt, *quem vocas*: „*dilecte*“. — v. 11. *superna* Cod. apud Muret. et Bentl. sed omnes fere reliqui *superne* Cf. Bentl. — v. 13. *notior Icaro* Unus apud Bentl. et tres Codd. Vand. *tutior* con. Bentl. Cf. Doering.

Noscent Geloni: me peritus
Disceet Iber, Rhodanique potor.

20

Absint inani funere naeniae,
Luctusque turpes et querimoniae:
Compesce clamorem, ac sepulcri
Mitte supervacuos honores.

v. 20. *Dicet* in variis lectt. Zurk.

Q. HORATII FLACCI
C A R M I N U M

LIBER TERTIUS.

CARMEN I.

Præcepta tradit ut germanus sanctiorum Musarum sacerdos
de necessitate mortis omnibus communi, de animi tranquillitate
et vita vere beata nec voluptatibus nec divitiis quaerenda.

Metrum Alcaicum.

Odi profanum vulgus et arceo:
Favete linguis: carmina non prius
Audita Musarum sacerdos
Virginibus puerisque canto.

Regum timendorum in proprios greges, 5
Reges in ipsos imperium est Iovis,
Clari Giganteo triumpho,
Cuncta supercilio moventis.

Est ut viro vir latius ordinet
Arbusta sulcis; hic generosior 10
Descendat in Campum petitor,
Moribus hic meliorque fama

Contendat; illi turba clientium
Sit major: aequa lege Necessitas
Sortitur insignes et imos; 15
Omne capax movet urna nomen.

- Destructus ensis cui super impia
 Cervice pendet, non Siculae dapes
 Dulcem elaborabunt saporem,
 Non avium citharaeque cantus 20
- Somnum reducent. Somnus agrestium
 Lenis virorum non humiles domos
 Fastidit, umbrosamve ripam,
 Non Zephyris agitata Tempe.
- Desiderantem quod satis est, neque 25
 Tumultuosum sollicitat mare,
 Nec saevus Arcturi cadentis
 Impetus, aut orientis Haedi,
- Non verberatae grandine vineae
 Fundusque mendax, arbore nunc aquas 30
 Culpante, nunc torrentia agros
 Sidera, nunc hiemes iniquas.
- Contracta pisces aequora sentiunt
 Lactis in altum molibus; huc frequens
 Caementa demittit redemptor 35
 Cum famulis, dominusque terrae
- Fastidiosus: sed Timor et Minae
 Scandunt eodem, quo dominus: neque
 Decedit aerata triremi, et
 Post equitem sedet atra Cura. 40
- Quod si dolentem nec Phrygius lapis,
 Nec purpurarum sidere clarior
 Delenit usus, nec Falerna
 Vitis, Achaemeniumve costum:
- Cur invidendis postibus et novo 45
 Sublime ritu moliar atrium?
 Cur valle permutem Sabina
 Divitias operosiores?

I, v. 17. *Destructus* plerique Codd. alii *districtus*. — v. 43. *delenit* Ed. Venet. Lamb. etc. *delinit* Edd. omnes fere vett. Cod. Gotting. et Coll. Sax. Retinuit etiam Bentl.

CARMEN II.

De puerorum educatione, quos virtuti bellicae, civili et pietati erga deos assuefaciendos esse praecipit.

Metrum Alcaicum.

Angustam, amici, pauperiem pati
 Robustus acri militia puer
 Condiscat, et Parthos feroces
 Vexet eques metuendus hasta,
 Vitamque sub divo et trepidis agat 5
 In rebus. Illum ex moenibus hosticis
 Matrona bellantis tyranni
 Prospiciens, et adulta virgo,
 Suspiret, heu heu; ne rudis agminum
 Sponsus laecessat regius asperum 10
 Tactu leonem, quem cruenta
 Per medias rapit ira caedes.
 Dulce et decorum est pro patria mori:
 Mors et fugacem persequitur virum,
 Nec parcat imbellis iuventae 15
 Poplitibus timidove tergo.
 Virtus, repulsae nescia sordidae,
 Intaminatis fulget honoribus:
 Nec sumit aut ponit secures
 Arbitrio popularis aurae. 20

II, v. 1. *amici* aliquot Codd. apud Bentl. multaeque Edd. *amice* longe plurimi Codd. et maxima Edd. pars. Cf. Bentl. Fea., Both. in Annot. et Jahn. — v. 14. *consequitur* coni. Bentl. *prosequitur* Codd. aliquot apud eundem. — v. 16. *timidove* ex aliquot Codd. restituit Bentl. quem V. Plurimi Codd. et Edd. *timidoque*. — v. 18. *incontaminatis* ita ut prima syllaba praecedenti versui iungatur Codd. aliquot et Edd. V. Bentl.

Virtus, recludens immeritis mori
 Coelum, negata tentat iter via;
 Coetusque vulgares et udam
 Spernit humum fugiente penna.

Est et fideli tuta silentio 25

Mercēs: vetabo, qui Cereris sacrum
 Vulgarit areanae, sub isdem
 Sit trabibus, fragilemve mecum

Solvat phaselon. Saepe Diespiter
 Neglectus incesto addidit integrum: 30

Raro anteedentem scelestum
 Deseruit pede Poena claudō.

CARMEN III.

Laudes iustitiae et constantiae. Sed fortasse totius argumenti ratio in v. 57 seqq. includitur.

Metrum Alcaicum.

Iustum et tenacem propositi virum
 Non civium ardor prava iubentium,
 Non vultus instantis tyranni
 Mente quatit solida, neque Auster,

Dux inquieti turbidus Hadriae, 5
 Nec fulminantis magna manus Iovis:
 Si fractus illabatur orbis,
 Impavidum ferient ruinae.

Hac arte Pollux et vagus Hercules
 Enisus, arces attigit igneas; 10
 Quos inter Augustus recumbens
 Purpureo bibet ore nectar.

III, v. 7. *illabetur* Cod. Vand. et aliquot Benth. — v. 10. Codd. et Edd. variant in *innisus*, *innixus*, *enisus*. Cf. Benth. — v. 12. *bibet* plerique Codd. *bibit* Codd. aliquot apud Benth. et plurimae Edd. Cf. Benth. Fea, Jahn.

Hac te merentem, Bacche pater, tuae Vexere tigres, indocili iugum Collo trahentes. Hac Quirinus Martis equis Acheronta fugit;	15
Gratum elocuta consiliantibus Iunone Divis: Ilion, Ilion Fatalis incestusque iudex Et mulier peregrina vertit	20
In pulverem, ex quo destituit Deos Mercede pacta Laomedon, mihi Castaque damnatum Minervae Cum populo et duce fraudulento.	
Iam nec Lacaenae splendet adulterae Famosus hospes, nec Priami domus Periura pugnaces Achivos Hectoreis opibus refringit:	25
Nostrisque ductam seditionibus Bellum resedit. Protinus et graves Iras, et invisum nepotem, Troica quem peperit sacerdos,	30
Marti redonabo. Illum ego lucidas Inire sedes, ducere nectaris Succos, et adscribi quietis Ordinibus patiar Deorum.	35
Dum longus inter saeviat Ilion Romanque pontus, qualibet exsules In parte regnanto beati: Dum Priami Paridisque busto	40
Insultet armentum, et catulos ferae Celent inultae; stet Capitolium	

v. 23. *damnatam* malit Bentr. — v. 32. *Troica* omnes Codd. *Troia* con. Heinsius probante Bentr. idque plurimae Edd. receperunt Cf. Bentr. — v. 34. *discere nectaris* plures Codd. apud Bentr. et Vand. Cf. Bentr.

Fulgens, triumphatisque possit
Roma ferox dare iura Medis.

Horrenda late nomen in ultimas 45
Extendat oras, qua medius liquor
Secernit Europen ab Afro,
Qua tumidus rigat arva Nilus:

Aurum irrepertum et sic melius situm,
Quum terra celat, spernere fortior 50
Quam cogere, humanos in usus
Omne sacrum rapiente dextra.

Quicumque mundo terminus obstitit,
Hunc tangat armis, visere gestiens,
Qua parte debacchentur ignes, 55
Qua nebulae pluviique rores.

Sed bellicosus fata Quiritibus
Hac lege dico, ne nimium pii,
Rebusque fidentes, avitae
Tecta velint reparare Troiae. 60

Troiae renascens alite lugubri
Fortuna tristi clade iterabitur,
Ducente viatrices catervas
Coniuge me Iovis et sorore.

Ter si resurgat murus aëneus 65
Auctore Phoebō, ter pereat meis
Excisus Argivis, ter uxor
Capta virum puerosque ploret.

Non haec iocosae conveniunt lyrae:
Quo, Musa, tendis? Desine pervicax 70
Referre sermones Deorum, et
Magna modis tenuare paryis.

v. 53. *mundi* aliquot recentiores Codd. Cf. Bentr. — v. 66.
Ductore Phoebō Codd. aliquot Bentr. quem V. — v. 69. *hoc...*
conveniet plurimi Codd. idque servavit Bentr.

CARMEN IV.

AD CALLIOPEN.

Musas celebrat, quae et sibi ipsi opem in vitae periculis praesentem tulerint et omnino vitam humanam ornent atque emendent.

Metrum Alcaicum.

Descende coelo, et dic, age, tibia
Regina longum Calliope melos,
Seu voce nunc mavis acuta,
Seu fidibus citharaque Phoebi.

Auditis? an me ludit amabilis
Insania? Audire et videor pios
Errare per lucos, amoenae
Quos et aquae subeunt et aerae.

Me fabulosae Vulture in Appulo,
Altricis extra limen Apuliae,
Ludo fatigatumque somno
Fronde nova puerum palumbes

Texere: mirum quod foret omnibus,
Quicumque celsae nidum Acherontiae,
Saltusque Bantinos, et arvum
Pingue tenent humilis Forenti;

Ut tuto ab atris corpore viperis
Dormirem et ursis; ut premerer sacra
Lauroque collataque myrto,
Non sine Dis animosus infans.

IV, v. 4. *citharaque* Unus Cod. Benth. et aliquot Vand.; reliqui fere *citharave*. — v. 5. *Audiris* Fea ex coniect. Sed Cf. Both. Annotatt. — v. 9. *Vulture in abdito* coni. Both. — v. 10. Codd. partim *altricis*, partim *nutricis*. Benth. coni. *Nutricis extra limina sedulae*. De utroque versu Cf. Jahn.

Vester, Camenae, vester in arduos
Tollor Sabinos; seu mihi frigidum
Praeneste, seu Tibur supinum,
Seu liquidae placuere Baiae.

Vestris amicum fontibus et choris, 25
Non me Philippis versa acies retro,
Devota non exstinxit arbor,
Nec Sicola Palinurus unda.

Utcunque mecum vos eritis, libens
Insanientem navita Bosporum 30
Tentabo, et urentes arenas
Litoris Assyrii viator.

Visam Britannos hospitibus feros,
Et lactum equino sanguine Concanum;
Visam pharetratos Gelonos 35
Et Scythicum inviolatus amnem.

Vos Caesarem altum militia, simul
Fessas cohortes reddidit oppidis,
Finire quaerentem labores
Pierio recreatis antro: 40

Vos lene consilium et datis, et dato
Gaudetis, almae. Scimus, ut impios
Titanas immanemque turmam
Fulmine sustulerit caduco,

v. 31. *urentes* multi Codd. etiam Vand. et Feae, pluresque Edd. Vulgo *arentes* Cf. Bentl. Fea, Both. — v. 37. Fea *altum militia* coniungit i. e. *bello innutritum*. Vulgo *militia* cum sequenti vocabulo copulabatur. — v. 38. Plures Codd. apud Bentl. Vand. Feam atque Edd. vet. *reddidit*, eamque lectionem tuentur Bentl. et Fea; vulgata lectio est *abdedit* de qua Cf. Dæring. Aliquot Codd. Vand. *addidit*, quod Vand. verum videtur et Bothio, quem V. — v. 43. *turbam* Cod. Brod. alii, eademque lectionis varietas infra v. 46. ubi alii *turmas*, alii *turbas*. — v. 44. Bentl. coni. *sustulerit corrusco*.

Qui terram inertem, qui mare temperat
Ventosum, et urbes, regnaque tristia,
Divosque mortalesque turbas
Imperio regit unus aequo. 45

Magnum illa terrorem intulerat Iovi
Fidens inventus horrida bracchiis,
Fratresque tendentes opaco
Pelion imposuisse Olympo. 50

Sed quid Typhoeus et validus Mimas,
Aut quid minaci Porphyryon statu,
Quid Rhoetus, evulsisque truncis
Enceladus iaculator audax, 55

Contra sonantem Palladis aegida
Possent ruentes? Hinc avidus stetit
Vulcanus, hinc matrona Iuno, et
Nunquam humeris positurus arcum, 60

Qui rore puro Castaliae lavit
Crines solutos, qui Lyciae tenet
Dumeta natalemque silvam,
Delius et Patareus Apollo.

Vis consilii expers mole ruit sua;
Vim temperatam Di quoque provehunt
In maius: idem odere vires
Omne nefas animo moventes. 65

Testis mearum centimanus Gyges
Sententiarum, notus et integrae
Tentator Orion Dianae,
Virginea domitus sagitta. 70

Iniecta monstris Terra dolet suis,
Moeretque partus fulmine luridum

v. 46. Pro *urbes* coni. Benth. *umbras*, Cuning. *orbes*. Cf. Both. Annotatt. — v. 55. Alii *Rhoecus* V. ad II, 19, 23. — v. 69. Alii *Gyas* aut *gigas* Vid. ad II, 17, 14.

Missos ad Orcum; nec peredit	75
Impositam celer ignis Aetnam;	
Incontinentis nec Tityi iecur	
Relinquit ales, nequitiae additus	
Custos; amatorem trecentae	80
Pirithoum cohibent catenae.	

CARMEN V.

IN LAUDEM CÆSARIS AUGUSTI.

Laudat Augustum a victis per eum Britannis et Parthis, qui quidem cum nunc demum captivos Romanos et signa militaria reddidissent, ignaviae istorum militum Crassianorum et Antonianorum praeclarum Reguli facinus opponit.

Metrum Alcaicum.

Coelo tonantem credidimus Iovem	
Regnare; praesens Divus habebitur	
Augustus, adiectis Britannis	
Imperio, gravibusque Persis.	
Milesne Crassi coninge barbara	5
Turpis maritus vixit? et hostium	
(Pro Curia, inversique mores!)	
Consenuit socerorum in armis,	
Sub rege Medo, Marsus et Appulus,	
Anciliorum et nominis et togae	10
Oblitus, aeternaeque Vestae,	
Incolumi Iove et urbe Roma?	
Hoc caverat mens provida Reguli,	
Dissentientis conditionibus	

v. 76. *Aetnen* Ed. Jani.

V, v. 8. *armis* omnes Codd. praeter unum Jani, qui habet *avis*, in quod iam antea suspicione inciderant Tanaquil Faber et Nic. Heins. a Bentleio, aliis receptum.

- Foedis, et exemplo trahenti 15
 Perniciem veniens in aevum,
 Si non periret immiserabilis
 Captiva pubes. Signa ego Punicis
 Affixa delubris, et arma
 Militibus sine caede, dixit, 20
 Dereptā vidi: vidi ego civium
 Retorta tergo brachia libero,
 Portasque non clausas, et arva
 Marte coli populata nostro.
 Auro repensus scilicet acrior 25
 Miles redibit. Flagitio additis
 Damnum. Neque amissos colores
 Lana refert medicata fuco,
 Nec vera virtus, quum semel excidit,
 Curat reponi deterioribus. 30
 Si pugnat extricata densis
 Cerva plagis: erit ille fortis,
 Qui perfidis se credidit hostibus;
 Et Marte Poenos proteret altero,
 Qui lora restrictis lacertis 35
 Sensit iners, timuitque mortem.
 Hic, unde vitam sumeret inscius,
 Pacem duello miscuit. O pudor! 40
 O magna Carthago, probrosis
 Altior Italiae ruinis!

v. 15. *trahenti* e coniectura Canteri probarunt Stephan. Benth. alii. Sed omnes Codd. et Edd. vett. *trahentis*, quod Fea tuetur, quem V. Benth. conie. *exempli trahentis*. — v. 17. *perirent* conii. Glareanus metro subventurus. Cf. Benth. — v. 26. *redibit*? Fea. — v. 33. *reddidit host.* Cod. Brod. *delidit* aut *tradidit* conii. Benth. — v. 37. *aptius* pro *inscius* plures Codd. apud Benth. qui locum ita constituit: *timuitque mortem Hinc, unde vitam sumeret aptius, Pacem et duello miscuit.* Both. in Annotatt. *timuitque mortem Hinc, unde vitam sumeret, inscius Pacem duello miscuit.* Cf. Jahn.

Fertur pudicae coniugis osculum,
 Parvosque natos, ut capitis minor,
 Ab se removisse, et virilem
 Torvus humi posuisse vultum:

Donec labantes consilio Patres 45
 Firmaret auctor nunquam alias dato,
 Interque moerentes amicos
 Egregius properaret exsul.

Atqui sciebat, quae sibi barbarus
 Tortor pararet: non aliter tamen 50
 Dimovit obstantes propinquos,
 Et populum reditus morantem,

Quam si clientum longa negotia
 Diudicata lite relinqueret,
 Tendens Venefranos in agros, 55
 Aut Lacedaemonium Tarentum.

CARMEN VI.

AD ROMANOS.

Contra suae aetatis contemptum religionis et mores corruptos.

Metrum Alcaicum.

Delicta maiorum immeritus lues,
 Romane, donec templa refeceris,
 Aedesque labentes Deorum, et
 Foeda nigro simulacra fumo.

Dīs te minorem quod geris, imperas: 5
 Hinc omne principium, huc refer exitum.
 Dī multa neglecti dederunt
 Hesperiae mala luctuosae.

v. 43. *a se* plures Codd. V. Benth.

VI, v. 6. *Huc omne* quidam Codd. apud Torrent.

Iam bis Monaeses et Pacori manus Non auspicatos contudit impetus Nostros, et adiecisse praedam Torquibus exiguis renidet.	10
Paene occupatam seditionibus Delevit Urbem Dacus et Aethiops; Hic classe formidatus, ille Missilibus melior sagittis.	15
Fecunda culpa saecula nuptias Primum inquinavere, et genus et domos; Hoc fonte derivata clades In patriam populumque fluxit.	20
Motus doceri gaudet Ionicos Matura virgo, et fingitur artibus: Iam nunc et incestos amores De tenero meditatur ungui.	
Mox iuniores quaerit adulteros Inter mariti vincta, neque eligit, Cui donet impermissa raptim Gaudia, luminibus remotis;	25
Sed iussa coram non sine conscio Surgit marito, seu vocat institor, Seu navis Hispanae magister, Dedecorum pretiosus emtor.	30
Non his inventus orta parentibus Infecit aequor sanguine Punico, Pyrrhumque et ingentem cecidit Antiochum, Hannibalemque dirum:	35

v. 10. *Inauspicatos*, Codd. Vand. alii. Cf. Both. Annotatt. et Jahn. — v. 20. *Inque patres populumque* Bentl. coni. et in textum assumisit. — v. 22. Alii Codd. *fingitur artibus*, alii *frangitur artibus* Cf. Bentl. Fea, Both. — v. 27. Codd. aliquot *intermissa*, duo *improvisa*. V. Bentl. — v. 36. *dirum* plurimi Codd. sed *durum* item multi Cf. Bentl. et Fea.

Sed rusticorum mascula militum
 Proles, Sabellis docta ligonibus
 Versare glebas, et severae
 Matris ad arbitrium recisos 40
 Portare fustes, sol ubi montium
 Mutaret umbras, et iuga demeret
 Bobus fatigatis, amicum
 Tempus agens abeunte curru.
 Damnosa quid non imminuit dies? 45
 Aetas parentum, peior avis, tulit
 Nos nequiores, mox daturos
 Progeniem vitiosiore.

CARMEN VII.

AD ASTERIEN.

Consolatur eam de mariti vel amici sui absentia moestam,
 eique ut fidem servet monet.

Metrum idem quod I, 5.

Quid fles, Asterie, quem tibi candidi
 Primo restituent vere Favonii,
 Thyna merce beatum,
 Constantis iuvenem fide,
 Gygen? Ille Notis actus ad Oricum 5
 Post insana Caprae sidera, frigidas
 Noctes non sine multis
 Insomnis lacrimis agit.
 Atqui sollicitae nuntius hospitae,
 Suspirare Chloën, et miseram tuis 10
 Dicens ignibus uri,
 Tentat mille vafer modis.

VII, v. 4. *constantis iuvenem fide* Edd. principes; plures Codd. *constantis fidei*. Cf. Benth. et Both. Annotatt.

- Ut Proetum mulier perfida credulum
 Falsis impulerit crininibus, nimis
 Casto Bellerophonti 15
 Maturare necem, refert.
- Narrat paene datum Pelea Tartaro,
 Magnessam Hippolyten dum fugit abstinens:
 Et peccare docentes 20
 Fallax historias movet;
- Frustra: nam scopulis surdior Icarī
 Voces audit adhuc integer. At, tibi
 Ne vicinus Enipeus
 Plus iusto placeat, cave:
- Quamvis non alius flectere equum sciens 25
 Aequē conspicitur gramine Martio,
 Nec quisquam citus aequē
 Tusco denatat alveo.
- Prima nocte domum claude, neque in vias
 Sub cantu querulae despice tibiae; 30
 Et te saepe vocanti
 Duram difficilis mane.

CARMEN VIII.

AD MAECENATEM.

Ad Matronalia Calendis Martiis, quo die ab immani arboris ruina evaserat, hilariter apud se agenda Maecenatē invitāt.

Metrum Sapphicum.

Martiis caelebs quid agam Calendis,
 Quid velint flores et acerra thuris
 Plena, miraris, positusque carbo in
 Cespite vivo,

v. 20. *movet* Codd. Torrentii, Bentl. et alii *monet*. Cf. Ben l. qui etiam pro *fallax* coni. *pellax*. — v. 23. *Nec vic.* Edd. primae. VIII, v. 3. Plures Codd. omittunt *in*.

Docte sermones utriusque linguae? 5
 Voveram dulces epulas et album
 Libero caprum, prope funeratus
 Arboris ictu.

Hic dies anno redeunte festus
 Corticem adstrictum pice demovebit 10
 Amphorae funum bibere institutae
 Consule Tullo.

Sume, Maecenas, cyathos amici
 Sospitis centum; et vigiles lucernas
 Perfer in lucem: procul omnis esto 15
 Clamor et ira.

Mitte civiles super Urbe curas:
 Occidit Daci Cotisonis agmen;
 Medus infestus sibi luctuosus
 Dissidet armis; 20

Servit Hispanae vetus hostis orae,
 Cantaber, sera domitus catena;
 Iam Scythae laxo meditantur arcu
 Cedere campis.

Negligens, ne qua populus laboret, 25
 Parce privatus nimium cavere:
 Dona praesentis cape laetus horae, et
 Linque severa.

v. 5. Vulgo sine interrogatione. — v. 10. Plurimi Codd. *dinovebit*. — v. 15. *Profer* Codd. duo apud Benth. — v. 18. *Cotisonis* Codd. apud Torrent. Cf. Benth. — v. 27. *rape* Codd. quidem apud Benth. et Lambin. Coll. Saxon. alii. Cf. Benth.

CARMEN IX.

CARMEN AMOEBAEUM.

Suavissimum amici cum amica colloquium, quo intermissus aliquandiu amor denuo conciliatur.

Metrum quod I. 3.

Horatius.

Donec gratus eram tibi,
Nec quisquam potior brachia candidae
Cervici iuvenis dabat:
Persarum vigui rege beator.

Lydia.

Donec non alia magis
Arsisti, neque erat Lydia post Chloën:
Multi Lydia nominis
Romana vigui clarior Ilia.

5

Horatius.

Me nunc Thressa Chloë regit,
Dulces docta modos, et citharae sciens:
Pro qua non metuam mori,
Si parcent animae fata superstiti.

10

Lydia.

Me torret face mutua
Thurini Calais filius Ornyti:
Pro quo bis patiar mori,
Si parcent puero fata superstiti.

15

Horatius.

Quid? si prisca redit Venus,
Diductosque iugo cogit aëneo?
Si flava excutitur Chloë,
Reiectaeque patet ianua Lydiae?

20

IX, v. 5. *aliam* plures Codd. Benth. et Vand. Cf. Benth. et Both. Annot. — v. 9. *Cressa* Codd. aliquot Vand. alii. Cf. Benth.

Lydia.

Quamquam sidere pulchrior

Ille est, tu levior cortice, et improbo
Iracundior Hadria:

Tecum vivere amem, tecum obeam libens.

CARMEN X.

A D L Y C E N.

Carmen, quale παρακλαυσιθυρον Graeci vocant, quod ad amicae fores lamentabili voce canebatur,

Metrum quod I. 6.

Extremum Tanain si biberes, Lyce,
Saevo nupta viro: me tamen asperas
Porrectum ante fores obiicere incolis
Plorares Aquilonibus.

Audis, quo strepitu ianua, quo nemus 5
Inter pulchra satum tecta remugiat
Ventis? et positas ut glaciēt nives
Puro numine Iupiter?

Ingratam Veneri pone superbiam,
Ne currente rota funis eat retro. 10
Non te Penelopen difficilem procis
Tyrrhenus genuit parens.

O, quamvis neque te munera, nec preces,
Nec tinctus viola pallor amantium,
Nec vir Pieria pellice saucius 15
Curvat: supplicibus tuis

X, v. 1. *Tanain* Benth. e Codd. Olim vulgo *Tanaim*. — v. 3. *Proiectum* Benth. e coniectura. Cf. Jahn. — v. 6. *satum* Benth. e Codd. *situm* alii Codd. et Edd. vet. — v. 7. Benth. posito post *remugiat* signo interrogationis coni. *Sentis et pos.* — v. 10. Sic Benth. ex aliquot Codd. Vulgo: *Ne currente retro funis eat rota*. Cf. Doering et Fea.

Parcas, nec rigida mollior aesculo,
Nec Mauris animum mitior anguibus.
Non hoc semper erit liminis aut aquae
Coelestis patiens latus. ,

20

CARMEN XI.

AD MERCURIUM

Mercurium rogat atque lyram, ut obstinatum dominae animum flectant.

Metrum Sapphicum.

Mercuri, — nam te docilis magistro
Movit Amphion lapides canendo, —
Tuque Testudo, resonare septem
Callida nervis,

Nec loquax olim neque grata, nunc et
Divitum mensis et amica templis:
Dic modos, Lyde quibus obstinatas
Applicet aures;

5

Quae, velut latis equa trima campis,
Ludit exultim, metuitque tangi,
Nuptiarum expers, et adhuc protervo
Cruda marito.

10

Tu potes tigres comitesque silvas
Ducere, et rivos celeres morari:
Cessit immanis tibi blandienti
Ianitor aulae,

15

v. 18. Plerique Codd. *animo*. V. Benth.

XI, v. 18. Varie hic locus tentatus. Benth. coni. *muniant angues caput eius exeatque Spirit. tet.* Cuningamius: *quamquam furiale centum muniant angues caput aestuatque Spirit. tet.* Boethius: *quamquam furiale centum muniunt angues caput eiulatque Spirit.* Sed optime tuetur vulgatam lectionem Jahn.

Cerberus, quamvis furiale centum
Muniant angues caput eius, atque
Spiritus teter saniesque manet

Ore trilingui.

20

Quin et Ixion Tityosque vultu
Hisit invito; stetit urna paulum
Sicca, dum grato Danaï puellas
Carmine mulces.

Audiat Lyde scelus atque notas
Virginum poenas, et inane lymphæ
Dolium fundo percuntis imo,
Seraque fata,

25

Quæ manent culpas etiam sub Orco.
Impiæ, — nam quid potuere maius? —
Impiæ sponso potuere duro
Perdere ferro!

30

Una de multis, face nuptiali
Digna, periurum fuit in parentem
Splendide mendax, et in omne virgo
Nobilis ævum.

35

Surge, quæ dixit iuveni marito,
Surge, ne longus tibi somnus, unde
Non times, detur; socerum et scelestas
Falle sorores,

40

Quæ, velut nactæ vitulos leaenæ,
Singulos, cheu! lacerant. Ego illis
Mollior, nec te feriam, neque intra
Claustra tenebo.

Me pater sævis oncret catenis,
Quod viro clemens misero peperci:
Me vel extremos Numidarum in agros
Classe releget.

45

v. 30. Pro *nam* est *num* in uno Cod. Bentr. et Coll. Saxon.
— v. 43. Alii *nec intra* Cf. Bentr. —

1, pedes quo te rapiunt et aurae,
 Dum favet nox et Venus; i secundo
 Omine, et nostri memorem sepulcro
 Sculpe querelam.

50

CARMEN XII.

AD NEOBULEN.

Neobules sortem misere amantis dolet.

Metrum ionicum a minore.

Miserarum est, neque Amori dare ludum, neque dulci
 Mala vino lavere, aut exanimari metnentes
 Patruae verbera linguae. Tibi qualum Cythereae
 Puer ales, tibi telas, operosaeque Minervae
 Studium aufert, Neobule, Liparei nitor Hebri, 5
 Simul unctos Tiberinis humeros lavit in undis,
 Eques ipso melior Bellerophonte, neque pugno
 Neque segni pede victus: catus idem per apertum
 Fugientes agitato grege cervos iaculari, et
 Celer arcto latitantem fruticeto excipere aprum. 10

CARMEN XIII.

AD FONTEM BANDUSIUM.

Fonti Blandusino sacrificium promittit eiusque dicit laudes.

Metrum ut lib. I. Carm. 5.

O fons Bandusiae, splendidior vitro,
 Dulci digne mero, non sine floribus,

v. 52. *Sculpe* multi Codd. et Edd. quos enumerat Fea, quem Cf. Sed totidem fere *scalpe*.

XII, v. 5. Bothius auctore H. Stephano post *Hebri* plene interpungit. — v. 10. *arcto* vel *arcto* Codd. Lambin. Bentr. alii. Pleraque Edd. olim *alto*. Cf. Bentr. et Fea.

XIII, v. 1. Plurimae Edd. mendose *Blandusiae* V. Bentr. et Fea.

Cras donaberis haedo,
Cui frons turgida cornibus

Primis et Venerem et proelia destinat 5
Frustra: nam gelidos inficiet tibi
Rubro sanguine rivos
Lascivi suboles gregis.

Te flagrantis atrox hora Caniculae
Nescit tangere; tu frigus amabile 10
Fessis vomere tauris
Praebes, et pecori vago.

Fies nobilium tu quoque fontium,
Me dicente cavis impositam ilicem
Saxis, unde loquaces 15
Lymphae desiliunt tuae.

CARMEN XIV.

IN AUGUSTI EX HISPANIA REDITUM.

Metrum Sapphicum.

Herculis ritu modo dictus, o Plebs,
Morte venalem petiisse laurum
Caesar Hispana repetit Penates
Victor ab ora.

Unico gaudens mulier marito 5
Prodeat, iustis operata Divis,
Et soror clari ducis; et decorae
Supplice vitta

v. 16. Codd. Benth. et Vand. plurimaeque Edd. *Nymphae*
V. Jahn.

XIV, v. 6. Codd. aliquot Benth. Vand. et vett. Edd. *operata*
sacris. — v. 7. *cavi ducis* Codd. apud Benth. et Vand.

Virginum matres, iuvenumque nuper
 Sospitum. Vos o pueri, et puellae
 Iam virum expertes male ominatis
 Parcite verbis. 10

Hic dies vere mihi festus atras
 Eximet curas: ego nec tumultum,
 Nec mori per vim metuam, tenente
 Caesare terras. 15

I, pete unguentum, puer, et coronas,
 Et cadum Marsi memorem duelli,
 Spartacum si quâ potuit vagantem
 Fallere testa. 20

Dic et argutae properet Neaerae
 Myrrheum nodo cohibere crinem:
 Si per invisum mora ianitorem
 Fiet, abito. 25

Lenit albescens animos capillus
 Litium et rixae cupidos protervae:
 Non ego hoc ferrem, calidus iuventa.
 Consule Planco.

CARMEN XV.

A D C H L O R I N.

Monet eam, ut iam vetula petulantiae et libidini modum constituat.

Metrum quale I. 3.

Uxor pauperis Ibyci,
 Tandem nequitiae fige modum tuae,

v. 11. *Iam virum expertae* est Codd. lectio; quam nos sequimur ea Cunigamio debetur, plurimis Editoribus comprobata. Benth. coni. *Non vir. exp.* Codd. lectionem tuetur Doering. Eodem versu libri MSS. fluctuant inter *male ominata* et *male nominata*. Benth. coni. *male inominatis*. De toto versu inprimis Cf. Benth. Fea. Both. Annotatt. — v. 19. Both. coni. *siquae*.

XV, v. 2. Codd. quidam apud Lamb. et Vand. *pone modum*. Horat. I.

Famosisque laboribus;
 Maturo propior desine funeri
 Inter ludere virgines, 5
 Et stellis nebulam spargere candidis.
 Non, si quid Pholoënis satis,
 Et te, Chlōri, decet: filia rectius
 Expugnat iuvenum domos,
 Pulso Thyias uti concita tympano. 10
 Illam cogit amor Nothi
 Lascivae similem ludere capreae:
 Te lanae prope nobilem
 Tonsae Luceriam, non citharae, decent,
 Nec flos purpureus rosae, 15
 Nec poti, vetulam, faece tenus eadi.

CARMEN XVI.

AD MAECENATEM.

Execratur insanum divitiarum amorem, seque parvo beatum ostendit.

Metrum quod I. 6.

Inclusam Danaën turris aënea,
 Robustaeque fores, et vigilum canum
 Tristes excubiae munierant satis
 Nocturnis ab adulteris;
 Si non Acrisium, virginis abditae 5
 Custodem pavidum, Iupiter et Venus
 Risissent: fore enim tutum iter et patens
 Converso in pretium Deo.
 Aurum per medios ire satellites,
 Et perrumpere amat saxa potentius 10
 Ictu fulmineo. Concidit auguris
 Argivi domus ob lucrum

f v. 10. *Thyias* pro vulgato *Thyas* Benth. quem V. ad II, 19, 9. —
 v. 16. Plures Codd. et vet. Edd. *vetula* Cf. Benth. et Both. Annotatt.

Demersa exitio. Diffidit urbium
 Portas vir Macedo, et subruit aemulos
 Reges muneribus. Munera navium 15
 Saevos illaqueant duces.

Crescentem sequitur cura pecuniam,
 Maiorumque fames. Iure perhorru
 Late conspicuum tollere verticem,
 Maecenas, equitum decus. 20

Quanto quisque sibi plura negaverit,
 Ab Dis plura feret. Nil cupientium
 Nudus castra peto, et transfuga divitum
 Partes linquere gestio, 25

Contemtae dominus splendidior rei,
 Quam si, quidquid arat impiger Appulus,
 Occultare meis dicerer horreis,
 Magnas inter opes inops.

Purae rivus aquae, silvaeque iugerum
 Paucorum, et segetis certa fides meae, 30
 Fulgentem imperio fertilis Africae
 Fallit sorte beator.

Quamquam nec Calabriae mella ferunt apes,
 Nec Laestrygonia Bacchus in amphora
 Languescit mihi, nec pinguis Gallicis 35
 Crescunt vellera pascuis;

Importuna tamen Pauperies abest,
 Nec, si plura velim, tu dare deneges.
 Contracto melius parva cupidine
 Vectigalia porrigam, 40

XVI, v. 13. *exitio* plurimi Codd. et antiquissimae Edd. Alii Codd. et magna Edd. pars *excidio*. Vid. Benth. et Fea. — v. 22. Plurimi Codd. *Ab dis*; alii, ut Fea et pleraeque Edd. *a dis*. — v. 26. Pauci tantum Codd. *non piger*. Vid. Benth. et Both. Annotatt. — v. 32. Alii interpunctionem pleniorum post *fallit* ponunt. Cf. Doering. et Iahn. Benth. coni. *fulgente*. — v. 39. *Contracta* Cod. Brod. Coll. Saxon. et aliquot Edd. vet.

Quam si Mygdoniis regnum Alyattei
Campis continuem. Multa petentibus
Desunt multa. Bene est, cui Deus obtulit
Parca, quod satis est, manu.

CARMEN XVII.

AD AELIUM LAMIAM.

Suadet ei, ut crastinum diem, qui pluvius fore videretur, hilariter transigat, qua ratione fortasse poeta, ab amico se invitari velle in hunc diem, lepide significavit.

Metrum Alcaicum.

Aeli, vetusto nobilis ab Lamo, —
Quando et priores hinc Lamias ferunt
Denominatos, et nepotum
Per memores genus omne fastos
Auctere ab illo ducit originem, 5
Qui Formiarum moenia dicitur
Princeps et innantem Maricae
Litoribus tenuisse Lirim,
Late tyrannus: — cras foliis nemus
Multis et alga litus inutili 10
Demissa tempestas ab Euro
Sternet, aquae nisi fallit augur
Annosa cornix. Dum potis, aridum
Compone lignum: cras Genium mero
Curabis et porco bimestri, 15
Cum famulis operum solutis.

v. 41. *Alyattici* antiquissimae Edd. unde in plurimas sequentium fluxit: perperam. Bentleius, quem V. *Alyattei* aut *Alyattium* legendum esse docuit.

XVII, v. 4. Nonnulli Codd. *fastus*. Vid. Benth. — v. 5. *ducis* omnes Codd. quam lectionem bene tuetur Iahn. *ducit* e conjectura Heinsii, quem post Bentleium plurimi editores secuti sunt. — v. 13. *potis* Benth. e Codd. Vulgata lectio: *potes*.

CARMEN XVIII.
A D F A U N U M.

Faunalibus, quae Nonis erant Decembribus, Fauno hymnum canit.

Metrum Sapphicum.

Faune, Nympharum fugientum amator,
Per meos fines et aprica rura
Lenis incedas, abeasque parvis
 Aequis alumnis:

Si tener pleno cadit haedus anno, 5
Larga nec desunt Veneris sodali
Vina craterae, vetus ara multo
 Fumat odore.

Ludit herboso pecus omne campo,
Quum tibi Nonae redeunt Decembres; 10
Festus in pratis vacat otioso
 Cum bove pagus;

Inter audaces lupus errat agnos;
Spargit agrestes tibi silva frondes;
Gaudet invisam pepulisse fossor 15
 Ter pede terram.

CARMEN XIX.
A D T E L E P H U M.

Murena auguratum adepto, Horatius Telephum sodalem suum hortatur, ut relictis doctis nugis hilari secum convivio adsit.

Metrum quod I. 3.

Quantum distet ab Inacho
Codrus, pro patria non timidus mori,

Narras, et genus Aeaci,
 Et pugnata sacro bella sub Ilio;
 Quo Chium pretio cadum 5
 Mercemur, quis aquam temperet ignibus,
 Quo praebente domum et quota
 Pelignis caream frigoribus, taces.
 Da Lunae properae novae,
 Da noctis mediae, da, puer, auguris 10
 Murenæ: tribus aut novem
 Miscentur cyathis pocula commodis.
 Qui Musas amat impares,
 Ternos ter cyathos attonitus petet
 Vates: tres prohibet supra 15
 Rixarum metuens tangere Gratia,
 Nudis iuncta Sororibus.
 Insanire iuvat: cur Berecynthiae
 Cessant flamina tibiae?
 Cur pendet tacita fistula cum lyra? 20
 Parcentes ego dexteras
 Odi: sparge rosas; audiat invidus
 Dementem strepitum Lycus,
 Et vicina seni non habilis Lyco.
 Spissa te nitidum coma, 25
 Puro te similem, Telephe, Vespero,
 Tempestiva petit Rhode:
 Me lentus Glycerae torret amor meao.

XIX, v. 11. Plures Edd. *Muraenae*: perperam. V. Fea. —
 v. 12. *Miscentur* omnes Codd. *miscentor* Benth. c. coniectura
 Heinsii, quod plurimi recentiorum Editorum praetulerunt. Sed
 Codd. lectionem bene explicat Iahn.

CARMEN XX.

AD PYRRHUM.

Carmen amatorii generis, quo Pyrrhum monet ne a puella amante Nearchum, formosum puerum abstrahere conetur.

Metrum Sapphicum.

Non vides, quanto moveas periculo,
Pyrrhe, Gaetulae catulos leaenae?

Dura post paulo fugies inaudax

Proelia raptor,

Quum per obstantes iuvenum catervas

5

Ibit insignem repetens Nearchum:

Grande certamen, tibi praeda cedat

Maior an illi.

Interim, dum tu celeres sagittas

Promis, haec dentes acuit timendos,

10

Arbiter pugnae posuisse, nudo

Sub pede palmam

Fertur, et leni recreare vento

Sparsum odoratis humerum capillis:

Qualis aut Nireus fuit, aut aquosa

15

Raptus ab Ida.

CARMEN XXI.

AD AMPHORAM.

Amphoram generosi et vetusti vini alloquitur in Corvini gratiam promendam.

Metrum Alcaicum.

O nata mecum consule Manlio,

Seu tu querelas, sive geris iocos,

XX, v. 1. *moveas tumultu* Codd. apud Benth. et Vand. — v. 3. *paulum* Cod. Brod. Coll. Saxon. aliique libri et Edd. vett. — v. 6. Post *Nearchum* Doering. minori interpunctione utitur, ut *certamen* appositio fiat eius nominis.

Seu rixam et insanos amores,
 Seu facilem, pia testa, somnum,
 Quocunque lectum nomine Massicum 5
 Servas, moveri digna bono die:
 Descende, Corvino iubente,
 Promere languidiora vina.
 Non ille, quamquam Socraticis madet
 Sermonibus, te negliget horridus: 10
 Narratur et prisci Catonis
 Saepe mero caluisse virtus.
 Tu lene tormentum ingenio admoves
 Plerumque duro; tu sapientium
 Curas et arcanum iocoso 15
 Consilium retegis Lyaeo;
 Tu spem reducis mentibus anxiiis
 Viresque, et addis cornua pauperi,
 Post te neque iratos trementi
 Regum apices, neque militum arma. 20
 Te Liber, et, si laeta aderit, Venus,
 Segnesque nodum solvere Gratiae,
 Vivaque producent lucernae,
 Dum rediens fugat astra Phoebus.

CARMEN XXII.

A D D I A N A M.

Dianae pinum villae suae propinquam dedicat.

Metrum Sapphicum.

Montium custos nemorumque, Virgo,
 Quae laborantes utero puellas
 Ter vocata audis, adimisque leto,
 Diva triformis,

XXI, v. 5. *numine* Cod. quidam Feae itemque Vand. *factum numine* coniecerat Bentl. — v. 12. *incaluisse* ex citat. Marii Victorini Bentl. quem Cf.

Imminens villae tua pinus esto,
 Quam per exactos ego lactus annos
 Verris obliquum meditantis ictum
 Sanguine donem.

CARMEN XXIII.

AD PHIDYLEN.

Phidylen de tenuitate sacrificiorum diis a se oblаторum consolatur, eaque, modo ab innocenti animo proficiscantur, numini gratissima esse docet.

Metrum Alcaicum.

Coelo supinas si tuleris manus
 Nascente Luna, rustica Phidyle,
 Si thure placaris et horna
 Fruge Lares, avidaque porca:
 Nec pestilentem sentiet Africum
 Fecunda vitis, nec sterilem seges
 Robiginem, aut dulces alumni
 Pomifero grave tempus anno.
 Nam, quae nivali pascitur Algidio
 Devota quercus inter et ilices,
 Aut crescit Albanis in herbis,
 Victima, pontificum secures
 Cervice tinguet. Te nihil attinet
 Tentare multa caede bidentium
 Parvos coronantem marino
 Rore Deos fragilique myrto.
 Immunis aram si tetigit manus,
 Non sumtuosa blandior hostia,
 Mollivit aversos Penates,
 Farre pio et saliente mica.

XXIII, v. 7. Plures Codd. et Edd. *rubiginem*. Vid. Fea. — v. 12. *securim* Bentl. e Codd. Cf. Jani. — v. 19. Plerique Codd. *mollibit*, alii *mollivit* aut *mollirit*. Cf. Bentl. et Fea.

CARMEN XXIV.

Seculi sui vitia insectatur et eorum remedium proponit.

Metrum quale I. 3.

Intactis opulentior	
Thesauris Arabum et divitis Indiae,	
Caementis licet occupes	
Thyrrhenum omne tuis et mare Apulicum,	
Si figit adamantinos	5
Summis verticibus dira Necessitas	
Clavos, non animum metu,	
Non mortis laqueis expedies caput.	
Campestres melius Scythae,	
Quorum plastra vagas rite trahunt domos,	10
Vivunt, et rigidi Getae:	
Immetata quibus iugera liberas	
Fruges et Cererem ferunt,	
Nec cultura placet longior annua,	
Defunctumque laboribus	15
Aequali recreat sorte vicarius.	
Illic matre carentibus	
Privignis mulier temperat innocens;	
Nec dotata regit virum	
Coniux, nec nitido fidit adultero:	20
Dos est magna parentium	
Virtus, et metuens alterius viri	
Certo foedere castitas,	
Et peccare nefas, aut pretium emori.	
O quisquis volet impias	25
Caedes et rabiem tollere civicam,	
Si quaeret Pater urbium,	
Subscribi statuis, indomitam audeat	

XXIV, v. 24. *pretium est mori* plerique Codd. *pretium mori* aliquot apud Benth. alii, *pret. emori.* unus Pulmanni. Cf. Both. Annotatt. — v. 25. *O quis, quis . . civicam?* Benth.

Refrenare licentiam,	
Clarus postgenitis, quatenus, heu nefas,	30
Virtutem incolumem odimus,	
Sublatam ex oculis quaerimus invidi.	
Quid tristes querimoniae,	
Si non supplicio culpa reciditur?	
Quid leges, sine moribus	35
Vanae, proficiunt, si neque fervidis	
Pars inclusa caloribus	
Mundi, nec Boreae finitimum latus,	
Durataeque solo nives,	
Mercatorem abigunt; horrida callidi	40
Vincunt aequora navitae;	
Magnum pauperies opprobrium iubet	
Quidvis et facere et pati,	
Virtutisque viam deserit arduae?	
Vel nos in Capitolium,	45
Quo clamor vocat et turba faventium,	
Vel nos in mare proximum	
Genmmas, et lapides, aurum et inutile,	
Summi materiem mali,	
Mittamus, scelorum si bene poenitet.	50
Eradenda cupidinis	
Pravi sunt elementa, et tenerae nimis	
Mentes asperioribus	
Formandae studiis. Nescit equo rudis	
Haerere ingenus puer,	55
Venarique timet; ludere doctior,	
Seu Graeco iubeas trocho,	
Seu malis vetita legibus alea,	
Quum periura patris fides	
Consortem, socium fallat et hospites,	60

v. 30. *Carus* Cod. Canteri Cf. Benth. — v. 39. *Pro solo* Benth. coni. *gelu*, quem refellit Cuning. — v. 50. *scelerum si* etc. Fea cum seqq. coniungit. Sed Cf. Both. Annotatt. — v. 54. *Firman-
dae* Benth. c coniectura. Cf. Fea. — v. 60. *Consortem* virgula

Indignoque pecuniam

Heredi properet. Scilicet improbae

Crescunt divitiae; tamen

Curtae nescio quid semper abest rei.

CARMEN XXV.

A D B A C C H U M.

Carmen dithyrambici generis, quo poeta uberioribus Augusti laudibus a se canendis praeludere vult videri.

Metrum ut in proxime antecedenti Carmine.

Quo me, Bacche, rapis tui

Plenum? Quae nemora aut quos agor in specus,

Velox mente nova? Quibus

Antris egregii Caesaris audiar

Aeternum meditans deus

5

Stellis inserere et consilio Iovis?

Dicam insigne, recens, adhuc

Indictum ore alio. Non secus in iugis

Exsomnia stupet Evias,

Hebrum prospiciens, et nive candidam

10

Thracen, ac pede barbaro

Lustratam Rhodopen; ut mihi devio

Ripas et vacuum nemus

Mirari libet! O Naiadum potens

Baccharumque valentium

15

separandum a voce *socium* Cf. Bentl. et Fca. — *hospites* Bentl. c meliore parte Codd. Reliqui *hospitem*.

XXV, v. 2. Ita meliores Codd. et vett. Edd. *Aliae quae in nemora*. Vid. Bentl. — v. 6. *consilio* multi Codd. et vett. Edd. Sed olim in plerisque Edd. *concilio*. Vid. Fca et Both. — v. 12. Haec omnium fere Codd. lectio est; sed pleraeque Editiones punctum post *Rhodopen* collocant. Bentl. ex aliquot Codd. *ac mihi*. Cf. Both. Annotatt. — v. 13. *Ripas* Omnes Codd. *rupes* Muret. *ivos* Bentl.

Proceras manibus vertere fraxinos:
 Nil parvum aut humili modo,
 Nil mortale loquar. Dulce periculum est,
 O Lенаее! sequi Deum
 Cingentem viridi tempora pampino. 20

CARMEN XXVI.

A D V E N E R E M.

Amare desiturus lyram et aliam suppellectilem amatoriam
 Veneri dedicat.

Metrum Alcaicum.

Vixi puellis nuper idoneus,
 Et militavi non sine gloria:
 Nunc arma defunctumque bello
 Barbiton hic paries habebit,
 Laevum marinae qui Veneris latus 5
 Custodit. Hic, hic ponite lucida
 Funalia, et vectes, et arcus
 Oppositis foribus minaces.
 O quae beatam, Diva, tenes Cyprum, et
 Memphin carentem Sithonia nive, 10
 Regina, sublimi flagello
 Tange Chloën semel arrogantem.

v. 16. *fraxinus* Cod. Graevian. et aliquot Vand. V. Benth. ad
 Carm. II, 15, 16.

XXVI, v. 7. *vectis securesque* con. Benth. quem V. *harpas*
 con. Cuning. Cf. Both. Annotatt. — v. 10. *Memphin* Benth. c
 Codd. Aliae Edd. *Memphim*. Cf. Fea.

CARMEN XXVII.
AD GALATEAM.

Galateam ab itinere ob imminentes tempestates dehortatur.

Metrum Sapphicum.

Impios parrae recinentis omen
Ducat, et praegnans canis, aut ab agro
Rava decurrens lupa Lanuvino,
Fetaque vulpes;

Rumpat et serpens iter institutum,
Si per obliquum similis sagittae
Terruit mannos: ego cui timebo,
Providus auspex,

5

Antequam stantes repetat paludes
Imbrium divina avis imminetum,
Oscinem corvum prece suscitabo
Solis ab ortu.

10

Sis licet felix, ubicunque mavis,
Et memor nostri, Galatea, vivas;
Teque nec laevus vetet ire picus,
Nec vaga cornix.

15

Sed vides, quanto trepidet tumultu
Pronus Orion. Ego, quid sit ater
Hadriae, novi, sinus, et quid albus
Peccet Iapyx.

20

Hostium uxores puerique caecos
Sentiant motus orientis Austri, et
Aequoris nigri fremitum, et trementes
Verbere ripas.

XXVII, v. 3. *Lanuvino* Fea quem Cf. — v. 5. *rumpit* Benth. e Cod. Graev. itemque unus Vand. Sed V. Jahn. — v. 15. Benth. e Cod. Lamb. *vetat*, itemque Cod. Brod. — v. 22. *orientis haedi* conl. Muret. Sed V. Benth.

Sic et Europe niveum doloso 25
 Credidit tauro latus, et scatentem
 Beluis pontum mediasque fraudes
 Palluit audax.

Nuper in pratis studiosa florum, et
 Debitae Nymphis opifex coronae, 30
 Nocte sublustri nihil astra praeter
 Vidit et undas.

Quae simul centum tetigit potentem
 Oppidis Creten, Pater, o relictum
 Filiae nomen, pietasque, dixit, 35
 Victa furore!

Unde? quo veni? Levis una mors est
 Virginum culpae. Vigilansne ploro
 Turpe commissum? an vitiis carentem
 Ludit imago 40

Vana, quae porta fugiens eburna
 Somnium ducit? Meliusne fluctus
 Ire per longos fuit, an recentes
 Carpere flores?

Si quis infamen mihi nunc iuvenum 45
 Dedat iratae! lacerare ferro et
 Frangere enitar modo multum amati
 Cornua monstri.

Impudens liqui patrios Penates:
 Impudens Orcum moror! O Deorum 50
 Si quis haec audis, utinam inter errem
 Nuda leones!

Antequam turpis macies decentes
 Occupet malas, teneraeque succus
 Defluat praedae, speciosa quaero 55
 Pascere tigres.

v. 34. *O pater, O relictum* unus Cod. apud Benth. quem Cf.
 — v. 39. *vicio* Benth. contra omnes Codd. Vid. Gesner. —
 v. 48. *tauri* pro *monstri* multae Edd. V. Benth. —

Vilis Europe, pater urget absens,
 Quid mori cessas? Potes hac ab orno
 Pendulum zona bene te secuta
 Laedere collum.

60

Sive te rupes et acuta leto
 Saxa delectant, age, te procellae
 Crede veloci; nisi herile mavis
 Carpere pensum,

Regius sanguis, dominaeque tradi
 Barbarae pellex. Aderat querenti
 Perfidum ridens Venus, et remisso
 Filius areu.

65

Mox, ubi lusit satis, Abstineto,
 Dixit, irarum calidaeque rixae,
 Quum tibi invisus laceranda reddet
 Cornua taurus.

70

Uxor invieti Iovis esse nescis:
 Mitte singultus; bene ferre magnam
 Disce fortunam: tua sectus orbis
 Nomina ducet.

75

CARMEN XXVIII.

A D L Y D E N.

Amicam fidicinam ad festum Neptuni hilariter celebrandum
 invitat.

Metrum I. 3.

Festo quid potius die
 Neptuni faciam? Prome reconditum,
 Lyde, strenua Caecubum,
 Munitaeque adhibe vim sapientiae.

v. 59. *secuta e* — *lidere* aliquot Lamb. Codd. idque praetulit
 Bentl. Cf. Jahn.

XXVIII, 2. *facias* Bentl. coni. Cf. Both. Annotatt.

Inclinare meridiem 5
 Sentis; ac, veluti stet volueris dies,
 Parcis deripere horreo
 Cessantem Bibuli Consulis amphoram?
 Nos cantabimus invicem
 Neptunum, et virides Nereïdum comas: 10
 Tu curva recines lyra
 Latonam, et celeris spicula Cynthiae;
 Summo carmine, quae Cnidon
 Fulgentesque tenet Cycladas, et Paphon
 Iunctis visit oloribus. 15
 Dicetur merita Nox quoque naenia.

CARMEN XXIX.

AD MAECENATEM.

Invitat eum, ut relictâ urbe publicisque negotiis, rure
 apud se hilariter degat.

Metrum Alcaicum.

Tyrrhena regum progenies, tibi
 Non ante verso lene merum cado,
 Cum flore, Maecenas, rosarum, et
 Pressa tuis balanus capillis
 Iam dudum apud me est. Eripe te morae: 5
 Ne semper udum Tibur et Aesulae
 Declive contempleris arvum, et
 Telegoni iuga parricidae.
 Fastidiosam desere copiam, et
 Molem propinquam nubibus arduis; 10
 Omitte mirari beatae
 Fumum et opes strepitumque Romae.

— v. 9. *in vices* aliquot Codd. Vid. Both. Annotatt.
 XXIX, v. 2. *versum* Cod. Brod. et aliquot Vand.

- Plerumque gratae divitibus vices,
 Mundaque parvo sub lare pauperum
 Coenae, sine aulaeis et ostro, 15
 Sollicitam explicuere frontem.
- Iam clarus occultum Andromedae pater
 Ostendit ignem; iam Procyon furit
 Et stella vesani Leonis,
 Sole dies referente siccos. 20
- Iam pastor umbras cum grege languido
 Rivunque fessus quaerit, et horridi
 Dumeta Silvani, caretque
 Ripa vagis taciturna ventis.
- Tu, civitatem quis deceat status, 25
 Curas, et Urbi sollicitus times,
 Quid Seres et regnata Cyro
 Bactra parent Tanaisque discors.
- Prudens futuri temporis exitum
 Caliginosa nocte premit Deus, 30
 Ridetque, si mortalis ultra
 Fas trepidat. Quod adest, memento
- Componere aequus: cetera fluminis
 Ritu feruntur, nunc medio alveo
 Cum pace delabentis Etruscum 35
 In mare, nunc lapides adesos,
- Stirpesque raptas, et pecus et domos
 Volventis una, non sine montium
 Clamore vicinaeque silvae,
 Quum fera diluvies quietos 40
- Irritat amnes. Ille potens sui
 Laetusque deget, cui licet in diem

v. 17. *Andromedes* quaedam Edd. vett. Cf. Benth. — v. 25. *qui* Fabr. Cuning. — v. 28. *dissors* coni. Benth. — v. 42. *degit* plures Codd. Vand. et Feac.

Dixisse, Vixi: cras vel atra
 Nube polum Pater occupato,
 Vel sole puro; non tamen irritum, 45
 Quodcunque retro est, efficiet, neque
 Dissinget infectumque reddet,
 Quod fugiens semel hora vexit.
 Fortuna saevo laeta negotio, et
 Ludum insolentem ludere pertinax, 50
 Transmutat incertos honores,
 Nunc mihi, nunc alii benigna.
 Laudo manentem: si celeres quatit
 Pennas, resigno quae dedit, et mea
 Virtute me involvo, probamque 55
 Pauperiem sine dote quaero.
 Non est meum, si mugiat Africis
 Malus procellis, ad miseras preces
 Decurrere, et votis pacisci,
 Ne Cypriae Tyriaeque merces 60
 Addant avaro divitias mari.
 Tum me biremis praesidio scaphae
 Tutum per Aegaeos tumultus
 Aura feret geminusque Pollux.

CARMEN XXX.

Nominis sui immortalitatem vaticinatur.

Metrum I. 1.

Exegi monumentum aere perennius,
 Regalique situ pyramidum altius,
 Quod non imber edax, non Aquilo impotens

v. 47. *dissinget* aliquot Codd. Lamb. *diffundet* alii apud Ianium.
 — v. 60. *Syriaeque* Codd. aliquot Vanderb. quem V. — v. 62.
 Codd. Feae, alii *tunc*. Bentl. e Codd. *ferat*.

Possit diruere, aut innumerabilis	
Annorum series, et fuga temporum.	5
Non omnis moriar, multaque pars mei	
Vitabit Libitinam. Usque ego postera	
Crescam laude recens, dum Capitolium	
Scandet cum tacita Virgine pontifex.	
Dicar, qua violens obstrepit Ausidus,	10
Et qua pauper aquae Daunus agrestium	
Regnavit populorum, ex humili potens,	
Princeps Aeolium carmen ad Italos	
Deduxisse modos. Sume superbiam	
Quaesitam meritis, et mihi Delphica	15
Lauro cinge volens, Melpomene, comam.	

XXX, v. 12. *regnator* multi Codd. et Edd. vett. Vid. Fea et Bentl.

Q. HORATII FLACCI
C A R M I N U M.

LIBER QUARTUS.

CARMEN I.

AD VENEREM.

Se aetate iam proVectiori denuo amoribus irretiri conqueritur.

Metrum ut lib. I. Carm. 3.

Intermissa, Venus, diu

Rursus bella moves? Parce, precor, precor!

Non sum, qualis eram bonae

Sub regno Cinarae. Desine, dulcium

Mater saeva Cupidinum,

5

Circa lustra decem flectere mollibus

Iam durum imperiis. Abi,

Quo blandae iuvenum te revocant preces.

Tempestivius in domum

Paulli, purpureis ales oloribus,

10

Comissabere Maximi,

Si torrere iecur quaeris idoneum.

Namque et nobilis, et decens,

Et pro sollicitis non tacitus reis,

I, v. 2. De signo interrogationis h. l. ponendo cum Vanderburgio et Bothio Cf. Iahn. — v. 9. Ita Benth. e Codd. quibus accedunt Codd. Vand. et Feae. Alii *domo*. Vid. Benth.

Et centum puer artium,	15
Late signa feret militiae tuae;	
Et quandoque potentior	
Largis muneribus riserit aemuli,	
Albanos prope te lacus	
Ponet marmoream, sub trabe Cypria.	20
Illic plurima naribus	
Duces thura, lyraeque et Berecynthiae	
Delectabere tibiae	
Mixtis carminibus, non sine fistula.	
Illic bis pueri die	25
Numen cum teneris virginibus tuum	
Laudantes, pede candido	
In morem Salinum ter quatient humum.	
Me nec femina, nec puer	
Iam, nec spes animi credula mutui,	30
Nec certare iuvat mero,	
Nec vincere novis tempora floribus. —	
Sed cur, hen, Ligure, cur	
Manat rara meas lacrima per genas?	
Cur facunda parum decoro	35
Inter verba cadit lingua silentio?	
Nocturnis te ego somniis	
Iam captum teneo, iam voluerem sequor	
Te per gramina Martii	
Campi, te per aquas, dure, volubilis.	40

v. 18. Aliquot Codd. apud Benth. et Feam *largi*, quod recepit Benth. — v. 20. Haud pauci Codd. *trabe citrea*, sed plures *Cypria* Vid. Mitscherlich et Fea. — v. 22. Codd. aliquot *lyra*, *Berecynthia*, *tibia* quod praetulit Benth. quem Vid. — v. 37. Ita Lambin. Torrent. alii, itemque plures Vand. Codd. Reliqui omitunt *te*. Cf. Benth.

CARMEN II.

AD IULUM ANTONIUM.

Monet Iulum Antonium, ut Augustum e bello Germanico
reducem carmine Pindarico celebret, cuius quidem granditati
dum se imparem esse affirmat, Augusti tamen laudes et ipse
splendidissimis et gravissimis versibus complectitur.

Metrum Sapphicum.

Pindarum quisquis studet aemulari,
Iule, ceratis ope Daedalea
Nititur pennis, vitreo daturus
Nomina ponto.

Monte decurrens velut amnis, imbres 5
Quem super notas aluere ripas,
Fervet immensusque ruit profundo
Pindarus ore,

Laurea donandus Apollinari,
Seu per audaces nova dithyrambos 10
Verba devolvit, numerisque fertur
Lege solutis;

Seu Deos, regesve canit, Deorum
Sanguinem, per quos cecidere iusta
Morte Centauri, cecidit tremendae 15
Flamma Chimaerae;

Sive, quos Elea domum reducit
Palma coelestes, pugilemve equumve
Dicit, et centum potiore signis
Munere donat; 20

II, v. 2. De voce *Iule* non, ut aliqui faciunt, in duo versiculos
distrahendo (*aemulari, I—ule*) Cf. Iahn. — v. 6. Plures Codd.
apud Benth. Iani. Vand. *Quum super notas saliere vel saluere*
ripas. Cf. Benth. — *totas* pro *notas* Codd, Fabricii Vid. Fea. —

Flebili sponsae iuvenemve raptum
 Plorat, et vires animumque moresque
 Aureos educit in astra, nigroque
 Invidet Orco.

Multa Dircaeum levat aura cycnum, 25
 Tendit, Antoni, quoties in altos
 Nubium tractus; ego, apis Matinae
 More modoque,

Grata carpentis thyma per laborem
 Plurimum, circa nemus uvidique 30
 Tiburis ripas operosa parvus
 Carmina fingo.

Concines maiore poëta plectro
 Caesarem, quandoque trahet feroces
 Per sacrum clivum, merita decorus 35
 Fronde, Sygambros:

Quo nihil maius meliusve terris
 Fata donavere bonique Divi,
 Nec dabunt, quamvis redeant in aurum
 Tempora priscum. 40

Concines laetosque dies, et Urbis
 Publicum ludum, super impetrato
 Fortis Augusti reditu, forumque
 Litibus orbum.

Tum meae, si quid loquor audiendum, 45
 Vocis accedet bona pars, et, O Sol
 Pulcher, o laudande, canam, recepto
 Caesare felix.

Tuque dum procedis, Io triumphè,
 Non semel dicemus, Io triumphè, 50

v. 30. Plerique ita interpungunt ut *plurimum cum laborem* coniungatur, Bentleyus contra post vocem *laborem* incidit. —
 v. 31. *Tiburis rivos* Benth. e coniect. Cf. ad Od. III, 25, 13. —
 v. 45. *loquor* Benth. e Codd. Vulgata lectio: *loquar*. Cf. Benth. —
 v. 49. Codd. variant inter *Tuque* et *Tequè*, Benth. e coniectura *Isque*

Civitas omnis, dabimusque Divis
 Thura benignis.
 Te decem tauri totidemque vaccae,
 Me tener solvet vitulus, relictæ
 Matre, qui largis iuvenescit herbis 55
 In mea vota,
 Fronte curvatos imitatus ignes
 Tertium Lunae referentis ortum,
 Qna notam duxit, niveus videri,
 Cetera fulvus. 60

CARMEN III.

AD MELPOMENEN.

Dotibus et honore a Musa sibi concessis fruitur et gloriatur.

Metrum I. 3.

Quem tu, Melpomene, semel
 Nascentem placido lumine videris,
 Illum non labor Isthmius
 Clarabit pugilem; non equus impiger 5
 Curru ducet Achaico
 Victorem, neque res bellica Deliis
 Ornatum foliis ducem,
 Quod regum tumidas contuderit minas,
 Ostendet Capitolio;
 Sed quae Tibur aquae fertile perfluunt, 10
 Et spissae nemorum comae,
 Fingent Aeolio carmine nobilem.
 Romae principis urbium
 Dignatur suboles inter amabiles

dum proc. Bothius recepto *Caesare felix Teque. Dum etc.* De nostra lectione Cf. Doering. — v. 58. Plures Codd. *orbem* Vid. Benth. III, v. 10. Ita multi Codd. et Edd. vet.; *praefluunt* Codd. apud Benth. alios; nonnullae Edd. *profluunt* vel *proluunt*. Vid. Benth. et Fea.

Vatum ponere me choros, 15
 Et iam dente minus mordeor invido.
 O, testudinis aureae
 Dulcem quae strepitum, Pieri, temperas:
 O, mutis quoque piscibus
 Donatura cygni, si libeat, sonum, 20
 Totum muneris hoc tui est,
 Quod monstror digito praetereuntium
 Romanae fidicen lyrae:
 Quod spiro et placeo, si placeo, tuum est.

CARMEN IV.

DRUSI LAUDES.

Drusum, Augusti privignum, ob devictos (A. U. C. 738. ante
 Christ. nat. 12.) Vindelicos collaudat.

Metrum Alcicum.

Qualem ministrum fulminis alitem,
 Cui rex Deorum regnum in aves vagas
 Permisit, expertus fidelem
 Iupiter in Ganymede flavo,
 Olim iuventas et patrius vigor 5
 Nido laborum propulit inscium,
 Vernique, iam nimbis remotis,
 Insolitos docuere nisus
 Venti paventem; mox in ovilia
 Demisit hostem vividus impetus; 10
 Nunc in reluctantes dracones
 Egit amor dapis atque pagnae:
 Qualemve lactis caprea pascuis
 Intenta, fulvae matris ab ubere

IV, v. 6. *protulit* Codd. Torrentii, alii. — v. 7. *Vernisque*
 haud pauci Codd. apud Benth. Vand. Fea. Cf. Benth. et Mitscherl.

- Iam lacte depulsum leonem,
Dente novo peritura, vidit: 15
- Videre Raetis bella sub Alpibus
Drusum gerentem Vindelici; quibus
Mos unde deductus per omne
Tempus Amazonia securi 20
- Dextras obarmet, quaerere distuli;
Nec scire fas est omnia: sed diu
Lateque victrices catervae,
Consiliis iuvenis revictae,
- Sensere, quid mens rite, quid indoles 25
Nutrita faustis sub penetralibus,
Posset, quid Augusti paternus
In pueros animus Neronēs.
- Fortes creantur fortibus et bonis:
Est in iuvenis, est in equis, patrum 30
Virtus, neque imbellem feroces
Progenerant aquilae columbam.
- Doctrina sed vim promovet insitam,
Rectique cultus pectora roborant:
Utrunque defecere mores, 35
Indecorant bene nata culpae.
- Quid debeas, o Roma, Neronibus,
Testis Metaurum flumen, et Hasdrubal.

— v. 15. pro lacte coni. Benth. mane aut sponte. Cf. Doering. —
v. 17. *Raetis* coni. Heinsius et Benth. eodemque quaedam Codd.
vestigia ducunt V. Benth. et Fea. Sed omnes fere Codd. et plu-
rimae vet. Edd. *Rhaeti*. Unus Cod. Benth. et aliquot Edd.
Rhaeti . . . et *Vindelici* addita copula. De scrip. *Raetis* sine
li. era aspirante V. Fea. De loco universo Vid. inprimis Benth.
— v. 24. *repressae* Benth. ex aliquot Codd. quem V. collatis
Doering. et Iahn. *revictae* Codd. aliquot Vand. — v. 29. Plures
post *fortibus* incidunt, ut *bonis* cum *iuvenis* coniungatur. Cf.
Benth. Both Annotatt. et Fea. — v. 36. Ita Benth. e vetere
Schol. et Codd. Olim vulg. *Dedecorant*.

Devictus, et pulcher fugatis Ille dies Latio tenebris,	40
Qui primus alma risit adorea, Dirus per urbes Afer ut Italas, Ceu flamma per taedas, vel Eurus Per Siculas equitavit undas.	45
Post hoc secundis usque laboribus Romana pubes crevit, et impio Vastata Poenorum tumultu Fana Deos habuere rectos;	50
Dixitque tandem perfidus Hannibal: Cervi, luporum praeda rapacium, Sectamur ultro, quos opimus Fallere et effugere est triumphus.	55
Gens, quae cremato fortis ab Illo Iactata Tuscis aequoribus sacra, Natosque, maturosque patres Pertulit Ausonias ad urbes,	60
Duris ut ilex tonsa bipennibus Nigrae feraci frondis in Alcido, Per damna, per caedes, ab ipso Ducit opes animumque ferro.	65
Non Hydra secto corpore firmior Vinci dolentem crevit in Herculem, Monstrumve submittere Colchi Maius, Echioniaeve Thebae.	
Merses profundo, pulchrior evenit: Luctere, multa proruet integrum Cum laude victorem, geretque Proelia coniugibus loquenda.	

— v. 48. *tectos* Cod. Brod. Vid. Fea. — v. 65. Alii Codd. *mersus* aut *merges* aut *merge* V. Benth. et Vand. — v. 66, *pro-ruit* Benth. e Codd. ut mox *geritque* et *perficiunt*.

Carthagini iam non ego nuntios
 Mittam superbos: occidit, occidit 70
 Spes omnis et fortuna nostri
 Nominis, Hasdrubale interemto.
 Nil Claudiae non perficient manus:
 Quas et benigno numine Iupiter
 Defendit, et curae sagaces 75
 Expediunt per acuta belli.

CARMEN V.

AD AUGUSTUM.

Augustum, ut redditum suum omnibus exoptatissimum mactaret,
 precatur.

Metrum I. 6.

Divis orte bonis, optime Romulae
 Custos gentis, abes iam nimium diu:
 Maturum redditum pollicitus Patrum
 Sancto consilio, redi.
 Lucem redde tuae, Dux bone, patriae: 5
 Instar veris enim vultus ubi tuus
 Affulsit populo, gratior it dies,
 Et soles melius nitent.
 Ut mater iuvenem, quem Notus invido
 Flatu Carpathii trans maris aequora 10
 Cunctantem spatio longius annuo
 Dulci distinet a domo,
 Votis ominibusque et precibus vocat,
 Curvo nec faciem litore demovet:

V, v. 4. Alii *concilio* Cf. supra ad III, 25, 6. — v. 9. *Notus invido* Codd. Torrenti Vid. Benth. — v. 12. *domu* Fea, quem V. ad Od. I, 3, 29. — v. 13. Ed. Venet. 1478. *Votis omnibus atque precibus.* Cf. Benth.

- Sic desideriiis ieta fidelibus 15
 Quaerit patria Caesarem.
- Tutus hos etenim rura perambulat,
 Nutrit rura Ceres, almaque Faustitas;
 Pacatum volitant per mare navitae;
 Culpari metuit Fides; 20
- Nullis polluitur casta domus stupris,
 Mos et lex maculosum edomuit nefas;
 Laudantur simili prole puerperae;
 Culpam Poena premit comes.
- Quis Parthum paveat? quis gelidum Scythen? 25
 Quis, Germania quos horrida parturit
 Fetus, incolumi Caesare? quis ferae
 Bellum curet Iberiae?
- Condit quisque diem collibus in suis,
 Et vitem viduas ducit ad arbores; 30
 Hinc ad vina redit laetus, et alteris
 Te mensis adhibet Deum:
- Te multa prece, te prosequitur mero
 Diffuso pateris, et Laribus tuum
 Miscet numen, uti Graecia Castoris 35
 Et magni memor Herculis.
- Longas o utinam, Dux bone, ferias
 Praestes Hesperiae! dicimus integro
 Sicci mane die, dicimus uvidi,
 Quum Sol Oceano subest. 40

— v. 17. Pro *rura* coni. Faber et Sanadon. *prata*, Both. *tuta*, ut seq. versu Bentl. coni. *farra* et Cuning. *culta* pro *rura*, ne idem vocabulum repetatur. Sed Vid. Iahn. ad Od. 1, 3, 28. — v. 31. *vina venit* Bentl. e Codd. — v. 34. *Diffuso* multi Codd. et Edd. vet. idque tuetur Fea. Alii *defuso*. — v. 37. Aliquot Codd. *rex* pro *dux*. Cf. Bentl.

CARMEN VI.
AD APOLLINEM.

Carmini seculari praeludit poëta.

Metrum Sapphicum.

Dive, quem proles Niobeæ magnæ
Vindicem linguæ, Tityosque raptor
Sensit, et Troiæ prope victor altæ
Phthius Achilles,

Ceteris maior, tibi miles impar: 5
Filius quamquam Thetidos marinæ
Dardanas turres quateret tremenda
Cuspide pugnax.

Ille, mordaci velut icta ferro
Pinus, aut impulsa cupressus Euro, 10
Procidit late, posuitque collum in
Pulvere Teucro.

Ille non, inclusus equo Minervæ
Sacra mentito, male feriatos
Troas et lætam Priami choreis 15
Falleret aulam;

Sed palam captis gravis, heu nefas! heu!
Nescios fari pueros Achivis
Ureret flammis, etiam latentem
Matris in alvo, 20

Ni, tuis victus Venerisque gratae
Vocibus Divum Pater adnuisset

VI, v. 6. *quamvis* Codd. Vand. et plures Edd. quod certe quidem ob frequentius repetitam hoc versu literam *i* ferri posset. Vid. doctam adnotationem Iahn. — Eod. vers. *Thetidis* multæ Edd. — v. 17. Codd. aliquot apud Bentl. et Vand. *victor* pro *captis*. — v. 21. *flexus* pro *victus* e Codd. Bentl. quem V. —

Rebus Aeneae potiore ductos
Alite muros.

Doctor Argivae fidicen Thaliae, 25
Phoebe, qui Xantho lavis anne crines,
Daunia defende decus Camenae,
Levis Agyieū.

Spiritum Phoebus mihi, Phoebus artem 30
Carminis, nomenque dedit poëtae.
Virginum primae, puerique claris
Patribus orti,

Deliae tutela Deae, fugaces
Lyncas et cervos cohibentis arcu, 35
Lesbium servate pedem, meique
Pollicis ictum,

Rite Latonae puerum canentes,
Rite crescentem face Noctilucam,
Prosperam frugum, celeremque pronos 40
Volvere menses.

Nupta iam dices: Ego Dîs amicum,
Saeculo festas referente luces,
Reddidi carmen, docilis modorum
Vatis Horatî.

v 25. Codd. habent *Ductor argutae* aut *Doctor arg.*, aut *doctor Argivae*, aut denique *ductor Argivae*. Vid. Bentl.

CARMEN VII.

AD TORQUATUM.

Hortatur Torquatum, ut verno iam tempore dulcia carpat,
cum vitae spatium et breve sit et incertum.

*Metrum Archilochiam primum, quod hexametro heroico constat
et penthemimeri heroica.*

Diffugere nives, redeunt iam gramina campis,
Arboribusque comae;
Mutat terra vices, et decrescientia ripas
Flumina praetereunt;
Gratia cum Nymphis geminisque sororibus audet 5
Ducere nuda choros.
Immortalia ne speres, monet Annus et alium
Quae rapit Hora diem.
Frigora mitescunt Zephyris, Ver proterit Aestas,
Interitura, simul 10
Pomifer Auctumnus fruges effuderit, et mox
Bruma recurrit iners.
Damna tamen celeres reparant coelestia lunae:
Nos, ubi decidimus,
Quo pater Aeneas, quo dives Tullus et Ancus, 15
Pulvis et umbra sumus.
Quis scit, an adiciant hodiernae crastina summae
Tempora Di superi?
Cuncta manus avidas fugient heredis, amico
Quae dederis animo. 20
Quum semel occideris, et de te splendida Minos
Fecerit arbitria:
Non, Torquate, genus, non te facundia, non te
Restituet pietas.

VII, v. 7. *album* Codd. Torrent. Cf. Benth. — v. 15. Ita Benth.
e plurimis et optimis Codd. Vulgo *pater Aeneas*. Pro *dives* Benth.
coni. *pauper*. Sed Cf. Fea.

Infernis neque enim tenebris Diana pudicum 25
 Liberat Hippolytum,
 Nec Lethaea valet Theseus abrumpere caro
 Vincula Pirithoo.

CARMEN VIII.

AD CENSORINUM.

Se non nisi carmina posse amicis donare; sed nihil iis esse
 potentius ad nominis et gloriae aeternam memoriam efficiendam.

Metrum I. 1.

Donarem pateras grataque commodus,
 Censorine, meis aera sodalibus;
 Donarem tripodas, praemia fortium
 Graiorum; neque tu pessima munerum
 Ferres, divite me scilicet artium, 5
 Quas aut Parrhasius protulit, aut Scopas,
 Hic saxo, liquidis ille coloribus
 Sollers nunc hominem ponere, nunc Deum.
 Sed non haec mihi vis, nec tibi talium
 Res est aut animus deliciarum egens. 10
 Gaudes carminibus: carmina possumus
 Donare, et pretium dicere muneri.
 Non incisa notis marmora publicis,
 Per quae spiritus et vita redit bonis
 Post mortem ducibus; non celeres fugae, 15
 Reiectaeque retrorsum Hannibalis minae,
 Non incendia Carthaginiis impiae,
 Eius, qui domita nomen ab Africa
 Lucratus rediit, clarius indicant

VIII, v. 1. *commodis* multi Codd. — v. 12. *muneris* multi
 Codd. sed plures jique meliores *muneri*. Vid. Benth. — v. 17.
 Totum versum deleri iubet Benth. *impendia* pro *incendia* coni.
 Cuning. *stipendia* coni. et in textum recepit Doering. Sed Vid.
 Fea.

Laudes, quam Calabrae Pierides: neque, 20
 Si chartae sileant, quod bene feceris,
 Mercedem tuleris. Quid foret Iliae
 Mavortisque puer, si taciturnitas
 Obstaret meritis invida Romuli?
 Ereptum Stygiis fluctibus Aeacum 25
 Virtus et favor et lingua potentium
 Vatum divitibus consecrat insulis.
 Dignum laude virum Musa vetat mori;
 Coelo Musa beat. Sic Iovis interest
 Optatis epulis impiger Hercules; 30
 Clarum Tyndaridae sidus ab infimis
 Quassas eripiunt aequoribus rates;
 Ornatus viridi tempora pampino
 Liber vota bonos ducit ad exitus.

CARMEN IX.

AD LOLLIUM.

Nominis eius et virtutis memoriam carmine consecrat.

Metrum Alcaicum.

Ne forte credas interitura, quae,
 Longe sonantem natus ad Ausidum,
 Non ante vulgatas per artes
 Verba loquor socianda chordis.
 Non, si priores Maeonius tenet 5
 Sedes Homerus, Pindaricae latent,
 Caeaeque, et Alcaeï minaces,
 Stesichorique graves Cameenae;
 Nec, si quid olim lusit Anacreon,
 Delevit aetas; spirat adhuc amor, 10
 Vivuntque commissi calores
 Aeoliae fidibus puellae.

Non sola comtos arsit adulteri Crines, et aurum vestibus illitum Mirata, regalesque cultus Et comites, Helene Lacaena;	15
Primusve Teucer tela Cydonio Direxit arcu; non semel Iliós Vexata; non pugnavit ingens Idomeneus Sthenelusve solus	20
Dicenda Muis proelia; non ferox Hector, vel acer Deiphobus graves Excepit ictus pro pudicis Coniugibus puerisque primus.	
Vixere fortes ante Agamemnona Multi; sed omnes illacrimabiles Urgentur ignotique longa Nocte, carent quia vate sacro.	25
Paulum sepultae distat inertiae Celata virtus. Non ego te meis Chartis inornatum silebo, Totve tuos patiar labores	30
Impune, Lolli, carpere lividas Obliviones. Est animus tibi Rerumque prudens, et secundis Temporibus dubiisque rectus;	35
Vindex avarae fraudis, et abstineas Ducentis ad se cuncta pecuniae; Consulque non unius anni, Sed quoties bonus atque fidus	40
Index honestum praetulit utili, Reiecit alto dona nocentium	

v. 17. *primusque* et mox *Sthenelusque* Codd. aliquot Feae, alii et plures Edd. Vid. Jahn. — v. 31. *sileri* Codd. apud Benth. et multae Edd. inde ab Aldina 1519. Cf. Benth. — v. 41. *Coniunctio et hoc versu ut mox vers. 43. tantum non ab omnibus Codd. et vet. Edd. ante Aldinam 1501. abest. Vid. Fea.*

Vultu, per obstantes catervas
 Explicuit sua victor arma.
 Non possidentem multa vocaveris 45
 Recte beatum; rectius occupat
 Nomen beati, qui Deorum
 Muneribus sapienter uti,
 Duramque callet pauperiem pati,
 Peiusque leto flagitium timet, 50
 Non ille pro caris amicis,
 Aut patria timidus perire.

CARMEN X.

AD LIGURINUM.

Fastidiosum et superbum in amatores puerum monet, ne formae suae periturae nimium confidat.

Metrum I. 11.

O crudelis adhuc, et Veneris muneribus potens,
 Insperata tuae quum veniet pluma superbiae,
 Et, quae nunc humeris involitant, deciderint comae
 Nunc et qui color est puniceae flore prior rosae,
 Mutatus Ligurinum in faciem verterit hispidam: 5
 Dices, heu! quoties te speculo videris alterum:
 Quae mens est hodie, cur eadem non puero fuit?
 Vel cur his animis incolumes non redeunt genae?

X, v. 2. Pro *pluma* Benth. coni. *bruma*. Cf. Fea. — v. 5. *Ligurine* Codd. duo Torrent. Vid. Benth. — v. 6. Ita plurimi Codd. et Edd. vet. Alii *in speculo*. Vid. Fea.

CARMEN XI.

AD PHYLLIDEM.

Phyllidem ad Maecenatis natalem sacris epulis et hilari com-
potatione secum celebrandum invitat.

Metrum Sapphicum.

Est mihi nonum superantis annum
Plenus Albani cadus; est in horto,
Phylli, nectendis apium coronis;
Est ederae vis

Multa, qua crines religata fulges. 5
Ridet argento domus, ara castis
Vineta verbenis avet immolato
Spargier agno.

Cuncta festinat manus, huc et illuc
Cursitant mixtae pueris puellae; 10
Sordidum flammae trepidant rotantes
Vertice fumum.

Ut tamen noris, quibus advoceris
Gaudiis: Idus tibi sunt agendae,
Qui dies mensem Veneris marinae 15
Findit Aprilem,

Iure sollemnis mihi, sanctiorque
Paene natali proprio, quod ex hac
Luce Maecenas meus affluentes
Ordinat annos. 20

Telephum, quem tu petis, occupavit,
Non tuae sortis iuvenem, puella
Dives et lasciva, tenetque grata
Compede vinctum.

XI, v. 9. *festinant* Codd. aliquot. Sed Cf. Benth. et Fea. —
v. 11. *crepitant* coni. Benth. — v. 13. *advocere* Coll. Sax. et
coni. Cuning. Recepit Both. — v. 17. *Sollemnis* scribendum esse,
neque *solemnis* docet Fea.

Terret ambustus Phaëthon avaras
 Spes, et exemplum grave praebet ales
 Pegasus, terrenum equitem gravatus
 Bellerophontem: 25

Semper ut te digna sequare, et, ultra
 Quam licet sperare nefas putando,
 Disparem vites. Age iam, meorum
 Finis amorum, — 30

Non enim posthac alia calebo
 Femina, — condisce modos, amanda
 Voce quos reddas: minuentur atrae
 Carmine curae. 35

CARMEN XII.

AD VIRGILIUM.

Veris adventu Virgilium suum ad hilarem computationem invitat.

Metrum I. 6.

Iam Veris comites, quae mare temperant,
 Impellunt animae lintea Thraciae:
 Iam nec prata rigent, nec fluvii strepunt
 Hiberna nive turgidi.

Nidum ponit, Ityn flebiliter gemens,
 Infelix avis, et Cecropiae domus
 Aeternum opprobrium, quod male barbaras
 Regum est ulta libidines. 5

Dicunt in tenero gramine pinguium
 Custodes ovium carmina fistula, 10

— v. 35. *minuuntur* Codd. Bentl. alii. Cf. Both. Annotatt.

XII. Codd. aliquot: Ad *Virgilium negotiatorem*, vel *unguentarium*. Cf. Both. Annotatt. — v. 11. Cod. Brod. Coll. Saxon. alii *Delectante deum*.

Delectantque Deum, cui pecus et nigri
Colles Arcadiae placent.

Adduxere sitim tempora, Virgili;
Sed pressum Calibus ducere Liberum
Si gestis, invenum nobilium cliens,
Nardo vina merebere.

15

Nardi parvus onyx eliciet cadum,
Qui nunc Sulpiciis accubat horreis,
Spes donare novas largus, amaraque
Curarum eluere efficax.

20

Ad quae si properas gaudia, cum tua
Velox mercede veni: non ego te meis
Immunem meditor tingere poculis,
Plena dives ut in domo.

Verum pone moras et studium lucri;
Nigrorumque memor, dum licet, ignium,
Misce stultitiam consiliis brevem:
Dulce est desipere in loco.

25

CARMEN XIII.

A D L Y C E N.

Deridet vetulam turpiter adhuc inveniles amores sectantem.

Metrum I. 5.

Audivere, Lyce, Dî mea vota, Dî
Audivere, Lyce. Fis anus, et tamen
Vis formosa videri,
Ludisque et bibis impudens,

Et cantu tremulo pota Cupidinem
Lentum sollicitas. Ille virentis et

5

— v. 11. *nigrae* Benth. ex uno Cod. — v. 16. Codd. aliquot
apud Benth. *mereberis*, quem Cf. et Jani.

Doctae psallere Chiaë

Pulchris excubat in genis.

Importunus enim transvolat aridas

Querens, et refugit te, quia luridi

10

Dentes te, quia rugae.

Turpant et capitis nives.

Nec Coae referunt iam tibi purpurae,

Nec clari lapides tempora, quae semel

Notis condita fatis

15

Includit volucris Dies.

Quo fugit Venus? heu! quove color? decens

Quo motus? quid habes illius, illius,

Quae spirabat Amores,

Quae me surpuerat mihi?

20

Felix post Cinaram notaque et artium

Gratarum facies! Sed Cinarae breves

Annos fata dederunt,

Servatura diu parem

Cornicis vetulae temporibus Lycen,

25

Possent ut iuvenes visere fervidi,

Multo non sine risu,

Dilapsam in cineres facem.

CARMEN XIV.

AD AUGUSTUM.

Gratulatur Augusto ob Drusi et Tiberii de Vindelicis et Raetis reportatam eius auspiciis victoriam.

Metrum Alcaicum.

Quae cura Patrum, quaeve Quiritium,

Plenis honorum muneribus tuas,

XIII, v. 14. *cari* plures Codd. et Edd. Cf. Benth. et Fea. —
v. 17. Ita interpunxit Benth. quem V. Codd. et Edd. vet. fere
omnes *color decens?*

Auguste, virtutes in aevum
 Per titulos memoresque fastos
 Aeternet? o, qua sol habitabiles 5
 Illustrat oras, maxime principum,
 Quem legis expertes Latinae
 Vindelici didicere nuper,
 Quid Marte posses. Milite nam tuo
 Drusus Genaunos, implacidum genus, 10
 Breunosque veloces, et arces
 Alpibus impositas tremendis,
 Deiecit acer plus vice simplici.
 Maior Neronum mox grave proelium
 Commisit, immanesque Raetos 15
 Auspiciis pepulit secundis;
 Spectandus in certamine Martio,
 Devota morti pectora liberae
 Quantis fatigaret ruinis: —
 Indomitas prope qualis undas 20
 Exercet Auster, Pleiadam choro
 Scindente nubes: — impiger hostium
 Vexare turmas, et frementem
 Mittere equum medios per ignes.
 Sic tauriformis volvitur Ausidus, 25
 Qui regna Danni praefluit Appuli,
 Quum saevit, horrendamque cultis
 Diluvium meditatur agris:
 Ut barbarorum Claudius agmina
 Ferrata vasto diruit impetu, 30
 Primosque et extremos metendo
 Stravit humum, sine clade victor,

XIV, v. 4. *fastus* Bentr. itemque plures Codd. Feae et Vand.
 Cf. supra, III, 17, 4. — v. 19. Alii Codd. *fatigarit* vel *fatigarat*
 Cf. Bentr. — v. 20. *indomitus* Bentr. e coniect. — v. 28. *mini-*
tatur pro *meditatur* Bentr. e Codd. et Nonio. — v. 30. *dirpuit*
 Edd. Florent. 1486.

Te copias, te consilium et tuos Praebente Divos. Nam, tibi quo die Portus Alexandria supplex Et vacuam patefecit aulam,	35
Fortuna lustris prospera tertio Belli secundos reddidit exitus, Laudemque et optatum peractis Imperii decus arrogavit.	40
Te Cantaber non ante domabilis, Medusque, et Indus, te profugus Scythes Miratur, o tutela praesens Italiae dominaeque Romae,	45
Te, fontium qui celat origines, Nilusque, et Ister, te rapidus Tigris, Te beluosus qui remotis Obstrepat Oceanus Britannis;	50
Te non paventis funera Galliae Duraeque tellus audit Iberiae: Te caede gaudentes Sygambri Compositis venerantur armis.	

CARMEN XV.

AUGUSTI LAUDES.

Augustum a pacis potissimum artibus collaudat.

Metrum Alcaicum.

Phoebus volentem proelia me loqui
Victas et urbes, inerepuit lyra,
Ne parva Tyrrhenum per aequor
Vela darem. Tua, Caesar, aetas

— v. 49. *paventes* Bentl. e Codd.

XV, v. 1. Plures Edd. post *inerepuit* incidunt. Cf. Mitscherl.

Fruges et agris retulit uberes, Et signa nostro restituit Iovi, Derepta Parthorum superbis Postibus, et vacuum duellis	5
Ianum Quirinum clusit, et ordinem Rectum evaganti frena Licentiae Iniecit, emovitque culpas, Et veteres revocavit artes,	10
Per quas Latinum nomen et Italae Crevere vires, famaue et imperi Porrecta maiestas ad ortum Solis ab Hesperio cubili.	15
Custode rerum Caesare, non furor Civilis aut vis eximet otium, Non ira, quae procudit enses, Et miseras inimicat urbes.	20
Non, qui profundum Danubium bibunt, Edicta rumpent Iulia, non Getae, Non Seres, infidive Persae, Non Tanain prope flumen orti.	
Nosque et profestis lucibus et sacris, Inter iocosi munera Liberi, Cum prole matronisque nostris, Rite Deos prius apprecati,	25
Virtute functos, more patrum, duces, Lydis remixto carmine tibiis Troiamque et Anchisen et almae Progeniem Veneris canemus.	30

— v. 7. *direpta* plures Codd. et Edd. Vid. Fea. — v. 9. Omnes Codd. *Ianum Quirini* Cf. Benth. et Fea. — v. *ead.* *Clusit* Cuning. sed Codd. *clausit*. Vid. Fea. — v. 15. Plures Codd. et Edd. *vett.* *ortus* Cf. Benth. — v. 18. *eximet* maior pars Codd. alii *exiget* Cf. Benth. et Fea.

Q. HORATII FLACCI
E P O D O N.

LIBER.

CARMEN I.

AD MAECENATEM.

Maecenati ad bellum Actiacum proficiscenti comitem se offert.

Metrum primo versu est iambicum trimetrum, altero dimetrum.

Ibis Liburnis inter alta navium,

Amice, propugnacula,

Paratus omne Caesaris periculum

Subire, Maecenas, tuo.

Quid nos, quibus te vita si superstitute

5

Iucunda; si contra, gravis?

Utrumne iussi persequemur otium,

Non dulce, ni tecum simul?

An hunc laborem mente laturi, decet

Qua ferre non molles viros?

10

Feremus; et te vel per Alpium iuga,

Inhospitalem et Caucasum,

Vel occidentis usque ad ultimum sinum,

I, v. 4. *tuo*. Wakefield. Tragoed. Delect. II. p. 22. coni. *tui*;
Both. *Caesari* . . . *tuo*. V. Iahn. — v. 5. *si super*. plurimi Codd.
quos enumerat Fea; idque tuetur Benth. Codd. Torrent. alii *sit*,
Vid. Both. Annotatt.

Forti sequemur pectore.
 Roges, tuum labore quid iuvem meo, 15
 Imbellis ac firmus parum?
 Comes minore sum futurus in metu.
 Qui maior absentes habet:
 Ut assidens implumibus pullis avis
 Serpentium allapsus timet 20
 Magis relictis; non, ut adsit, auxili
 Latura plus praesentibus.
 Libenter hoc et omne militabitur
 Bellum in tuae spem gratiae;
 Non ut iuvencis illigata pluribus 25
 Aratra nitantur meis,
 Pecusve Calabris ante sidus fervidum
 Lucana mutet pascuis,
 Neque ut superni villa candens Tusculi
 Circaea tangat moenia. 30
 Satis superque me benignitas tua
 Ditavit; haud paravero
 Quod aut, avarus ut Chremes, terra premam,
 Discinctus aut perdam ut nepos.

CARMEN II.

Alphium foeneratorem deridet, qui vitae rusticae commoda et gaudia ubi mirum in modum laudavit, mox ad pristinam vivendi rationem et sordidam avaritiam revertitur.

Metrum idem.

Beatus ille, qui procul negotiis,
 Ut prisca gens mortalium,

— v. 21. *uti sit* pro *ut adsit* Benth. e pluribus Codd. quem Cf.
 — v. 26. *mea* plures Codd. Vid. Benth. et Fea. *nectantur* pro
nitantur aliquot Codd. Cf. Benth. et Fea. — v. 28. *pascuis* multi
 Codd. et vett. Edd. Alii *pascua* Vid. Benth. — v. 29. *Neque* plu-
 res Edd. vett. al. *nec* Vid. Both. Annotatt. Pro *superni* Benth.
 e, coniect. *supini*, quem V. coll. Fea.

Paterna rua bubus exercet suis,
 Solutus omni fenore.
 Neque excitatur classico miles truci, 5
 Neque horret iratum mare;
 Forumque vitat et superba civium
 Potentiorum limina.
 Ergo aut adulta vitium propagine
 Altas maritat populos, 10
 Aut in reducta valle mugientium
 Prospectat errantes greges;
 Inutilesque falce ramos amputans,
 Feliciores inserit;
 Aut pressa puris mella condit amphoris; 15
 Aut tondet infirmas oves;
 Vel, quum decorum mitibus pomis caput
 Auctumnus agris extulit,
 Ut gaudet insitiva decerpens pyra,
 Certantem et uvam purpurae, 20
 Qua muneretur te, Priape, et te, pater
 Sylvane, tutor finium.
 Libet iacere, modo sub antiqua ilice, .
 Modo in tenaci gramine.
 Labuntur altis interim ripis aquae; 25
 Queruntur in silvis aves:
 Fontesque lymphis obstrepunt manantibus,
 Somnos quod invitet leves.

II, v. 9. *altae propagini* coni. Both. Annotatt. — v. 11—14. Hic in omnibus praeter Altorfinum Codicibus est horum versuum ordo. Henr. Stephan. Georg. Fabric. alique vers. 13 et 14. ante vers. 11 et 12. collocant. Vid. Benth. — v. 13. *inutilesve* Benth. e coniect. — v. 18. *agris* longe plurimi optimique Codd. Alii *arvis*. Cf. Benth. et Fea. — v. 20. *purpura* Codd. aliquot Cruq. Cf. Fea. — v. 21. *Quis* pro *Qua* cum Cuning. Sanadon. et Wadio edidit Fea. quem V. Sed incerta est huius lectionis, auctoritas. — v. 25. *ripis* Edd. veteres, sed Codd. alii *ripis*, alii *rivis*. Vid. Benth. Fea. Both. Annotatt. — v. 27. *frondesque* e coni. Marklandi recepit Both. quem V. in Annotatt. Cf. Fea.

At quum Tonantis annus hibernus Iovis
 Imbres nivesque comparat, 30
 Aut trudit acres hinc et hinc multa cane
 Apros in obstantes plagas;
 Aut amite levi rara tendit retia,
 Turdis edacibus dolos;
 Pavidumque leporem, et advenam laqueo gruem, 35
 Incunda captat praemia.
 Quis non malarum, quas amor curas habet,
 Haec inter obliviscitur?
 Quod si pudica mulier in partem iuвет
 Domum atque dulces liberos, 40
 Sabina qualis, aut perusta solibus
 Pernicis uxor Appuli,
 Sacrum et vetustis exstruat lignis focum,
 Lassi sub adventum viri;
 Claudensque textis cratibus laetum pecus, 45
 Distenta siccet ubera;
 Et horna dulei vina promens dolio,
 Dapes inemtās apparet;
 Non me Lucrina iuverint conchylia,
 Magisve rhombus, aut scari, 50
 Si quos Eois intonata fluctibus
 Hiems ad hoc vertat mare;
 Non Afra avis descendat in ventrem meum,
 Non attagen Ionicus
 Iucundior, quam lecta de pinguissimis 55
 Oliva ramis arborum,
 Aut herba lapathi prata amantis, et gravi
 Malvae salubres corpori,
 Vel agna festis caesa Terminalibus,
 Vel haedus ereptus lupo. 60
 Has inter epulas, ut iuvat pastas oves

— v. 37. *malorum* Edd. quaedam veteres, idque probat Both.
 Annotatt. — v. 52. *verrat* coni. Heins. Cf. Bentl. — v. 54. *Io-*
nus Fea.

Videre properantes domum!
 Videre fessos vomerem inversum boves
 Collo trahentes languido!
 Positosque vernas, ditis examen domus,
 65 Circum renidentes Lares!
 Haec ubi locutus fenerator Alphius,
 Iam iam futurus rusticus,
 Omnem redegit Idibus pecuniam;
 Quaerit Calendis ponere.
 70

CARMEN III.

AD MAECENATEM.

Allium iocoso carmine detestatur.

Metrum idem.

Parentis olim si quis impia manu
 Senile guttur fregerit,
 Edit cicutis allium nocentius.
 O dura messorum ilia!
 Quid hoc veneni saevit in praecordiis?
 5 Num viperinus his cruor
 Incoctus herbis me fefellit? an malas
 Canidia tractavit dapes?
 Ut Argonautas praeter omnes candidum
 Medea mirata est ducem,
 10 Ignota tauris illigaturum iuga,
 Perunxit hoc Iasonem:
 Hoc delibutis ulta donis pellicem,

— v. 66. *renitentes* unus Cod. Vand. — v. 67. *Alfius* alii Codd. et Edd. Cf. Fea. — v. 69. *relegit* aliquot Codd. et Ed. princeps Vid. Benth. et Fea.

III, 3. *Edat* Cod. Brod. plures Vand. alii. Vid. Both. Annotatt. — v. 5. *Quis* Edd. aliquot vett. — v. 6. *Non pro Num* Cuiacius Observatt. 28. e Codd. — v. 8. *tentavit dapes* Cod. Torrent.

Serpente fugit alite.
 Nec tantus unquam siderum insedit vapor 15
 Siticulosae Apuliae:
 Nec munus humeris efficacis Herculis
 Inarsit aestuosius.
 At, si quid unquam tale concupiveris,
 Iocose Maecenas, precor 20
 Manum puella savio opponat tuo,
 Extrema et in sponda cubet.

CARMEN IV.

IN CNEIUM POMPEIUM CNEI LIBERTUM MENAM.

Ex servo divitem factum et trihunum militum ob arrogantiam
 acerbissime deridet.

Metrum idem.

Lupis et agnis quanta sortito obtigit,
 Tecum mihi discordia est,
 Ibericis peruste funibus latus,
 Et crura dura compeде.
 Licet superbus ambules pecunia, 5
 Fortuna non mutat genus.
 Videsne, Sacram metiente te viam
 Cum his trium ulnarum toga,
 Ut ora vertat huc et huc euntium
 Liberrima indignatio? 10
 Sectus flagellis hic Triumviralibus,
 Praeconis ad fastidium,
 Arat Falerni mille fundi iugera,

— v. 20. *Iocosa* Markland. coni. Cf. Fea. — v. 21. De scripti-
 one *savio* Vid. Fea. Plures Codd. et Edd. *suavio*.

IV. Admodum variat inscriptio in Codd. et Edd. Nos Feam
 secuti sumus, quem Cf. — v. 8. Ita Barth. Adv. 54, 26. tan-
 quam ex libro et Bentl. Vulgata lectio: *bis ter ulnarum* cons-
 tanti MSS, consensu. V. Bentl.

Et Appiam mannis terit;
Sedilibusque magnus in primis eques, 15
Othone contemto, sedet.
Quid attinet tot ora navium gravi
Rostrata duci pondere
Contra latrones atque servilem manum,
Hoc, hoc tribuno militum? 20

CARMEN V.

IN CANIDIAM VENEFICAM.

Describuntur sacra magica horrendis artificiiis a Canidia ut
amatorem devinciat, habita.

Metrum idem.

„At, o Deorum quicquid in coelo regit
Terras et humanum genus!
Quid iste fert tumultus? et quid omnium
Vultus in unum me truces?
Per liberos te, si vocata partibus 5
Lucina veris adfuit,
Per hoc inane purpurae decus precor,
Per improbaturum haec Iovem,
Quid ut noverca me intueris, aut uti
Petita ferro belua?“ 10
Ut haec tremente questus ore constitit
Insignibus raptis puer,
Impube corpus, quale posset impia
Mollire Thracum pectora;

— v. 16. *contento* Ed. princeps Venet. an. 1478. Vid. Benth. --
v. 17. *aera* pro *ora* coni. Benth.

V, v. 1. *regit* Codd. habent plerumque aut *regis*. Cod. Brod.
quisquis regis. Veteres aliquot Edd. *quisquis regit*. Cf. Benth.
— v. 3. *aut quid* aliquot Codd. ut Vand. et vett. Edd. idque
recepit Both. — v. 11. *tremente* Codd. ferunt. *trementi* Benth.
quem Cf.

Canidia brevibus implicata viperis	15
Crines et incomtum caput,	
Iubet sepulcris caprificos erutas,	
lubet cupressus funebres,	
Et uncta turpis ova ranae sanguine,	
Plumamque nocturnae strigis,	20
Herbasque, quas Iolcos atque Iberia	
Mittit venenorum ferax,	
Et ossa ab ore rapta ieiunae canis,	
Flammis aduri Colchicis.	
At expedita Sagana, per totam domum	25
Spargens Avernales aquas,	
Horret capillis, ut marinus, asperis,	
Echinus, aut currens aper.	
Abacta nulla Veia conscientia,	
Ligonibus duris humum	30
Exhauriebat, ingemens laboribus,	
Quo posset infossus puer	
Longo die bis terque mutatae dapis	
Inemori spectaculo,	
Quum promineret ore, quantum exstant aqua	35
Suspensa mento corpora;	
Exsecta uti medulla, et aridum iecur	
Amoris esset poculum,	
Interminato quum semel fixae cibo	
Intabuissent pupulae.	40
Non defuisse masculae libidinis	
Ariminensem Foliam,	
Et otiosa credidit Neapolis,	
Et omne vicinum oppidum,	

— v. 21. *Colchos* pro *Iolcos* Edd. aliquot vett. Cf. Both. Annotatt. — v. 22. *foras* pro *ferax* Cod. Brod. — v. 28. *Laurens aper* coni. Heinsius, quam lectionem tuetur Bentl. refutat Fea. — v. 33. *terque* omnes fere Codd. *terve* Ed. Aldin. indeque plurimae Edd. V. Bentl. — v. 37. *exsecta* vel *execta* melior maiorque pars Codd. Reliqui *exsucta*, *exsucca*. *exusta*, *exuta*, *exerta*. N. Heins. coni. *exesa* Vid. Bentl. et Fea.

- Quae sidera excantata voce Thessala
Lunamque coelo deripit. 45
- Hic irresectum saeva dente livido
Canidia rodens pollicem,
Quid dixit? aut quid tacuit? „O rebus meis
Non infideles arbitrae, 50
- Nox, et Diana, quae silentium regis,
Arcana quum fiunt sacra,
Nunc nunc adeste! nunc in hostiles domos
Iram atque numen vertite!
Formidolosae dum latent silvis ferae, 55
Dulci sopore languidae,
Senem, quod omnes rideant, adulterum
Latrent Suburanae canes,
Nardo perunctum, quale non perfectius
Meae laborarint manus. — 60
- Quid accidit? cur dira barbarae minus
Venena Medae valent,
Quibus superbam fugit ulta pellicem,
Magni Creontis filiam,
Quum palla, tabo munus imbutum, novam 65
Incendio nuptam abstulit?
Atqui nec herba, nec latens in asperis
Radix fefellit me locis.
Indormit unctis omnium cubilibus
Oblivione pellicum. — 70
- Ah! ah! solutus ambulat veneficae
Scientioris carmine.
Non usitatis, Vare, potionibus,
O multa fleturum caput,

— v. 54. *Arcum* pro *Iram* Cod. Brod. — v. 55. *formidolosae* Codd. plurimi, alii, quos Benth. sequitur *formidolosae* Cf. Fea.
— v. 58. *suburranae* aut *suburbanae* plures Codd. multaeque Edd. Sed Vid. Fea. — v. 60. *laborarunt* olim pleraeque Edd.
— v. 63. *superba* multi Codd. et vet. Edd. Cf. Benth. — v. 65. *infectum* pro *imbutum* Coll. Sax. et Codd. Bersm. — v. 71. *ha!* *ha!* plures Codd. Cf. Fea.

Ad me recurre, nec vocata mens tua 75
 Marsis redibit vocibus.
 Maius parabo, maius infundam tibi
 Fastidienti poculum.
 Priusque coelum sidet inferius mari,
 Tellure porrecta super, 80
 Quam non amore sic meo flagres, uti
 Bitumen atris ignibus.
 Sub haec puer, iam non, ut ante, mollibus
 Lenire verbis impias;
 Sed dubius unde rumperet silentium, 85
 Misit Thyesteas preces:
 „Venena magnum fas nefasque, non valent
 Convertere humanam vicem.
 Diris agam vos: dira detestatio
 Nulla expiatur victima. 90
 Quin, ubi perire iussus expiravero,
 Nocturnus occurram Furor,
 Petamque vultus umbra curvis unguibus,
 Quae vis Deorum est Manium,
 Et inquietis assidens praecordiis, 95
 Pavore somnos auferam.
 Vos turba vicitim hinc et hinc saxis petens
 Contundet obscenas anus.
 Post insepulta membra different lupi
 Et Exquilinae alites; 100
 Neque hoc parentes, heu mihi superstites!
 Effugerit spectaculum.

— v. 81. *mei* Ed. Glarean. Benth. — v. 87. Benth. coni. *Venena magica fas nefasque non valent, Non vertere humanas vices* Fea ita interpungit: *Venena! magnum fas, nefasque, non valent Convertere humanam vicem?* Sed Vid. Mitscherl. et Both. Annotatt. — v. 100. *Exquilinae* dedit Fea e Codd. marmoribus, vett. Edd. *Esquilinae* plurimae Edd.

CARMEN VI.

IN CASSIUM SEVERUM.

Maledico calumniatori minatur ultionem.

Metrum idem.

Quid immerentes hospites vexas, canis,
 Ignāvus adversum lupos?
 Quin huc inanes, si potes, vertis minas,
 Et me remorsurum petis?
 Nam, qualis aut Molëssus, aut fulvus Lacon, 5
 Amica vis pastoribus,
 Agam per altas aure sublata nives,
 Quaecunque praecedet fera:
 Tu, quum timenda voce complesti nemus, 10
 Proiectum odoraris cibum.
 Cave, cave: namque in malos asperrimus
 Parata tollo cornua,
 Qualis Lycambae spretus infido gener,
 Aut acer hostis Bupalò.
 An, si quis atro dente me petiverit, 15
 Inultus ut flebo puer?

CARMEN VII.

AD POPULUM ROMANUM.

A bello civili dehortatur.

Metrum idem.

Quo, quo scelesti ruitis? aut cur dexteris
 Aptantur enses conditi?

VI, v. 8. *procedet* Both. e Codd. Cf. Iahn. — v. 14. *Bubalo* plures Codd. et Edd. vet. Cf. Fea et Both. Annot. — v. 15. *oppetiverit* Codd. aliquot Feae.

Parumne câmpis atque Neptuno super
 Fusum est Latini sanguinis,
 Non, ut superbas invidiae Carthaginis 5
 Romanus arces ureret,
 Intactus aut Britannus ut descenderet
 Sacra catenatus via;
 Sed ut, secundum vota Parthorum, sua
 Urbs haec periret dextera? 10
 Neque hic lupis mos, nec fuit leonibus,
 Unquam, nisi in dispar, feris.
 Furorine caecus, an rapit vis acrior?
 An culpa? responsum date. —
 Tacent; et ora pallor albus inficit, 15
 Mentisque percussae stupent.
 Sic est: acerba fata Romanos agunt,
 Scelusque fraternae necis,
 Ut immerentis fluxit in terram Remi
 Sacer nepotibus cruor. 20

CARMEN VIII.

IN ANUM LIBIDINOSAM.

Respondet quaerenti, cur ipse ad libidinem secum exercendam torpeat.

Metrum idem.

Rogare longo putidam te saeculo,
 Vires quid enervet meas!
 Quum sit tibi dens ater, et rugis vetus
 Frontem senectus exaret,

VII, v. 12. Ita omnes fere Codd. *Nunquam* e veteribus aliquot Edd. *Usquam* Cod. Vand. Pro *feris* Lambin. e Codd. *genus*, idemque vocabulum in duobus Codd. Vand. a glossatore super *dispar* scriptum est. Cf. Fea. — v. 13. *caecos* Benth. e Codd. — v. 16. *percussae* Cod. Brod.

VIII, v. 1. *putridum* Cod. Bersm. — v. 2. *quod* pro *quid* ibi!

Hietque turpis inter aridas nates 5
 Podex, velut crudae bovis.
 Sed incitat me pectus, et mammae putres,
 Equina quales ubera,
 Venterque mollis, et femur tumentibus
 Exile suris additum. 10
 Esto beata, funus atque imagines
 Ducant triumphales tuum;
 Nec sit marita, quae rotundioribus
 Onusta baccis ambulet.
 Quid? quod libelli Stoici inter sericos 15
 Iacere pulvillos amant,
 Illiterati num minus nervi rigent,
 Minusve languet fascinum,
 Quod ut superbo provoces ab inguine,
 Ore allaborandum est tibi? 20

CARMEN IX.

AD MAECENATEM.

Laetatur de victoria ab Augusto contra Antonium et Cleopatra-
 tram reportata.

Metrum idem.

Quando repostum Caecubum ad festas dapes,
 Victore laetus Caesare,
 Tecum sub alta, sic Iovi gratum, domo,
 Beate Maecenas, bibam,
 Sonante mixtum tibiis carmen lyra, 5
 Hac Dorium, illis Barbarum?
 Ut nuper, actus quum freto Neptunius
 Dux fugit, ustis navibus,

— v. 15. Ita hunc locum interpunxit Both. quem Vid. Vulgo post
amant, rigent, fascinum interrogationis signa collocantur.

IX, v. 5. *mixtum* Edd. vett. *mixtis* Benth. e duobus Codd. Lam-
 bin.

Minatus urbi vincla, quae detraxerat!	
Servis amicus perfidis.	10
Romanus, heu! heu! posterī negabitis,	
Emancipatus feminae,	
Fert vallum et arma miles, et spadonibus	
Servire rugosis potest;	
Interque signa turpe militaria	15
Sol adspicit conopium.	
Ad hoc frementes verterunt bis mille equos	
Galli, canentes Caesarem;	
Hostiliumque navium portu latent	
Puppēs sinistrorsum citae.	20
Io Triumphē! tu moraris aureos	
Currus, et intaetas boves?	
Io Triumphē! nec Iugurthino parē	
Bello reportasti ducem,	
Neque Africanum, cui super Carthaginem	25
Virtus sepulcrum condidit.	
Terra marique victus hostis, Punico	
Lugubre mutavit sagum;	
Aut ille centum nobilem Cretā urbibus,	
Ventis iturus non suis;	30
Exercitatas aut petit Syrtes Noto,	
Aut fertur incerto mari.	
Capaciores affer huc, puer, scyphos,	
Et Chia vina, aut Lesbia,	
Vel, quod fluentem nausēam coërceat,	35
Metire nobis Caccubum.	

— v. 11. *heu* multae Edd. Cf. Both. Annotatt. — v. 16. *conopeum* plurimi Codd. Vid. Benth. — v. 17. Codd. varie *Ad hunc*, *At huc*, *Adhuc*. Vulgata per plurimas Edd. lectio est *Ad hunc*, quam denuo Both. et Jahn. tuentur. Benth. *Ad hoc*; Fea; *At hoc*. — v. 20. *sitae* pro *citae* Codd. aliquot Cruq. et Lamb. — v. 25. *Africanum* Benth. e pluribus Codd. et duabus vetustissimis Edd. Vulgatam lectionem *Africano* Fea secutus est. Cf. utriusque not. — v. 34. *Aut Chia* Benth. cum Torrent. et plenius distinguit post *scyphos*.

Curam metumque Caesaris rerum iuvat
Dulci Lyaeo solve.

CARMEN X.

IN MAEVIUM POETAM.

Navigaturo naufragium imprecatur.

Metrum idem.

Mala soluta navis exit alite, Ferens olentem Maevium.	
Ut horridis utrumque verberes latus, Auster, memento fluctibus.	
Niger rudentes Euris, inverso mari, Fractosque remos differat;	5
Insurgat Aquilo, quantus altis montibus Frangit trementes ilices;	
Nec sidus atra nocte amicum appareat, Qua tristis Orion cadit;	10
Quietiore nec feratur acquore, Quam Graia victorum manus,	
Quum Pallas usto vertit iram ab Illo In impiam Aiaceis ratem.	
O quantus instat navitis sudor tuis, Tibique pallor luteus,	15
Et illa non virilis eiulatio, Preces et aversum ad Iovem,	
Ionius udo quum remugiens sinus Noto carinam ruperit!	20

X, v. 1. *Malo* apud Marium Victorinum. Cf. Benth. — v. 4. *flatus* pro *fluctibus* Codd. Valart. — v. 8. *fregit* pro *frangit* citatur apud Plotium, veterem Grammaticum. Cf. Benth. qui coni. *vertit* aut *sternit*. Wakef. coni. *plangit* a Bothio receptum. Sed Cf. Fea. — v. 18. *ulversum* Codd. aliquot Vand. et Feae. — v. 19. *sinu Notus* Codd. Cruq. et Edd. aliquot vet. Vid. Benth.

Opima quod si praeda curvo litore
 Porrecta mergos iuveris;
 Libidinosus immolabitur caper,
 Et agna Tempestatibus.

CARMEN XI.

A D P E C T I U M.

Queritur, se perpetuo amoris laqueis irretitum teneri.

Metrum Archilochium tertium, compositum e senario iambico et versu elegiambico, qui constat dimidio pentametro sive penthemimeri dactylica et dimetro iambico.

Pecti, nihil me, sicut antea, iuvat
 Scribere versiculos amore perculsum gravi,
 Amore, qui me praeter omnes expetit
 Mollibus in pueris aut in puellis urere.
 Hic tertius December, ex quo destiti 5
 Inachia furere, silvis honorem decutit.
 Heu! me, per urbem, nam pudet tanti mali,
 Fabula quanta fui! conviviorum et poenitet,
 In queis amantem et languor et silentium
 Arguit, et latere petitus imo spiritus. 10
 Contrane lucrum nil valere candidum
 Pauperis ingenium! querebar, applorans tibi;
 Simul calentis inverecundus Deus
 Fervidiore mero arcana promorat loco.
 Quod si meis inaestuât praecordiis 15

— v. 22. *proiecta* Bentr. e coni. Sed Cf. Fea. *iuverit* plures Codd. Cf. Bentr. *paverit* Coll. Sax. quo verbo Adnotator Cruquianus illud *iuveris* explicat.

XI. Codd. et Edd. varie *Pectium*, *Pettium*, *Petium* V. Fea. v. 2. *perculsum* plures Codd. et vett. Edd. Vid. Bentr. et Fea. — v. 4. *aut puer.* pro *in* coni. Bentr. quem Cf. — v. 8. *ut poenitet* Bentr. e coniect. Cf. Fea. et Both. Annott. — v. 14. *fervidiora* Ald. Ed. 1501 et plures aliae. Cf. Both. Annott. — v. 15. *inaestuât* Lambin. Bentr. Fea.

Libera bilis, ut haec ingrata ventis dividat
 Fomenta, vulnus nil malum levantia;
 Desinet imparibus certare summotus pudor.
 Ubi haec severus te palam laudaveram,
 Iussus abire domum, ferebar incerto pede 20
 Ad non amicos heu! mihi postes, et heu!
 Limina dura, quibus lumbos et infregi latus.
 Nunc, gloriantis quamlibet muliereculam
 Vincere mollitie, amor Lycisci me tenet;
 Unde expedire non amicorum queant 25
 Libera consilia, nec contumeliae graves;
 Sed alius ardor aut puellae candidae,
 Aut teretis pueri, longam renodantis comam.

CARMEN XII.

IN ANUM LIBIDINOSAM.

Amarissime in eius foeditatem et libidinem invehitur.

Metrum Od. I, 7.

Quid tibi vis, mulier nigris dignissima barris?
 Munera eur mihi, quidve tabellas
 Mittis, nec firmo iuveni, neque naris obesae?
 Namque sagacius unus odoror,
 Polypus, an gravis hirsutis cubet hireus in alis, 5
 Quam canis acer, ubi lateat sus.
 Qui sudor vietis, et quam malus undique membris

— v. 17. *allevantia* Cod. Feae et aliquot Edd. vett. Cf. Fea et Both. — v. 19. *ter* aut *tibi* pro *te* coni. Both. Annott. — v. 24. Ita Bentl. e Codd. Vulgo *mollitia*. — v. 28. *longa renidentis coma* Coll. Sax. *renidentis* etiam Ed. Florent. 1482.

XII, v. 1. Both. in Annotatt. cum Turnebo et Vanderb. mavult *Barris* ut sit nomen proprium hominis, quem Horat. in Serm. I, 4, 110 aliis locis nominat. — v. 2. *quid mihi* Bentl. e Codd. *curve tabellas* Codd. aliquot et vett. Edd. Cf. Fea. — v. 5. *Pulipus* malit Both. Annott. quem Cf. — v. 7. *qui* plurimi et optimi Codd. *quis* multae Edd.

Crescit odor, quum pene soluto
 Indomitam properat rabiem sedare; neque illi
 Iam manet humida creta, colorque 10
 Stercore fucatus crocodili, iamque subando
 Tenta cubilia, tectaque rumpit;
 Vel mea quum saevis agitat fastidia verbis:
 Inachia langues minus ac me;
 Inachiam ter nocte potes, mihi semper ad unum 15
 Mollis opus. Pereat male: quae te,
 Lesbia, quaerenti taurum, monstravit inertem,
 Quum mihi Cous adesset Amyntas,
 Cuius in indomito constantior inguine nervus,
 Quam nova collibus arbor inhaeret. 20
 Muricibus Tyriis iteratae vellera lanae
 Cui properabantur? tibi nempe;
 Ne foret aequales inter conviva, magis quem
 Diligeret mulier sua, quam te.
 O ego non felix, quam tu fugis, ut pavet acres 25
 Agna lupos, capreaeque leones.

CARMEN XIII.

A D A M I C U M.

Ad computationes per hibernum tempus habendas et omnino ad vitam hilariter transigendam amicos hortatur:

Metrum Archilochium secundum. Hexametro heroico subiicitur versus iambelegus, iambico dimetro cum penthemimeri dactylica constans.

Horrida tempestas coelum contraxit, et imbres
 Nivesque deducunt Iovem; nunc mare, nunc siluac,
 Threicio Aquilone sonant. Rapiamus, amici,
 Occasionem de die; dumque virent genua,

— v. 25. *ego infelix* Codd. quidam. V. Bentl.

XIII, *Ad amicum* Bentl. et Fea inscribunt; alii *Ad amicos*.
 v. 3. *amice* Bentl. contra Codd. Cf. Fea.

Et decet, obducta solvatur fronte senectus. 5
 Tu vix Torquato move Consule pressa meo.
 Cetera mitte loqui: Deus haec fortasse benigna
 Reducet in sedem vice. Nunc et Achaemenio
 Perfundi nardo iuvat, et fide Cyllenea
 Levare diris pectora sollicitudinibus. 10
 Nobilis ut grandi cecinit Centaurus alumno:
 Invicte, mortalis Dea nate puer Thetide,
 Te manet Assaraci tellus, quam frigida parvi
 Findunt Scamandri flumina, lubricus et Simoïs;
 Unde tibi reditum certo subtemine Parcae 15
 Rupere; nec mater domum caerulea te revehet.
 Illic omne malum vino cantuque levato,
 Deformis aegrimoniae dulcibus alloquiis.

CARMEN XIV.

AD MAECENATEM.

Phrynes amorem obstare, quominus iambos Maecenati promissos absolvat.

Metrum pythiambicum primum, hexametro heroico et versu iambico quaternario constans.

Mollis inertia cur tantam diffuderit imis
 Oblivionem sensibus,
 Pocula Lethaeos ut si ducentia somnos
 Arente fauce traxerim,
 Candide Maecenas, occidis saepe rogando: 5
 Deus, Deus nam me vetat

— v. 8. *Achaemenio* e plurimis Codd. et antiquissimis Edd. revocavit Bentl. eumque sequitur Fea. Vulg. *Achaemenia*. Vid. Bentl.
 — v. 15. *curto* pro *certo* coni. Bentl. *substamine* Coll. Sax. *subtegmine* plures Edd. vett. — v. 18. coniunctionem *et* ante *dulcibus* plures Codd. apud Bentl. inter lineas, unde coni. *ac dulcibus*. Vid. Bentl. Mitscherl. Fea.
 XIV. v. 3. *veluti ducentia* aliquot Codd. Vid. Bentl.

Inceptos, olim promissum carmen, iambos
 Ad umbilicum adducere.
 Non aliter Samio dicunt arsisse Bathyllo
 Anacreonta Teïum; 10
 Qui persaepe cava testudine flevit amorem,
 Non elaboratum ad pedem.
 Ureris ipse miser! quod si non pulchrior ignis
 Accendit obsessam Ilion,
 Gaude sorte tua; me libertina, neque uno 15
 Contenta, Phryne macerat.

CARMEN XV.

AD NEAERAM.

Non servatam ab ea fidem conqueritur.

Metrum ut in praecedenti carmine.

Nox erat, et coelo fulgebat Luna sereno
 Inter minora sidera,
 Quum tu magnorum numen laesura Deorum,
 In verba iurabas mea,
 Arctius, atque edera procera adstringitur ilex, 5
 Lentis adhaerens brachiis:
 Dum pecori lupus, et nautis infestus Orion
 Turbaret hibernum mare,
 Intonsosque agitaret Apollinis aura capillos,
 Fore hunc amorem mutuum. 10
 O dolitura mea multum virtute Neaera,
 Nam si quid in Flacco viri est,
 Non feret assiduas potiori te dare noctes,
 Et quaeret iratus parem,
 Nec semel offensae cedit constantia formae, 15

XV, v. 8. 9. *Turbarit, agitarit* plures Codd. et Ed. pr. inde-
 que Benth. et Fea. quos Vid. — v. 12. *virium* Codd. Vand. —
 v. 15. *offensi* Benth. e coniectura. Cf. Fea et Both. Annotatt.

Si certus intrarit dolor.
 At tu, quicumque es felicior, atque meo nunc
 Superbus incedis malo.
 Sis pecore et multa dives tellure licebit,
 Tibique Pactolus fluat, 20
 Nec te Pythagorae fallant arcana renati,
 Formaue vincas Nireâ;
 Heu heu! translato alio moerebis amores,
 Ast ego vicissim risero.

CARMEN XVI.

AD POPULUM ROMANUM.

Desperat Romae ob bella civilia salutem eiusque interitum
 vaticinatur et hortatur cives, ut feliciores regiones patria relicta
 petant. Littora autem piaie genti destinata, quae petenda dicit,
 nobis, non verentibus ne Baxterianas dialogias somnietur, ἀλ-
 λήγορικῶς accipienda videntur, de poeseos et omnino bonarum
 artium studiis communi eorum, qui patriam frustra deplorant,
 refugio.

*Metrum Pythiambicum secundum, in quo hexametrum excipit
 senarius iambicus.*

Altera iam teritur bellis civilibus aetas,
 Suis et ipsa Roma viribus ruit.
 Quam neque finitimi valuerunt perdere Marsi,
 Minacis aut Etrusca Porsenae manus.
 Aemula nec virtus Capuae, nec Spartacus acer, 5
 Novisque rebus infidelis Allobrox,
 Nec fera caerulea domuit Germania pube,
 Parentibusque abominatus Hannibal;
 Impia perdemus devoti sanguinis aetas,
 Ferisque rursus occupabitur solum. 10

— v. 17. *Et tu* multi Codd. Cf. Benth. et Fea. — v. 23. Ita
 plures Codd. Cruq. Torrent. et primae Edd. Vulgo *Eheu*.

XVI, v. 6. *Novisve*, ut v. 8. *parentibusve* Benth. ex coniectura.
 Horat. l.

Barbarus, heu! cineres insistet victor, et Urbem
 Eques sonante verberabit ungula;
 Quaeque carent ventis et solibus, ossa Quirini,
 Nefas videre, dissipabit insolens.
 Forte, (quod expediat!) communiter, aut melior pars 15
 Malis carere quaeritis laboribus?
 Nulla sit hac potior sententia: Phocaeorum
 Velut profugit execrata civitas
 Agros atque Lares patrios, habitandaque fana
 Apris reliquit et rapacibus lupis, 20
 Ire pedes quocunque ferent, quocunque per undas
 Notus vocabit, aut protervus Afrius.
 Si placet? an melius quis habet suadere? secunda
 Ratem occupare quid moramur alite?
 Sed iuremus in haec: Simul inis saxa renarint 25
 Vadis levata, ne redire sit nefas;
 Neu conversa domum pigeat dare lintea, quando
 Padus Matina laverit cacumina;
 In mare seu celsus proruperit Apenninus;
 Novaque monstra iunxerit libidine 30
 Mirus amor, iuvet ut tigres subsidere cervis,
 Adulteretur et columba miluo,
 Credula nec rivos timeant armenta leones,
 Ametque salsa levis hircus aequora.
 Haec, et quae poterunt reditus abscindere dulces, 35
 Eamus omnis execrata civitas,
 Aut pars indocili melior grege; mollis et exspes
 Inominata perprimat cubilia.

— v. 15. Ita coni. Rutgersius probante Bentleio, eodemque ducunt duo Codd. Rom. et Ed. Ald. 1501. in quibus est *quod expedit*. Vulgo: *quid expediat*. Vid. Benth. et Both. Annotatt. — v. 16. Ita Schol. Cruq. Pleraque Edd. omittunt signum interrogandi. — v. 19. *proprios* pro, *patrios* Edd. vett. Mitsch. — v. 29. *proruperit* Fca e pluribus Codd. Vulg. *procurrerit*. — v. 32. *miluo* meliores Codd. et Edd. vett. Alii *milvio*. Vid. Torrent. et Both. Annotatt. — v. 33. *ravos* Benth. ex aliquot Codd. Cruq. Cf. Mitsch. ad Od. III, 27, 3. *fulvos* Codd. aliquot Lambin. et Bersm. *flavos* plerique. Cf. Fca.

Vos, quibus est virtus, muliebrem tollite luctum,
 Etrusca praeter et volate litora. 40
 Nos manet Oceanus circumvagus: arva, beata
 Petamus arva, divites et insulas,
 Reddit ubi Cererem tellus inarata quotannis,
 Et imputata floret usque vinea;
 Germinat et nunquam fallentis termes olivae, 45
 Suamque pulla ficus ornat arborem,
 Mella cava manant ex ilice, montibus altis
 Levis crepante lympa desilit pede.
 Illic iniussae veniunt ad mulctra capellae,
 Refertque tenta grex amicus ubera; 50
 Nec vespertinus circumgemit ursus ovile,
 Neque intumescit alta viperis humus.
 Nulla nocent pecori contagia, nullius astri
 Gregem aestuosa torret impotentia.
 Pluraque felices mirabimur: ut neque largis 55
 Aquosus Eurus arva radat imbribus,
 Pingua nec siccis urantur semina glebis;
 Utrumque rege temperante Coelitum.
 Non huc Argoo contendit remige pinus,
 Neque impudica Colchis intulit pedem; 60
 Non huc Sidonii torserunt cornua nautae,
 Laboriosa nec cohors Ulixei.
 Iupiter illa pia se crevit litora genti,
 Ut inquinavit aere tempus aureum,
 Aerea dehinc ferro duravit saecula; quorum 65
 Piiis secunda vate me datur fuga.

— v. 39. *animus* pro *virtus* Codd. apud Bentr. quem Cf. — v. 41. *circumvagus arva*; interpungit Fea. Sed Cf. Both. Annotatt. — v. 48. *Nympha* pro *lympa* Codd. aliquot. Vid. Bentr. ad Od. III, 13, 12. — v. 51. *ovili* alii Cod. et Edd. princeps, itemque Fea. Cf. Both. Annotatt. — v. 60. *Ulixei* Bentr. Vulg. *Ulysssei*. — v. 63. *sacra vit* pro *se crevit* Codd. aliquot Torrent. et Bentr. quem V. coll. Fea. — v. 65. Sic Codd. apud Bentr. Feam alios, et vett. Edd. Vulgo: *Aere, dehinc*. Vid. Both. Annotatt. Pro *quorum* Graev. coni. *quorsum*, Bentr. *quo nunc*.

CARMEN XVII.
IN CANIDIAM.

Poeta loquens inducitur atque palinodia ironica se Canidiae beneficiis superatum fingens, cui venefica non exorata novis diris respondet.

Metrum Iambicum senarium.

Horatius.

Iam iam efficaci do manus scientiae
 Supplex, et oro regna per Proserpinae,
 Per et Dianae non movenda numina,
 Per atque libros carminum valentium
 Refixa coelo devocare sidera, 5
 Canidia, parce vocibus tandem sacris,
 Citumque retro solve, solve turbinem.
 Movit nepotem Telephus Nereium
 In quem superbus ordinarat agmina
 Mysorum, et in quem tela acuta torserat. 10
 Luxere matres Iliae addictum feris
 Alitibus atque canibus homicidam Hectorem,
 Postquam relictis moenibus rex procidit
 Heu! pervicacis ad pedes Achillei.
 Setosa duris exuere pellibus 15
 Laboriosi remiges Ulixii
 Volente Circa membra; tunc mens et sonus

XVII. Mitscherl. vers. 1 — 52. Horatio ademptos Varo tribuit Canidiae amatori, qui supra nominatur Epod. 5 et vera ille quidem coniectura ductus. Sed. Cf. Doering. — v. 5. *Refixa* multi Codd. et Edd. vett. Alii Codd. non pauciores et Edd. vett. *defixit*. Vid. Bentl. et Both. Annotatt. — v. 7. *volve, volve* Lambin. ex coniectura Aurati Cf. Both. Annotatt. — v. 11. Totidem fere Codd. et vett. Edd. *luxere* habent, quot *unxere*. Nos Bentl. secuti sumus, quem V. coll. Fea. — v. 12. *Hectora* Cod. Bersm. Cf. Bentl. ad v. 17. huius carm. — v. 17. *Circa* Bentl. ex uno suo Cod. et Valerio Probo, itemque duo Codd. Feae. Vulg. *Circe*. Vid. Bentl.

Relapsus, atque notus in vultus honor.
 Dedi satis superque poenarum tibi,
 Amata nautis multum et institoribus. 20
 Fugit iuventas, et verecundus color
 Reliquit ossa pelle amicta lurida,
 Tuis capillus albus est odoribus,
 Nullum ab labore me reclinat otium.
 Urget diem nox, et dies noctem, neque est 25
 Levare tenta spiritu praecordia.
 Ergo negatum vincor ut credam miser,
 Sabella pectus increpare carmina,
 Caputque Marsa dissilire naenia.
 Quid amplius vis? O mare, o terra! ardeo, 30
 Quantum neque atro delibutus Hercules
 Nessi cruore, nec Sicana fervida
 Furens in Aetna flamma. Tu, donec cinis
 Iniuriosis aridus ventis ferar,
 Cales venenis officina Colchicis. 35
 Quae finis? aut quod me manet stipendium?
 Effare: iussas cum fide poenas luam;
 Paratus expiare, seu poposceris
 Centum iuencos, sive mendaci lyra
 Voles sonari; tu pudica, tu proba, 40
 Perambulabis astra sidus aureum,
 Infamis Helenae Castor offensus vice,
 Fraterque magni Castoris, victi prece,
 Adempta vati reddidere lumina.

— v. 18. *Relatus* pro *relapsus* aliquot Codd. et Edd. vett. Vid. Benth. — v. 22. *ossa* omnes Codd. *ora* Benth. ex coniectura. Cuning. post *reliquit* comma posuit, ut ad *reliquit* subaudiatur *me* et a sequentia verba *ossa pelle* etc. *sunt*. Sed Cf. Fea et Iahn. — v. 24. *ab* plures Codd. Fea Vand. et Benth. Vulg. *a*. — v. 30. *o terra* cum Benth. e Codd. Fea, quem Vid. — v. 33. *furens* Benth. dedit e Codd. quibus accedunt Codd. Fea. Alii Codd. *urens* aut *virens* Cf. Benth. et Fea. — v. *cod.* Benth. coni. *Tua*, . . . *Calet venenis officina*. — v. 39. *iuencis* Benth. ex aliquot Codd. Cf. Fea. — v. 42. *vicem* Codd. aliquot et Benth. quem Vid. coll. Fea.

Et tu, potes nam, solve me dementia, 45
 O nec paternis obsoleta sordibus,
 Nec in sepulcris pauperum prudens anus
 Novendiales dissipare pulveres.
 Tibi hospitale pectus, et purae manus:
 Tuusque venter Pactumeius; et tuo 50
 Cruore rubros obstetrix pannos lavit,
 Utcunque fortis exsilis puerpera.

Canidia.

Quid obseratis auribus fundis preces?
 Non saxa nudis surdiora navitis
 Neptunus alto tundit hibernus salo. 55
 Inultus ut tu riseris Cotyttia
 Vulgata, sacrum liberi Cupidinis?
 Et Esquilini Pontifex veneficâ
 Impune ut Urbem nomine impleris meo?
 Quid proderat ditasse Pelignas anus 60
 Velociusve miscuisse toxicum?
 Sed tardiora fata te votis manent:
 Ingrata misero vita ducenda est in hoc,
 Novis ut usque suppetas doloribus.
 Optat quietem Pelopis infidus pater, 65
 Egens benignae Tantalus semper dapis;

— v. 50. *Pactumeius* plurimi et optimi Codd. cum antiquissimis Edd. *partumeius* Codd. nonnulli Feae et plures post Ald. Edd. Vid. Bentl. Fea. Vanderb. apud Both. Annotatt. — v. 56. *Cocytia* plures Edd. vett. Sed Vid. Fea. — v. 60. *proderat* Bentl. ex Codd. Ante eum vulgabatur *proderit*, quod Fea reduxit. Cf. Both. Annotatt. — v. 62. *Sed* plures Codd. et vetussissimae Edd. itemque Bentl. Olim pleraeque Edd. *Si tardiora* posito interrogandi signo post *manent* eodemque deleta post *toxicum*; eamque lectionem sequitur Fea. Sed Cf. Both. Annotatt. — v. 64. *laboribus* Bentl. ex Codd. et vett. Edd. Alii *doloribus*. Cf. Fea. — v. 65. *infidus* et *infidi* aequas fere Codd. et vett. Edd. auctoritates habent. Cf. Bentl. et Fea.

Optat Prometheus obligatus aliti;
 Optat supremo collocare Sisyphus
 In monte saxum: sed vetant leges Iovis.
 Voles modo altis desilire turribus, 70
 Modo ense pectus Norico recludere;
 Frustraque vinela gutturi nectes tuo,
 Fastidiosa tristis aegrimonia.
 Vectabor humeris tunc ego inimicis eques,
 Meaeque terra cedet insolentiae. 75
 An, quae movere cereas imagines,
 Ut ipse nosti curiosus, et polo
 Deripere Lunam vocibus possim meis;
 Possim crematos excitare mortuos,
 Desiderique temperare pocula, 80
 Plorem artis in te nil agentis exitum?

— v. 72. *innectes* maxima pars Edd. Sed Benth. e Codd. *nectes*, quem Vid. — v. 78 et 79. *possim* omnes Codd. et vetustissimae Edd. *possum* Ed. Ald. 1501. indeque plurimae aliae. Cf. Fea et Both. Annotatt. — v. 80. Ita Benth. e Codd. Vulgo: *poculum*. — v. 81. Codd. plurimi aut *agentis* habent, aut *habentis*, nonnulli *valentis*, Edd. vett. pleraeque *habentis*. Vid. Fea et Both.

Q. HORATII FLACCI
CARMEN SECLARE
AD APOLLINEM ET DIANAM.

Cum seculares ludos Augustus celebraret, secundum ritum
priscæ religionis a virginibus puerisque prætextatis in Capito-
lio cantatum est. *Vet. Schol.*

Metrum Sapphicum.

Phoebe, silvarumque potens Diana,
Lucidum coeli decus, o colendi
Semper et culti, date quæ precamur
Tempore sacro,

Quo Sibyllini monuere versus
Virgines lectas puerosque castos
Dîs, quibus septem placuere colles,
Dicere carmen.

6

Alme Sol, curru nitido diem qui
Promis et celas, aliusque et idem
Nasceris, possis nihil urbe Roma
Visere maius.

10

Rite maturos aperire partus
Lenis Ilithyia, tuere matres:
Sive tu Lucina probas vocari,
Seu Genitalis.

15

Vers. 4. Unus in Coll. Sax. Codex *tempore præco*; et ita
Baxter et Gesner, — v. 16, *Seu Genetyllus* Bentl, ex coniectura.
Cf. Fea,

Diva, producas subolem, Patrumque
 Prosperes decreta super iugandis
 Feminis, prolisque novae feraci
 Lege marita:

20

Certus undenos decies per annos
 Orbis ut cantus referatque ludos,
 Ter die claro, totiensque grata
 Nocte frequentes.

Vosque veraces cecinisse Parcae,
 Quod semel dictum, stabilisque rerum
 Terminus servat, bona iam peractis
 Iungite fata.

25

Fertilis frugum pecorisque Tellus
 Spicea donet Cererem corona:
 Nutriant fetus et aquae, salubres
 Et Iovis aurae.

30

Condito mitis placidusque telo
 Supplices audi pueros, Apollo;
 Siderum regina bicornis, audi,
 Luna, puellas.

35

Roma si vestrum est opus, Iliaeque
 Litus Etruscum tenere turmae,
 Iussa pars mutare Lares et urbem
 Sospite cursu,

40

Cui per ardentem sine fraude Troiam
 Castus Aeneas patriae superstes
 Liberum munivit iter, daturus
 Plura relictis:

— v. 21, *ut denos et seq. versu orbis et pro undenos . . . orbis ut Codd.* aliquot Lambini et Edd. quaedam vet. Cf. Fea. — v. 26. Vulg. *dictum est*, quam posteriorem voculam Fea e plurimum Codd. fide expunxit. Bentl. coni. *dictum stabilis per aevum*. Cf. Bentl. Fea, Both. Annotatt. — v. 27, *servat et servet* promiscue Codd. et Edd.

Di, probos mores docili iuventae, 45
 Di, senectuti placidae quietem,
 Romulae genti date remque prolemque
 Et decus omne.

Quaeque vos bobus veneratur albis, 50
 Clarus Anchisae Venerisque sanguis,
 Impetret, bellante prior, iacentem
 Lenis in hostem.

Iam mari terraque manus potentes
 Medus Albanasque timet secures:
 Iam Scythae responsa petunt, superbi 55
 Nuper, et Indi.

Iam Fides, et Pax, et Honor, Pudorque
 Priscus, et neglecta redire Virtus
 Audet, apparetque beata pleno 60
 Copia cornu.

Augur et fulgente decorus arcu
 Phoebus, acceptusque novem Camenis,
 Qui salutari levat arte fessos
 Corporis artus,

Si Palatinas videt aequus arces, 65
 Remque Romanam, Latiumque felix
 Alterum in lustrum meliusque semper
 Proroget aevum;

Quaeque Aventinum tenet Algidumque,
 Quindecim Diana preces virorum 70

— v. 45. 46. *docilis . . . senectutis* Bentl. ex Codd. *placidam* Codd. aliquot Cf. Bentl. — v. 49. Ita locum dedit Bentl. ex pluribus potioribus Codd. et vetustissimis Edd. Multi alii Codd. et pleraeque Edd. *Quique . . . imperet*. Vid. Bentl. Fea, Both. Annotatt. — v. 65. *arces* pleraeque Edd. sed multi Codd. *aras*, quod praetulit Fea, quem V. coll. Bentl. — v. 66. *Romanam Latiumque* coni. Bentl. — v. 68. *Proroget* ut mox *curet . . . applicet* pleraeque Edd. Sed Bentl. ex pluribus Codd. quibus accedunt

Curet, et votis puerorum amicas
Applicet aures.

Haec Iovem sentire, Deosque cunctos,
Spem bonam certamque domum reporto,
Doctus et Phoebi chorus et Dianae
Dicere laudes.

75

Codd. Feae *prorogat, curat, applicat*. Fea ea interpunctione
utilitur, ut protasis per coniunctionem *si* illata inde a vers. 60.
usque ad v. 73. pertineat, et apodosis incipiat a verbis *haec Iovem*,
probante Bothio. Sed Cf. Iahn. — v. 75. *Phoebo* Cod. unus
apud Barth. Adv. 38, 18. Cf Benth.

1000000

1000000 1000000 1000000

1000000 1000000 1000000

1000000 1000000 1000000

1000000

Q. HORATII FLACCI
O P E R A O M N I A.

A D

OPTIMORUM LIBRORUM FIDEM EDITA

C U M

VARIARUM LECTIONUM DELECTU.

CURAVIT

CAROLUS ZELL,

PHILOSOPHIAE DOCTOR ET ANTIQUARUM LITERARUM
IN UNIVERSITATE FRIBURGENSEI PROFESSOR.



TOMUS ALTER.

STUTTGARTIAE,
SUNTIBUS CAROLI HOFFMANN.
MDCCGXXVII.



Q. HORATII FLACCI S E R M O N U M.

LIBER PRIMUS.

SATIRA I.

Si comparaveris hanc satiram, cum plurimis Horatii reliquis, quae, etsi temere fusae videntur, miro tamen ordine et coniunctione partium excellunt: facile apparebit, primum ibi fecisse poetam in hoc genere periculum. Incunte enim satira totum argumentum iis versibus complecti videtur, quibus quaerit cur nemo sua sorte contentus vivat, aliam optet. V. 1—3. Sed ubi hunc locum pluribus versibus explicuit, et eiusmodi hominum inconstantiam notavit, repente inde desilit, atque ex hoc latiori humanae perversitatis campo ad unum genus separatim tractandum se recipit, V. 28. id est eorum, qui perpetuo dum opes conquirunt, conquisitis non fruuntur; in iisque exagitandis maxima satirae pars versatur, V. 28—107. Deinde hunc locum abrupta clausula praecidit, V. 108. in qua versibus aliquot, quae adhuc dixerat, arguta interrogatione complectitur. Atque haec ipsa clausula, tum ratio non satis luculenta, qua ad V. 113. transit, et conclusio V. 117. proposita, denique totius sermonis exitus V. 120, qualis cuilibet sermoni assui poterat, haec omnia novitiam Musam et primos in hoc genere conatus produnt, ita quidem, ut quod Epist. I, 1, 1. ad Maecenatem scribit: *Prima dicte mihi summa dicende Camena* de hac ipsa satira intelligendum esse videatur. Ordinem certe callidiore artificio aut occultiori conflatum in hac quidem satira reperire nondum potuimus; atque Horatius etiamsi in his juvenilis Musae primitiis et ratione et oratione Lucilium superaverit, neque praeclaris versibus haec satira careat: vix tamen sermones suos omnibus omnium aetatum elegantissimi iudicii hominibus et vitae usu subaectis tantopere probasset, si omnes eodem hoc stilo conscripsisset.

Quî fit, Maccenas, ut nemo, quam sibi sortem
 Seu ratio dederit, seu fors obiecerit, illa
 Contentus vivat, laudet diversa sequentes?
 O fortunati mercatores! gravis annis
 Miles ait, multo iam fractus membra labore. 5
 Contra mercator, navim iactantibus austris,
 Militia est potior! Quid enim? concurritur: horae
 Momento aut cita mors venit aut victoria laeta.
 Agricolam laudat iuris legumque peritus,
 Sub galli cantum consultor ubi ostia pulsat. 10
 Ille, datis vadibus qui rure extractus in urbem est,
 Solos felices viventes clamat in urbe.
 Cetera de genere hoc, adeo sunt multa, loquacem
 Delassare valent Fabium. Ne te morer, audi
 Quo rem deducam. Si quis Deus, En ego, dicat, 15
 Iam faciam quod vultis: eris tu, qui modo miles,
 Mercator; tu, consultus modo, rusticus: hinc vos,
 Vos hinc mutatis discedite partibus. Eia;
 Quid statis? — Nolint. Atqui licet esse beatis.
 Quid causae est, merito quin illis Iupiter ambas 20
 Iratus buccas inflet, neque se fore posthac
 Tam facilem dicat, votis ut praebeat aurem?
 Praeterea, ne sic, ut qui iocularia, ridens
 Percurram: (quamquam ridentem dicere verum
 Quid vetat? ut pueris olim dant crustula blandi 25
 Doctores, elementa velint ut discere prima:)
 Sed tamen amoto quaeramus seria ludo.
 Ille gravem duro terram qui vertit aratro,
 Perfidus hic caupo, miles, nautaeque, per omne

Sat. I, 1, v. 2. *ulla* pro *illa* Fea ex Codd. multis. Cf. Iahn.
 v. 4. *annis* omnes Codd. et vet. Edd. *armis* coni. Buher. in dia-
 rio Trevoltensi anni 1715. Iun. a pluribus, etiam a F. A. Wolfio
 comprobatur. Cf. Heindorf. Both. Annotatt. Iahn. — v. 7. *Quid-*
ni? Fea. e Codd. Cf. Both. Annot. — v. 8. *aut cita* Benth. ex
 quatuor Codd. Lamb. Reliqui hoc priori *aut* carent. Vid. Hein-
 dorf. — v. 29. Hanc lectionem vulgatam Heindorf. tuctur, pri-
 mum a Marklando impugnatur. Codd. Fea. plures *campo* pro

Audaces mare qui currunt, hac mente laborem 30
 Sese ferre, senes ut in otia tuta recedant,
 Aiunt, quum sibi sint congesta cibaria: sicut
 Parvula, nam exemplo est, magni formica laboris
 Ore trahit quodcunque potest, atque addit acervo,
 Quem struit, haud ignara ac non incauta futuri. 35
 Quae, simul inversum contristat Aquarius annum,
 Non usquam prorepat, et illis utitur ante
 Quaesitis sapiens; quum te neque fervidus aestus
 Demoveat lucro, neque hiems, ignis, mare, ferrum,
 Nil obstet tibi, dum ne sit te ditior alter. 40
 Quid iuvat, immensum te argenti pondus et auri
 Furtim defossa timidum deponere terra? —
 Quod, si comminuas, vilem redigatur ad assem. —
 At, ni id fit, quid habet pulchri constructus acervus?
 Millia frumenti tua triverit area centum, 45
 Non tuus hoc capiet venter plus ac meus: ut si
 Reticulum panis venales inter onusto
 Forte vehas humero, nihilo plus accipias, quam
 Qui nil portarit. Vel dic, quid referat intra
 Naturae fines viventis, iugera centum an 50
 Mille aret? — At suave est ex magno tollere acervo. —
 Dum ex parvo nobis tantundem haurire relinquas,
 Cur tua plus laudes cumeris granaria nostris?
 Ut tibi si sit opus liquidi non amplius urna
 Vel cyatho, et dicas: Magno de flumine malim, 55
 Quam ex hoc fonticulo tantundem sumere. Eo fit,

caupo, unde *Fea praefidus hic campo*: alii alia coniecerunt. Both. *fervidus in campo*. Iahnus *perfidus hic campo* lectionem Codd. *Feae* servavit. Vid. Heindorf. et Both. Annotatt. — v. 38. Codd. inter *sapiens* et *patiens* fluctuant. Vett. Edd. pleraeque *patiens*. Vid. Benth. Heindorf. *Fea*. — v. 43. *in assem* Cod. Bersm. — v. 46 *ac meus* Benth. e plurimis Codd. quibus accedunt Codd. *Feae*; olim vulgo: *quam meus*. Cf. Benth. et Heind. — v. 50. Ita coni. Cuning. Codd. omnes *viventi* Vid. Heind. Both. Iahn. v. 55. *malim* Benth. ex Codd. revocavit; pleraeque olim Edd. *mallem*. Cf. Heind.

Plenior ut si quos delectet copia iusto;
 Cum ripa simul avulsos ferat Aufidus acer.
 At qui tantuli eget, quanto est opus, is neque limo
 Turbatam haurit aquam, neque vitam amittit in undis, 60
 At bona pars hominum decepta cupidine falso,
 Nil satis est, inquit; quia tanti, quantum habeas, sis.
 Quid facias illi? — Iubeas miserum esse, libenter
 Quatenus id facit. Ut quidam memoratur Athenis
 Sordidus ac dives populi contemnere voces. 65
 Sic solitus: Populus me sibilat; at mihi plaudo
 Ipse domi, simul ac nummos contemplor in arca. —
 Tantalus a labris sitiens fugientia captat
 Flumina... Quid rides? mutato nomine de te
 Fabula narratur. Congestis undique saccis 70
 Indormis inhians, et tanquam parcere sacris
 Cogaris, aut pictis tanquam gaudere tabellis.
 Nescis quo valeat nummus? quem praebeat usum?
 Panis ematur, olus, vini sextarius; adde,
 Queis humana sibi doleat natura negatis. 75
 An vigilare metu exanimem, noctesque diesque
 Formidare malos fures, incendia, servos,
 Ne te compilent fugientes, hoc iuvat? Horum
 Semper ego optarim pauperrimus esse bonorum. —
 At si condoluit tentatum frigore corpus, 80
 Aut alius casus lecto te affixit; habes qui
 Assideat, fomenta paret, medicum roget, ut te
 Suscitet, ac natis reddat, carisque propinquis. —
 Non uxor salvum te vult, non filius; omnes

— v. 59. *quantum* Benth. e Codd. Sed Cf. Heind. — v. 63. *miseram* Benth. ex conie. itemque unus Cod. Valart. Cf. Gesner. —
 v. 73. *Pro quo* Cod. Han. et Gotting. *quid.* — v. 77. *malos,*
fures commate interposito Fea cum aliis editoribus. Sed Vid.
 Heindorf. Both. Annot. — v. 79. *optarem* Codd. duo Bersm.
 alii. — v. 81. *Affixit* plures Codd. et vett. Edd. *affixit* pauciores.
 Vid. Benth. et Gesner. — v. 83. In plurimis Edd. signum interrogandi
 in fine vers. additur. Sed Cf. Heind. *An pro At* coni. Doering.

Vicini oderunt, noti, pueri atque puellae. 85
 Miraris, quum tu argento post omnia ponas,
 Si nemo praestet, quem non merearis, amorem?
 An si cognatos, nullo natura labore
 Quos tibi dat, retinere velis, servareque amicos, 90
 Infelix operam perdas: ut si quis asellum
 In campo doceat parentem currere frenis?
 Denique sit finis quaerendi; quoque habeas plus,
 Pauperiem metuas minus, et finire laborem
 Incipias, parto quod avebas, ne facias quod 95
 Ummidius quidam; non longa est fabula. Dives,
 Ut metiretur nummos; ita sordidus, ut se
 Non unquam servo melius vestiret, ad usque
 Supremum tempus, ne se penuria victus
 Opprimeret, metuebat. At hunc liberta securi
 Divisit medium, fortissima Tyndaridarum. — 100
 Quid mi igitur suades? ut vivam Maenius aut sic
 Ut Nomentanus? — Pergis pugnancia secum
 Frontibus adversis componere? Non ego, avarum
 Quum veto te fieri, vappam iubeo ac nebulonem.
 Est inter Tanain quiddam socerumque Viselli. 105
 Est modus in rebus, sunt certi denique fines,
 Quos ultra citraque nequit consistere rectum.
 Illuc, unde abii, redeo. Nemon' ut avarus
 Se probet, ac potius laudet diversa sequentes;
 Quodque aliena capella gerat distentius uber, 110

— v. 88. *An si* Benth. e veteri Schol. et pluribus Codd. *At si* plurimae Edd. vett. *amorem*, *Ac si* Heind. ex coni. *An sic* — *amicos*? Cod. Valart. Vid. Benth. et Heind. — v. 92. *cumque* vel *quumque* pro *quoque* Benth. e Codd. et vett. Edd. Cf. Heind. — v. 95. In nomine proprio valde in Codd. variatum est: *Vimidi*us, *Numidi*us, *Umidi*us, aliter Vid. Benth. et Fea. — Benth. coni. *qui tam* pro *quidam* Cf. Heind. et Both. Annot. — v. 100. *Tyndariarum* coni. Cuning. Sed. V. Benth. — v. 101. *Naevius* plurimi Codd. *Mevius* Edd. vett. pleraeque. Sed Ed. Ven. Lambin. Benth. cum plerisque recentiorum *Maenius* V. Heind. — Cod. Benth. *an sic*, duo alii apud eundem *ac sic*.

Tabescat! neque se maiori pauperiorum
 Turbae comparet; hunc atque hunc superare laboret!
 Sic festinanti semper locupletior obstat:
 Ut, quum carceribus missos rapit ungula currus,
 Instat equis auriga suos vincentibus, illum 115
 Praeteritum temnens extremos inter euntem.
 Inde fit, ut raro, qui se vixisse beatum
 Dicat, et exacto contentus tempore, vita
 Cedat, uti conviva satur, reperire queamus.
 Iam satis est. Ne me Crispini scrinia lippi 120
 Compilasse putes, verbum non amplius addam.

SATIRA II.

Opinionem vulgarem, qua tota haec satira in moechos conscripta putatur, tum demum admiserimus, si omnino in quovis poemate totius operis consilium et ratio ex longissima quaque parte apparere statuendum erit; quod secus esse videtur. Atqui haec quidem satira duabus partibus constat. Incipit poeta a describenda et pluribus exemplis explicanda communi quadam hominum perversitate, quae V. 24. his verbis significatur: *Dum vitant stulti vitia, in contraria currunt*. Ob oculos igitur ponit ab altera parte eos, qui ne in prodigalitatis vitium incurrant, avari evadant et nimis adstricti, et sic porro. Eodem modo etiam in amore peccari subiungit, dum alteri nimis fastidiosi nonnisi matronas, alteri contra nonnisi vilissima quaeque scorta veniunt. — V. 36. Iam inde sequitur altera satirae pars, qua moechorum insania exagitur, qui quamvis facilem Venerem spernunt, atque pericula omnis generis et taedia in matronis alienisque uxoribus sectandis caeci subeunt. Posset utique tota pars prior (V. 1—36.) prooemium totius sermonis haberi, nisi v. 48. denuo alterum in amore et contrarium vitium eorum, qui in libertinis solis insaniunt, uberiori tractatione describeretur. V. 48—63. Inde efficitur commune totius satirae consilium et rationem omnino multiplicem illam et variam hominum stultitiam spectare, qui sapientia carentes dum vitant vitia in contraria incurrunt. In cuius quidem argumenti tractatione unum aliquod genus seligit poeta plenius explicandum, quod aper-

— v. 118. *vita* multi Codd. etiam Feae. Alii *vitae*. Cf. Heind. —
 v. 120. *lippum* pro *lippi* coni. Bentl. Sed V. Heind.

tissime ostendat, quam sit grave et periculosum ab aurea illa mediocritate utraque parte recedere. *Heindorf.*

Ambubaiarum collegia, pharmacopolae,
 Mendici, mimae, balatrones, hoc genus omne
 Moestum ac sollicitum est cantoris morte Tigelli.
 Quippe benignus erat. Contra hic, ne prodigus esse
 Dicatur metuens, inopi dare nolit amico, 5
 Frigus quo duramque famem depellere possit.
 Hunc si perconteris, avi cur atque parentis
 Praeclaram ingrata stringat malus ingluvie rem,
 Omnia conductis coëmens obsonia nummis:
 Sordidus atque animi quod parvi nolit haberi, 10
 Respondet. Laudatur ab his, culpatur ab illis.
 Fufidius vappae famam timet ac nebulonis,
 Dives agris, dives positus in fenore nummis,
 Quinas hic capiti mercedes exsecat, atque
 Quanto perditior quisque est, tanto acrius urget; 15
 Nomina sectatur, modo sumta veste virili,
 Sub patribus duris, tironum. Maxime, quis non,
 Iupiter, exclamat, simulatque audivit? — At in se
 Pro quaestu sumtum facit hic. — Vix credere possis
 Quam sibi non sit amicus: ita ut pater ille, Terentii 20
 Fabula quem miserum nato vixisse fugato
 Inducit, non se peius cruciaverit atque hic.
 Si quis nunc quaerat, Quo res haec pertinet? Illuc:
 Dum vitant stulti vitia, in contraria currunt.
 Malthinus tunicis demissis ambulat; est qui 25
 Inguen ad obscenum subductis usque facetus.
 Pastillos Rufillus olet, Gargonius hireum.
 Nil medium est. Sunt qui nolint tetigisse nisi illas,

II, v. 6. *propellere* longe plurimi Codd. Alii cum maxima parte editionum *depellere*. Cf. Benth. et Heind. — v. 14. *mercedes* *exigit*. Ed. Glarean. — v. 18. *ut ipse* Ed. Ven. et Glarean. pro *in se*. — v. 25. Codd. et Edd. veteres varie *Malthivus*, *Maltinus*, *Malchinus*, quod quidem Benth. praetulit, et *Malchimus*. Cf. Benth. et Heind. — v. 27. *Gargonius* Benth. e Codd. Vulg. *Gorgonius*.

Quarum subsuta talos tegat instita veste :
 Contra alius nullam, nisi olente in fornice stantem. 30
 Quidam notus homo quum exiret fornice, Macte
 Virtute esto, inquit sententia dia Catonis:
 Nam simulac venas inflavit tetra libido,
 Huc iuvenes aequum est descendere, non alienas
 Permollere uxores. Nolim laudari, inquit, 35
 Sic me, mirator cunni Cupiennius albi.
 Audire est operae pretium, procedere recte
 Qui moechos non vultis, ut omni parte laborent;
 Utque illis multo corrupta dolore voluptas,
 Atque haec rara cadat dura inter saepe pericla. 40
 Hic se praecipitem tecto dedit; ille flagellis
 Ad mortem caesus; fugiens hic decedit acrem
 Praedonum in turbam; dedit hic pro corpore nummos;
 Hunc perminxerunt calones; quin etiam illud
 Accidit, ut quidam testes caudamque salacem 45
 Demeteret ferro. Iure omnes: Galba negabat.
 Tutior at quanto merx est in classe secunda!
 Libertinarum dico, Sallustius in quas
 Non minus insanit, quam qui moechatur. At hic si,
 Qua res, qua ratio suaderet, quaque modeste 50
 Munifico esse licet, vellet bonus atque benignus
 Esse: daret quantum satis esset; nec sibi damno
 Dedecorique foret; verum hoc se amplectitur uno,
 Hoc amat, hoc laudat: Matronam nullam ego tango.
 Ut quondam Marsaeus, amator Originis ille, 55
 Qui patrum minae donat fundumque laremque,

— v. 30. *olenti* quidam Codd. et servat Fea. Sed Vid. Benth. ad Od. I, 25, 17. — v. 38. *moechos* Benth. ex Codd. et loco Ennii a Scholiasta laudato. Vulg. *moechis*. Cf. Heind. — v. 45. Sic omnes fere Codd. et vet. Edd. Duo Codd. Lambin. et unus Cruq. *cuidam*; unus Cod. Feae *demeterent*. Unde vel *cuidam* *demeteret ferrum*, vel *cuidam* . . . *demeterent ferro* ediderunt. Vid. Benth. et Heind. — v. 48. *in qua* Benth. ex uno Cod. Sed Cf. Heind. — v. 56. *minae census donavit avarae* Codd. quidam quos laudat Fea et Coll. Sax.

Nil fuerit mi, inquit, cum uxoribus unquam alienis.
 Verum est cum mimis, est cum meretricibus, unde
 Fama malum gravius, quam res, trahit. An tibi abunde
 Personam satis est, non illud, quidquid ubique 60
 Officit, evitare? Bonam deperdere famam,
 Rem patris oblimare, malum est ubicunque. Quid inter-
 Est in matrona, ancilla peccesne togata?
 Villius in Fausta Sullae gener, hoc miser uno
 Nomine deceptus, poenas dedit usque superque 65
 Quam satis est: pugnis caesus, ferroque petitus;
 Exclusus fore, quum Longarenus foret intus.
 Huic si mutonis verbis mala tanta videntis
 Diceret haec animus: Quid vis tibi? numquid ego a te
 Magno prognatum depono Consule cunnum, 70
 Velatumque stola, mea quum conferbuit ira?
 Quid responderet? Magno patre nata puella est.
 At quanto meliora monet, pugnantiisque istis,
 Dives opis natura suae, tu si modo recte
 Dispensare velis, ac non fugienda petendis 75
 Immiscere! Tuo vitio rerumne labores,
 Nil referre putas? Quare, ne poeniteat te,
 Desine matronas sectarier, unde laboris
 Plus haurire mali est, quam ex re decerpere fructus.
 Nec magis huic, niveos inter viridesque lapillos 80
 Sit licet, o Cerinthe, tuo tenerum est femur aut crus
 Rectius, atque etiam melius persaepe togata est.
 Adde huc, quod mercem sine fucis gestat; aperte,
 Quod venale habet, ostendit; nec, si quid honesti est,
 lactat habetque palam, quaerit quo turpia celet. 85
 Regibus hic mos est, ubi equos mereantur, opertos

— v. 63. *peccesne* Lambin. et Benth. ex Codd. Olim plurimae
 Edd. *peccesve*. Vid. Benth. — Comma post *ancilla* deleuimus
 auctore Heindorf. quem Cf. — v. 68. *videnti* Benth. e pluribus
 Codd. et vett. Edd. Cf. Heind. — v. 80. Ita locum ex Codd.
 constituit Benth. quem V. Lectio vulgaris erat: (*Sit licet hoc*
Cerinthe tuum), a Fea servata. Cf. Iahn. *Scilicet, o Cerinthe,*
tuo tenerum etc. coni. Both. — v. 86. *apertos* plures Codd. et
 vett. Edd. Cf. Benth.

Inspiciunt; ne, si facies, ut saepe, decora
 Molli fulta pede est, emtorem inducat hiantem;
 Quod pulchrae clunes, breve quod caput, ardua cervix.
 Hoc illi recte: ne corporis optima Lyncei 90
 Contemplare oculis, Hypsaea caecior illa
 Quae mala sunt spectes. — O crus! O brachia! — Verum
 Depygis, nasuta, brevi latere ac pede longo est.
 Matronae, praeter faciem, nil cernere possis,
 Cetera, ni Catia est, demissa veste tegentis. 95
 Si interdicta petes, vallo circumdata, (nam te
 Hoc facit insanum): multae tibi tum officient res,
 Custodes, lectica, ciniffones, parasitae,
 Ad talos stola demissa, et circumdata palla;
 Plurima, quae inuideant pure apparere tibi rem. 100
 Altera, nil obstat: Cois tibi pacne videre est
 Ut nudam, ne crure malo, ne sit pede turpi;
 Metiri possis oculo latus. An tibi mavis
 Insidias fieri, pretiumque avellier, ante
 Quam mercem ostendi? — Leporem venator ut alta 105
 In nive sectetur, positum sic tangere nolit:
 Cantat, et apponit, Meus est amor huic similis; nam
 Transvolat in medio posita, et fugientia captat.
 Hiscine versiculis speras tibi posse dolores,
 Atque aestus, curasque graves e pectore pelli? 110
 Nonne, cupidinibus statuatur natura modum quem,
 Quid latura, sibi quid sit dolitura negatum,
 Quaerere plus prodest, et inane abscindere soldo?
 Num, tibi quum fauces urit sitis, aurea quaeris
 Pocula? num esuriens fastidis omnia praeter 115

— v. 90. *Lyncei* pro vulgato *Lynceis* Benth. c. Codd. Itemque
 coni. *Tu corporis optima Lyncei Contemplare oculis . . . spectas*
 Sed Cf. Heind. — v. 106. *sectatur* Codd. aliquot. Sed Vid. Benth.
 et Heind. — v. 110. *tolli* Benth. ex Codd. Vulg. *pectore pelli*.
 Cod. Benth. et Feac. *velli*. — v. 111. *statuat* plures Codd. et
 Schol. Olim vulgata lectio *statuit*. Cf. Benth. Gesner. Heind. —
 v. 113. *abscidere* Fea ex aliquot Codd.

Pavonem rhombumque? tument tibi quum inguina,
num, si

Ancilla aut verna est praesto puër, impetus in quem
Continuo fiat, malis tentigine rumpi?

Non ego: namque parabilem amo Venerem facilemque.
Illam, »Post paulo:« »Sed pluris:« »Si exierit vir,« 120
Gallis; hanc Philodemus ait sibi, quae neque magno
Stet pretio, neque cunctetur, quum est iussa venire.
Candida rectaque sit; munda hactenus, ut neque longa
Nec magis alba velit, quam det natura, videri.

Haec ubi supposuit dextro corpus mihi laevum, 125
Ilia et Egeria est; do nomen quodlibet illi,

Nec vereor, ne, dum futuo, vir rure recurrat,
Ianua frangatur, latret canis, undique magno
Pulsa domus strepitu resonet, vepallida lecto
Desiliat mulier, miseram se conscia clamet; 130

Cruribus haec metuat, doti deprensa, egomet mi.
Discincta tunica fugiendum est ac pede nudo,
Ne nummi pereant, aut pyga, aut denique fama.
Deprendi miserum est; Fabio vel iudice vincam.

SATIRA III.

Horatius neque invidiam, quam sibi apud multos satiris suis
contraxerat diluere, neque metum eorum tollere efficacius po-
tuit, qui a poeta, Maecenatis potentissimi viri amico homines
tam libere et diserte notari aegre ferrent, quam hoc ipso ser-
mone. in quo dum praecipit, qua ratione aliorum errores et
vitia ferenda et diiudicanda sint, animi sui candorem, et huma-
nitatem luculentissime prodit. Atque huius satirae conscribendae
hoc nobis consilium, haec occasio esse videtur. Ceterum ibi

— v. 121. Olim male Edd. *Gallis hanc*; coniungebant; veram
interpunctionem instituit Bentl. — v. 129. Codd. et vet. Edd.
vepallida, *veh pallida*, *vae pallida*. Bentl. ex con. *ne pallida*.
Vid. Heind. et Fea. — v. 131. *doti haec deprensa* Bentl. ex Nic.
Heinsii con. Sed Cf. Heind.

primum communis illa hominum perversitas exagitur, qua nostra vitia aut plane ignoramus aut summa indulgentia fovemus, aliorum contra, vel amicorum, sedulo inquirimus et acerbissima severitate notamus. Deinde V. 76. transit poeta ad Stoicorum philosophorum sententiam omnia vitia aequalia habentium; qua quidem cum obtrectatores abuti possint, contrariae Epicureorum sententiae adhibentur V. 98—112. Sequitur postremum aliud Stoicorum παράδοξον V. 126. quod poeta deridet, ita ut vivida et alacri clausula sermo finiatur. *Heindorf.*

Omni⁵bus hoc vitium est cantoribus, inter amicos
 Ut nunquam inducant animum cantare rogati,
 Iniussi nunquam desistant. Sardus habebat
 Ille Tigellius hoc. Caesar, qui cogere posset,
 Si peteret per amicitiam patris atque suam non
 Quidquam proficeret: si collibnisset, ab ovo
 Usque ad mala citaret, Io Bacche! modo summa
 Voce, modo hac, resonat quae chordis quatuor ima.
 Nil aequale homini fuit illi. Saepe velut qui
 Currebat fugiens hostem, persaepe velut qui 10
 Iunonis sacra ferret; habebat saepe ducentos,
 Saepe decem servos; modo reges atque tetrarchas,
 Omnia magna, loquens; modo, Sit mihi mensa tripes et
 Concha salis puri et toga, quae defendere frigus,
 Quamvis crassa, queat. Decies centena dedisses 15
 Huic parco paucis contento, quinque diebus
 Nil erat in oculis. Noctes vigilabat ad ipsum
 Mane; diem totum stertebat. Nil fuit unquam
 Sic impar sibi. Nunc aliquis dicat mihi, Quid tu?
 Nullane habes vitia? Imo alia, haud fortasse minora. 20
 Maenius absentem Novium quum carperet, Heus tu,

III, v. 7. *iteraret* pro *citaret* Bentl. ex con. Vid. Heind. — *Ibid.* Io Bacchae Codd. aliquot. et Ed. Mediolan. 1477. Cf. Bentl. et Heind. — v. 11. *alebat* Bentl. ex scriptura Cod. Vossian. *Habebat.* Cf. Heind. — v. 20. *haud* in uno Fae Cod. et Ed. Ald. Unus Cod. *aut*, reliqui omnes et Edd. vett. ante Aldinam et. Baxter. con. *ut.* Vid. Bentl. qui lectionem et probat, et Heind. qui probat *haud*.

Quidam ait, ignoras te? an ut ignotum dare nobis
 Verba putas? Ego met mi ignosco, Maenius inquit.
 Stultus et improbus hic amor est dignusque notari.
 Quum tua pervideas oculis mala lippus inunctis, 25
 Cur in amicorum vitiis tam cernis acutum,
 Quam aut aquila aut serpens Epidaurius? At tibi contra
 Evenit, inquirant vitia ut rursus et illi.
 Iracundior est paulo; minus aptus acutis
 Naribus horum hominum; rideri possit, eo quod 30
 Rusticius tonso toga desluit, et male laxus
 In pede calceus haeret: at est bonus, ut melior vir
 Non alius quisquam; at tibi amicus; at ingenium ingens
 Inculto latet hoc sub corpore: denique te ipsum
 Concute, num qua tibi vitiorum inseverit olim 35
 Natura aut etiam consuetudo mala: namque
 Neglectis urenda filix innascitur agris.
 Illuc praevertamur: amatorem quod amicae
 Turpia decipiunt caecum vitia, aut etiam ipsa haec
 Delectant, veluti Balbinum polypus Hagnae. 40
 Vellem in amicitia sic erraremus, et isti
 Errori nomen virtus posuisset honestum.
 At pater ut gnati, sic nos debemus amici.
 Si quod sit vitium, non fastidire: strabonem
 Appellat Paetum pater; et Pullum, male parvus 45
 Si cui filius est, ut abortivus fuit olim
 Sisyphus: hunc Varum, distortis cruribus: illum
 Balbutit Scaurum, pravis sultum male talis.
 Parcior hic vivit? frugi dicatur. Ineptus
 Et iactantior hic paulo est? concinnus amicis 50

— v. 25. Unus Cod. *praevideas*, pauci *provideas*, reliqui *pervi-*
deas Benth. coni. *Cum tua tu videas*. Both. *pro videas* gentis ut
 praepositio *pro* cum *oculis* coniungatur. Vid. Henr. Stephan.
 apud Both. Annotatt. Heind. et Fea. — *vers. cod.* Benth. *male*
 e Codd. probante Heind. — v. 29. *aduncis* pro *acutis* coni.
 Benth. Cf. Heind. — v. 34. *pectore* Codd. aliquot pro *corpore*
 Cf. Benth. — v. 40. *Agnae* Codd. Sed V. Benth. et Fea. —
 v. 43. Alii Codd. *ac* pro *at* Both. coni. *aut.* Cf. Heind. —

Postulat ut videatur. At est truculentior atque
 Plus aequo liber? simplex fortisque habeatur.
 Caldior est? acres inter numeretur. Opinor,
 Haec res et iungit, iunctos et servat amicos.
 At nos virtutes ipsas invertimus atque 55
 Sincerum cupimus vas incrustare. Probus quis
 Nobiscum vivit multum demissus homo? Illi
 Tardo cognomen, pingui, damus. Hic fugit omnes
 Insidias, nullique malo latus obdit apertum,
 Quum genus hoc inter vitae versetur, ubi acris 60
 Invidia atque vigent ubi crimina: pro bene sano
 Ac non incauto fictum astutumque vocamus.
 Simplicior quis, et est, qualem me saepe libenter
 Obtulerim tibi, Maecenas, ut forte legentem
 Aut tacitum impellat quovis sermone molestus? 65
 Communi sensu plane caret, inquit. Heu, heu,
 Quam temere in nosmet legem sancimus iniquam!
 Nam vitiis nemo sine nascitur: optimus ille est,
 Qui minimis urgetur. Amicus dulcis, ut aequum est,
 Cum mea compenset vitiis bona, pluribus hisce, 70
 Si modo plura mihi bona sunt, inclinet. Amari
 Si volet hac lege, in trutina ponetur eadem.
 Qui, ne tuberibus propriis offendat amicum,
 Postulat, ignoscet verrucis illius; aequum est,
 Peccatis veniam poscentem reddere rursus. 75
 Denique, quatenus excidi penitus vitium irae,

— 57. Olim vulgo: *multum est demissus homo*; Benth. *multum demissus homo ille*, *Tardo ac cognomen pingui damus*. Heind. *multum et demissus homo: illi Tardo cognomen pingui et damus*. In utraque lectione *ac* et post *pingui* copula et mera coniectura nituntur. Cf. utrumque et de nostra lectione Both. Annotatt. — v. 58. *pinguis* Codd. Bersm. Feae et vett. aliquot Edd. — v. 60. *versetur* Benth. ex uno Cod. Cruquii. — v. 63. *quis at est qual*. Lambin. e Codd. — v. 65. *appellet* Lambin. ex Codd. et vet. Schol. *impediat* Benth. ex con. pro *impellat*. Cf. Heind. — v. 74. *ignoscet* e plurimis Codd. et vett. Edd. Benth. quem V. Alii *ignoscat*. —

Cetera item nequeunt stultis haerentia: cur non
Ponderibus modulisque suis ratio utitur? ac res
Ut quaeque est, ita suppliciis delicta coërcet?
Si quis eum servum, patinam qui tollere iussus 80
Semesos piscis tepidumque ligurrierit ius,
In cruce suffligat, Labeone insanior inter
Sanos dicatur. Quanto hoc furiosius atque
Maius peccatum est! Paulum deliquit amicus;
Quod nisi concedas, habere insuavis; acerbus 85
Odisti, et fugis, ut Rusonem debitor aeris,
Qui nisi, quum tristes misero venere Calendae,
Merecedem aut nummos unde unde extricat, amaras
Porrecto iugulo historias, captivus ut, audit.
Comminxit lectum potus, mensave catillum 90
Evandri manibus tritum deiecit: ob hanc rem,
Aut positum ante mea quia pullum in parte catini
Sustulit esuriens, minus hoc iucundus amicus
Sit mihi? Quid faciam, si furtum fecerit? aut si
Prodiderit commissa fide? sponsumve negarit? 95
Queis paria esse fere placuit peccata, laborant,
Quum ventum ad verum est: sensus moresque repug-
nant,
Atque ipsa utilitas, iusti prope mater et aequi.
Quum prorepserunt primis animalia terris,
Mutum et turpe pecus, glandem atque cubilia propter 100
Unguibus et pugnīs, dein fustibus, atque ita porro
Pugnabant armis, quae post fabricaverat usus;
Donec verba, quibus voces sensusque notarent,
Nominaque invenere: dehinc absistere bello,
Oppida coeperunt munire, et ponere leges, 105
Ne quis fur esset, neu latro, neu quis adulter.
Nam fuit ante Helenam cunnus teterrima belli

v. 82. *Labieno* coni. Benth. quem V. coll. Wieland. et Heind. *Labione* unus Fcae. Cod. — v. 86. *Rusonem* omnes fere Codd. Olim pleraeque Edd. *Drusonem* V. Benth. — v. 91. *tortum* pro *tritum* Benthlei unus Cod. ipsi probatum. Sed. Cf. Heind. — v. 99. *animalia glebis*. Ed. Ven. 1509.

Causa; sed ignotis perierunt mortibus illi,
 Quos, Venerem incertam rapientes, more ferarum,
 Viribus editior caedebat, ut in grege taurus. 110
 Iura inventa metu iniusti fateare necesse est,
 Tempora si fastosque velis evolvere mundi.
 Nec natura potest iusto secernere iniquum,
 Dividit ut bona diversis, fugienda petendis:
 Nec vineet ratio hoc, tantundem ut peccet idemque, 115
 Qui teneros caules alieni fregerit horti,
 Et qui nocturnus sacra Divum legerit. Adsit
 Regula, peccatis quae poenas irroget aequas,
 Ne sentica dignum horribili sectere flagello.
 Nam ut ferula caedas meritum maiora subire 120
 Verbera, non vereor, quum dicas esse pares res
 Furta latrociniiis, et magnis parva mineris
 Falce recisurum simili te, si tibi regnum
 Permittant homines. Si dives, qui sapiens est,
 Et sutor bonus, et solus formosus, et est rex: 125
 Cur optas quod habes? — Non nosti, quid pater, inquit,
 Chrysippus dicat. Sapiens crepidas sibi nunquam
 Nec soleas fecit; sutor tamen est sapiens. — Qui? —
 Ut, quamvis tacet Hermogenes, cantor tamen atque
 Optimus est modulator; ut Alfenus vaser, omni 130
 Abiecto instrumento artis elausaque taberna,
 Sutor erat: sapiens operis sic optimus omnis
 Est opifex solus, sic rex. — Vellunt tibi barbam
 Lascivi pueri, quos tu nisi fuste coërces,
 Urgeris turba circum te stante, miserque 135

— v. 117. *sacra deum nocturnus* Cod. unus Benth. quem Cf. —
 v. 120. *Nam ferula caedas sine ut* Cod. Feae; sed a secunda
 manu ibidem. *Nam ferula ut caed.* Inde Both. *Nam ferula ut*
caedas . . . Verbera? Non ver. Idemque coni . . . *flagello. Ne*
ferula caedas etc. Cf. Heind. et Iahn. — v. 128. *qui* Benth. e
 Codd. Olim vulg. *quo.* — v. 130. Plures Edd. *Alphenus.* Cf. Fea.
 — v. 132. *tonsor* pro *sutor* Benth. e Cod. raso et secundum
 Aconis Cod. in quo erat *tonstrina.* Vid. Heind. — *Protinus*
 pro *optinus* Cuning. e Codd.

Rumperis, et latras, magnorum maxime regum.
 Ne longum faciam, dum tu quadrante lavatum
 Rex ibis, neque te quisquam stipator, ineptum
 Praeter Crispinum, sectabitur: et mihi dulces
 Ignoscent, si quid peccaro stultus, amici; 140
 Inque vicem illorum patiar delicta libenter,
 Privatusque magis vivam te rege beatus.

SATIRA IV.

Octoginta circiter ante Horatium annis Lucilius, ingeniosissimus poeta, veterem illam et inconditam Romanorum satiram instauraverat, adstrinxerat certo versuum genere, plerumque epici carminis, et novo decore ornaverat, cum suae aetatis vitam moresque salse describeret. Neque ullum impedimentum diviti venae et salibus eius offecit, florente populari rei publicae statu et summa loquendi scribendique libertate. Etsi igitur veteres comoediae Atticae auctores aemulatus nemini ne principibus quidem in civitate viris parcebat, tamen neque apud cives suos invidiam sibi conflavit, neque nobilium amicorum gratiam perdidit. (Cf. Sat. II, 1, 62.) Post Lucilium nemo in hoc genere elaboravit, donec Horatius existeret novus satiricae poeseos auctor, sed tempore a Luciliano illo aevo multum diverso. Sublata enim erat una cum vetere re publica felicissima illa dicendi, iocandi, deridendi libertas; simul morum perditorum pestis et omnis generis vitia, iam prius illata per bella civilia, ita nunc omnem civitatem inquinaverant, ut perquam pauci reperirentur ab hac seculi labe immunes et qui hanc satirarum candidam libertatem non reformidarent. Neque minus iam tota poeseos Romanae ratio erat immutata, in qua patrius color et vernacula antiquitatis Romanae indoles ita evanisset, ut omnis laus ex artificiosa Graecorum imitatione peteretur. Non igitur mirum nobis videri potest, ab aliis ea aetate nativam Horatianae satirae simplicitatem et gratam sermonis negligentiam prae magis artificiosa illa carminum pangendorum ratione fastiditam esse, ab aliis poetam ut acerbum, lividum, perniciosum esse vituperatum. Iam contra hos sinistros rumores et prava iudicia ut se

— v. 140. *peccaro* e plurimis Codd. Bentl. quem Cf. Olim pleraeque Edd. *peccavero*.

defenderet poeta hanc satiram conscripsit. Atque ut iam in sermonis exordio hoc consilium significatur, ita propria argumenti tractatio inde a V. 48. instituitur. *Heindorf.*

Eupolis atque Cratinus Aristophanesque, poëtae,
 Atque alii, quorum Comoedia prisca virorum est,
 Si quis erat dignus describi, quod malus, aut fur,
 Quod moechus foret, aut sicarius, aut alioqui
 Famosus, multa cum libertate notabant. 5
 Hinc omnis pendet Lucilius, hosce secutus,
 Mutatis tantum pedibus numerisque, facetus,
 Emunctae naris, durus componere versus.
 Nam fuit hoc vitiosus, in hora saepe ducentos,
 Ut magnum, versus dictabat stans pede in uno. 10
 Quum flueret lutulentus, erat quod tollere velles:
 Garrulus, atque piger scribendi ferre laborem,
 Scribendi recte: nam ut multum, nil moror. Ecce,
 Crispinus minimo me provocat. — Accipe, si vis,
 Accipiam tabulas; detur nobis locus, hora, 15
 Custodes; videamus, uter plus scribere possit. —
 Di bene fecerunt, inopis me quodque pusilli
 Finxerunt animi, raro et perpauca loquentis;
 At tu conclusas hircinis foliis auras,
 Usque laborantes, dum ferrum molliat ignis, 20
 Ut mavis, imitare. Beatus Fannius, ultro
 Delatis capsis et imagine! quum mea nemo
 Scripta legat, vulgo recitare timentis, ob hanc rem,
 Quod sunt quos genus hoc minime iuvat, utpote plures
 Culpari dignos. Quemvis media elige turba; 25

— v. 3. *ac fur* Bentl. e Codd. Sed Vid. Heind. et Fea. — v. 11. Both. verba: *scribendi recte* . . . *moror* parentheses eos uncinis includens, commate tantum interpungit, ut *garrulus* etc. ad *Crispinum* referatur. Cf. Iahn. — v. 15. *Accipe iam* Bentl. e Codd. et vet. aliquot Edd. Cf. Gesner. et Heind. — v. 18. *loquentem* Bentl. ex coni. Cf. Heindorf. — v. 25. Pro *elige* alii Codd. sique plurimi *erue*, alii *eripe* unde coni. *arripe* Bentl. Cf. Heind.

Aut ab avaritia aut misera ambitione laborat.
 Hic nuptarum insanit amoribus, hic puerorum;
 Hunc capit argenti splendor; stupet Albius aere;
 Hic mutat merces surgente a sole ad eum, quo
 Vespertina tepet regio; quin per mala praeceps 30
 Fertur, uti pulvis collectus turbine, ne quid
 Summa deperdat metuens, aut ampliet ut rem.
 Omnes hi metuunt versus, odere poëtas. —
 Fenum habet in cornu, longe fuge; dummodo risum
 Excutiat sibi, non hic cuiquam parcat amico; 35
 Et, quodcunque semel chartis illeverit, omnes
 Gestiet a furno redeuntes scire lacuque,
 Et pueros et anus. — Agedum, pauca accipe contra.
 Primum ego me illorum, dederim quibus esse poëtis,
 Excerptam numero. Neque enim concludere versum 40
 Dixeris esse satis, neque, si qui scribat, uti nos,
 Sermoni propiora, putes hunc esse poëtam.
 Ingenium cui sit, cui mens divinior, atque os
 Magna sonaturum, des nominis huius honorem.
 Idcirco quidam, Comoedia necne poëma 45
 Esset, quaesivere: quod acer spiritus ac vis
 Nec verbis nec rebus inest, nisi quod pede certo
 Differt sermoni sermo merus. — At pater ardens
 Saevit, quod meretrice nepos insanus amica
 Filius uxorem grandi cum dote recuset, 50
 Ebrius et, magnum quod dedecus. ambulet ante
 Noctem cum facibus. — Numquid Pomponius istis
 Audiret leviora, pater si viveret? Ergo
 Non satis est puris versum perscribere verbis,
 Quem si dissolvas, quivis stomachetur eodem 55

— v. 26. Plures Codd. *miser*. Sed Cf. Fea. — Plurimi Codd. *ob avaritiam*. Vid. Iahn. — v. 28. *aera* coni. Burmann. V. Heind. — v. 35. *tibi pro sibi* coni. Rutgers. probante Heind. quem V. — v. 39. *poetis* Bentl. secundum Acronem ad Sat. I. 6, 25. Codd. omnes *poetas*. — v. 41. *si qui* Bentl. e Codd. Alii *si quis*. Cf. Heind. et Iahn. — v. 50. *recusat* et vers. seq. *ambulat* Fea e pluribus Codd. Cf. Both. Annotatt.

Quo personatus pacto pater. His, ego quae nunc,
 Olim quae scripsit Lucilius, eripias si
 Tempora certa modosque, et quod prius ordine ver-
 bum est,

Posterior facias, praeponens ultima primis:
 Non, ut si solvas, »Postquam discordia tetra 60
 Belli ferratos postes portasque refregit:»
 Invenias etiam disiecti membra poetæ.
 Hactenus haec: alias, iustum sit necne poema,
 Nunc illud tantum quaeram, meritone tibi sit
 Suspectum genus hoc scribendi. Sulcius acer 65
 Ambulat et Caprius, rauci male cumque libellis,
 Magnus uterque timor latronibus; at bene si quis
 Et vivat puris manibus, contemnat utrumque.
 Ut sis tu similis Caclî Birrîque, latronum,
 Non ego sum, Caprî neque Sullî; cur metuas me? 70
 Nulla taberna meos habeat neque pila libellos,
 Quois manus insudet vulgi Hermogenisque Tigellî,
 Nec recito cuiquam, nisi amicis, idque coactus,
 Non ubivis, coramve quibuslibet. In medio qui
 Scripta foro recitent, sunt multi, quique lavantes; 75
 Suave locus voci resonat conclusus. Inanes
 Hoc iuvat, haud illud quaerentes, num sine sensu,
 Tempore num faciant alieno. — Laedere gaudes,
 Inquit, et hoc studio pravus facis. — Unde petitur
 Hoc in me iacis? est auctor quis denique eorum, 80
 Vixi cum quibus? Absentem qui rodit amicum,
 Qui non defendit alio culpante, solutos
 Qui captat risus hominum famamque dicacis,
 Fingere qui non visa potest, commissa tacere
 Qui nequit: hic niger est, hunc tu, Romane, caveto. 85

— v. 70. *Caprî* e pluribus Codd. Bentl. Sed Vid. Heind. — *sum* plures Codd. Torrentii probante Heind. quem Cf. Vulg. *sim*. — v. 73. *recitem* Codd. aliquot Lambin. *quicquam* pro *cuiquam* unus Cod. Bentlei, quem V. coll. Heind. — v. 79. *inquit* Bentl. e Codd. revocavit, quem V. coll. Heind. Olim vulg. *inquis*.

Saepe tribus lectis videas coenare quaternos,
 E quibus unus amet quavis adspargere cunctos,
 Praeter eum, qui praebet aquam; post, hunc quoque
 potus,
 Condita quum verax aperit praecordia Liber:
 Hic tibi comis et urbanus liberque videtur 90
 Infesto nigris: ego si risi, quod ineptus
 Pastillos Rufillus olet, Gargonius hircum,
 Lividus et mordax videor tibi? Mentio si qua
 De Capitolini furtis iniecta Petillî
 Te coram fuerit, defendas, ut tuus est mos: — 95
 Me Capitolinus convictore usus amicoque
 A puero est, causaque mea permulta rogatus
 Fecit; et incolumis laetor quod vivit in urbe,
 Sed tamen admiror, quo pacto iudicium illud
 Fugerit. — Hic nigrae succus loliginis, haec est 100
 Aerugo mera, quod vitium procul afore chartis,
 Atque animo prius, ut si quid promittere de me
 Possum aliud vere, promitto. Liberius si
 Dixero quid, si forte iocosius, hoc mihi iuris
 Cum venia dabis. Insuevit pater optimus hoc me, 105
 Ut fugerem, exemplis vitiorum quaeque notando.
 Quum me hortaretur, parce, frugaliter, atque
 Viverem uti contentus eo, quod mi ipse parasset:
 Nonne vides, Albi ut male vivat filius? utque
 Barrus inops? magnum documentum, ne patriam rem 110
 Perdere quis velit. A turpi meretricis amore
 Quum deterreret: Scetani dissimilis sis.

— v. 87. *imus* pro *unus* Fea ex aliquot Codd. — *amet* Benth. ex Codd. pro *avet*, quod olim pleraeque Edd. habuerunt. — v. 88. *aqua* coniecerunt Brodaeus et Muret. Cf. Heind. — v. 100. *fucus* pro *succus* Fea ex uno Cod. et vet. Schol. — v. 102. *ut si qui promittere de me Possum aliquid, vere promitto* Fea ex Codd. Sed Cf. Heind. et Both. Annotatt. — v. 105. *Insuevit* coni. Lambin. et duo Codd. confirmant. Sed Vid. Benth. et Heind. — v. 108. *parassem* Cod. Benth. quem Cf. — v. 109 et 110. *ut qui Panis inops?* vel: *Farris inops* coni. Benth. Cf. Heind. — v. 112.

Ne sequerer moechas, concessa quum Venere uti
 Possem : Deprensi non bella est fama Treboni,
 Aiebat. Sapiens, vitatu quidque petitu 115
 Sit melius, causas reddet tibi; mihi satis est, si
 Traditum ab antiquis morem servare, tuamque,
 Dum custodis eges, vitam famamque tueri
 Incolumem possum; simulac duraverit aetas
 Membra animumque tuum, nabis sine cortice. Sic me 120
 Formabat puerum dictis, et sive iubebat
 Ut facerem quid, Habes auctorem, quo facias hoc;
 Unum ex iudiciis selectis obiciebat:
 Sive vetabat, An hoc inhonestum et inutile factum
 Necne sit, addubites, flagret rumore malo quum 125
 Hic atque ille? Avidos vicinum funus ut aegros
 Exanimat, mortisque metu sibi parcere cogit:
 Sic teneros animos aliena opprobria saepe
 Absterrent vitiis. Ex hoc ego sanus ab illis,
 Perniciem quaecunque ferunt, mediocribus, et queis 130
 Ignoscas, vitiis teneor. Fortassis et istinc
 Largiter abstulerit longa aetas, liber amicus,
 Consilium proprium; neque enim, quum lectulus aut me
 Porticus exceperit, desum mihi. Rectius hoc est;
 Hoc faciens vivam melius; sic dulcis amicis 135
 Occurram; hoc quidam non belle; nunquid ego illi
 Imprudens olim faciam simile? Haec ego mecum
 Compressis agito labris; ubi quid datur otii,
 Illudo chartis. Hoc est mediocribus illis
 Ex vitiis unum, cui si concedere nolis, 140
 Multa poetarum veniet manus, auxilio quae
 Sit mihi, nam multo plures sumus, ac veluti te
 Iudaei cogemus in hanc concedere turbam.

Sectani omnes fere Codd. excepto uno, qui *Sectani*. Cf. Benth.
 et Iahn. — v. 115. *vitatum*, .. *petitum* Coll. Sax. — v. 119.
possim plurimae Edd. vet. Sed Vid. Benth. — v. 124. *factum*
 longe plurimi Codd. *factu* Lambin. et Benth. Cf. Heind. —
 v. 140. *nolis* Codd. ferunt. Benth. *notes* ... *veniet*. Sed Vid. Heind.
 — v. 141. *auxilioque* Lambin. cum Codd. aliquot et vet. Edd.

SATIRA V.

Schol: Porphyr. *Lucilium hac satira aemulatur Horatius iter suum a Roma usque Brundisium describens, quod et ille in tertio libro fecit, primum a Roma Capuam usque et inde fretum Siciliense.* Dubitari non potest, quin poeta hanc satiram, quae itineris Roma Brundisium quasi diarium continet, Lucilianae illi ut geminam addere voluerit; in qua quidem quantopere vetustiore poetam et arte et elegantia superaverit, e Luciliani carminis fragmentis adhuc reliquis (in collectione Dousae), etsi non multis illis quidem conicere quodammodo possumus. Quaeri tamen potest, an non haec lepida narratio omnes omnino Romanos lectores et ab omni parte ita teneret, ut nos nunc tenet. Plures enim loci ut vers. 30. 38. 48. 49. 95. 96, tum id quod significatur v. 36, atque quod v. 82-85. narratur, haec omnia adducere nos debent, ut credamus, hunc sermonem non fuisse ab auctore destinatum, qui publici iuris fieret, sed tantum cum paucis amicis una profectis ut ludicrum huius itineris monumentum communicaretur. Qua de causa autem Maecenas et Cocceius, quibus Horatius se comitem applicuit, hoc iter susceperunt, ipse indicat vers. 28: conciliaturi enim erant Octavianum et Antonium tum temporis inter se dissentientes. Massonius in *Vita Horat.* p. 81 seqq. hoc iter anni 717 aetumno assignat secundum *Dion. Cass.* 48, 54; sed Wesselingius *Observatt.* II, 15. certioribus rationibus utens praecedentis anni tempori verno, cum Antonius Brundisium veniret. *Appian.* V, 78 sq. ed. Schweigh. p. 815 sq. Iter fecerunt primum pedibus, tum navi, deinde mulis (v. 47.) postremum rhedis (v. 86.) vecti. *Heindorf.*

Egressum magna me excepit Aricia Roma
 Hospitio modico; rhetor comes Heliodorus,
 Graecorum longe doctissimus. Inde Forum Appi,
 Differtum nautis, cauponibus atque malignis.
 Hoc iter ignavi divisimus, alius ac nos
 Praecinctis unum; minus est gravis Appia tardis.

5

V, v. 1. *accepit* Lambin. e Codd. Cf. Fea. — v. 3. *linguae* pro *longe* multi Codd. Cf. Heind. et Fea. — v. 5. *Hinc iter* coni. Both. Annotatt. Sed Cf. Iahn. — v. 6. *nimis* pro *minus* dedit Fea e pluribus Codd. Bothio et Doeringio sequentibus. Sed V. Iahn.

Hic ego propter aquam, quod erat teterrima, ventri
 Indico bellum, coenantes haud animo aequo
 Expectans comites. Iam nox inducere terris
 Umbras et coelo diffundere signa parabat: 10
 Tum pueri nautis, pueris convicia nautae
 Ingerere. — Huc appelle!... Trecentos inseris; ohe!
 Iam satis est. — Dum aes exigitur, dum mula ligatur,
 Tota abit hora. Mali culices ranaeque palustres
 Avertunt somnos. Absentem ut cantat amicam 15
 Multa prolutus vappa nauta atque viator
 Certatim: tandem fessus dormire viator
 Incipit, ac missae pastum retinacula mulae
 Nauta piger saxo religat, stertitque supinus.
 Iamque dies aderat, nil quum procedere lintrem 20
 Sentimus, donec cerebrosus prosilit unus,
 Ac mulae nautaeque caput lumbosque saligno
 Fuste dolat. Quarta vix demum exponimur hora.
 Ora manusque tua lavimus, Feronia, lympa.
 Millia tum pransi tria repimus, atque subimus 25
 Impositum saxis late candentibus Anxur.
 Huc venturus erat Maecenas optimus atque
 Cocceius, missi magnis de rebus uterque
 Legati, aversos soliti componere amicos.
 Hic oculis ego nigra meis collyria lippus 30
 Illinere. Interea Maecenas advenit atque
 Cocceius Capitoque simul Fonteius, ad unguem
 Factus homo, Antonî, non ut magis alter, amicus.
 Fundos Aufidio Lusco praetore libenter
 Linquimus, insani ridentes praemia scribae, 35
 Praetextam et latum clavum prunaeque vatillum.

— v. 7. *teterrima* aliquot Codd. sed plurimi *deterrima* Cf. Benth.
 Heind. Fea, qui quidem praefert *deterr.* — v. 12. *ingeris* pro
inseris Codd. Lambin. Cf. Fea. — v. 15. *ut cantat* e multis
 Codd. Benth. Olim vulgo sine *ut.* — v. 23. *exponimus* Coll.
 Sax. — v. 24. *lavimur* Benth. ex con. Nic. Heinsii. Cf. Heind.
 — v. 27. *optimus* Benth. commate a praecedente nomine divellit
 et ad *Cocceium* refert. — v. 36. *prunaeque batillum* multi Codd.

In Mamurrarum lassi deinde urbe manemus,
 Murena praebente domum, Capitone culinam.
 Postera lux oritur multo gratissima, namque
 Plotius et Varius Sinuessae Virgiliusque 40
 Occurrunt, animae, quales neque candidiores
 Terra tulit, neque queis me sit devinctior alter.
 O qui complexus et gaudia quanta fuerunt!
 Nil ego contulerim iucundo sanus amico.
 Proxima Campano ponti quae villula, tectum 45
 Praebuit, et parochi, quae debent ligna salemque.
 Hinc muli Capuae clitellas tempore ponunt.
 Lusum it Maecenas, dormitum ego Virgiliusque:
 Namque pila lippis inimicum et ludere crudis.
 Hinc nos Cocceū recipit plenissima villa, 50
 Quae super est Caudī cauponas. Nunc mihi paucis
 Sarmenti scurrae pugnam Messique Cicirri,
 Musa, velim memores, et quo patre natus uterque
 Contulerit lites. Messī clarum genus Osci;
 Sarmenti domina exstat. Ab his maioribus orti 55
 Ad pugnam venire. Prior Sarmentus: Equi te
 Esse feri similem dico. Ridemus; et ipse
 Messius, Accipio; caput et movet. O, tua cornu
 Ni foret exsecto frons, inquit, quid faceres, quum
 Sic mutilus miniteris? At illi foeda cicatrix 60
 Setosam laevi frontem turpaverat oris.
 Campanum in morbum, in faciem permulta iocatus,
 Pastorem saltaret uti Cyclopa, rogabat;
 Nil illi larva aut tragicis opus esse cothurnis.

bacillum vel *catillum* Edd. quaedam veteres; *prunisque bacillum* auctore Baruffaldo Opusc. scient. et philol. Tom. 29. p. 141. scribendum censet Both. quem V. in Annotatt. coll. Fea et Heind. — v. 37. *Dein* pro *deinde* dedit Both. ad insuavem sonum vitandum. — v. 50. *Cocceū* cum Iahnio scripsimus, quem V. pro vulg. *Coccei*. — v. 51. *Claudi* plures Codd. Cf. Heind. et Fea. — v. 54. *Contulerint* Both. e Coll. Sax. et Ed. Mediolan. 1477. — v. 60. *miniteris* Bentl. e plurimis Codd. et antiquissimis Edd. revocavit; olim vulgo: *minitaris*. Cf. Heind.

Multa Cicirrus ad haec: Donasset iamne catenam 65
 Ex voto Laribus, quaerebat; scriba quod esset,
 Nihilo deterius dominae ius esse. Rogabat
 Denique, cur unquam fugisset? cui satis una
 Farris libra foret, gracili sic tamque pusillo.
 Prorsus iucunde coenam produximus illam. 70
 Tendimus hinc recta Beneventum, ubi sedulus hospes
 Paene macros arsit dum turdos versat in igni.
 Nam vaga per veterem dilapso flamma culinam
 Vulcano summum properabat lambere tectum.
 Convivas avidos coenam servosque timentes 75
 Tum rapere, atque omnes restinguere velle videres.
 Incipit ex illo montes Appulia notos
 Ostentare mihi, quos torret Atabulus, et quos
 Numquam erepsemus, nisi nos vicina Trivici
 Villa recepisset, lacrimoso non sine fumo, 80
 Udos cum foliis ramos urente camino.
 Hic ego mendacem stultissimus usque puellam
 Ad mediam noctem exspecto: somnus tamen aufert
 Intentum Veneri; tum immundo somnia visu
 Nocturnam vestem maculant ventremque supinum. 85
 Quatuor hinc rapimur viginti et millia rhedis,
 Mansuri oppidulo, quod versu dicere non est,
 Signis perfacile est: venit vilissima rerum
 Hic aqua, sed panis longe pulcherrimus, ultra
 Callidus ut soleat humeris portare viator; 90
 Nam Canusî lapidosus, aquae non ditior urna
 Qui locus a forti Dioniede est conditus olim.
 Flentibus hic Varius discedit moestus amicis.
 Inde Rubos fessi pervenimus, utpote longum

— v. 67. Ita Benth. e multis Codd. quem Vid. Alii Codd. et Edd.
Deterius nihilo; *Nullo deterius*. Cf. Fea. — v. 70. *producimus*
 Benth. e Codd. assentiente Heind. — v. 72. *Paene arsit macros*
 Lambini Cod. et alter Benth. Sed V. Both. Annotatt. — *igni*
 Benth. e Codd. pro *igne*. — v. 89. *ultra* plures Edd. post Aldi-
 nam. Cf. Heind. — v. 92. Hunc versum Benth. pro spurio habet.
 Sed Cf. Heind.

Carpentes iter et factum corruptius imbri. 95
 Postera tempestas melior, via peior adusque
 Bari moenia piscosi. Dein Gnatia Lymphis
 Iratis exstructa dedit risusque iocosque,
 Dum flamma sine thura liquescere limine sacro
 Persuadere cupit. Credat Iudaeus Apella, 100
 Non ego; namque Deos didici securum agere aevum,
 Nec, si quid miri faciat natura, Deos id
 Tristes ex alto coeli demittere tecto.
 Brundusium longae finis chartaeque viaeque.

SATIRA VI.

Poeta noster postquam et familiaritate, quam cum Maecenate habuit et Luciliano satirarum genere denuo a se instaurato multitudinis in se oculos converterat, fieri non potuit, quin, cum nonnisi perquam pauci aut ipsum aut Maecenatis in eum animum accuratius introspecerent, a plurimis unus ex istis vulgaribus fortunae filiis haberetur, quales post civilium conversionum turbas et in hac nobilissimarum familiarum ruina a civitatis dominis aut oppressarum aut derelictarum larga copia pullulaverant, atque qui prava ambitione et mala sedulitate in familiaritatem Maecenatis irrepsisset, ut honores et opes venaretur. Atqui adversus hanc ipsam sinistram de se suspicionem et hominum aut ignorantiam aut malevolentiam hic sermo conscriptus esse nobis videtur. Generosus enim poeta virtutis suae sibi conscius et sapientium praeceptis iam a teneris annis honorum et divitiarum inanem gloriam spernere edoctus hoc et Maecenati suo et sibi ipsi debuit, ut civibus suis demonstraret, qua ratione Maecenatis sibi amicitiam conciliaverit, et quam parum ea ad splendida in re publica munera quaerenda abuti vellet. Inde igitur hic sermo natus est, in quo nescias utrum magis admiranda sit dicendi libertas et generosus poetae coram patrono candor, an pietatis erga parentem et grati animi sensus mira vi et veritate expressus. Etiam hoc prudentissime noster fecit, quod ad Maecenatem potissimum hanc satiram scripsit. Ita enim et omnibus quae narrat eo certiore fidem conciliat, et nimiam summi amici laudationem, in quam alioquin aberrare poterat, felicissime effugit. Accedit, quod Maecenati procul dubio pergratum accedit, ut de vera nobili-

tate populus a poeta nostro tam luculenter et graviter edoceret. Nam ut et ipse Maecenas, quanquam potentia et gratia validissimus, intra equestrem ordinem substitit, ita in amicis quoque eligendis, modo sibi constare vellet, magis virtutem et ingenii dotes, quam generis splendorem spectare debuit. Neque id quidem, ut Wielandius acutissime observat, a rationibus rei publicae conversae et secundum Maecenatis potissimum consilia ab Augusto temperatae erat alienum, in qua cum iam summa rerum unius esse coepisset, necesse quodammodo erat, quo facilius nobilium familiarum superbia et auctoritas imminueretur, ut ubique cum in vitae usu, tum in re publica administranda, ab iis qui civitatem regerent, non ex generis nobilitate et decore imaginum, sed ex sua ipsius virtute et ingenii praestantia unusquisque tractaretur.

Non, quia, Maecenas, Lydorum quidquid Etruscos
 Incoluit fines, nemo generosior est te,
 Nec, quod avus tibi maternus fuit atque paternus,
 Olim qui magnis legionibus imperitarent,
 Ut plerique solent, naso suspendis adunco 5
 Ignotos, ut me libertino patre natum.
 Quum referre negas, quali sit quisque parente
 Natus, dum ingenuus: persuades hoc tibi vere,
 Ante potestatem Tullî atque ignobile regnum
 Multos saepe viros nullis maioribus ortos 10
 Et vixisse probos, amplis et honoribus auctos;
 Contra Laevinum, Valerî genus, unde Superbus
 Tarquinius regno pulsus fugit, unius assis
 Non unquam pretio pluris licuisse, notante
 Iudice, quo nosti, populo, qui stultus honores 15
 Saepe dat indignis, et famae servit ineptus,

VI, v. 4. *regionibus* ex uno suo Cod. Cf. Heind. Both. Iahn.
 — *imperitarent* multi Codd. Alii Codd. et Edd. *imperitarint*, vel
imperitarunt. Vid. Benth. Heind. Both. Annotatt. — v. 13. *fugit*
 Benth. e multis Codd. revocavit. Vulg. *fuit*, quod tueretur Heind.
 Cf. Both. Annotatt. — v. 15. *quo* Benth. e Codd. et vetustissimis
 Edd. quem Vid. coll. Heind. *quem* pleraeque Edd. inde ab Aldin.

Qui stupet in titulis et imaginibus. Quid oportet
 Nos facere, a vulgo longe longeque remotos?
 Namque esto, populus Laevino mallet honorem
 Quam Decio mandare novo, censorque moveret 20
 Appius, ingenuo si non essem patre natus;
 Vel merito, quoniam in propria non pelle quiessem.
 Sed fulgente trahit constrictos gloria curru
 Non minus ignotos generosis. Quo tibi, Tilli,
 Sumere depositum clavum, fierique tribuno? 25
 Invidia accrevit, privato quae minor esset.
 Nam ut quisque insanus nigris medium impediit crus
 Pellibus et latum demisit pectore clavum,
 Audit continuo: Quis homo hic est? quo patre natus?
 Ut si qui aegrotet, quo morbo Barrus, haberi 30
 Ut cupiat formosus; eat quaecunque, puellis
 Iniiciat curam quaerendi singula, quali
 Sit facie, sura, quali pede, dente, capillo:
 Sic qui promittit, cives, Urbem sibi curae,
 Imperium fore, et Italiam, et delubra Deorum; 35
 Quo patre sit natus, num ignota matre inhonestus,
 Omnes mortales curare et quaerere cogit. —
 Tunc Syri, Damae, aut Dionysi filius, audes
 Deicere e saxo cives, aut tradere Cadmo? —
 At Novius collega gradu post me sedet uno; 40
 Namque est ille, pater quod erat meus. — Hoc tibi
 Paullus
 Et Messala videris? At hic, si plostra ducenta
 Concurrantque foro tria funera. magna sonabit
 Cornua quod vincatque tubas: saltem tenet hoc nos. —
 Nunc ad me redeo, libertino patre natum, 45

— v. 18. *Nos* pro *nos* Bentr. ex coniect. Sed Cf. Heind. — *longe longeque* Bentr. e Codd. Olim vulg. *longe lateque*. — v. 24. *Tilli* e pluribus Codd. Bentr. quem V. Ante eum vulg. *Tulli*. — v. 25. *tribunum* plures Edd. Cf. Heind. — v. 29. Ita Lambin. e multis Codd. Alii: *quis homo hic et quo patr.* alii: *quis homo hic aut quò p.* quam postremam lectionem Bentr. sequitur.

Quem rodunt omnes libertino patre natum;
 Nunc quia sim tibi, Maecenas, convictor; at olim,
 Quod mihi pareret legio Romana tribuno.
 Dissimile hoc illi est, quia non, ut forsit honorem
 Iure mihi invidet quivis, ita te quoque amicum, 50
 Praesertim cautum dignos assumere prava
 Ambitione procul. Felicem dicere non hoc
 Me possum, casu quod te sortitus amicum;
 Nulla etenim mihi te fors obtulit; optimus olim
 Virgilius, post hunc Varius, dixere quid essem. 55
 Ut veni coram, singultim pauca locutus,
 Infans namque pudor prohibebat plura profari,
 Non ego me claro natum patre, non ego circum
 Me Saturciano vectari rura caballo,
 Sed quod eram, narro: respondes, ut tuus est mos, 60
 Pauca: abeo; et revocas nono post mense, iubesque
 Esse in amicorum numero. Magnum hoc ego duco,
 Quod placui tibi, qui turpi secernis honestum,
 Non patre praeclaro, sed vita et pectore puro.
 Atqui si vitiis mediocribus ac mea paucis 65
 Mendosa est natura, alioqui recta, velut si
 Egregio inspersos rependas corpore naevos,
 Si neque avaritiam neque sordes aut mala lustra
 Obiiciet vere quisquam mihi; purus et insons,
 Ut me collaudem, si et vivo carus amicis 70
 Causa fuit pater his, qui macro pauper agello
 Noluit in Flavi ludum me mittere, magni
 Quo pueri magnis e centurionibus orti,
 Laevo suspensi loculos tabulamque lacerto,

— v. 47. *sum* plures Codd. Feae, aliorum. Cf. Heind. — v. 53. *possim* Codd. Feae, aliorum; recepit Iahn. *possunt* Benth. ex Schol. itemque plures Edd. Vid. Heind. et Bo h. Annotatt. — v. 54. *tibi me* Benth. ex Schol. Cruq. et uno Cod. Sed Vid. Gesner. et Heind. — v. 55. Torrentii aliquot Codd. *Varius*. Cf. Heind. — v. 68. Ita Benth. ex Acrone et Ed. Ven. 1490. Olim vulg. *ac mala*. Cod. Cruq. *nec mala*. — v. 70. *si vivo et carus* Lambin. cum veteribus aliquot Edd.

Ibant octonis referentes Idibus aera; 75
 Sed puerum est ausus Romam portare, docendum
 Artes, quas doceat quivis eques atque senator
 Semet prognatos. Vestem servosque sequentes,
 In magno ut populo, si qui vidisset, avita
 Ex re praeberi sumtus mihi crederet illos. 80
 Ipse mihi custos incorruptissimus omnes
 Circum doctores aderat. Quid multa? pudicum,
 Qui primus virtutis honos, servavit ab omni
 Non solum facto, verum opprobrio quoque turpi,
 Nee timuit, sibi ne vitio quis verteret olim, 85
 Si praeco parvas, aut, ut fuit ipse, coactor
 Mercedes sequerer; neque ego essem questus. At hoc
 nunc
 Laus illi debetur et a me gratia maior.
 Nil me poeniteat sanum patris huius, eoque
 Non, ut magna dolo factum negat esse suo pars, 90
 Quod non ingenuos habeat clarosque parentes,
 Sic me defendam. Longe mea discrepat istis
 Et vox et ratio. Nam si natura iuberet
 A certis annis aevum remeare peractum,
 Atque alios legere ad fastum quoscunque parentes: 95
 Optaret sibi quisque; meis contentus honestos
 Fascibus et sellis nollem mihi sumere, demens
 Iudicio vulgi, sanus fortasse tuo, quod
 Nollem onus haud unquam solitus portare molestum.
 Nam mihi continuo maior quaerenda foret res, 100
 Atque salutandi plures; ducendus et unus
 Et comes alter, uti ne solus rusve peregreve
 Exirem; plures calones atque caballi
 Pascendi; ducenda petorrita. Nunc mihi curto
 Ire licet mulo vel, si libet, usque Tarentum, 105

— v. 79. *si qui* Benth. ex optimis et veterrimis Codd. Alii *si quis* Cf. Iahn. ad Sat. I, 4, 41. — v. 87. Codd. varie: *ad hoc*, *ad haec*, *ut hoc*, *ob hoc*. Benth. praefert *ad haec*. Cf. Heind. — v. 96. *onustos* pro *honestos* e Codd. Lambin. Cf. Heind. — v. 102. *peregre aut* Cod. Gott. et Edd. aliquot vett. Sed V. Heind.

Mantica cui lumbos onere ulceret atque eques armos.
 Obiiciet nemo sordes mihi, quas tibi, Tulli,
 Quum Tiburte via praetorem quinque sequuntur
 Te pueri, lasanum portantes oenophorumque.
 Hoc ego commodius quam tu, praeclare senator, 110
 Multis atque aliis vivo. Quacunque libido est,
 Incedo solus; perecontor quanti olus ac far;
 Fallacem Circum vespertinumque pererro
 Saepe forum; adsisto divinis; inde domum me
 Ad porri et ciceris refero laganique catinum. 115
 Coena ministratur pueris tribus, et lapis albus
 Pocula cum cyatho duo sustinet; adstat echinus
 Vilis, cum patera guttus, Campana supellex.
 Deinde eo dormitum, non sollicitus, mihi quod cras
 Surgendum sit mane, obeundus Marsya, qui se 120
 Vultum ferre negat Noviorum posse minoris.
 Ad quartam iaceo; post hanc vagor, aut ego, lecto
 Aut scripto quod me tacitum invet, ungor olivo,
 Non quo fraudatis immundus Natta lucernis,
 Ast ubi me fessum Sol acrior ire lavatum 125
 Admonuit, fugio Campum lusumque trigonem.
 Pransus non avide, quantum interpellet inani
 Ventre diem durare, domesticus otior. Haec est
 Vita solutorum misera ambitione gravique.
 His me consolor victurum suavius, ac si 130
 Quaestor avus, pater atque meus, patruusque fuisset.

— v. 107, *Tilli* Benth. ut supra v. 24. itemque Fca. Cf. Heind.
 — v. 113. *vespertinusque* Zurich. in variis lectt. — v. 126. Ita
 versum restituit Benth. e Cod. Cruq. Olim vulgabatur: *fugio*
rabiosi tempora signi. Pro *lusum* Benth. coni. *nudum*. Cf. Heind.
 — v. 131. *fuisset* Benth. e Codd. quem Vid. Alii *fuissept*.

SATIRA VII.

Massonius in *Vita Horat.* p. 69. anno U. C. 713, cum Horatius post proelium Philippense Romam redisset, hanc satiram conscriptam esse censet. Sed quam brevi aut longo tempore interposito hoc certamen scurrile ejus narratio subsecuta sit, quis certo hoc demonstraverit? P. Rupilius Rex Romanus ex cohorte Bruti (v. 23—25.) tunc temporis Asiam provinciam a senatu sibi demandatam administrantis cum Persio quodam Clazomenis, Ionica urbe, negotiatore litem habebat, quae erat coram Bruto praetore (711 U. C.) dirimenda. Litigabant igitur utrique acerrima contentione, Rupilius insuper acerbissimis conviciis, Persius vilissima utens erga Brutum adulatione. Tandem Persius salse aliquod dictum in adversarium expromit, quod totius historiologiae acumen et quasi medullam continet, vers. 33 seqq. atque narratiunculae finem imponit. De hoc P. Rupilio Rege afferunt Scholia Cruquii: *Publius Rupilius Rex Praenestinus, postquam a Praenestinis in exilium missus esset, in Attica militavit sub Attio Varo; deinde cum praeturam gereret, in triumviratu proscriptus ab Augusto confugit ad Brutum, in cuius castris cum Horatio commilito tulit aegre tribunum eum esse militum, generis ignobilitatem ei saepius exprobrans. Quare Horatius, ut se ulcisceretur, describit infacetum et arrogans in iurgando cum Persio ingenium.* Idem narrant Acro et Porphy. Qui tandem igitur Wielandus omnia, quae non ex ipsa satira petita sint, Scholiastas in hac narratione commentos esse affirmare sustinuit?

Proscripti Regis Rupili pus atque venenum
 Hybrida quo pacto sit Persius ultus, opinor
 Omnibus et lippis notum et tonsoribus esse.
 Persius hic permagna negotia dives habebat
 Clazomenis, etiam lites cum Rege molestas; 5
 Durus homo, atque odio qui posset vincere Regem,
 Confidens, tumidusque, adeo sermonis amari,
 Sisennas, Barros ut equis praecurreret albis.
 Ad Regem redeo. Postquam nihil inter utrumque
 Convenit: (hoc etenim sunt omnes iure molesti, 10

VII, v. 2. *Hbrida* Both. Alii *Hibrida*. Cf. Heind. — v. 5. *haud lippis* coni. Faber. Vid. Benth. et Heind.

Quo fortes, quibus adversum bellum incidit: inter
 Hectora Priamiden, animosum atque inter Achillem
 Ira fuit capitalis ut ultima divideret mors,
 Non aliam ob causam nisi quod virtus in utroque
 Summa fuit; duo si discordia vexet inertes, 15
 Aut si disparibus bellum incidat, ut Diomedi
 Cum Lycio Glaucō: discedat pigrior, ultro
 Muneribus missis.) Bruto Praetore tenente
 Ditem Asiam, Rupili et Persi par pugnat, uti non
 Compositum melius cum Bitho Bacchius. In ius 20
 Acres procurrunt, magnum spectaculum uterque.
 Persius exponit causam; ridetur ab omni
 Conventu: laudat Brutum laudatque cohortem;
 Solem Asiae Brutum appellat, stellasque salubres
 Appellat comites, excepto Rege; canem illum, 25
 Invisum agricolis sidus, venisse: ruebat,
 Flumen ut hibernum, fertur quo rara securis.
 Tum Praenestinus salso multoque fluenti
 Expressa arbusto regerit convicia durus
 Vindemiator et invictus, cui saepe viator 30
 Cessisset, magna compellans voce cuculum.
 At Graecus, postquam est Italo perfusus aceto,
 Persius exclamat: Per magnos, Brute, Deos te
 Oro, qui reges consueris tollere; cur non
 Hunc Regem iugulas? operum hoc, mihi crede, tuo-
 rum est. 35

— v. 11. *olim pro inter* coni. Benth. Sed Cf. Heind. — v. 15.
verset inert. Codd. aliquot Lambin. idque praefert Benth. Cf.
 Heind. — v. 20. *Compositus* maxima Edd. pars; *compositum*
 permulti Codd. *compositi* duo Codd. Vid. Benth. qui dedit *com-*
positi, Cf. Heind. Feā. — v. 28. *multumque* Edd. vet. et maior
 pars Codd. Cf. Benth. — v. 34. *consuesti* ex uno Cod. et vetere
 quadam Ed. Benth. Sed Cf. Heind.

SATIRA VIII.

Neutiquam haec Satira omnino contra superstitiosos, ut Baxterus autumat, conscripta est, sed certam quandam personam petit, id est, Canidiam veneficam, eandem quae epodi 5 et 17 argumentum praebuit. Scholia Acronis et Cruquii adnotant ad v. 24. *Cunidium pro Gratidia Neapolitana unguentaria, quam semper ut veneficam carpit Horatius*, maxime in V et XVII Epodo, et Schol. Cruquii ad Od. I, 16. *Cantat palinodiam, i. e. cantando revocat, quae scripserat in amicum Gratidium*. Itemque Schol. Acron. et Cruq. ad Sat. II, 1, 48. *Canidia positu est pro Gratidia*. Ad huius Satirae VIII, vers. 25. Porphy. addit: *Mementi me legere apud Helenum Acronem, Saganam fuisse nomine libertam Pomponii senatoris, qui a triumviris est proscriptus*. Quae quidem omnia ex antiquis fontibus, inprimis ex scriptis illis *De personis Horatianis*, quae saepius Scholiastae laudant, derivata esse videntur. Criminosi autem illi iambi, quorum Carm. I, 16, 2. mentio iniicitur procul dubio sunt ii ipsi bini Epodi, nisi temere de aliis deperditis carminibus cogitare malimus. Canidia igitur sive Gratidia, ut ex iis locis apparet, meretrix erat, quam olim invenis poeta amaverat ut Cinaram, Lydiam, Barinen, alias, quae quidem res ex eorum temporum moribus nihil in se habebat turpe nec quidquam flagitiosi. Vid. Od. I, 16. in fin. Sed dissensione oborta Horatius amicam, quo malam eius fidem ulcisceretur, omnibus ob oculos in hoc sermone ponit veneficiorum et incantationum laboribus occupatam, indeque ridiculo casu fugatam. Inducit igitur Priapum, cuius simulacrum ut omnino in hortis ita in Maecenatis hortis Exquilinis esset collocatum, narrantem, ut veneficia et magicas artes a Canidia eiusque socia Sagana in sepulcris exerceri viderit, easque subito fugaverit. Tota res procul dubio non vera sed callide ficta. De ritibus magicis Cf. Epod. V et XVII. Theocrit. Idyll. II. Virgil. Eclog. VIII. Propert. V, 4, 25 seqq. Lucan. VI, 430—830.

Olim truncus eram ficulnus, inutile lignum,
 Quum faber, incertus scamnum faceretne Priapum,
 Maluit esse Deum. Deus inde ego, furum aviumque
 Maxima formido; nam fures dextra coërcet
 Obscenoque ruber porrectus ad inguine palus, 5
 Ast importunas volucres in vertice arundo

Terret fixa, vetatque novis considerare in hortis.
 Huc prius angustis eiecta cadavera cellis
 Conservus vili portanda locabat in arca.
 Hoc miserae plebi stabat commune sepulcrum, 10
 Pantolabo scurrae Nomentanoque nepoti.
 Mille pedes in fronte, trecentos cippus in agrum
 Hic dabat; heredes monumentum ne sequeretur.
 Nunc licet Exquiliis habitare salubribus, atque
 Aggere in aprico spatium, qua modo tristes 15
 Albis informem spectabant ossibus agrum,
 Quum mihi non tantum furesque feraeque, suctae
 Hunc vexare locum, curae sunt atque labori,
 Quantum carminibus quae versant atque venenis
 Humanos animos. Has nullo perdere possum 20
 Nec prohibere modo, simulac vaga Luna decorum
 Protulit os, quin ossa legant herbasque nocentes.
 Vidi egomet nigra succinctam vadere palla
 Canidiam, pedibus nudis, passoque capillo,
 Cum Sagana maiore ululantem. Pallor utrasque 25
 Fecerat horrendas aspectu. Scalpere terram
 Unguibus, et pullam divellere mordicus agnam
 Coeperunt; cruor in fossam confusus, ut inde
 Manes elicerent, animas responsa daturas.
 Lanea et effigies erat, altera cerea; maior 30
 Lanea, quae poenis compesceret inferiorem.
 Cerea suppliciter stabat, servilibus ut quae
 Iam peritura modis. Hecaten vocat altera, saevam
 Altera Tisiphonen; serpentes atque videres
 Infernas errare canes, lunamque rubentem, 35

VIII, v. 7. *fissa* pro *fixa* Fea ex coniectura. Cf. Both. Annotatt. — v. 14. *Exquiliis* Fea quem Vid. Vulg. *Esquiliis*; aliquot Edd. *Aesquiliis*. — v. 15. *quo* omnes Codd. *qua* Benth. ex coniectura, plurimis Edd. sequentibus Cf. Iahn. — v. 19. *vexant* Codd. aliquot Feae, aliorum. — v. 29. Comma post verbum *elicerent* tollunt Fea et Both. Annotatt. quos Vid. — v. 32. *ut quae* e Codd. Benth. Vulg. *utque*. Iahnus cum Wakef. *servilibus modis* ad *stabat* referens post *servilibus* et *peritura* incidit.

Ne foret his testis, post magna latere sepulcra.
 Mentior at si quid, merdis caput inquiner albis
 Corvorum, atque in me veniat mictum atque cacatum
 Iulius, et fragilis Pediatia, furque Voranus.
 Singula quid memorem? quo pacto alterna loquentes 40
 Umbrae cum Sagana resonarent triste et acutum,
 Utque lupi barbam variae cum dente colubrae
 Abdiderint furtim terris, et imagine cerea
 Largior arserit ignis, et ut non testis inultus
 Horruerim voces Furiarum et facta duarum. 45
 Nam, displosa sonat quantum vesica, pepedi
 Diffissa nate ficus: at illae currere in urbem.
 Canidiae dentes, altum Saganae caliendrum
 Excidere, atque herbas, atque incantata lacertis
 Vincula, cum magno risuque iocoque videres. 50

SATIRA IX.

Vulgaris opinio, qua haec satira garruli descriptionem continere putatur, procul dubio e male intellecto versu 33. orta est. Nam lectori integro et nullis praeiudicatis opinionibus corrupto continuo patebit, hic neque garruli charactera depingi, qualis, ut hoc utar, apud Theophrastum (Charact. III.) describitur, neque omnino generalis characteris ullius descriptionem proponi, quales, ut garruli, ubique et semper reperiantur; sed potius hoc sibi poetam in hac satira proposuisse, sive veram rem narrat sive fictam, ut certos quosdam homines derideret, qui iudicii elegantiam et ingenium amoenum affectantes atque exemplum Virgilii Horatiique aemulati in Maecenatis familiaritatem se intrudere satagerent, et quo certius id assequerentur sine ullo pudore et nihil verentes ne vilem suum et abiectum animum proderent, omnibus modis poetae nostri amicitiam expugnare contenderent. Utut hoc sit multo aptius certe haec satira male seduli quam garruli inscriptionem prae se ferret. Denique et hoc facile apparebit, quam callide hac quoque occasione Horatius utatur, ut civibus suis demonstret, qualis sibi

— v. 41. *resonarint* Benth. e coniect. Cf. Heind. — v. 45. *Ob-
 ruerim voces* ex uno Cod. Fea, Both. Iahn,

familiaritas cum Maecenate intercedat a plurimis ignorata aut male iudicata, atque qui mores et qualis vivendi ratio Maecenati placeat. *Heindorf*.

Ibam forte Via sacra, sicut meus est mos,
 Nescio quid meditans nugarum, et totus in illis:
 Accurrit quidam notus mihi nomine tantum,
 Arreptaque manu, Quid agis, dulcissime rerum?
 Suaviter, ut nunc est, inquam, et cupio omnia quae
 vis. 5

Quum assectaretur, Num quid vis? occupo: at ille,
 Noris nos, inquit; docti sumus. Hic ego, Pluris
 Hoc, inquam, mihi eris. Misere discedere quaerens,
 Ire modo ocius, interdum consistere, in aurem
 Dicere nescio quid puero; quum sudor ad imos 10
 Manaret talos. O te, Bolane, cerebri
 Felicem! aiebam tacitus, quum quidlibet ille
 Garriret, vicos, urbem laudaret. Ut illi
 Nil respondebam, Misere cupis, inquit, abire,
 Iamdudum video, sed nil agis, usque tenebo, 15
 Prosequar. Hinc quo nunc iter est tibi? — Nil opus est te
 Circumagi; quendam volo visere non tibi notum;
 Trans Tiberim longe cubat is, prope Caesaris hortos. —
 Nil habeo quod agam, et non sum piger; usque sequar
 te. —

Demitto auriculas ut iniquae mentis asellus, 20
 Quum gravius dorso subiit onus. Incipit ille:
 Si bene me novi, non Viscum pluris amicum,
 Non Varium facies; nam quis me scribere plures
 Aut citius possit versus? quis membra movere
 Mollius? invidet quod et Hermogenes, ego canto. 25
 Interpellandi locus hic erat. — Est tibi mater?

IX, v. 1. *Ibam ut forte* Benth. ex mera coniectura. Cf. Heind. et Both. Annotatt. — v. 3. *Occurrit plures* Codd. et Edd. V. Fea. — v. 16. *Prosequar* Benth. e pluribus Codd. probante Heind. Vulg. *persequar*, quod Fea tueretur.

Cognati, quæis tæ salvo est opus? — Haud mihi quisquam;

Omnes composui. — Felices! Nunc ego resto;
Confice, namque instat fatum mihi triste, Sabella

Quod puero cecinit, divina mota anus urna: 30

„Hunc neque dira venena nec hosticus auferet ensis,

„Nec laterum dolor aut tussis nec tarda podagra;

„Garrulus hunc quando consumet cunque; loquaces,

„Si sapiat, vitet, simulatque adoleverit aetas.“

Ventum erat ad Vestae, quarta iam parte diei 35

Praeterita, et casu tunc respondere vadato

Debebat: quod ni fecisset, perdere litem.

Si me amas, inquit, paulum hic ades. — Inteream, si

Aut valeo stare, aut novi civilia iura;

Et propero quo scis. — Dubius sum quid faciam,

inquit; 40

Tene relinquam an rem. — Me, sodes. — Non faciam,

ille,

Et praecedere coepit. Ego, ut contendere durum est

Cum victore, sequor. — Maecenas quomodo tecum?

Hinc repetit. Paucorum hominum et mentis bene sanæ;

Nemo dexterius fortuna est usus. Haberes 45

Magnum adiutorem, posset qui ferre secundas,

Hunc hominem velles si tradere; dispeream ni

Summosses omnes. — Non isto vivitur illic,

Quo tu rere, modo; domus hac nec purior ulla est,

Nec magis his aliena malis; nil mi officit unquam, 50

Ditior hic aut est quia doctior; est locus uni-

— v. 30. *mota divina anus urna* Bentr. ex conl. Sed Cf. Heind. —
v. 36. *vadatus* conl. Bentr. Sed Vid. Heind. — v. 38. *huc pro*
hic Both. e paucis Feae Codd. — *Si tu me, inquit, amas* Cod.
Cruq. Sed Cf. Heind. — v. 42. *est* omittit Bentr. secundum
Codd. Cf. Both. Annotatt. — v. 44. *hominum; mentis* sine copula
ex uno Codd. Feae Both. cuius Vid. Annotatt. — v. 48. *vivitur*
e Codd. Bentr. quem Cf. Olim vulg. *vivimus*. — v. 49. *hac non*
Cod. Comb. idque praeferendum videtur Both. Annotatt. —
v. 50. *officit inquam* Bentr. e Codd. Cf. Heind.

Cuique suus. — Magnum narras, vix credibile. — Atqui
 Sic habet. — Accendis, quare cupiam magis illi
 Proximus esse. — Velis tantummodo; quae tua virtus,
 Expugnabis, et est qui vinci possit, eoque 55
 Difficiles aditus primos habet. — Haud mihi deero;
 Muneribus servos corrumpam; non, hodie si
 Exclusus fuero, desistam; tempora quaeram;
 Occurram in triviis, deducam. Nil sine magno
 Vita labore dedit mortalibus. — Haec dum agit, ecce, 60
 Fuscus Aristius occurrit, mihi carus et illum
 Qui pulchre nosset. Consistimus. Unde venis? et,
 Quo tendis? rogat et respondet. Vellere coepi,
 Et prensare manu lentissima bracchia, nutans,
 Distorquens oculos, ut me eriperet. Male salsus 65
 Ridens dissimulare. Meum iecur urere bilis.
 Certe nescio quid secreto velle loqui te
 Aiebas mecum. Memini bene, sed meliore
 Tempore dicam; hodie tricesima sabbata; vin' tu
 Curtis Iudaeis oppedere? — Nulla mihi, inquam, 70
 Relligio est. — At mi; sum paulo infirmior, unus
 Multorum; ignosces, alias loquar. — Huncine solem
 Tam nigrum surrexe mihi! Fugit improbus ac me
 Sub cultro linquit. Casu venit obvius illi
 Adversarius, et, Quo tu turpissime? magna 75
 Inclamat voce, et, Licet antestari? Ego vero
 Oppono auriculam. Rapit in ius. Clamor utrinque,
 Undique concursus. Sic me servavit Apollo.

— v. 60. *dum ait* Both. ex aliquot Codd. Sed Cf. Iahn. — v. 64.
pressare e pluribus Codd. *Fea* quem V. — v. 69. *vis tu* Benth.
 Sed Vid. Heind. — v. 76. *Inclamat* e melioribus Codd. Benth.
 quem V. Alii *exclamat* vel *adclamat*. — v. 77. *Appono* e duo-
 bus Codd. *Fea* quem Cf. sequentibus Both. et Iahn.

SATIRA X.

Octo versus huic satirae praemissi et diversis formis typorum a reliquis distincti desiderabantur in Editionibus Horatii, ex quo Landinus eos in sua editione anni 1482 e textu in adnotationes relegaverat. Secuti sunt eum Aldus, Ascensius, Lambinus, Cruquius, Torrentius, Bentleius alii. Atque Lambinus quidem *Hos versus*, inquit, *si quis non videt non esse Horatianos, in his litteris parum videt*; provocans ad Mureti, Aurati, aliorum iudicium. Plures, ut Bentleius, ne mentionem quidem horum versuum fecerunt. Gesnerus demum ex antiquissimis Editionibus denuo eos protraxit, quod et editores primi, etiam Lambinus et Torrentius eos in Codicibus reperissent et sibi ipsi si non ab Horatio tamen et ingenioso et antiquo poeta perfecti esse viderentur. Genuinos esse peculiari scriptione demonstrare studuit Iac. Fried. Heusingerus (*De versibus Horatianis, quibus eques importunus Lucilii defensor facete reprehenditur, causa parum manifesta ab Horatio abiudicatis Wolfenb. 1759.*) rationibus partim ex iis ipsis partim extra petitis, quae tamen incredulis vix persuadeant. Nos certe quidem, cum statuit aut Horatium hos versus satirae iam prius publici iuris factae postea addidisse, postquam comperisset Catonem Grammaticum Lucilianas satiras emendare, aut Librarii negligentia in uno exemplo esse omissos, sententiae eius non magis quam aliorum hariolationibus accedere possumus. Utut hoc sit, id certe quidem facile patebit, totam horum versuum rationem et indolem neque cum verbis *Nempe incomposito* etc. apte coire, neque omnino cum subsequente satira eos uno filo esse deductos. Qualis enim tandem haec est coniunctio et orationis progressus, ubi sic habet: *Quam mendosa, Lucili, tua carmina sint, probabo Catone teste, qui versus tuos emendaturus est, et certe melius ille quidem quam iste Grammaticus, qui per nonnisi loris et finibus ad antiquorum poetarum studium cogi poterat. Sed ut illuc redeam (quo tandem?), nempe hoc dixi, Lucilii versus incomposito pede currere* etc. Quo tandem hanc in exordio satirae aliorum hominum derisionem, ubi Horatius hoc egit, ut serie iudicium de Lucilio suum in Satira IV. prolatum tueretur? Nam graviter et serio se defendere incipit, cum dicit: *Nempe incompositio* etc. atque hoc serium dicendi genus ad vers. 18 usque, imo per totam satiram dominatur. Attamen hos versus, etsi a satira segregandos, orationis color antiquos esse ostendit, multum diversus ille quidem ab illis versibus Aeneidos exordio praepositis *Ille ego qui quondam* etc. His enim versibus continetur derisio aequalium, lenior Catonis, qui defensor Lucilii, carmina eius emendaturus, hoc ipso munere

veteris satirici vitia argueret; acerbior callosi Grammatici, quem nonnisi verbera in ludo puero inflicta Grammaticum et veterum poetarum admiratorem effingere possent. Ut igitur hi versus ingenium non vile produnt, ita orationem prae se ferunt Horatio non indignam; atque Catonis mentio ut viventis, *qui emendare parat versus Lucili* arguit, esse eos aetati poetae nostri assignandos. Nam, ut Georg. Fabricius iam observavit, procul dubio *Cato Valerius* Grammaticus significatur, qui apud Suetonium De Grammat. illustr. 11. nominatur *Latina Siren, qui solus legit ac facit poetas*; qui quidem per Sullam admodum iuvenis bonis exutus, auctore Suetonio ad summam senectutem pervenit, ut Horatii esset adhuc aequalis. Sed quae res adducere potuerit quemquam inter Horatii aequales, ut satirae, quae tam belle et apte incipit, hoc exordium assueret? Neque magis cogitare licet, Horatium ipsum satirae a se ad umbilicum deductae postea hunc pannum addidisse. Nobis utique hi versus a manu Horatii profecti esse videntur, destinati primum huius satirae exordio, sed postea reiecti, cum aliud sermonis initium placuisset; aut inventi post poetae obitum ut imperfectum cuiuscunque satirae exordium et ab aliquo ante hanc satiram collocati, cum qua commode coniungi posse viderentur. Neque tamen hoc fragmentum in omnia exempla assumebatur, cum neque in omnibus, qui nunc habentur, codicibus reperitur, neque ullum eius scholion vetus exstet. Ceterum haec satira X defensionem continet iudicii, quod Horatius satira huius libri quarta de Lucilio tulerat a nonnullis reprehensi (Vid. vers. 78--80.) Excipit igitur haec satira satirarum quartam; sed quominus eidem subiungeremus impedivit nos satirarum ordo, qui ut omnino ab omnibus observatur, ita non temere institutus esse videtur. *Heindorf.*

*Lucili, quam sis mendosus, teste Catone
Defensore tuo pervincam, qui male factos
Emendare parat versus. Hoc lenius ille,
Quo melior vir adest; longe subtilior illo,
Qui multum puer est loris et funibus udis
Exoratus, ut esset, opem qui ferre poetis
Antiquis posset contra fastidia nostra,
Grammaticorum equitum doctissimus. Ut redeam illuc.*

X, v. 4. Ita Cod. Berolin. Vulg. *Est quo vir melior.* Both. coni. in Annotatt. *Quo melior vir et est longe subtilior isto.* — v. 6. Ita plures Codd. Berolin. et Feac. Vulg. *Exhortatus.* Cf. Heind. et Both. Annotatt. —

Nempe incomposito dixi pede currere versus
 Lucilî. Quis tam Lucilî fautor inepte est,
 Ut non hoc fateatur? At idem, quod sale multo
 Urbem defricuit, charta laudatur eadem.
 Nec tamen hoc tribuens dederim quoque cetera; nam
 sic 5

Et Laberî mimos ut pulchra poëmata mirer.
 Ergo non satis est risu diducere rictum
 Auditoris: (et est quaedam tamen hic quoque virtus:)
 Est brevitæ opus, ut currat sententia, neu se
 Impediat verbis lassas onerantibus aures: 10
 Et sermone opus est modo tristi, saepe iocoso,
 Defendente vicem modo rhetoris atque poëtae,
 Interdum urbani, parcentis viribus, atque
 Extenuantis eas consulto. Ridiculum acri
 Fortius et melius magnas plerumque secat res. 15
 Illi, scripta quibus Comoedia prisca viris est,
 Hoc stabant, hoc sunt imitandi; quos neque pulcher
 Hermogenes unquam legit, neque simius iste,
 Nil præter Calvum et doctus cantare Catullum. —
 At magnum fecit, quod verbis Graeca Latinis 20
 Miscuit. — O seri studiorum! quine putetis
 Difficile et mirum, Rhodio quod Pitholeonti
 Contigit? — At sermo lingua concinnus utraque
 Suavior, ut Chio nota si commixta Falerni est.
 Quum versus facias, te ipsum percontor, an et quum 25
 Dura tibi peragenda rei sit causa Petillî?
 Scilicet oblitus patriæque patrisque, Latine
 Quum Pedius causas exsudet Publicola, atque
 Corvinus, patriis intermiscere petita
 Verba foris malis, Canusini more bilinguis? 30
 Atqui ego quum Graecos facerem, natus mare citra,

— v. 8. *haec quoque* Cod. Feae. — v. 21. *putatis* plures Codd. Vid. Benth. et Both. Annotatt. — v. 27. *Latine* aliquot Lambin. idque tuentur Fea et Iahn. quos Vid. Plurimi Codd. *Latini*. Pro *oblitus* Benth. ex con. *oblitos*, probantibus Heind. et Both. quos Cf. — v. 31. *Atqui* Benth. e Codd. Alii *atque* Cf. Heind.

Versiculos, vetuit tale me voce Quirinus,
 Post mediam noctem visus, quum somnia vera:
 In silvam non ligna feras insanius, ac si
 Magnas Graecorum malis implere catervas. 35
 Turgidus Alpinus iugulat dum Memnona, dumque
 Defingit Rhēni luteum caput: haec ego ludo,
 Quae neque in aede sonent certantia iudice Tarpa,
 Nec redeant iterum atque iterum spectanda theatris.
 Arguta meretrice potes, Dāvoque Chremeta 40
 Fludente senem, comis garrere libellos,
 Unus vivorum, Fundani: Pollio regum
 Faeta canit pede ter percusso: forte epos acer,
 Ut nemo, Varius ducit: molle atque facetum
 Virgilio annuerunt gaudentes rure Camenae. 45
 Hoc erat, experto frustra Varrone Atacino
 Atque quibusdam aliis, melius quod scribere possem,
 Inventore minor; neque ego illi detrudere ausim
 Haerentem capiti cum multa laude coronam.
 At dixi fluere hunc lutulentum, saepe ferentem 50
 Plura quidem tollenda relinquendis. Age, quaeso,
 Tu nihil in magno doctus reprendis Homere?
 Nil comis tragici mutat Lucilius Atti?
 Non ridet versus Ennī gravitate minores?
 Quum de se loquitur, non ut maiore repressis? 55
 Quid vetat et nosmet Lucilī scripta legentes
 Quaerere, num illius, num rerum dura negarit
 Versiculos natura magis factos et euntes
 Mollius, ac si quis pedibus quid claudere senis,
 Hoc tantum contentus, amet scripsisse ducentos 60
 Ante cibum versus, totidem coenatus? Etrusci
 Quale fuit Cassi rapido ferventius amni
 Ingenium, capsis quem fama est esse librisque
 Ambustum propriis. Fuerit Lucilius, inquam,

— v. 37. Codd. varie: *defingit, diffingit, defigit, depingit*. Vid. Benth. et Heind. — v. 49. *cum multa* Benth. e Codd. et vett. Edd. quem Cf. Alii *multa cum*. Cf. Both. Annotati.

Comis et urbanus; fuerit limatior idem, 65
 Quam rudis et Graecis intacti carminis auctor,
 Quamque poetarum seniorum turba: sed ille,
 Si foret hoc nostrum fato delatus in aevum,
 Detereret sibi multa, recideret omne, quod ultra
 Perfectum traheretur, et in versu faciendo 70
 Saepe caput scaberet, vivos et roderet ungues.
 Saepe stilum vertas, iterum quae digna legi sint,
 Scripturus; neque, te ut miretur turba, labores,
 Contentus paucis lectoribus. An tua demens
 Vilibus in ludis dictari carmina malis? 75
 Non ego; nam satis est equitem mihi plaudere, ut audax,
 Contentis aliis, explosa Arbuscula dixit.
 Men' moveat cimex Pantilius? aut cruciet quod
 Vellicet absentem Demetrius? aut quod ineptus
 Fannius Hermogenis laedat conviva Tigelli? 80
 Plotius et Varius, Maecenas Virgiliusque,
 Valgius, et probet haec Octavius optimus, atque
 Fuscus, et haec utinam Viscorum laudet uterque!
 Ambitione relegata, te dicere possum,
 Pollio, te, Messala, tuo cum fratre, simulque 85
 Vos, Bibule et Servi; simul his te, candide Furni,
 Compluresque alios, doctos ego quos et amicos
 Prudens praetereo, quibus haec, sunt qualiacunque,
 Arridere velim; doliturus, si placeant spe
 Deterius nostra. Demetri, teque, Tigelli, 90
 Discipularum inter iubeo plorare cathedras.
 I, puer, atque meo citus haec subscribe libello.

— v. 66. *Quam Rudius Graecis* etc. conl. Casaubon. De Rom. Sat. p. 255. Sed Cf. Heind. — v. 68. Alii Codd. *delatus*, *delapsus*, *dilapsus*. Cf. Heind. et Fea. — v. 78. *cruciet* Lambin. Bentleius orationem inde a verbis *Men' moveat*, continuat nullo interrogationis signo interposito usque ad *Demetrius?* Cf. Heind. — v. 86. *Bibule* ex emendatione Nic. Heinsii. Codd. et Edd. vett. *Bibuli*. Cf. Heind. — v. 88. *sunt* ex antiquissimis Edd. Bentl. quem V. coll. Heind. Alii *sint*. — v. 91. *discipularum* Edd. aliquot vett. post Aldinam. Vid. Fea et Heind.

Q. HORATII FLACCI S E R M O N U M.

LIBER SECUNDUS.

SATIRA I.

Carminum Horatii ordo et in singulos libros distributio poetam ipsum, ut a Bentleio in praefatione sua edocti sumus, auctorem habet. Horatius, ex Bentlei computatione, satiras aetatis anno 26 usque ad 28 a se conscriptas uno volumine collectas ediderat; nunc pluribus annis post, alterum hoc volumen publici iuris fecit anno aetatis 31 usque ad 33 confectum. Quam parum autem hae satirae separatim primum editae placuerint, quam aspera iam tum iudicia pars lectorum de poetae consilio et voluntate, alia pars de horum carminum pretio tulerit, satirae libri primi, 3, 4 et 10 satis clare ostendunt; neque integro volumine edito hominum favorem continuo sibi poeta conciliaverit. Haecenus non mirum nobis videbitur, hoc alterum satirarum volumen ab iterata satirici generis defensione incipere; at quam longe huius quidem defensionis ratio et stilus ab illis prioribus recedit! Poeta enim dum simplici et candido sermone uti videtur, per totam hanc satiram adversarios suos salissimè nobis deridendos propinat, ut non amplius hoc carminum genus serio et iustis argumentis defendere, sed potius hac data occasione de aliis quibusdam rebus huc pertinentibus cum lectoribus communicare eum voluisse appareat. Nam Horatius, cum in priore satirarum volumine poetam satis ingeniosum atque adeo praestantissimum se prae buisset, nonne expectationem excitare de se debebat, fore, ut ipse, Maecenatis et Augusti familiaris, ingenium suum et artem ad huius principis gloriam celebrandam conferret, quod quidem omnes fere poetae hac aetate satagerent? Augustum certe quidem ipsum hoc exoptasse et Horatii de se silentium male accepisse *Suetonius* diserte narrat in

Vita Horatii, his verbis: *Scripta quidem eius usque adeo probavit mansuraque perpetuo opinatus est* (Augustus), *ut — post sermones quoque lectos nullam sui mentionem habitam ita sit questus: Irasci me tibi scito, quod non in plerisque eiusmodi scriptis neciam potissimum loquiris. An vereris ne apud posteros tibi infame sit, quod videris familiaris nobis esse?* In priore autem satirarum libro nusquam Augusti honorifica mentio iniicitur; semel tantum aliud agens poeta eum nominat III, 4: at contra in hac prima alterius libri satira bis egregia cum laude nomen eius carmine includitur: *vers. 10 seqq. et vers. 84*, tum subtili artificio et elegantissima orationis conversione *vers. 62 sqq. Sat. V.* huius libri. Quapropter Augusti querela nullam sui mentionem a poeta factam nonnisi priorem Satirarum librum tangere potest. Iam prior huius primae libri secundi Satirae pars ad hanc ipsam de se expectationem pertinet *vers. 10—20*. Aliud quiddam eorum, quae poeta in hoc sermone quasi aliud agens attingit, significatur *vers. 60*. Trebatii verbis: *O puer ut sis Fūtilis metuo, et maiorum ne quis amicus Frigore te feriat*. Poeta enim non satis securus et verens, ne hoc satiricum genus sensim sensimque etiam potentioribus suis amicis molestiam creet et moveat stomachum, consulto ibi heroes illos Scipiones, Laelios commemorat Lucilio, familiari suo, non succensentes quamvis mordaci libertate principes in civitate viros et omnino omnes cives notaret. In fine Satirae adversariorum praecupat consilia, qui, ut videtur, vel in ius poetam se vocaturos esse minati erant, atque ad Augusti de his Satiris iudicium provocans impetum eorum contundit. Neque minus haec Satira in alterius libri limine posita ut orationis stilo ita toto genere et conformatione a praecedentibus differt. Est enim genus dramaticum: colloquantur inter se Horatius et senex iuris consultus C. Trebatius Testa, Ciceronis familiaris, ad quem Topica scripsit, ex eiusque litteris ad familiares (Lib. VII.) satis notus. Cicero Trebatium his verbis Iulio Caesari, Galliae Proconsuli, commendaverat (Epp. VII, 5.): *de quo tibi homine hoc spondeo — more Romano — probiorem hominem, meliorem virum, prudentiorem esse neminem. Accedit etiam, quod familiam ducit in iure civili, singularis memoria, summa scientia*; quo factum est, ut Caesar eum in amicorum cohortem reciperet. Orto bello civili partes Pompeii cum Cicerone secutus, postea veniam impetravit ab Augusto et totum se iurisprudentiae studio dedit, nisi quod 706 U. C. Tribunus plebis fuit. Augustus eum de iure consulere solebat, eiusque auditor fuit magnus ille Iuris consultus Q. Antistius Labeo. Vid. N. H. Gundlingii *Dissertatio C. Trebatius Testa Ictus ab iniuriis veterum et recentiorum liberatus*. Hal, 1710. et Menag. *Amoenitatt. Iur. Civ. cap. 14*. Magnam ei

cum Horatio intercessisse familiaritatem, ex hoc colloquio satis apparet, in quo senex Iuris consultus iuniori amico benevole, sed breviter et praecisis verbis, ut de iure respondens, consilium dat. *Heindorf.*

Horatius.

Sunt quibus in Satira videor nimis acer, et ultra
Legem tendere opus; sine nervis altera, quidquid
Composui, pars esse putat, similesque meorum
Mille die versus deduci posse. Trebati,
Quid faciam, praescribe.

Trebatius.

Quiescas.

Horatius.

Ne faciam, inquis, 5

Omnino versus?

Trebatius.

Aio.

Horatius.

Peream male, si non
Optimum erat; verum nequeo dormire.

Trebatius.

Ter uncti

Transnanto Tiberim, somno quibus est opus alto,
Irriguumque mero sub noctem corpus habento.
Aut si tantus amor scribendi te rapit, aude
Caesaris invicti res dicere, multa laborum
Praemia laturus.

10

Horatius.

Cupidum, pater optime, vires
Deficiunt; neque enim quivis horrentia pilis

1, v. 1. Codd. plurimi *videor*; haud pauci *videar*. Vid. Benth. et Heind. — v. 2. *intendere opus* Codd. aliquot, Vid. Fca et Heind. — v. 10. *te capit* Benth. ex uno Cod. Cf. Heind.

Agmina, nec fracta pereuntes cuspide Gallos,
Aut labentis equo describit vulnere Parthi. 15

Trebatius.

Attamen et iustum poteras et scribere fortem,
Scipiadam ut sapiens Lucilius.

Horatius.

Haud mihi deero,
Quum res ipsa feret: nisi dextro tempore Flacci
Verba per attentam non ibunt Caesaris aurem;
Cui male si palpare, recalcitrat undique tutus. 20

Trebatius.

Quanto rectius hoc, quam tristi laedere versu
Pantolabum scurram Nomentanumque nepotem!
Quum sibi quisque timet, quamquam est intactus, et
odit.

Horatius.

Quid faciam? Saltat Milonius, ut semel icto
Accessit fervor capiti numerusque lucernis. 25
Castor gaudet equis; ovo prognatus eodem,
Pugnis; quot capitum vivunt, totidem studiorum
Millia: me pedibus delectat claudere verba,
Lucili ritu, nostrum melioris utroque.
Ille velut fidis arcana sodalibus olim 30
Credebat libris; neque, si male cesserat, usquam
Decurrens alio; neque si bene: quo fit, ut omnis
Votiva pateat veluti descripta tabella
Vita senis. Sequor hunc, Lucanus an Appulus, anceps:
Nam Venusinus arat finem sub utrumque, colonus 35

— v. 15. *describat* pleraeque Edd. vett. et plures Codd. Reliqui Codd. aut *describet* aut *describit*. Vid. Benth. et Fea. — v. 20. *recalcitret* Benth. e Codd. Cf. Heind. — v. 24. *ut simul* Fea ex Cod. Cf. Both. Annotatt. — v. 31. *cesserat* Codd. aliquot Feae; *gesse- rat* longe plurimi Codd. et pleraeque ante Lambin. Edd. Cf. Benth. et Heindorf. — *unquam* cum Fea scripsimus e pluribus Codd. et vett. Edd. Alii *usquam*. Cf. Fea.

Missus ad hoc, pulsus, vetus est ut fama, Sabellis,
 Quo ne per vacuum Romano incurreret hostis,
 Sive quod Appula gens, seu quod Lucania bellum
 Inceuteret violenta. Sed hic stilus haud petet ultro
 Quemquam animantem; et me veluti custodiet ensis 40
 Vagina tectus, quem cur destringere coner,
 Tutus ab infestis latronibus? O pater et rex
 Iupiter, ut pereat positum robigine telum,
 Nec quisquam noceat cupido mihi pacis! at ille,
 Qui me commoritur, (melius non tangere, clamo) 45
 Flebit, et insignis tota cantabitur urbe.
 Cervius iratus leges minuitur et urnam:
 Canidia Albuti, quibus est inimica, venenum:
 Grande malum Turius, si quid se iudice certes.
 Ut, quo quisque valet, suspectos terreat, utque 50
 Imperet hoc natura potens, sic collige mecum:
 Dente lupus, cornu taurus petit; unde, nisi intus
 Monstratum? Scaevae vivacem crede nepoti
 Matrem: nil faciet sceleris pia dextera; — mirum,
 Ut neque calce lupus quemquam, neque dente petit
 bos; — 55

Sed mala tollet animum vitiato melle cicuta.
 Ne longum faciam, seu me tranquilla senectus
 Exspectat, seu mors atris circumvolat alis,
 Dives, inops, Romae, seu fors ita iusserit, exsul,
 Quisquis erit vitae, scribam, color.

Trebatius.

O puer, ut sis 60
 Vitalis, metuo, et maiorum ne quis amicus
 Frigore te feriat.

— v. 37. *qua ne* aliquot Codd. Lambin. Cf. Benth. — v. 41. *dis-*
stringere Edd. aliquot, quas Heindorf. sequitur, quem Vid. collat.
 Doering. — v. 45. *commoritur* unus Cod. apud Bentleium, quem
 Cf. — v. 55. *petat* Codd. aliquot apud Benth. qui coni. *mirum ni*
aut si. De interpunctione loci Cf. Iahn. — v. 58: *ita luserit* Fea
 & pluribus Codd.

Horatius.

Quid? quum est Lucilius ausus
 Primus in hunc operis componere carmina morem,
 Detrahere et pellem, nitidus qua quisque per ora
 Cederet, introrsum turpis; num Laelius, et qui 65
 Duxit ab oppressa meritum Carthagine nomen,
 Ingenio offensi? aut laeso doluere Metello,
 Famosisque Lupo cooperto versibus? Atqui
 Primores populi arripuit, populumque tributum;
 Scilicet uni aequus virtuti atque eius amicis. 70
 Quin ubi se a vulgo et scena in secreta remorant
 Virtus Scipiadae et mitis sapientia Laeli,
 Nugari cum illo et discincti ludere, donec
 Decoqueretur olus, soliti. Quidquid sum ego, quamvis
 Infra Lucili censum ingeniumque, tamen me 75
 Cum magnis vixisse invita fatebitur usque
 Invidia, et fragili quaerens illidere dentem
 Offendet solido; nisi quid tu, docte Trebati,
 Dissentis.

Trebati.

Equidem nihil hic diffingere possum,
 Sed tamen ut monitus caveas, ne forte negoti 80
 Ineutiat tibi quid sanctarum incitiae legum:
 Si mala condiderit in quem quis carmina, ius est
 Iudiciumque.

Horatius.

Esto, si quis mala; sed bona si quis
 Iudice condiderit laudatus Caesare? si quis
 Opprobriis dignum laceraverit, integer ipse? 85

— v. 64. *ora in-cederet* Coll. Sax. Cf. Benth. — v. 65. *et qui*
 Benth. e Codd. et vetustis Edd. Olim vulgo: *aut qui*. Cf. Benth. —
 v. 69. *tributum* Lambin. e Codd. Cf. Heind. — v. 79. Magna
 hoc loco Codd. et Edd. veterum varietas; habent enim primum
hic vel *hinc*, deinde *diffundere*, *diffidere*, *defingere*, *defindere*,
diffingere, *diffigere*, *defringere*. Vid. Benth. Heind. Fea. — v. 85.
laceraverit Benth. quem Vid. e Codd. Lambin. Vulgo *lutraverit*.
 Cf. Benth. Fea, Both. Annotatt.

Trebatius.

Solventur risu tabulae; tu missus abibis.

SATIRA II.

Tenuis et simplex victus, quo veteres illi Romani heroes inde ab urbe condita per quinque secula usi erant, poetae nostri aetate in his corruptis civium suorum moribus plane evanuerat. *Potentiae Romanorum*, Velleio auctore II, 1, prior Scipio viam aperuerat, luxuriae posterior aperuit; quippe remoto Carthaginis metu sublataque imperii aemula, non gradu, sed praecipiti cursu a virtute descitum, ad vitia transcursum; vetus disciplina deserta, nova inducta; in somnum a vigiliis, ab armis ad voluptates, a negotiis in otium conversa civitas. Carthaginis excidium, Graecia voluptatum omnis generis magistra et Asia opulentissima subactae, orientis gazae Romam deportatae incredibilem luxuriam et molli-
tiam apud Romanos pepererant. Sed ut plerumque contrariis vitiis genus humanum ab utraque parte simul urgeri solet, ita in hac communi fere prodigientia non defuerunt, qui nimiam parsimoniam atque adeo sordidam avaritiam consecrarentur. Nulla res magis poetae, seculi vitia emendaturo, cordi esse debuit, quam haec ipsa labes. Sed cum Maecenatis et talium virorum convictorem parum deceret, censoria severitate in hoc genere uti, sub Ofelli, rustici cuiusdam, persona praecepta tradit, qui nullius philosophi doctrinae addictus, perversis aetatis suae hominibus veterem illam abstinentiam et frugalitatem liberrimo gravissimoque sermone commendat, quam ipse optimam expertus erat ad beate vivendum et vel totius rei familiaris iacturam aequo animo ferendam. Per totam igitur hanc Satiram Ofellus, loquens inducitur, vir simplex et candidus; sed Ofellum dum audimus, poetae ipsius animum et sententiam cognoscimus. *Heindorf*.

Quae virtus, et quanta, boni, sit vivere parvo,
(Nec meus hic sermo est, sed quem praecepit Ofellus
Rusticus, abnormis sapiens, crassaque Minerva)

II, v. 1. *bonis* Codd. aliquot et v. Edd. Cf. Heind. Fea. et Both. Annotatt. — v. 2. *quae* pro *quem* Benth. e Codd. Cf. Heind. — v. 3. *abnormi* plures Codd. Cf. Benth.

Discite, non inter lances mensasque nitentes,
 Quum stupet insanis acies fulgoribus, et quum 5
 Acclinis falsis animus meliora recusat;
 Verum hic impransi mecum disquirite. — Cur hoc? —
 Dicam, si potero. Male verum examinat omnis
 Corruptus iudex. Leporem sectatus, equove
 Lassus ab indomito, vel, si Romana fatigat 10
 Militia assuetum graecari, seu pila velox,
 Molliter austerum studio fallente laborem,
 Seu te discus agit; (pete cedentem aëra disco:)
 Quum labor extulerit fastidia, siccus, inanis
 Sperne cibum vilem; nisi Hymettia mella Falerno 15
 Ne biberis diluta. Foris est promus, et atrum
 Defendens pisces hiemat mare; cum sale panis
 Latrantem stomachum bene leniet. Unde putas? aut
 Qui partum? Non in caro nidore voluptas
 Summa, sed in te ipso est. Tu pulmentaria quaere 20
 Sudando: pinguem vitiis albumque neque ostrea
 Nec scarus aut poterit peregrina iuvare lagois.
 Vix tamen eripiam, posito pavone, velis quin
 Hoc potius, quam gallina, tergere palatum,
 Corruptus vanis rerum, quia veneat auro 25
 Rara avis et picta pandat spectacula cauda;
 Tanquam ad rem attineat quidquam. Num vesceris ista,
 Quam laudas, pluma? coeto num adest honor idem?
 Carne tamen quamvis distat nihil hac magis illa,
 Imparibus formis deceptum te patet: esto. 30
 Unde datum sentis, lupus hic Tiberinus an alto
 Captus hiet? pontesne inter iactatus an amnis
 Ostia sub Tusci? laudas insane trilibrem
 Mullum, in singula quem minuas pulmenta necesse est.

— v. 14. *labor extulerit* plures Codd. *expulerit* Benth. ex uno Cod. Cf. Heind. Fea, Iahn. — v. 29. *nihil hac avis illa coni.* Heind. *haec magis illa* Fea. Cf. Benth. Heind. et imprimis Both. Annotatt. cum Iahn.

Ducit te species, video: quo pertinet ergo 35
 Proceros odisse lupos? quia scilicet illis
 Maiorem natura modum dedit, his breve pondus:
 Ieiunus raro stomachus vulgaria temnit.
 Porrectum magno magnum spectare catino
 Vellem, ait Harpyiis gula digna rapacibus: at vos 40
 Praesentes Austri coquite horum opsonia. Quamquam
 Putet aper rhombusque recens, mala copia quando
 Aegrum sollicitat stomachum, quum rapula plenus
 Atque acidas mavult inulas. Necdum omnis abacta
 Pauperies epulis regum: nam vilibus ovis 45
 Nigrisque est oleis hodie locus. Haud ita pridem
 Galloni praeconis erat acipensere mensa
 Infamis: quid? tum rhombos minus aequora alebant?
 Tutus erat rhombus, tutoque ciconia nido,
 Donec vos auctor docuit praetorius. Ergo 50
 Si quis nunc mergos suaves edixerit assos,
 Parebit pravi docilis Romana iuventus.
 Sordidus a tenui victu distabit, Ofello
 Iudice; nam frustra vitium vitaveris illud,
 Si te alio pravus detorseris. Avidienus, 55
 Cui Canis ex vero dictum cognomen adhaeret,
 Quinquennes oleas est et silvestria corna,
 Ac nisi mutatum parcit defundere vinum, et
 Cuius odorem olei nequeas perferre, (licebit
 Ille repotia, natales, aliosve dierum 60
 Festos albatus celebret) cornu ipse bilibri
 Caulibus instillat, veteris non parcus aceti.

— v. 38. Benteius hunc versum pro spurio habuit ad A. P.
 v. 337. *rari* pro *raro* ex Acrone Heind. Cf. Doering, et Iahn. —
 v. 40. *Vellem* ait pro *Vellem* coni. Heind. Cf. Both. Annotatt. —
 v. 41. Pleraque olim Codd. *quamvis* pro *quamquam* Cf. Heind. —
 v. 53. *distabat* Codd. aliquot. Vid. Benth. — v. 55. *pravus* e Codd.
 Benth. quem Vid. Vulg. *pravum*. — v. 56. *ductum* plures Codd.
 et vett. Edd. Vid. Benth. Heind. et Fea. — v. 58. *diffundere* Codd.
 aliquot et vett. Edd. Cf. Heind. — v. 62. *largus* pro *purcus* Codd.
 Feae et Ed. princ. Cf. Heind.

Quali igitur victu sapiens utetur? et horum
 Utrum imitabitur? Hac urget lupus, hac canis, aiunt.
 Mundus erit, qui non offendant sordibus, atque 65
 In neutram partem cultus miser. Hic neque servis,
 Albucii senis exemplo, dum munia didit,
 Saevus erit; neque sic ut simplex Naevius unctam
 Convivis praebebit aquam; vitium hoc quoque magnum.
 Accipe nunc, victus tenuis quae quantaque secum 70
 Afferat. Inprimis valeas bene: nam variae res
 Ut noceant homini, credas, memor illius escae,
 Quae simplex olim tibi sederit. At simul assis
 Miscueris elixa, simul conchyliis turdis:
 Dulcia se in bilem vertent, stomachoque tumultum 75
 Lenta feret pituita. Vides, ut pallidus omnis
 Coena desurgat dubia? Quin corpus onustum
 Hesternis vitiis animum quoque praegravat una,
 Atque affigit humo divinae particulam aerae.
 Alter, ubi dicto citius curata sopori 80
 Membra dedit, vegetus praescripta ad munia surgit,
 Hic tamen ad melius poterit transcurrere quondam,
 Sive diem festum rediens advexerit annus,
 Seu recreare volet tenuatum corpus, ubi 85
 Accedent anni, et tractari mollius aetas
 Imbecilla volet. Tibi quidnam accedet ad istam,
 Quam puer et validus praesumis, mollitiem, seu
 Dura valetudo incidit seu tarda senectus?
 Rancidum aprum antiqui laudabant, non quia nasus
 Illis nullus erat, sed, credo, hac mente, quod hospes 90
 Tardius adveniens vitiatum commodius, quam
 Integrum edax dominus consumeret. Hos utinam inter
 Heroas natum tellus me prima tulisset!

— v. 64. *angit* plurimi Codd. et Edd. ante Lambinum, qui primus
 e Codd. dedit *aiunt*. Cf. Heind. et Fea. — v. 65. *qua non offendat*
 Bentl. e Codd. Sed Vid. Heind. — v. 77. *desurgit* Collat.
 Sax. — v. 79. *affligit* Plures Codd. Lambin. et Fea. Praetulit
 Bentl. quem Vid. coll. Heind. et Fea. — v. 84. *ubivive* Bentl. ex
 coni. Cf. Heind. et Iahn.

Das aliquid famae, quae carmine gratior aurem
 Occupat humanam? grandes rhombi patinaeque 95
 Grande ferunt una cum damno dedecus. Adde
 Iratum patrum, vicinos, te tibi iniquum,
 Et frustra mortis cupidum, quum deerit egenti
 As, laquei pretium. Iure, inquit, Trausius istis
 Iurgatur verbis; ego vectigalia magna 100
 Divitiasque habeo tribus amplas regibus. Ergo,
 Quod superat, non est melius quo insumere possis?
 Cur eget indignus quisquam, te divite? quare
 Tempora ruunt antiqua Deum? cur, improbe, carae
 Non aliquid patriae tanto emetiris acervo? 105
 Uni nimirum tibi recte semper erunt res.
 O magnus posthac inimicis risus! Uterne
 Ad casus dubios fidet sibi certius? hic, qui
 Pluribus assuerit mentem corpusque superbum,
 An qui, contentus parvo metuensque futuri 110
 In pace, ut sapiens, aptarit idonea bello?
 Quo magis his credas; puer hunc ego parvus Ofellum
 Integris opibus novi non latius usum,
 Quam nunc accisis. Videas metato in agello
 Cum pecore et gnatis fortem mercede colonum, 115
 Non ego, narrantem, temere edi luce profesta
 Quidquam praeter olus, fumosae cum pede pernae;
 Ac mihi seu longum post tempus venerat hospes,
 Sive operum vacuo gratus conviva per imbrem
 Vicinus, bene erat, non piscibus urbe petitis, 120
 Sed pullo atque haedo: tum pensilis uva secundas
 Et nux ornabat mensas, cum duplici ficu.
 Post hoc ludus erat, culpa potare magistra;

— v. 95. *occupet* plures Codd. eosque sequitur Heind. quem Vid.
 coll. Benth. et Both. Annotatt. — v. 99. *aes* plurimi Codd. et vet.
 Edd. Vid. Benth. et Fea. — v. 99. *inquit* Benth. e Codd. quem Vid.
 coll. Heindorf. et Both. quibus aliorum Codd. lectio *inquis* prae-
 placet. — v. 106. *rectae* Codd. aliquot Lambin. et, ut videtur,
 omnes Fea. — *eunt* Benth. ex con. Nic. Heinsii. Sed Cf. Heind.
 — v. 123. *cuppa* Lambin. *cupa* Benth. uterque ex con. Sed Vid.

Ac venerata Ceres, ita culmo surgetet alto,
Explicuit vino contractae seria frontis. 125
Saeviat atque novos moveat fortuna tumultus;
Quantum hinc imminuet? quanto aut ego parcius, aut
vos,
O pueri, nitiuistis, ut huc novus incola venit?
Nam proprie telluris herum natura neque illum,
Nec me, nec quemquam statuit: nos expulit ille; 130
Illum aut nequities aut vafri inscitia iuris,
Postremum expellet certe vivacior heres.
Nunc ager Umbreni sub nomine, nuper Ofelli
Dictus erat, nulli proprius, sed cedit in usum
Nunc mihi, nunc alii. Quocirca vivite fortes, 135
Fortiaque adversis opponite pectora rebus.

SATIRA III.

Aedilitatis Agrippae cum mentio in hac Satira (v. 185.) fiat, inde sequitur eam non ante annum 721 U. C. quo Agrippa hoc munus gessit, id est, ante annum aetatis 33. poetae nostri esse conscriptam. Quodsi igitur prioris Satirarum libri confectio annis 715—717 U. C. assignanda est, Horatius post hoc tempus, quo illum librum edidit, per tres, quatuor annos paucas tantummodo Satiras, fortasse nullam nisi primam et secundam huius libri publici iuris fecit. Eo pertinet, quod sibi ineunte hoc Satira desidiam ipse obiicit, quae quidem desidia ingenium et conditionem poetae introsipientibus non tam mira videbitur. Cum enim iam a teneris annis hoc in votis haberet, ut sibi vivere posset, nec unquam inani carminum pangendorum pruritu laboraret, nunc tandem opes et praesidia vitae ita instituendae Maecenatis liberalitate nactus erat: nam in hac primum Satira villae Sabinae a Maecenate sibi donatae mentionem facit. Cf. Sat. II, 6, et quod etsi per iocum de se narrat Epist. II, 2, 49—54. Utrum id quod *vers.* 14 huius Satirae dicitur serio accipiendum sit, et adversarii hanc desidiam poetae in medio quasi curriculo cessanti vere crimini dederint, an amice fortasse eum hoc nomine familiares carp-

Heind. — v. 124. *ut culmo surgeret* multae Edd. Sed Cf. Benth.
et Heind. — v. 129. *proprie* e Codd. Fea. Vulg. *propriae* Cf. Iahn.

serint, haec omnia hariolationibus quidem, quibus Wielandii introductiones abundant, locum dare, neque vero ullis certioribus rationibus diiudicari possunt. Post longiorem igitur intercapedinem hic sermo a poeta nostro editus est, qui cum Epistolis libri secundi multo post et alio orationis genere conscriptis, inter longissima eademque perfectissima eius carmina numerandus est. Etiam huius Satirae ut plurimarum secundi libri genus est dramaticum. Colloquium enim continet poetae cum Damasippo, maxime ridiculo eius aetatis homine, qui cum per mercatum rem familiarem consumsisset, nihil iam aliud ageret, quam ut Stoica barba et pallio superbiens circumforaneus philosophus ubique sectae suae formulas, a Stertinio importuno aretalago sibi traditas, decantaret. Hunc igitur Damasippum inducit poeta in villam suam Sabinam irruentem et acerbissima sua vel potius Stertini oratione totum genus humanum, Stoicis sapientibus exceptis, stultitiae atque adeo ex Stoicae philosophiae rationibus, insaniae arguentem. Quam callide poeta hoc commento usus sit, quam salse Stoicus personatus Stoicos ipsos, tum etiam cives suos, denique se ipsum derideat, quam mirifico artificio sapientiae ludibrium et seria ludo miscuerit, haec omnia lectori intelligenti sua sponte perspicenda relinquere, quam disputatione nostra praecoccupare maluimus. *Heindorf.*

Damasippus.

Sic raro scribis, ut toto non quater anno
 Membranam poseas, scriptorum quaeque retexens,
 Iratus tibi, quod vini somnique benignus
 Nil dignum sermone canas. Quid fiet? At ipsis
 Saturnalibus huc fugisti. Sobrius ergo
 Dic aliquid dignum promissis: incipe. Nil est.
 Culpanitur frustra calami, immeritusque laborat
 Iratis natus paries Dis atque poetis.
 Atqui vultus erat multa et praeclara minantis,
 Si vacuum tepido cepisset villula tecto.
 Quorsum pertinuit stipare Platona Menandro?

5

10

III, v. 1. Benth. e Codd. *Si raro scribis, ut canas: quid fiet?* Cf. Heind. *Sic raro scribes* Both. e Codd. metri causa. Sed Vid. Iahn. — v. 4. *ab ipsis* fere Codd. quod tuentur Fca et Iahn. *at ipsis* Benth. e Codd. aliquot et Edd. vet.

Eupolin, Archilochum, comites edncere tantos?
 Invidiam placare paras, virtute relicta?
 Contemnere miser. Vitanda est improba Siren
 Desidia; aut quidquid vita meliore parasti, 15
 Ponendum aequo animo.

Horatius.

Di te, Damasippe, Deaque
 Verum ob consilium donent tonsore. Sed unde
 Tam bene me nosti?

Damasippus.

Postquam omnis res mea Ianum
 Ad medium fracta est, aliena negotia curo,
 Excussus propriis. Olim nam quaerere amabam, 20
 Quo vafer ille pedes lavisset Sisyphus aere,
 Quid sculptum infabre, quid fustum durius esset:
 Callidus huic signo ponebam millia centum:
 Hortos egregiasque domos mercarier unus
 Cum lucro noram; unde frequentia Mercuriale 25
 Imposuere mihi cognomen compita.

Horatius.

Novi,
 Et miror morbi purgatum te illius.

Damasippus.

Atqui
 Emovit veterem mire novus, ut solet, in cor
 Traiecto lateris miseri capitisve dolore,
 Ut lethargicus hic, quum sit pugil, et medicum urget. 30

Horatius.

Dum ne quid simile huic, esto ut libet.

Damasippus.

O bone, ne te
 Frustrere; insanis et tu stultique prope omnes, -

— v. 22. *scalptum* plures Codd. et Edd. Vid. Heind. — v. 25. *Mercuriali* coni. Cuning. Sed Cf. Heind. et Iahn. — v. 29. *capitisve* Bentl. e Codd. et vett. Edd. quem Cf. Olim vulg. *capitisque*.

Si quid Stertinius veri crepat; unde ego mira
 Descripsi docilis praecepta haec, tempore quo me
 Solatus iussit sapientem pascere barbam, 35
 Atque a Fabricio non tristem ponte reverti.
 Nam male re gesta quum vellem mittere operto
 Me capite in flumen, dexter stetit, et Cave faxis
 Te quidquam indignum: pudor, inquit, te malus angit,
 Insanos qui inter vereare insanus haberi. 40
 Primum nam inquiram, quid sit furere: hoc si erit in te
 Solo, nil verbi, pereas quin fortiter, addam.
 Quem mala stultitia, et quemcunque inscitia veri
 Caecum agit, insanum Chrysippi porticus et grex
 Autumat. Haec populos, haec magnos formula reges, 45
 Excepto sapiente, tenet. Nunc accipe, quare
 Desipiant omnes aequae ac tu, qui tibi nomen
 Insano posuere. Velut silvis, ubi passim
 Palantes error certo de tramite pellit,
 Ille sinistrorsum, hic dextrorsum abit; unus utrisque 50
 Error, sed variis illudit partibus: hoc te
 Crede modo insanum; nihilo ut sapientior ille,
 Qui te deridet, caudam trahat. Est genus unum
 Stultitiae nihilum metuenda timentis, ut ignes,
 Ut rupes, fluviosque in campo obstare queratur: 55
 Alterum et huic varum et nihilo sapientius, ignes
 Per medios fluviosque ruentis; clamet amica
 Mater, honesta soror, cum cognatis pater, uxor;
 Hic fossa est ingens, hic rupes maxima; serva!
 Non magis audierit, quam Fufius ebrius olim, 60
 Quum Ilionam edormit, Catienis mille ducentis,
 Mater, te appello, clamantibus. Huic ego vulgus
 Errori similem cunctum insanire docebo.
 Insanit veteres statuas Damasippus emendo:
 Integer est mentis Damasippi creditor? esto. 65

— v. 48. *insani* Codd. aliquot Lamb. alii. — v. 56. *varium* plures Edd. etiam Benth. Vid. Heind. — v. 60. *Fufius* Benth. e Codd. revocavit; olim pleraeque Edd. *Fafius* Cf. Benth.

Accipe quod nunquam reddas mihi, si tibi dicam,
 Tunc insanus eris, si acceperis, an magis excors,
 Reiecta praeda, quam praesens Mercurius fert?
 Scribe decem a Nerio: non est satis; adde Cicutae
 Nodosi tabulas centum; mille adde catenas: 70
 Effugiet tamen haec sceleratus vincula Proteus
 Quum rapies in ius malis ridentem alienis,
 Fiet aper, modo avis, modo saxum, et, quum volet,
 arbor.

Si male rem gerere insani, contra bene sani est,
 Putidius multo cerebrum est mihi crede, Perilli 75
 Dictantis, quod tu nunquam rescribere possis.
 Audire atque togam iubeo componere, quisquis
 Ambitione mala aut argenti pallet amore;
 Quisquis luxuria tristisque superstitione,
 Aut alio mentis morbo calet; huc propius me, 80
 Dum doceo insanire omnes vos, ordine adite.
 Danda est ellebori multo pars maxima avaris:
 Nescio an Anticyram ratio illis destinet omnem.
 Heredes Staberî summam incidere sepulcro;
 Ni sic fecissent, gladiatorum dare centum 85
 Damnati populo paria, atque epulum arbitrio Arrî,
 Frumenti quantum metit Africa. Sive ego prave
 Sen recte hoc volui, ne sis patruus mihi. Credo,
 Hoc Staberî prudentem animum vidisse. Quid ergo
 Sensit, quum summam patrimoni inculpere saxo 90
 Heredes voluit? Quoad vixit, credidit ingens
 Pauperiem vitium, et cavit nihil acrius; ut si
 Forte minus locuples uno quadrante perisset,
 Ipse videretur sibi nequior. Omnis enim res,
 Virtus, fama, decus, divina humanaque pulchris 95
 Divitiis parent, quas qui construxerit, ille

— v. 72. *in iura malis* Codd. Torrent. Vid. Heind. — v. 89. *iussisse* pro *vidisse* Lambin. Sed Cf. Both. Annotatt. — v. 93. *periret* plurimae Edd. Sed Vid. Bentl. — v. 96. *qui contraxerit* multi Codd. Cf. Bentl.

Clarus erit, fortis, iustus. Sapiensne? Etiam; et rex,
 Et quidquid volet. Hoc, veluti virtute paratum,
 Speravit magnae laudi fore. Quid simile isti
 Graecus Aristippus, qui servos proicere aurum 106
 In media iussit Libya, quia tardius irent
 Propter onus segnes? Uter est insanior horum?
 Nil agit exemplum, litem quod lite resolvit.
 Si quis emat citharas, emtas comportet in unum,
 Nec studio citharae nec Musae deditus ulli; 105
 Si scalpra et formas non sutor; nautica vela
 Aversus mercaturis: delirus et amens
 Undique dicatur merito. Quî discrepat istis,
 Qui nummos aurumque recondit, nescius uti
 Compositis, metuensque velut contingere sacrum? 110
 Si quis ad ingentem frumenti semper acervum
 Porrectus vigilet cum longo fuste, neque illinc
 Audeat esuriens dominus contingere granum,
 Ac potius foliis parcus vescatur amaris;
 Si positus intus Chii veterisque Falerni 115
 Mille cadis, nihil est, tercentum millibus, acre
 Potet acetum; age, si et stramentis incubet unde-
 Octoginta annos natus, cui stragula vestis,
 Blattarum ac tinearum epulae, putrescat in arca:
 Nimirum insanus paucis videatur, eo quod 120
 Maxima pars hominum morbo iactatur eodem.
 Filius aut etiam haec libertus ut ebibat heres,
 Dis inimice senex, custodis? Ne tibi desit?
 Quantulum enim summae curtabit quisque dierum,
 Ungere si caules oleo meliore, caputque 125
 Coeperis impexa foedum porrigine? Quare,
 Si quidvis satis est, periuras, surripis, auferis
 Undique? tun' sanus? Populum si caedere saxis
 Incipias servosque tuos, quos aere pararis,

— v. 127. *Si quodvis* unus Codd. Benth. quem Cf. — v. 129. *tuo*
 Benth. ex con. Ian. Fabri Codicibus Feae firmata Cf. Both. Vulg.
tuos Cf. Heind.

Insanum te omnes pueri clamentque puellae: 130
Quum laqueo uxorem interimis, matremque veneno,
Incolumi capite es? Quid enim? Neque tu hoc facis

Argis,

Nec ferro ut demens genitricem occidis Orestes.
An tu reris cum occisa insanisse parente,
Ac non ante malis dementem actum Furiis, quam 135
In matris iugulo ferrum tepefecit acutum?

Quin ex quo habitus male tutae mentis Orestes,
Nil sane fecit, quod tu reprehendere possis:
Non Pyladen ferro violare aususve sororem est
Electram: tantum maledicit utrique, vocando 140

Hanc Furiam, hunc aliud, iussit quod splendida bilis.
Pauper Opimius argenti positi intus et auri,
Qui Veientanum festis potare diebus

Campana solitus trulla, vappamque profestis,
Quondam lethargo grandi est oppressus, ut heres 145

Iam circum loculos et claves laetus ovansque
Curreret. Hunc medicus multum celer atque fidelis

Excitat hoc pacto: mensam poni iubet, atque
Effundi saccos nummorum, accedere plures

Ad numerandum: hominem sic erigit; addit et
illud: 150

Ni tua custodis, avidus iam haec auferet heres. —

Men' vivo? — Ut vivas igitur, vigila: hoc age. — Quid
vis? —

Deficient inopem venae te, ni cibus atque
Ingens accedit stomacho fultura ruenti.

Tu cessas? agedum, sume hoc ptisanarium oryzae. — 155
Quanti emtae? — Parvo. — Quanti ergo? — Octussi-

bus. — Eheu!

Quid refert, morbo an furtis pereamque rapinis?

— v. 154. *accedit* Benth. e Codd. Vulg. *accedat* Cf. Heind. et Both. Annotatt. — v. 157. Plurimi libri *pereamque*, multi *pereamve*, pauci *pereamne*. Benth. *pereamve*. Sed Vid. Heind. et praecipue Iahn.

Quisnam igitur sanus? — Qui non stultus. — Quid
avarus? —

Stultus et insanus. — Quid? si quis non sit avarus,
Continuo sanus? — Minime. — Cur, Stoice? —
Dicam. 160

Non est cardiacus, Craterum dixisse putato,
Hic aeger. Recte est igitur, surgetque? Negabit,
Quod latus aut renes morbo tententur acuto.
Non est periurus neque sordidus; immolet aequis
Hic porcum Laribus; verum ambitiosus et audax: 165
Naviget Anticyram. Quid enim differt, barathrone
Dones quidquid habes, an nunquam utare paratis?
Servius Oppidius Canusî duo praedia, dives
Antiquo censu, gnatis divîsse duobus
Fertur, et haec moriens pueris dixisse vocatis 170
Ad lectum: Postquam te talos, Aule, nucesque
Ferre sinu laxo, donare et ludere vidi,
Te, Tiberi, numerare, cavis abscondere tristem:
Extimui, ne vos ageret vesania discors,
Tu Nomentanum, tu ne sequerere Cicutam. 175
Quare per Divos oratus uterque Penates,
Tu cave ne minuas, tu, ne maius facias id,
Quod satis esse putat pater, et natura coërcet.
Praeterea ne vos titillet gloria, iure-
Iurando obstringam ambo: uter Aedilis fueritve 180
Vestrum Praetor, is intestabilis et sacer esto.
In cicere atque faba bona tu perdasque lupinis,
Latus ut in Circo spatiere, et aëneus ut stes,
Nudus agris, nudus nummis, insane, paternis?
Scilicet ut plausus, quos fert Agrippa, feras tu, 185
Astuta ingenuum vulpes imitata leonem?

— v. 163. *tentantur* Benth. e multis Codd. et vett. Edd. Sed Cf. Heind. — v. 166. *balatrône* Benth. e pluribus Codd. *balatroni* Fea e duobus Codd. Bersm. Cf. Heind. — v. 172. Pro *ludere* Benth. e coni. *perdere*. Cf. Heind. — v. 183. et *aëneus* Benth. e Codd. quem Vid. Vulg. aut *aeneus*.

Ne quis humasse velit Aiace[m], Atrida, vetas cur? —
 Rex sum. — Nil ultra quaero Plebeius. — Et aequam
 Rem imperito; at si cui videor non iustus, inulto
 Dicere, quod sentit, permitto. — Maxima regum, 190
 Di tibi dent capta classem reducere Troia!

Ergo consulere et mox respondere licebit? —
 Consule. — Cur Ajax, heros ab Achille secundus,
 Putrescit, toties servatis clarus Achivis,
 Gaudeat ut populus Priami Priamusque inhumato, 195
 Per quem tot iuvenes patrio caruere sepulcro? —
 Mille ovium insanus morti dedit, inclytum Ulixen
 Et Menelaum una mecum se occidere clamans. —
 Tu quum pro vitula statuis dulcem Aulide natam
 Ante aras, spargisque mola caput, improbe, salsa, 200
 Rectum animi servas? — Quorsum? — Insanus quid
 enim Ajax

Fecit? Quum stravit ferro pecus: abstinuit vim
 Uxore et gnato; mala multa precatus Atridis
 Non ille aut Teucrum aut ipsum violavit Ulixen. —
 Verum ego, ut haerentes adverso litore naves 205
 Eriperem, prudens placavi sanguine Divos. —
 Nempe tuo, furiose. — Meo, sed non furiosus. —
 Qui species alias veri, scelerisque tumultu
 Permixtas capiet, commotus habebitur, atque
 Stultitiane erret, nihilum distabit, an ira. 210
 Ajax quum immeritos occidit, desipit, agnos;
 Quum prudens scelus ob titulos admittis inanes,
 Stas animo? et purum est vitio tibi, quum tumidum
 est, cor?

v. 188. *quaere* Benth. ex uno Cod. Cf. Heind. — v. 191. *deducere*
 Codd. aliquot et vett. Edd. quod praetulit Benth. Cf. Heind. et Iahn.
 — v. 194. *putescit* multi Codd. et vett. Edd. probantque Fea et
 Both. quos Cf. Sed *putrescit* tuetur Benth. — v. 201. Ita locus auc-
 tore Schol. Cruq. constituendus. Alii, ut Benth. et Heind. Aeronem
 sequentes: *Quorsum insanus quid enim Ajax Fecit?* Both. *Quor-*
sum insanus? Vid. Heind. Both. Annotatt. Iahn. — v. 208. *veris*
 unus Cod. Cruq. a prima manu, alter a secunda vero. Vid. Benth.
 et Heind.

Si quis lectica nitidam gestare amet agnam,
 Huic vestem ut gnatae, parèt ancillas, paret aurum, 215
 Rufam aut Pusillam appellet, fortique marito
 Destinet uxorem: interdicto huic omne adimat ius
 Praetor, et ad sanos abeat tutela propinquos.
 Quid? si qui gnatam pro muta devovet agna,
 Integer est animi? Ne dixeris. Ergo ubi prava 220
 Stultitia, hic summa est insania: qui sceleratus,
 Et furiosus erit; quem cepit vitrea fama,
 Hunc circumtonuit gaudens Bellona cruentis.
 Nunc age, luxuriam et Nomentanum arripe mecum.
 Vincet enim stultos ratio insanire nepotes. 225
 Hic simul accepit patrimonî mille talenta,
 Edicit, piscator uti, pomarius, auceps,
 Unguentarius ac Tusci turba impia vici,
 Cum scurris fartor, cum Velabro omne Macellum
 Mane domum veniant. Quid tum? Venere frequentes. 230
 Verba facit leno: Quidquid mihi, quidquid et horum
 Cuique domi est, id crede tuum et vel nunc pete, vel
 cras.

Accipe, quid contra iuvenis responderit aequus:
 In nive Lucana dormis ocreatus, ut aprum
 Coenem ego; tu pisces hiberno ex aequore verris; 235
 Segnis ego, indignus qui tantum possideam: aufer!
 Sume tibi decies; tibi tantundem; tibi triplex,
 Unde uxor media currit de nocte vocata.
 Filius Aesopi detractam ex aure Metellae,
 Scilicet ut decies solidum absorberet, aceto 240
 Diluit insignem baccam; quî sanior, ac si
 Illud idem in rapidum flumen iaceretve cloacam?
 Quinti progenies Arrî, par nobile fratrum,
 Nequitia et nugis, pravorum et amore gemellum,

v. 230. Quid enim? Codd. Torrent. *qui cum* Bentr. coni. itemque Codd. aliquot Feae. Cf. Bentr. Heind. Iahn. — *v. 235. verris* tuetur Bentr. et Heind. Sed eadem Codd. et Edd. vet. auctoritate est *vellit*, quod defendit Fea. — *v. 238. currat* plures Edd. veteres. Cf. Heind.

Luscinias soliti impenso prandere coëmtas. 245
 Quorsum abeant? sani ut creta, an carbone notandi?
 Aedificare casas, plostello adiungere mures,
 Ludere par impar, equitare in arundine longa,
 Si quem delectet barbatum, amentia verset.
 Si puerilius his ratio esse evincet amare, 250
 Nec quidquam differre, utrumne in pulvere, trimus
 Quale prius, ludas opus, an meretricis amore
 Sollicitus plores: quaero, faciasne quod olim
 Mutatus Polemo? ponas insignia morbi,
 Fasciolas, cubital, focalia, potus ut ille 255
 Dicitur ex collo furtim carpsisse coronas,
 Postquam est impransi correptus voce magistri?
 Porrigis irato puero quum poma, recusat:
 Sumè, catelle: negat; si non des, optat. Amator
 Exclusus qui distat, agit ubi secum, eat, an non, 260
 Quo rediturus erat non arcessitus, et haeret
 Invisis foribus? Ne nunc, quum me vocet ultro,
 Accedam? an potius mediter finire dolores?
 Exclusit, revocat: redeam? Non, si obsecret. Ecce
 Servus, non paulo sapientior: O here, quae res 265
 Nec modum habet neque consilium, ratione modoque
 Tractari non vult. In amore haec sunt mala: bellum,
 Pax rursum. Haec si quis tempestatis prope ritu
 Mobilia, et caeca fluitantia forte, laboret
 Reddere certa sibi, nihilo plus explicet, ac si 270
 Insanire paret certa ratione modoque.
 Quid? Quum Picenis excerpens semina pomis
 Gaudes, si cameram percusti forte, penes te es?

— v. 246. *sani* ut plurimi Codd. alii *sani creta*, *sani an creta*,
sanine creta. Bentleius, eumque secutus Fea, alii *sanin creta*. —
notati Bentl. e Codd. Cf. Heind. — v. 254. *Polemo* Lambin. et
 Cruq. Vulg. *Polemon* Cf. Heind. — v. 262. *ne nunc* Bentl. e Codd.
 pro *nec nunc*, quod vett. Edd. ferunt. Cf. Heind. et Doering. —
 v. eod. *vocat* omnes Codd. tuetur Heind. Sed Bentl. *vocat*, quod
 omnes fere post eum Edd. habent. — v. 272. *camaram* Heind.
 Cf. Fea.

Quid? quum balba feris annoso verba palato,
 Aëdificante casas quî sanior? Adde cruorem 275
 Stultitiae, atque ignem gladio scrutare modo, inquam.
 Hellade percussa, Marius quum praecipitat se,
 Cerritus fuit? an commotae crimine mentis
 Absolves hominem, et sceleris damnabis eundem,
 Ex more imponens cognata vocabula rebus? 280
 Libertinus erat, qui circum compita siccus
 Lautis mane senex manibus currebat, et, Unum,
 (Quiddam magnum addens,) unum me surpite morti,
 Dis etenim facile est, orabat; sanus utrisque
 Auribus atque oculis; mentem, nisi litigiosus, 285
 Exciperet dominus, quum venderet. Hoc quoque vulgus
 Chrysippus ponit fecunda in gente Menenî.
 Iupiter, ingentes qui das adimisque dolores,
 Mater ait pueri menses iam quinque cubantis,
 Frigida si puerum quartana reliquerit, illo 290
 Mane die, quo tu iudicis ieiunia, nudus
 In Tiberi stabit. Casus medicusve levarit
 Aegrum ex praecipiti, mater delira necabit
 In gelida fixum ripa, febrimque reducet.
 Quone malo mentem concussa? timore Deorum. 295
 Haec mihi Stertinius, sapientium octavus, amico
 Arma dedit, posthac ne compellarer inultus.
 Dixerit insanum qui me, totidem audiet, atque
 Respicere ignoto discet pendentia tergo.

Horatius.

Stoice, post damnum sic vendas omnia pluris; 300
 Qua me stultitia, quoniam non est genus unum,
 Insanire putas? ego nam videor mihi sanus.

— v. 274. *seris* Codd. aliquot apud Lambin. Cf. Doering. —
 v. 283. Ita plures Codd. et antiquissimae quaeque Editiones; eam-
 que lectionem tuentur Heind. et Doering. In aliis Codd. *Quid tam*
magnum? addens; quod probant cum Bentleio Fea et Both. in
 Annotatt. — v. 301. *quam... stultitiam* unus Cod. Cruq. indeque
 Bentl. Cf. Heind.

Damasippus.

Quid? caput abscisum manibus quum portat Agave
Gnati infelicis, sibi tum furiosa videtur?

Horatius.

Stultum me fateor, liceat concedere veris, 305
Atque etiam insanum; tantum hoc edissere, quo
Aegrotare putes animi vitio.

Damasippus.

Accipe: primum

Aedificas, hoc est, longos imitaris, ab imo
Ad summum totus moduli bipedalis; et idem
Corpore maiorem rides Turbonis in armis 310
Spiritus et incessum: quí ridiculus minus illo?
An quodcunque facit Maecenas, te quoque verum est
Tantum dissimilem et tanto certare minorem?
Absentis ranae pullis vituli pede pressis,
Unus ubi effugit, matri denarrat, ut ingens 315
Bellua cognatos eliserit. Illa rogare,
Quantane? num tantum, sufflans se, magna fuisset? —
Maior dimidio. — Num tanto? — Quum magis atque
Se magis inflaret; Non, si te ruperis, inquit,
Par eris. Haec a te non multum abludit imago. 320
Adde poëmata nunc, hoc est, oleum adde camino;
Quae si quis sanus fecit, sanus facis et tu.
Non dico horrendam rabiem.

Horatius.

Iam desine.

— v. 303. *abscisum* plures Codd. Feae, quem Vid. — *manibus* Bentl. e pluribus Codd. Olim vulg. *demens* Cf. Heind. — v. 313. *Tantum* Bentl. e Codd. quem Vid. Olim vulg. *tanto*. — v. 317. Ita cum Croquio Bentleius, quem V. Olim vulg. *num tandem*, quod denuo tuetur Fea. in *tantum* coni. Doering. Cf. Both. Annotatt. et Iahn. — v. 318. Tuetur lectionem vulgatam Heind. *num tantum* Bentl. e Codd. idemque coni. *Maior perniuius*, Both. *Maior*. — *Dimidio?* — *Num tanto*.

Damasippus.

Cultum

Maiolem censu.

Horatius.

Teneas, Damasippe, tuis te.

Damasippus.

Mille puellarum, puerorum mille furores.

325

Horatius.

O maior tandem parcas, insane, miuori.

SATIRA IV.

De Catio, quem sibi Horatius fingit artis culinariae et mensae struendae praecepta summa cum gravitate et tanquam ex tripode tradentem, Cruquii Scholia haec nobis referunt: *Sub persona Catii risurus est poeta Epicureos, ut in proxima (risit) Stoicos. Fuit autem M. Catius Epicureus, qui quatuor libros scripsit de rerum natura et de summo bono, quod cum Epicurei in voluptate ponerent, h. e., in gulae et corporis libidine, contra Stoicos, qui summum bonum dicebant esse voluptatem rerum honestarum, rogat Catium Horatius, ut sibi dicat coenae parandae et ordinandae magistrum eiusque praecepta.* Catium Epicureum Insubria oriundum ut scriptorem nuper admodum mortuum commemorat Cicero *Epist. ad Famil. XV, 16. Cf. Quintilian. X, 1. in fine.* Sed difficile est ad intelligendum, cur Horatius, si vere consilium habuit Epicureos deridendi, hunc potissimum Catium iam diu mortuum et cuius memoria iam certe esset obliterata, quasi ex inferis ad hunc sermonem habendum resuscitaverit. Procul dubio nomen Catii et locus huius Satirae Stoicum Damasippi philosophi sermonem excipientis veteres Scholiastas ad singularem hanc opinionem adduxit. Praecepta quidem in hoc sermone tradita neutiquam luxuriam et gulae intemperantiam, sed potius victum elegantem et cum elegantia valetudini non adversantem commendant. Praeterea certam quandam personam omnia produnt, ut liquido Romanus quidam Horatii aequalis a poeta derideatur sub Catii nomine latens. Quapropter nobis non mera harioatione sed certioribus rationibus Wielandii sententia niti videtur, totum hoc carmen conscriptum esse statuentis in gratiam Maecenatis et reliquorum eius convictorum, atque id potissimum poetam nostrum agere,

ut certum quendam e numero horum convictorum iocose, sed non sine salsa acrimonia tangeret, qui reconditam suam sapientiae culinariae peritiam iactando nonnunquam sodalibus molestiam crearet. Sed quis tandem ille fuit? In Satira quidem octava, qua convivium Nasidieni Rufi describitur, nonnulla similia praecepta occurrunt, sed tractationem tamen multum diversam referunt. Wielandius, in coniectando audacior, eum, cuius hic delicatula in cibis eligendis elegancia, callida artificia et in curta re familiari magnificum fastidium ab Horatio deridetur, neminem alium esse putat quam Horatium ipsum, qui ultro se lectoribus hoc quidem nomine deridendum propinet. Sed ubi tandem ulla parsimoniae vestigia apparent, aut ratio curtae rei familiaris habetur? Imo praestantissima et pretiosissima quaeque commendantur. (Cf. v. 32--34, v. 58, 66, 68, 69, 77.) Quam parum quoque Wielandius poetam in hoc quidem genere novit, qui haud semel conviviorum luxuriam notat, tenuemque victum suum commendat. Vid. *Sat.* II, 2. Cf. *Od.* I, 20. I, 31, 15 sqq. III, 1. III, 6. III, 29. *Sat.* I, 6, 115 seqq. II, 6, 63 seqq. *Epist.* I, 5. init. I, 14, 35. I, 25. Nobis quidem, modo in re tam incerta coniecturam proferre liceat, is, qui hac Satira tecto nomine illuditur, nemo alius, nisi *Maecenas* videtur esse. Quodsi enim Maecenas, homo delicatulus et valetudinarius, de cibis et ad saporem et ad valetudinem optime parandis inter convivas disserere, atque omnino singularem in hoc genere et subtilem intelligentiam profiteri amabat, quid iocosius esse poterat hoc sermone, quid callidius hac nominis reticentia? Hoc si verum est, non modo tota orationis conformatio ad huius personae similitudinem facta erit, sed etiam singula praecepta procul dubio aut commemorationem cibi a Maecenate in deliciis habiti, aut observationem ab eodem cum convictoribus communicatam continebunt, ita quidem ut Maecenas hanc satiram legens ubique ea deprehenderet, quae ambitiose convivas docere soleret, varie et iocosa derisione inversa et immutata. Fortasse etiam Catius non est persona plane ficta, sed unus e convictoribus Maecenatis, simile nomen habens, sed quod ex poetae nostri consuetudine paulum immutatum sit, qui quidem haec patroni praecepta inprimis observare et repetere soleret, ut simul binae personae in hoc sermone tantummodo sodalibus proprie destinato simul significarentur. Singulare tamen et mirum est, in praeceptis ibi traditis falsas res veris et a communi usu alienas usitatis misceri. *Heindorf.* (Cf. *Both. Annotatt.*)

Horatius.

Unde, et quo Catius?

Catius.

Non est mihi tempus aventi
Ponere signa novis praeceptis, qualia vincant
Pythagoran Anytique reum doctumque Platona.

Horatius.

Peccatum fateor, quum te sic tempore laevo
Interpellarim: sed des veniam bonus, oro. 5
Quod si interciderit tibi nunc aliquid, repetes mox,
Sive est naturae hoc, sive artis, mirus utroque.

Catius.

Quin id erat curae, quo pacto cuncta tenerem,
Utpote res tenues, tenui sermone peractas,

Horatius.

Ede hominis nomen; simul et, Romanus an hospes. 10

Catius.

Ipsa memor praecepta canam, celabitur auctor,
Longa quibus facies ovis erit, illa memento
Ut succi melioris et ut magis alba rotundis
Ponere; namque marem cohibent callosa vitellum.
Caule suburbano, qui siccis crevit in agris, 15
Dulcior; irriguo nihil est elutius horto.
Si vespertinus subito te oppresserit hospes,
Ne gallina malum responset dura palato,
Doctus eris vivam musto mersare Falerno;
Hoc teneram faciet. Pratensibus optima fungis 20

IV, v. 2. *vincant* e Codd. Benth. Alii Codd. *vincunt*, aut *vincent*. — v. 10. Ita Benth. e Codd. Olim vulg. *simul an Rom.* Cf. Heind. — v. 13. *alba* omnes Codd. et vett. Edd. quam lectionem tuentur Fea, Both. Iahn. Benth. e conjectura *alma*, quod recentiores Edd. plerumque receperunt. — v. 15. *cole* pro *caule* plures Codd. Cf. Heind. — v. 19. *musto* ex conjectura Benth. quem Vid. Codd. *misto* vel *mixto*,

Natura est; aliis male creditur. Ille salubres
 Aestates peraget, qui nigris prandia moris
 Finiet, ante gravem quae legerit arbore solem.
 Aufidius forti miscebat mella Falerno,
 Mendose, quoniam vacuis committere venis 25
 Nil nisi lene decet; leni praeccordia mulso
 Prolueris melius. Si dura morabitur alvus,
 Mitulus et viles pellent obstantia conchae,
 Et lapathi brevis herba, sed albo non sine Coa.
 Lubrica nascentes implent conchylium lunae; 30
 Sed non omne mare est generosae fertile testae.
 Murice Baiano melior Luerina peloris;
 Ostrea Circeiis, Miseno oriuntur echini;
 Pectinibus patulis iactat se molle Tarentum.
 Nec sibi coenarum quivis temere arroget artem, 35
 Non prius exacta tenui ratione saporum.
 Nec satis est cara pisces avertere mensa,
 Ignarum quibus est ius aptius, et quibus assis
 Languidus in cubitum iam se conviva reponet.
 UMBER et iligna nutritus glande rotundas 40
 Curvet aper lances carnem vitantis inertem:
 Nam Laurens malus est, ulvis et arundine pinguis.
 Vineam summittit capreas non semper edules.
 Fecundae leporis sapiens sectabitur armos.
 Piscibus atque avibus quae natura et foret aetas, 45
 Ante meum nulli patuit quaesita palatum.
 Sunt quorum ingenium nova tantum crustula promit.
 Nequaquam satis in re una consumere curam;
 Ut si quis solum hoc, mala ne sint vina, laboret,
 Quali perfundat pisces securus olivo. 50
 Massica si coelo suppones vina sereno,
 Nocturna, si quid crassi est, tenuabitur aura,
 Et decedet odor nervis inimicus; at illa
 Integrum perdunt lino vitiata saporem.

Surrentina vafer qui miscet faece Falerna 55
 Vina, columbino limum bene colligit ovo,
 Quatenus ima petit volvens aliena vitellus.
 Tostis marcentem squillis recreabis et Afra
 Potorem cochlea; nam lactuca innatat acri
 Post vinum stomacho; perna magis ac magis hillis 60
 Flagitat immorsus refici, quin omnia malit,
 Quaecunque immundis fervent allata popinis.
 Est operae pretium duplicis pernoscere iuris
 Naturam. Simplex e dulci constat olivo,
 Quod pingui miscere mero muriaque decebit, 65
 Non alia quam qua Byzantia putuit orca.
 Hoc ubi confusum sectis inferbuit herbis,
 Corycioque croco sparsum stetit, insuper addes
 Pressa Venafranae quod bacca remisit olivae.
 Picenis cedunt pomis Tiburtia succo; 70
 Nam facie praestant. Venucula convenit ollis;
 Rectius Albanam fumo duraveris uvam.
 Hanc ego cum malis, ego faecem primus et halec,
 Primus et invenior piper album, cum sale nigro
 Incretum, puris circumposuisse catillis. 75
 Immane est vitium, dare millia terna macello,
 Angustoque vagos pisces urgere catino.
 Magna movet stomacho fastidia, seu puer unctis
 Tractavit calicem manibus, dum furta ligurrit,
 Sive gravis veteri craterae limus adhaesit. 80
 Vilibus in scopis, in mappis, in scoe, quantus
 Consistit sumtus? neglectis, flagitium ingens.
 Ten' lapides varios lutulenta radere palma,
 Et Tyrias dare circum illota toralia vestes,
 Oblitum, quanto curam sumtumque minorem 85

— v. 61. *immorsus* Bentl. e Codd. et vett. Edd. Plures Codd. et pleraeque olim Edd. *in morsus*. Cf. Heind. *immersus* con. Both. in Annotatt. — *navult* Codd. aliquot et ita Bentl. Cf. Heind. — v. 62. *in mundis* Codd. Cruq. Sed Vid. Bentl. — v. 78. *movet* Bentl. e Codd. quem Vid. Sed vett. Edd. plerumque *movent*.

Haec habeant, tanto reprimi iustius illis,
Quae nisi divitibus nequeant contingere mensis?

Horatius.

Docte Cati, per amicitiam Divosque rogatus,
Ducere me auditum, perges quocunque, memento.
Nam quamvis memori referas mihi pectore cuncta, 90
Non tamen interpret tantundem iuveris. Adde
Vultum habitumque hominis; quem tu vidisse beatus
Non magni pendis, quia contigit; at mihi cura
Non mediocris inest, fontes ut adire remotos,
Atque haurire queam vitae praecepta beatae. 95

SATIRA V.

In eo populo, apud quem ingentes opes per plura secula coacervatae, neque eae per mercatum aut opificiorum et artium industria laboriose conquisitae, sed ex toto terrarum orbe bellorum rapinis coactae summam avaritiam et, Livio teste, *desiderium per luxum atque libidinem pereundi perdendique omnia* peperissent; apud quem vel puerorum educandorum ratio nihil aliud fere spectaret, quam ut teneris iam annis iuventus *hac aerugine et cura peculii imbueretur* (Horat. A. P. 325 seqq.), ut omnes uno quasi ore hoc praeceptum decantarent, *quaerenda pecunia primum est, Virtus post nummos*; in eo igitur populo ea ars rem augendi, quae in hac Satira describitur, plurimis utique innoxia atque adeo honesta videri debuit. Per bellorum enim civilium turbas maxima civium pars omnem fere honestatis et decoris sensum perdiderat; atque cum satis exemplorum apud poetam nostrum et alios scriptores occurrant, Romanos eius aetatis, ut divitias conquirerent, nullum legibus vetitum crimen neque fenoris, neque periurii, aut parricidii detrectasse: quanto minus hoc artificium reformidaverint, quod neque leges vetarent, et quod nunc tam proclive esset, quoniam in his perditis moribus caelibes et orbi avari indies augerentur, atque consuetudo Romanis frequentata, maiores amicos et potentiores cives omni genere officiorum prosequendi, eo faciliorem aditum ad eiusmodi homines praeberet? Ita tandem factum est, ut fortasse in nullo alio unquam populo magis, quam apud Romanos hoc testamentorum captandorum studium a heredipetis tanquam peculiaris quaedam ars et proprius quaestus exerceretur. Atque quo magis imperatoria tempora vilescent, eo latius haec

pestis manare coepit. Horat. Epist. I, 1, 77. *Pars hominum gestit conducere publica: sunt qui Crustis et pomis viduas venentur avaras Excipiantque senes, quos in vivaria mittant: Multis occulto crescit res fenore.* Seneca De Benef. VI, 38. *An tu Arruntium et Aterium et ceteros, qui captandorum testamentorum artem professi sunt, non putas eadem habere, quae designatores et libituarios, vota?* Cf. Epist. 68. et Iuvenal. Sat. XII. Plin. Hist. Nat. XIV, prooem. *Postquam coepere orbitas in auctoritate summa et potentia esse, captatio in quaestu fertilissimo ac sola gaudia in possidendo, pessum iere vitae pretia.* Petron. Satir. 124. *Crotona intravimus, ubi — incidimus in turbam heredipetorum.* Quid quod iam Cicero dicit Paradox. V, 2. *An eorum servitus dubia est, qui cupiditate peculii nullam conditionem recusant durissimae servitutis? Hereditatis spes quid iniquitatis in serviendo non suscipit? quem nutum locupletis orbi senis non observat? Loquitur ad voluntatem: quicquid denuntiatum sit, facit: assectatur, assidet muneratur. Quid horum est liberi? quid non denique servi inertis?* Cf. Lips. ad Senec. De constant. cap. 5. Contra hos igitur, qui vocabantur, captatores haec Satira conscripta est, omnes dolos, artificia, insidias describens, quibus homines isti uterentur. Commentus est poeta in hunc finem colloquium Tiresiam inter et Ulyssem apud inferos habitum, tam salibus conditum et amara derisione insignem, ut haec Satira cum libri prioris Satira nona nostrae aetatis lectoribus maxime placuerit. Heindorf.

Ulysses.

Hoc quoque, Tiresia, praeter narrata petenti
 Responde, quibus amissas reparare queam res
 Artibus atque modis. Quid rides?

Tiresias.

Iamne doloso

Non satis est Ithacam revehi, patriosque penates
 Adspicere?

Ulysses.

O nulli quidquam mentite, vides ut 5
 Nudus inopsque domum redeam, te vate, neque illic

V, v. 3. *dolose* Benth. ex uno Cod. cui accedunt aliquot Feae Cf. Heind.

Aut apôtheca procis intacta est, aut pecus. Atqui
Et genus et virtus, nisi cum re, vilior alga est.

Tiresias.

Quando pauperiem, missis ambagibus, horres;
Accipe, qua ratione queas ditescere. Turdus 10
Sive aliud privum dabitur tibi, devolet illuc,
Res ubi magna nitet, domino sene; dulcia poma,
Et quoscunque feret cultus tibi fundus honores,
Ante Larem gustet venerabilior Lare dives;
Qui quamvis periurus erit, sine gente, cruentus 15
Sanguine fraterno, fugitivus: ne tamen illi
Tu comes exterior, si postulet, ire recuses.

Ulysses.

Utne tegam spurco Damae latus? haud ita Troiae
Me gessi, certans semper melioribus.

Tiresias.

Ergo

Pa per eris.

Ulysses.

Fortem hoc animum tolerare iubebo; 20
Et quondam maiora tuli. Tu protinus, unde
Divitias aerisque ruam, dic Augur, acervos.

Tiresias.

Dixi equidem et dico. Captes astutus ubique
Testamenta senum, neu, si vafer unus et alter
Insidiatorem praeroso fugerit hamo, 25
Aut spem deponas aut artem illusus omittas.
Magna minorve foro si res certabitur olim,
Vivet uter locuples sine gnatis, improbus, ultio
Qui meliorem audax vocet in ius, illius esto
Defensor: fama civem causaque priorem 30
Sperne, domi si gnatus erit fecundave coniux.

— v. 11. *primum* plures Codd. Cf. Heind.

Quinte, puta, aut Publi (gaudent praenomine molles
 Auriculae) tibi me virtus tua fecit amicum;
 Ius anceps novi, causas defendere possum;
 Eripiet quivis oculos citius mihi, quam te 35
 Contentum cassa nuce pauperet: haec mea cura est,
 Ne quid tu perdas, neu sis iocus. Ire domum atque
 Pelliculam curare iube: si cognitor ipse,
 Persta atque obdura seu rubra Canicula findet
 Infantes statuas, seu pingui tentus omaso 40
 Furius hibernas cana nive conspuet Alpes.
 Nonne vides, aliquis cubito stantem prope tangens
 Inquiet, ut patiens, ut amicis aptus, ut acer?
 Plures annabunt thumni, et cetera crescent.
 Si cui praeterea validus male filius in re 45
 Praeclara sublatus aletur; ne manifestum
 Caelibis obsequium nudet te, leniter in spem
 Arrepe officiosus, ut et scribare secundus
 Heres, et, si quis casus puerum egerit Orco,
 In vacuum venias: perraro haec alea fallit. 50
 Qui testamentum tradet tibi cunque legendum,
 Abnuere et tabulas a te remove memento,
 Sic tamen ut limis rapias, quid prima secundo
 Cera velit versu: solus multisne coheres,
 Veloci percurre oculo. Plerumque recoctus 55
 Scriba ex Quinqueviro corvum deludet hiantem,
 Captatorque dabit risus Nasica Corano.

Ulysses.

Num furis an prudens ludis me, obscura canendo?

Tiresias.

O Laërtiade, quidquid dicam, aut erit aut non:
 Divinare etenim magnus mihi donat Apollo. 60

— v. 36. *quassa nuce* plures Codd. et vett. Edd. Servat Fea. —
 v. 38, *sis cognit.* plurimae Edd. Cf. Benth. — v. 53. *linus* Coll.
 Sax. — v. 59. *dico* Both. e Codd. — v. 60. Benthleius in uno Cod.
mihi donat, in alio *donavit invenit*, unde Habermeldus correxit:

Ulysses.

Quid tamen ista velit sibi fabula, si licet, ede.

Tiresias.

Tempore quo iuvenis Parthis horrendus, ab alto
 Demissum genus Aenea, tellure marique
 Magnus erit, forti nubet procera Corano
 Filia Nasicae, metuentis reddere soldum. 65
 Tum gener hoc faciet: tabulas socero dabit, atque
 Ut legat orabit. Multum Nasica negatas
 Accipiet tandem, et tacitus leget, invenietque
 Nil sibi legatum, praeter plorare, suisque.
 Illud ad haec iubeo: mulier si forte dolosa 70
 Libertusve senem delirum temperet, illis
 Accedas socius, laudes, lauderis ut absens.
 Adiuvat hoc quoque, sed vincit longe prius, ipsum
 Expugnare caput. Scribet mala carmina vecors:
 Laudato. Scortator erit: cave te roget; ultro 75
 Penelopam facilis potiori trade.

Ulysses.

Putasne,
 Perduci poterit tam frugi tamque pudica,
 Quam nequiere proci recto depellere cursu?

Tiresias.

Venit enim magnum donandi parca iuventus,
 Nec tantum Veneris, quantum studiosa culinae. 80
 Sic tibi Penelope frugi est: quae si semel uno
 De sene gustarit, tecum partita lucellum,
 Ut canis a corio nunquam absterrebitur uncto.
 Me sene, quod dicam, factum est. Anus improba Thebis
 Ex testamento sic est elata: cadaver 85
 Unctum oleo largo nudis humeris tulit heres,

Quidquid dicam aut erit, aut non Divinare mihi magnus donavit Apollo, Vossio, Heindorfio, Bothio probantibus. — v. 76. Penelopem alii Codd. et pleraeque Edd. vett. Vid. Bentl.

Scilicet elabi si posset mortua; credo,
 Quod nimum institerat viventi. Cautus adito,
 Neu desis operae neve immoderatus abundes.
 Difficilem et morosum offendet garrulus, ultro 90.
 Non etiam sileas. Davus sis comicus, atque
 Stes capite obstipo, multum similis metuenti.
 Obsequio grassare: mone, si increbuit aura,
 Cautus uti velet earum caput; extrahe turba
 Oppositis humeris; aurem substringe loquaci. 95
 Importunus amat laudari: donec, Ohe iam!
 Ad coelum manibus sublatis dixerit, urge, et
 Crescentem tumidis infla sermonibus utrem.
 Quum te servitio longo curaque levarit,
 Et certum vigilans, Quartae esto partis Ulixes, 100
 Audieris, heres: Ergo nunc Dama sodalis
 Nusquam est? unde mihi tam fortem tamque fidelem?
 Sparge subinde, et, si paulum potes, illacrimare. Est
 Gaudia prodentem vultum celare. Sepulcrum
 Permissum arbitrio sine sordibus exstrue: funus 105
 Egregie factum laudet vicinia. Si quis
 Forte coheredum senior male tussiet, huic tu
 Dic, ex parte tua, seu fundi sive domus sit
 Emor, gaudentem nummo te addicere. Sed me
 Imperiosa trahit Proserpina; vive valeque. 110

SATIRA VI.

Quod maxime in votis habuerat Horatius, ut liber aliquando
 ab omni negotiorum cura et impedimentis vitae sibi ipsi rure
 viveret et otio suo frueretur, id iam villae Sabinae erat posses-
 sione assecutus; neque tamen tam assidue quam vellet ibi degere

— v. 90. *offendes* Benth. ex coniectura; recepit etiam Heind. Sed
 Cf. Both. Annotatt. — *ultra* multi Codd. et Edd. Servat Fea. Cf.
 Heind. — Benth. post *ultra* punctum collocat. — v. 103. Cod.
 a Barthio inspectus: *et, si paulum potes, illacrimare est Gaudia*
prudentum vultu celare. Inde Benth. con. *et, sic paulum potes*
illacrimare, et Gaudia prudenter vultu celare. Cf. Heind. Iahn.

ei licuit et nunc veterum libris nunc somno et inertibus horis
Ducere sollicitae iucunda oblivia vitae. Consuetudo enim et familiaritas Maecenatis, cui omnia sua deberet, fortasse etiam aliarum rationes (Vid. vers. 36.) saepius eum Romae et in his urbanae vitae turbis detinebant, ubi quidem nulla alia res maiorem ei molestiam creabat, quam eorum importunitas, qui Maecenatis non minus quam poetae nostri animum et mores ignorantes, ut se resque suas validissimo Augusti amico commendaret, pertinaci sedulitate Horatium rogare nunquam desinerent. (*Vers. 38 seqq.*) Itaque fortunati illius otii desiderium in hac satira describit, quae proprium poetae animum, sensus, ingenium tam graphice ob oculos ponit, ut plane hoc carminum genus a Lucilio inventum, instauratum ab Horatio, siqua alia, referat; derisio enim et ioci non insunt. Atqui in hoc ipso genere, quod totum in eo positum est, ut libere et sponte quasi erumpentes animi sensus exprimat, omnino necesse non est, ut quaeramus, an praeterea proprium et peculiare aliquid poeta in scribendo sibi proposuerit. Sed si coniecturis indulgere libet, suspicari possumus, Horatium excusare se Maecenati voluisse, quod tam raro in urbem veniret, aut civibus suis denuo explicare, qualis sibi cum Maecenate familiaritas intercederet, aut denique huic ipse significare, quid ab eo impetrare optaret. Eiusmodi certe quidem coniecturae alios poetae locos (Epist. I, 7. Sat. I, 6. I, 9.) conferentibus multo propius a vero abesse nobis videntur, quam singularis Wielandii opinio autumantis, Horatium vicinorum villae suae Sabinae in gratiam hunc sermonem confecisse, quos sibi conciliaret, cum boni rustici hominem e media urbe et ex sinu quasi Augusti atque Maecenatis ad se delatum subtimidi aspicerent, eique non satis confiderent. Sed vix credideris, rusticos Sabinos poetae vicinos unquam ullum eius carmen oculis usurpasse, neque Horatius pro ingenio suo, quale ex versibus eius elucet, hac commendatione indigere putandus est. *Heindorff.*

Hoc erat in votis: modus agri non ita magnus,
 Hortus ubi, et tecto vicinus iugis aquae fons,
 Et paulum silvae super his foret. Auctius atque
 Dì melius fecere: bene est: nil amplius oro,
 Maia nate, nisi ut propria haec mihi munera faxis. 5
 Si neque maiorem feci ratione mala rem,
 Nec sum facturus vitio culpave minorem;
 Si veneror stultus horum nihil, O si angulus ille

Proximus accedat, qui nunc denormat agellum!
 O si urnam argenti fors quae mihi monstret, ut illi, 10
 Thesauro invento qui mercenarius agrum
 Illum ipsum mercatus aravit, dives amico
 Hercule! Si, quod adest, gratum iuvat: hac prece te
 oro,

Pingue pecus domino facias, et cetera, praeter
 Ingenium; utque soles, custos mihi maximus adsis. 15
 Ergo ubi me in montes et in arcem ex Urbe removi,
 Quid prius illustrem Sâtiris Musâque pedestri?
 Nec mala me ambitio perdit, nec plumbeus Auster,
 Auctumnusque gravis, Libitinae quaestus acerbac.
 Matutine pater, seu Iane libentius audis, 20
 Unde hominis operum primos vitaeque labores
 Instituunt, (sic Dis placitum,) tu carminis esto
 Principium. Romae sponsorem me rapis. — Eia,
 Ne prior officio quisquam respondeat, urge.
 Sive Aquilo radit terras, seu bruma nivalem 25
 Interiore diem gyro trahit, ire necesse est. —
 Postmodo, quod mi obsit, clare certumque locuto,
 Luctandum in turba et facienda iniuria tardis. —
 Quid tibi vis, insane? et quam rem agis improbus?
 urget

Iratis precibus; tu pulses omne quod obstat, 30
 Ad Maecenatem memori si mente recurras. —
 Hoc iuvat et melli est, non mentiar. At simul atras

VI, v. 9. *deformat* plures Codd. et vet. Edd. Sed Cf. Fea. —
 v. 10. *quae* Bentl. e multis Codd. et vetustissimis Edd. Olim vulg.
qua Cf. Fea et Both. Annotatt. — v. 16. Gesner. hunc versum
 parenthesi includit, Heindorfio probante. Sed Cf. Iahn. — v. 24.
urges Codd. aliquot Lambini, aliorum. — v. 29. Ita ex emenda-
 tione Bentl. cum plurimi Codd. ferant: *Quid tibi vis insane et*
quas res agis? improbus urget. Fea e suis Codd. *Quid vis insane?*
et quas res agis? improbus urget. Sed Cf. Both. Omnes Editores
 praeter Gesnerum, et qui eum sequuntur, *improbus non cum*
agis, sed cum urget coniungunt. Cf. Heind. — v. 30. *pulsas*
 Cod. Bersm. et aliquot Feae Cf. Heind. — v. 32. *mentior* Coll.
 Sax. et Cod. Bersm. Vid. Bentl.

Ventum est Esquilias, aliena negotia centum
 Per caput et circa saliunt latus. Ante secundam
 Roscius orabat sibi adesses ad Puteal cras. 35
 De re communi scribae magna atque nova te
 Orabant hodie meminisses, Quinte, reverti.
 Imprimat his, cura, Maecenas signa tabellis.
 Dixeris, Experiar: Si vis, potes, addit et instat.
 Septimus octavo propior iam fugerit annus, 40
 Ex quo Maecenas me coepit habere suorum
 In numero, duntaxat ad hoc, quem tollere rheda
 Vellet iter faciens, et cui concedere nugas
 Hoc genus, Hora quota est? Threx est Gallina Syro
 par?
 Matutina parum cautos iam frigora mordent: 45
 Et quae rimosa bene deponuntur in aure.
 Per totum hoc tempus subiectior in diem et horam
 Invidiae noster. Ludos spectaverit una,
 Luserit in campo: Fortunae filius, omnes.
 Frigidus a Rostris manat per compita rumor: 50
 Quicumque obvius est, me consulit: O bone, nam te
 Scire, Deos quoniam propius contingis, oportet,
 Num quid de Dacis audisti? — Nil equidem. — Ut tu
 Semper eris derisor! — At omnes Di exagitent me,
 Si quidquam. — Quid? militibus promissa Triquetra 55
 Praedia Caesar an est Itala tellure daturus?
 Iurantem me scire nihil mirantur ut unum
 Scilicet egregii mortalem atque silenti.
 Perditur haec inter misero lux. non sine votis:
 O rus, quando ego te adspiciam? quandoque licebit, 60
 Nunc veterum libris, nunc somno et inertibus horis
 Ducere sollicitae iucunda obliviae vitae?

— v. 44. *Thrac* Lambin. — v. 48. Ita Benth. locum interpunxit, idemque pro vulg. *spectaverat*, *luserat*, dedit e Codd. *spectaverit*, *luserit*. Sed Fea, ut olim vulgabatur retinuit: *Invidiae: noster ludos spectaverat una*, *Luserat* etc. Cf. Heind. — v. 57. *miratur* Benth. ex uno Cod. Sed Cf. Heind.

O quando faba Pythagorae cognata, simulque
 Uncta satis pingui ponentur oluscula lardo?
 O noctes coenaeque Deum! quibus ipse, meique, 65
 Ante larem proprium vescor, vernasque procaces
 Pasco libatis dapibus. Prout cuique libido est,
 Siccatur inaequales calices conviva solutus
 Legibus insanis, seu quis capit acria fortis
 Pocula, seu modicis uvescit laetius. Ergo 70
 Sermo oritur non de villis domibusve alienis,
 Nec, male necne Lepos saltet, sed, quod magis ad nos
 Pertinet et nescire malum est, agitur: utrumne
 Divitiis homines an sint virtute beati;
 Quidve ad amicitias, usus rectumne, trahat nos; 75
 Et quae sit natura boni summumque quid eius.
 Cervius haec inter vicinus garrit aniles
 Ex re fabellas. Si quis nam laudat Arelli
 Sollicitas ignarus opes, sic incipit: Olim
 Rusticus urbanum murem mus paupere fertur 80
 Accepisse cavo, veterem vetus hospes amicum;
 Asper et attentus quaesitis, ut tamen areturi
 Solveret hospitibus animum. Quid multa? neque ille
 Sepositi ciceris nec longae invidit avenae;
 Aridum et ore ferens acinum semesaque lardi 85
 Frusta dedit, cupiens varia fastidia coena
 Vincere tangentis male singula dente superbo:
 Quum pater ipse domus palea porrectus in horna
 Esset ador loliumque, dapibus meliora relinquens.
 Tandem urbanus ad hunc: Quid te iuvat, inquit, amice, 90
 Praerupti nemoris patientem vivere dorso?
 Vis tu homines urbemque feris praeponere silvis?
 Carpe viam, mihi crede, comes, terrestria quando

— v. 67. *dapibus*: cum, ut cuique lib. Benth. ex uno Cod. Vid. Heind. — v. 70. *humescit* Ed. Glareani, aliquot aliae. — v. 78. Ita longe plurimi Codd. Sed plurimae Edd. vet. *nam si quis*. Vid. Benth. et Fea. — v. 83. *ille* Benth. e plurimis Codd. quem Vid. Olim vulg. *illi*. Cf. Heind. — v. 92. *vis tu* e Codd. Benth. quem Vid. Olim vulgo: *vin' tu*.

Mortales animas vivunt sortita, neque ulla est
 Aut magno aut parvo leti fuga; quo, bone, circa, 95
 Dum licet, in rebus iucundis vive beatus;
 Vive memor, quam sis aevi brevis. Haec ubi dicta
 Agrestem pepulere, domo levis exsilit; inde
 Ambo propositum peragunt iter, urbis aventes
 Moenia nocturni subrepere. Iamque tenebat 100
 Nox medium coeli spatium, quum ponit uterque
 In locuplete domo vestigia, rubro ubi cocco
 Tineta super lectos canderet vestis eburnos,
 Multaque de magna superessent fercula coëna,
 Quae procul exstructis inerant hesternae canistris. 105
 Ergo ubi purpurea porrectum in veste locavit
 Agrestem, veluti succinctus cursitat hospes,
 Continuatque dapes; nec non verniliter ipsis
 Fungitur officiis, praelambens omne quod affert.
 Ille cubans gaudet mutata sorte, bonisque 110
 Rebus agit laetum convivam, quum subito ingens
 Valvarum strepitus lectis excussit utrumque.
 Currere per totum pavidi conclave, magisque
 Exanimes trepidare, simul domus alta Molossis
 Personuit canibus. Tum rusticus, Haud mihi vita 115
 Est opus hac, ait, et valeas, me silva cavusque
 Tutus ab insidiis tenui solabitur ervo.

SATIRA VII.

Servus Horatii libertate Saturnalium utens severa oratione,
 quae tota est ad Stoicorum rationem composita, dominum casti-
 gat; neque vero quae dicit suo ingenio excogitavit, sed a Crispini
 Aretalogi ianitore, qui ex domini sui sermonibus arripuerat, ac-
 cepta tradit. Gestiens igitur quae didicerat effutire, ubi primum
 loquendi veniam impetravit, perversitatem hominum admodum

— v. 108. *vernaliter* maxima pars Codd. et olim plurimae Edd.
 Sed Vid. Bentl. et Heind. — v. 109. *praelibans omne* Bentl. e
 duobus Codd.

communem exagitare incipit, qua ne in vitiis quidem sibi constare consueverint, eandemque etiam in dominum suum cadere ostendit. Atque ea quidem, quae servus Horatio obiicit *vers.* 23—35 non plane a vero abesse facile credas, etiam si ipsius confessio non accedat *Epist.* I, 8, 11 *seqq.* et I, 1, 97 *seqq.*; sed ne ea quoque quae *vers.* 46 sequuntur, ubi contra moechos servus invehitur, serio a lectore accipiantur aut verum inde crimen contra poetae mores et ingenium petatur, satis cavetur *versu* 45. tum *versu* 72, qui clare ostendit, quomodo servi accusatio intelligenda sit. Neque ea quidem, quae *vers.* 95—101 proferuntur poetae personam spectare, sequentia docent, inprimis *vers.* 110. Sed quid sibi voluit Horatius hac satira conscribenda? Nobis quidem sibi plane idem proposituisse videtur, quod in Satira III huius septimae perquam simili, nimirum ut languidam, putidam et inertem garrulitatem derideret, qua Stoicorum eius aetatis, ut Stertini, ut Crispini, scripta laborabant. Contrarium igitur in his satiris exemplum proponit, qua tandem ratione haec Stoicorum celebrata *παράδοξα* tractanda sint, quod quidem tam luculenter, tam graviter et ingeniose facere instituit, ut nobis et germanam germanorum Stoicorum sententiam repraesentet, et optima vitae regendae praecepta impertiat. Nihil igitur est nisi amara derisio, quod hi sermones, alter Stertini, alter Crispino auctoribus tribuuntur. — Casu aut falsa versus 1 interpretatione factum est, ut in pluribus codicibus haec satira cum antecedente continuata coaeruerit. Sed qua tandem ratione adductus Bentleius hanc coniunctionem probare aut statuere potuerit, hanc satiram ad superiorem referri debere? Initium enim huius sermonis ita explicat: „Iamdudum ausculto, ait Davus; tibi nempe sermonem superiorem tecum recitanti; si pace tua liceat pauca habeo, quae contra reponam. Id modo dixisti tibi in votis esse, ut rure procul a negotiis et turbis degas. Recte quidem, si in eodem voto constanter ac perpetuo manere possis. Sed *Laudas Fortunam et mores antiquae plebis; et idem Si quis ad illa Deus subito te agat usque recuses.* — *Romae rus optas; absentem rusticus urbem Tollis ad astra levis* etc.“ Neque vero necesse erat hanc sermonis coniungendi occasionem comminisci; imo servus sapientiae, quam a Crispini ianitore in rem suam converterat, iactandae impatiens, coram domino disputare properat. Tum superior satira (VI.) si quae alia in se ipsa tota est teres atque rotunda, et aperte narrata fabula clauditur. Qui tandem eadem tam abrupte dramaticam formam inducere et colloquium illud marium inter se, servi cum Horatio colloquium continuo subsequi possit? Quo consilio hoc factum esse dicamus? Scilicet ut Sermonis VI. elegantia et nativa simplicitas corrumperetur. *Heindorf.*

DAVUS.

Iamdudum ausculto et cupiens tibi dicere servus
Pauca, reformido.

HORATIUS.

DAVUSNE?

DAVUS.

Ita, Davus, amicum
Mancipium domino, et frugi quod sit satis, hoc est,
Ut vitale putes.

HORATIUS.

Age, libertate Decembri,
Quando ita maiores voluerunt, utere, narra. 5

DAVUS.

Pars hominum vitiis gaudet constanter, et urget
Propositum; pars multa natat, modo recta capessens,
Interdum pravis obnoxia. Saepe notatus
Cum tribus anellis, modo laeva Priscus inani,
Vixit inaequalis, clavum ut mutaret in horas; 10
Aedibus ex magnis subito se conderet, unde
Mundior exiret vix libertinus honeste;
Iam moechus Romae, iam mallet doctus Athenis
Vivere, Vertumnis, quotquot sunt, natus iniquis.
Scurra Volanerius, postquam illi iusta cheragra 15
Contudit articulos, qui pro se tolleret atque
Mitteret in phinum talos, mercede diurna
Conductum pavit: quanto constantior idem
In vitiis, tanto levius miser ac prior illo,
Qui iam contento, iam laxo fune laborat. 20

— v. 13. Pars fere dimidia Codd. *doctor Athen*; eamque lectionem servat Fea. Sed Cf. Heind. — v. 19. *ille* alii Codd. et Edd, probatum Bentleio, Heindorfio, quem Vid. aliis. Plures Codd. Cruq. et Torrentii *acrior ille* vel *illo*.

Horatius.

Non dices hodie, quorsum haec tam putida tendant,
Furcifer?

Davus.

Ad te inquam.

Horatius.

Quo pacto pessime?

Davus.

Laudas

Fortunam et mores antiquae plebis, et idem,
Si quis ad illa Deus subito te agat, usque recuses,
Aut quia non sentis, quod clamas, rectius esse, 25
Aut quia non firmus rectum defendis, et haeres,
Nequidquam coeno cupiens evellere plantam.
Romae rus optas, absentem rusticus Urbem
Tollis ad astra levis. Si nusquam es forte vocatus
Ad coenam, laudas securum olus, ac, velut usquam 30
Vinctus eas, ita te felicem dicis, amasque,
Quod nusquam tibi sit potandum. Iusserit ad se
Maecenas serum sub lumina prima venire
Convivam: Nemon' oleum fert ocinus? ecquis
Audit? cum magno blateras clamore furisque. 35
Mulvius et scurrae tibi non referenda precati
Discedunt. Etenim fateor me, dixerit ille,
Duci ventre levem; nasum nidore supinor,
Imbecillus, iners; si quid vis, adde, popino:
Tu, quum sis quod ego, et fortassis nequior, ultro 40
Insectere velut melior, verbisque decoris
Obvolvas vitium? Quid, si me stultior ipso
Quingentis emto drachmis deprnderis? Aufer
Me vultu terrere; manum stomachumque teneto,
Dum, quae Crispini docuit me ianitor, edo. 45

— v. 34. *feret* plures Codd. et Edd. vett. Cf. Bentl. — v. 35. *fugisque* plurimi Codd. idque tuetur cum Fea Both. quem Vid. in Annotatt. — v. 45. *Chryssippi* pro *Crispini* Cod. Feae.

Te coniux aliena capit, meretricula Davum:
 Peccat uter nostrum cruce dignius? Acris ubi me
 Natura incendit, sub clara nuda lucerna
 Quaecunque excepit turgentis verbera caudae,
 Clunibus aut agitavit equum lasciva supinum: 50
 Dimittit neque famosum, neque sollicitum, ne
 Ditiore aut formae melioris meiat eodem.
 Tu, quum proiectis insignibus, annulo equestri
 Romanoque habitu, prodis ex iudice Dama
 Turpis, odoratum caput obscurante lacerna, 55
 Non es quod simulas? Metuens induceris, atque
 Altercante libidinibus tremis ossa pavore.
 Quid refert, uri, virgis ferroque necari
 Auctoratus eas, an turpi clausus in arca,
 Quo te demisit peccati conscia herilis, 60
 Contractum genibus tangas caput? Estne marito
 Matronae peccantis in ambo iusta potestas?
 In corruptorem vel iustior: illa tamen se
 Non habitu mutatae loco, peccatae superne,
 Quum te formidet mulier, neque credat amanti: 65
 Ibis sub furcam prudens, dominoque furenti
 Committens rem omnem et vitam et cum corpore famam.
 Evasti: metues, credo, doctusque cavebis.
 Quaeres, quando iterum paveas iterumque perire
 Possis, o toties servus! Quae bellua ruptis, 70
 Quum semel effugit, reddit se prava catenis?
 Non sum moechus, ais. Neque ego hercule fur, ubi vasa
 Praetereo sapiens argentea. Tolle periculum:
 Iam vaga prosiliet frenis natura remotis.
 Tune mihi dominus, rerum imperiis hominumque 75
 Tot tantisque minor, quem ter vindicta quaterque
 Imposita haud unquam misera formidine privet?
 Adde super, dictis quod non levius valeat: nam

— v. 64. *supine* coniicit pro *superne* Petr. Nannius Miscell. lib. IV.
 probante Both. Annotatt. — v. 78. Ita e pluribus Codd. Bentl.
 quem Vid. Olim vulg. *supra dictis*.

Sive vicarius est qui servo paret, uti mos
 Vester ait, seu conservus: tibi quid sum ego? Nempe 80
 Tu, mihi qui imperitas, aliis servis miser, atque
 Duceris ut nervis alienis mobile lignum.
 Quisnam igitur liber? Sapiens, sibi qui imperiosus,
 Quem neque pauperies neque mors neque vincula terrent,
 Responsare cupidinibus, contemnere honores 85
 Fortis, et in se ipse totus, teres atque rotundus,
 Externi ne quid valeat per leve morari,
 In quem manca ruit semper fortuna. Potesne
 Ex his ut proprium quid noscere? Quinque talenta
 Poscit te mulier, vexat, foribusque repulsum 90
 Perfundit gelida; rursus vocat; eripe turpi
 Colla iugo, Liber, liber sum, dic age. Non quis.
 Urget enim dominus mentem non lenis, et aeres
 Subiectat lasso stimulos, versatque negantem.
 Vel quum Pausiaca torpes, insane, tabella, 95
 Quî peceas minus atque ego, quum Fulvî Rutubaeque
 Aut Placideiani contento poplite miror
 Proelia, rubrica pieta aut carbone, velut si
 Re vera pugnent, feriant, vitentque moventes
 Arma viri? Nequam et cessator Davus; at ipse 100
 Subtilis veterum index et callidus audis.
 Nil ego, si ducor libo fumante: tibi ingens
 Virtus atque animus coenis responsat opimis?
 Obsequium ventris mihi perniciosius est cur?
 Tergo plector enim: quî tu impunitior illa, 105
 Quae parvo sumi nequeunt, obsonia captas?
 Nempe inamarescunt epulae sine fine petitae,
 Illusique pedes vitiosum ferre recusant
 Corpus. An hic peccat, sub noctem qui puer uvam
 Furtiva mutat strigili? qui praedia vendit, 110
 Nil servile, gulae parens, habet? Adde, quod idem

— v. 82. *signum* pro *lignum* Benth. ex coniectura. — v. 107. *in-*
marcescunt Cod. Gotting. et aliquot Feae, quem Cf. — v. 109. *uva*
Furtivam mutat strigilem Lambin. e Codd. Sed Vid. Heind.

Non horam tecum esse potes, non otia recte
Ponere; teque ipsum vitas fugitivus et erro,
Iam vino quaerens, iam somno fallere curam;
Frustra: nam comes atra premit sequiturque fugacem. 115

Horatius.

Unde mihi lapidem?

Davus.

Quorsum est opus?

Horatius.

Unde sagittas?

Davus.

Aut insanit homo, aut versus facit.

Horatius.

Ocius hinc te

Ni rapis, accedes opera agro nona Sabino.

SATIRA VIII.

Satis patet, quantum huic satirae commendationis accedat, si statuerimus, Horatium ut alias facere solet ita etiam hoc loco *Nasidienum* appellatione certum quendam hominem vero nomine paulum immutato significare, quem quidem bona lectorum pars ex cognomine *Rufi* versu 58 addito, atque adeo ex tota narratione facili coniectura assequeretur. Nihil autem vero similis est, quam derideri hoc sermone, ut iam Lambinus coniecit, *Salvidienum Rufum* apud *Suetonium in Aug.* cap. 66. commemoratum, ubi haec leguntur: *Neque . . . temere ex omni numero in amicitia eius (Augusti) afflictis reperientur praeter Salvidienum Rufum, quem ad consulatum usque, et Cornelium Gallum, quem ad praefecturam Aegypti, ex infima utrumque fortuna, provexerat. Quorum alterum (Gallum) res novas molientem damnandum Senatui tradidit: alteri (Nasidieno) ob ingratum et malevolum animum domo et provinciis suis interdixit.* Id autem quamvis summo studio ageret huius convivii dominus, quod Fundanius, poeta comicus apud Horatium Sat. I, 10, 42 collaudatus narrat, ut coram Maecenate, in cuius honorem convivium haberet, divitias suas, magnificentiam et elegans iudicium ostentaret, tamen operam tam misere perdi-

dit, ut vix quidquam ineptius, agrestius et magis ridiculum cogitari posset, quam haec ipsa coena et qui eam praebuit Nasidienus, *ex infima fortuna*, ut omnia arguunt, *profectus*, homo, ut Wielandii verbis utamur, avare prodigus, superbe submissus, arroganter credulus, elegantiam et urbanitatem ridicule affectans, sed idem ineptus, taedii plenus, stolidus, omni sensu, liberaliore educatione et vitae usu destitutus. Vel hodieque lector Horatii vix in ulla alia eius satira tam multa ridicula et deridenda in unum collecta inveniet: quanto plus romanus lector invenerit? Praesertim enim in iis, quae de ciborum ordine et apparatu narrantur, vix nunc nobis derisionis vim vel coniectura assequi licet; neque Salmasii aut Boettigeri eruditio suppetat ad omnes ineptias demonstrandas, quibus haec coena laboraverit. *Heindorf.*

Horatius.

Ut Nasidieni iuvit te coena beati?
Nam mihi convivam quaerenti dictus here illic
De medio potare die.

Fundanius.

Sic, ut mihi nunquam
In vita fuerit melius.

Horatius.

Da, si grave non est,
Quae prima iratum ventrem placaverit esca. 5

Fundanius.

In primis Lucanus aper: leni fuit Austro
Captus, ut aiebat coenae pater; acria circum
Rapula, lactueae, radices, qualia lasso
Pervellunt stomachum, siser, haecc, faecula Coa.
His ubi sublatis puer alte cinctus acernam 10
Gausape purpureo mensam pertersit, et alter

VIII, v. 1. Fea e Codd. *Nasidieni qui iuvit* etc. unde Iahn. conii. *Qui Nasidieni* etc. Cf. Benth. et Both. Annotatt. — v. 4. *da* Codd. Feae; sed plurimi Codd. et antiquissimae Edd. *dic.* Cf. Benth. Heind. et Fea.

Sublegit quodcunque iaceret inutile, quodque
 Posset coenantes offendere: ut Attica virgo
 Cum sacris Cereris, procedit fuscus Hydaspes
 Caecuba vina ferens, Alcon Chium maris experts. 15
 Hic herus, Albanum, Maecenas, sive Falernum
 Te magis appositis delectat, habemus utrumque.

Horatius.

Divitias miseras! Sed queis coenantibus una,
 Fundani, pulchre fuerit tibi, nosse laboro.

Fundanius.

Summus ego, et prope me Viscus Thurinus, et infra, 20
 Si memini, Varius; cum Servilio Balatrone.
 Vibidius, quos Maecenas adduxerat umbras.
 Nomentanus erat super ipsum, Porcius infra.
 Ridiculus totas simul obsorbere placentas.
 Nomentanus ad hoc, qui, si quid forte lateret, 25
 Indice monstraret digito: nam cetera turba,
 Nos, inquam, coenamus aves, conchylia, pisces,
 Longe dissimilem noto celantia succum;
 Ut vel continuo patuit, quum passeris assi et
 Ingustata mihi porrexerat ilia rhombi. 30
 Post hoc me docuit, melimela rubere minorem
 Ad lunam delecta. Quid hoc intersit, ab ipso
 Audieris melius. Tum Vibidius Balatrone:
 Nos nisi damnose bibimus, moriemur inulti;
 Et calices poscit maiores. Vertere pallor 35
 Tum parochi faciem, nil sic metuentis ut acres
 Potores, vel quod maledicunt liberius, vel
 Fervida quod subtile exsurdant vina palatum.

— v. 17. Bothius cum Heindorfio ita interpungit: *habemus utrumque, Divitias miseras*. Cf. Benth. et Heind. — v. 23. *supra* Coll. Sax. Cf. Heind. — v. 24. *semel* plures Codd. Vid. Benth. et Heind. — *absorbere* plures Codd. Cf. Heind. — v. 29. Ita Benth. et Codd. Lambini. Olim vulg. *passeris atque Ingust.* Idem Codd. Lamb. *porrexerat*; plurimi alii *porrexerit* Cf. Benth.

Invertunt Allifanis vinaria tota
 Vibidius Balatroque, secutis omnibus: imi 40
 Convivae lecti nihilum nocuere lagenis.
 Affertur squillas inter muraena natantes
 In patina porrecta. Sub hoc herus, Haec gravida, inquit,
 Capta est, deterior post partum carne futura.
 His mixtum ius est: oleo, quod prima Venafri 45
 Pressit cella; garo de succis piscis Iberi;
 Vino quinquenni, verum citra mare nato,
 Dum coquitur; cocto Chium sic convenit, ut non
 Hoc magis ullum aliud; pipere albo, non sine aceto,
 Quod Methymnaeam vitio mutaverit uvam. 50
 Erucas virides, inulas ego primus amaras
 Monstravi incoquere; illotos Curtillus echinos,
 Ut melius muria, quam testa marina remittit.
 Interea suspensa graves aulaea ruinas
 In patinam fecere, trahentia pulveris atri 55
 Quantum non Aquilo Campanis excitat agris.
 Nos maius veriti, postquam nihil esse pericli
 Sensimus, erigimur. Rufus posito capite, ut si
 Filius immaturus obisset, flere. Quis esset
 Finis, ni sapiens sic Nomentanus amicum 60
 Tolleret? Heu, Fortuna, quis est crudelior in nos
 Te Deus? ut semper gaudes illudere rebus
 Humanis! Varinus mappa compescere risum
 Vix poterat. Balatro suspendens omnia naso,
 Haec est conditio vivendi, aiebat, eoque 65
 Responsura tuo nunquam est par fama labori.
 Tene, ut ego accipiar laute, torquerier omni
 Sollicitudine districtum? ne panis adustus;
 Ne male conditum ius apponatur? ut omnes
 Praecinctorum recte pueri contique ministrent? 70
 Adde hos praeterea casus, aulaea ruant si,
 Ut modo; si patinam pede lapsus frangat agaso.
 Sed convivatoris, uti ducis, ingenium res

Adversae nudare solent, celare secundae.

Nasidienus ad haec: Tibi Dî, quaecunque preceris, 75

Commoda dent; ita vir bonus es convivae comis.

Et soleas poscit. Tum in lecto quoque videres

Stridere secreta divisos aure susurros.

Horatius.

Nullos his mallet ludos spectasse; sed illa

Redde, age, quae deinceps risisti.

Fundanius.

Vibidius dum. 80

Quaerit de pueris, num sit quoque fracta lagena,

Quod sibi poscenti non dentur pocula, dumque

Ridetur fictis rerum, Balatrone secundo:

Nasidiene, redis mutatae frontis, ut arte

Emendaturus fortunam; deinde secuti 85

Mazonomo pueri magno discerpta ferentes

Membra gruvis, sparsi sale multo non sine farre,

Pinguibus et fœcis pastum iecur anseris albae,

Et leporum avulsos, ut multo suavius, armos,

Quam si cum lumbis quis edit. Tum pectore adusto 90

Vidimus et merulas poni, et sine clune palumbes;

Suaves res, si non causas narraret earum et

Naturas Dominus, quem nos sic fugimus ulti,

Ut nihil omnino gustaremus, velut illis

Canidia afflasset peior serpentibus Afris. 95

— v. 75. *precaris* Codd. aliquot. et *priseae* Edd. Cf. Benth. —
v. 82. *dantur* plures Codd. Feae. Cf. Iahn. — v. 88. *albae* Heind.
e pluribus Codd. apud Benth. quem Vid. coll. Fea. et Iahn. Alii
albi. — v. 94. Benth. cui *afflare* hic accusativum requirere
videretur ex coniectura: *veluti si Canidia*. Cf. Heind. et Both. An-
notatt. — v. 95. *serpentibus atris* Benth. e Codd.

Q. HORATII FLACCI EPISTOLARUM

LIBER PRIMUS.

EPISTOLA I.

AD MAECENATEM.

Horatius, cum post Satiras, Epodos et Odas compositas tam diu cessavisset, ut Musarum castra plane deseruisse videretur; atque a Maecenate ut stilum repeteret esset provocatus: rationem reddit hac epistola cur nunc minus iam ad versus scribendos caleat. Excusat enim primum aetatem ingravescentem et a juvenilibus ludis alienam, *vers.* 1—9. (agebat autem hoc tempore e Bentleii rationibus annum quadragesimum sextum, aut septimum); deinde mutatum animi propositum, quo nunc unice sapientiae studio omissis ludicris vacet, non scholiasticae illius quidem, sed quae sectarum formulis spretis, serio et vere id tantum quaerat, ut vitam ratione regamus, neque malis cupidinibus abrepti, neque languore lenti et incuriosi. (*Vers.* 10—25.) Quod ubi dixit, continuo huius sanae rationis et verae sapientiae aliquot quasi specimina amico proponit, in quibus ut omnino contra humani generis inconstantiam et vitae vere beatae ignorationem disputat, (*Vers.* 25—93.) ita vel Maecenatem ipsum, etsi leniter et amicis verbis hoc nomine tangere pro sua libertate dicendi non veretur. (*Vers.* 94—104.) Postremum ne nimia severitate supercilium philosophicum assumpsisse videatur, ludibunda clausula epistolam praecidit. (*Vers.* 105—108).

Prima dicte mihi, summa dicende Camena,
 Spectatum satis, et donatum iam rude, quaeris,
 Maecenas, iterum antiquo me includere ludo.
 Non eadem est aetas, non mens. Veianius, armis
 Herculis ad postem fixis, latet abditus agro, 5
 Ne populum extrema toties exoret arena.
 Est mihi purgatam crebro qui personet aurem:
 Solve senescentem mature sanus equum, ne
 Peccet ad extremum ridendus, et ilia ducat.
 Nunc itaque et versus et cetera ludiera pono; 10
 Quid verum atque decens curo et rogo, et omnis in
 hoc sum;
 Condo et compono, quae mox depromere possim.
 Ac ne forte roges, quo me duce, quo lare tuter:
 Nullius addictus iurare in verba magistri,
 Quo me cunque rapit tempestas, deferor hospes. 15
 Nunc agilis fio et mersor civilibus undis,
 Virtutis verae custos rigidusque satelles;
 Nunc in Aristippi furtim praecepta relabor,
 Et mihi res, non me rebus subiungere conor.
 Ut nox longa, quibus mentitur amica, diesque 20
 Lenta videtur opus debentibus: ut piger annus
 Pupillis, quos dura premit custodia matrum:
 Sic mihi tarda fluunt ingrataque tempora, quae spem
 Consiliumque morantur agendi gnaviter id, quod
 Aequae pauperibus prodest, locupletibus aequae, 25
 Aequae neglectum pueris senibusque nocebit.
 Restat, ut his ego me ipse regam solerque elementis:
 Non possis oculos quantum contendere Lynceus,
 Non tamen idcirco contemnas lippus inungi;
 Nec, quia desperes invicti membra Glyconis, 30

I. v. 3. *inducere ludo* Codd. Bersm. *reddere ludo* Cod. Feae.
 Eiusdem Cod. unus cum interrogatione verum profert. — v. 16.
versor e Codd. et vett. Edd. Lambinus. Cf. Fea. — v. 19. *submit-*
tere conor plures Codd. et vett. Edd. Vid. Fea. — v. 21. *lenta*
 ex uno Cod. Benth. Vulg. *longa*, quod timentur Fea et Obbarius
 (*in peculiari huius epist. editione. Rudolstadt. 1822.*). — v. 28.
oculos Lambin. unus Cod. *oculis* alius Feae. Vid. Benth. et Fea.

Nodosa corpus nolis prohibere cheragra.
 Est quadam prodire tenuis, si non datur ultra.
 Fervet avaritia miseroque cupidine pectus:
 Sunt verba et voces, quibus hunc lenire dolorem
 Possis, et magnam morbi deponere partem. 35
 Laudis amore tumes: sunt certa piacula, quae te
 Ter pure lecto poterunt recreare libello.
 Invidus, iracundus, iners, vinosus, amator,
 Nemo adeo ferus est, ut non mitescere possit,
 Si modo culturae patientem commodet aurem. 40
 Virtus est vitium fugere, et sapientia prima
 Stultitia caruisse. Vides, quae maxima credis
 Esse mala, exiguum censum turpemque repulsam
 Quanto devites animo capitisque labore:
 Impiger extremos curris mercator ad Indos, 45
 Per mare pauperiem fugiens, per saxa, per ignes:
 Ne cures ea, quae stulte miraris et optas,
 Discere et audire et meliori credere non vis?
 Quis circum pagos et circum compita pugnax
 Magna coronari contemnat Olympia, cui spes, 50
 Cui sit conditio dulcis sine pulvere palmae?
 Vilius argentum est auro, virtutibus anrum.
 O cives, cives, quaerenda pecunia primum est,
 Virtus post nummos. Haec Ianus summus ab imo
 Prodocet; haec recinunt iuvenes dictata senesque, 55
 Laevo suspensi loculos tabulamque lacerto.
 Est animus tibi, sunt mores, est lingua fidesque;
 Sed quadringentis sex septem millia desunt:

— v. 31. *prohibere podagra* Codd. aliquot Feae. — v. 32. *quodam* plerique Codd. et Edd. *quadam* duo Codd. Cruq. et Schol. *quodam* Codd. aliquot Feae et vett. Edd. Vid. Benth. et Fea. — v. 33. *miseroque* Cod. Bersm. et Ed. Ven. — v. 40. *accomodet* Coll. Sax. et Cod. Bersm. — v. 44. *animo* Codd. aliquot Cruq. Alii *animi*. — *Ibid.* *labore?* Cod. Feae. Cf. Iahn. — v. 48. *audere* Ed. prima Cf. Gesner. — v. 55. *Prodocet* plurimi Codd. Alii cum vett. Edd. *praedocet* aut *perdocet* Cf. Benth. et Fea. — *Ibid.* *senesque* et Markland coni. Cf. Gesner et Iahn. — v. 57 et 58. Locum ita constituit Cruq. e Cod. probante Benth. quem Vid. Vulgata lectio olim erat:

Plebs eris. At pueri ludentes, Rex eris, aiunt,
 Si recte facies. Hic murus aëneus esto, 60
 Nil conscire sibi, nulla pallescere culpa.
 Roscia, dic sodes, melior lex, an puerorum est
 Naenia, quae regnum recte facientibus affert,
 Et maribus Curiis et decantata Camillis?
 Isne tibi melius suadet, qui, rem facias; rem, 65
 Si possis, recte; si non, quocunque modo rem,
 Ut propius spectes lacrimosa poemata Pupì:
 An qui, fortunae te responsare superbae
 Liberum et erectum, praesens hortatur et aptat?
 Quod si me populus Romanus forte roget, cur 70
 Non, ut porticibus, sic iudiciis fruar isdem,
 Nec sequar aut fugiam, quae diligit ipse vel odit:
 Olim quod vulpes aegroto cauta leoni
 Respondit, referam: Quia me vestigia terrent
 Omnia te adversum spectantia, nulla retrorsum. 75
 Bellua multorum es caput. Nam quid sequar? aut
 quem?
 Pars hominum gestit conducere publica; sunt qui
 Crustis et pomis viduas venentur avaras,
 Excipiantque senes, quos in vivaria mittant;
 Multis occulto creseit res fenore. Verum 80
 Esto, aliis alios rebus studiisque teneri:
 Idem eadem possunt horam durare probantes?
 Nullus in orbe sinus Baiis praelueet amoenis,
 Si dixit dives, lacus et mare sentit amorem
 Festinantis heri; cui si vitiosa libido 85
 Fecerit auspicium, cras ferramenta Teanum
 Tollebis, fabri. Lectus genialis in aula est:
 Nil ait esse prius, melius nil caelibe vita;

Si quadringentis sex etc.... desunt. Est animus tibi... fidesque,
Plebs eris. — v. 67. *Pupì* Benth. e Codd. Vulg. *Puppi*. Cf. Benth.
 et Fea. — v. 69. *optat* Cod. Feae, Ed. princeps multaeque aliae.
 Vid. Benth. et Fea. — v. 76. *est pro es* Benth. ex con. Cf. Gesner.
 — v. 78. *frustis pro crustis* Codd. aliquot Feae, alii et Ed. princ.

Si non est, iurat bene solis esse maritis.
 Quo teneam vultus mutantem Protea nodo? 90
 Quid pauper? Ride, ut mutat coenacula, lectos,
 Balnea, tonsores; conducto navigio aequè
 Nauseat ac locuples, quem ducit priva triremis.
 Si curatus inaequali tonsore capillos
 Occurro, rides: si forte subucula pexae 95
 Trita subest tunicae, vel si toga dissidet impar,
 Rides: quid? mea quum pugnat sententia secum;
 Quod petiit, spernit; repetit quod nuper omisit;
 Aestuât et vitæ disconvenit ordine toto;
 Diruit, aedificat, mutat quadrata rotundis: 100
 Insanire putas solennia me, neque rides?
 Nec medici credis nec curatoris egere
 A praetore dati; rerum tutela mearum
 Quum sis, et prave sectum stomacheris ob unguem
 De te pendentis, te respicientis amici. 105
 Ad summam, sapiens uno minor est Iove, dives,
 Liber, honoratus, pulcher, rex denique regum;
 Præcipue sanus, nisi quum pituita molesta est.

EPISTOLA II.

AD LOLLIUM.

Lollius, ad quem haec epistola data est, filius fuit natu maximus M. Lollii Palicani, ad quem scripsit Horatius carmen 9 libri IV. nobili loco natus, dives, iuvenis generosae indolis et elegantis ingenii, quantum quidem ex hac epistola et huius libri epistola XVIII conicere licet. Ei igitur poeta hac epistola saluberrimis consiliis viam, qua pervenitur ad honestatem, et felicitatem, indigital, et

— v. 91. *rides* aliquot Codd. *viden' ut* mutat Benth. ex coni. Cf. Iahn. — v. 94. *curatus* omnes Codd. excepto uno Cruq. qui habet *curtatus*, idemque Ed. Loscheriana, unde in plurimas alias transiit Vid. Benth. et Fea. — v. 95. *Occurro* Benth. e Codd. itemque plures Feae. Vulg. *occurri*. — v. 103. *suspicientis* Benth. ex coni. Nic. Heins. Cf. Fea.

ut alacri animo ingreditur iuvenem monet. Atque cum hoc ipso tempore Horatius Praeneste degenens Homeri carmina relegisset hac scribens occasione utens primum ostendit inde tanquam e vita ipsa posse aptissima in utramque partem exempla a nobis peti. Post hanc egregiam de Homero sententiam pluribus versibus explicatam (*vers. 1—31.*), tradit potissima praeceptorum capita, quibus vita iuveni regenda sit, tam vere, tam nervose, tam ad persuadendum apte, ut quemlibet adolescentem, nisi plane abiecto animo sit, non excitare et ad optima quaeque incendere non possint. (*Vers. 32 usque ad fin.*)

Troiani belli scriptorem, maxime Lolli,
Dum tu declamas Romae, Praeneste relegi;
Qui, quid sit pulchrum, quid turpe, quid utile, quid
non,
Planius ac melius Chrysippo et Crantore dicit.
Cur ita crediderim, nisi quid te detinet, audi. 5
Fabula, qua Paridis propter narratur amorem
Graecia barbariae lento collisa duello,
Stultorum regum et populorum continet aestus.
Antenor censet belli praecidere causam.
Quid Paris? ut salvus regnet vivatque beatus, 10
Cogi posse negat. Nestor componere lites
Inter Peliden festinat et inter Atriden:
Hunc amor, ira quidem communiter urit utrumque.
Quidquid delirant reges, plectuntur Achivi.
Seditione, dolis, scelere, atque libidine et ira 15
Iliacos intra muros peccatur et extra.
Rursum, quid virtus et quid sapientia possit,
Utile proposuit nobis exemplar Ulixem,
Qui domitor Troiae multorum providus urbes
Et mores hominum inspexit, latumque per aequor, 20
Dum sibi, dum sociis reditum parat, aspera multa

II, v. 4. *planus* ex Edd. principibus et plurimis Codd. revocavit Benth. quem Vid. Olim vulg. *plenius*. — v. 10. *Quod Paris* sine interrogatione Benth. ex Codd. — v. 17. *rursum* ex uno Cod. Benth. quem Vid. collato Both. Annotatt. Reliqui *rursus*. —

Pertulit, adversis rerum immersabilis undis.
 Sirenum voces et Circae pocula nosti;
 Quae si cum sociis stultus cupidusque bibisset,
 Sub domina meretrice fuisset turpis et excors, 25
 Vixisset canis immundus, vel amica luto sus.
 Nos numerus sumus, et fruges consumere nati,
 Sponsi Penelopae, nebulones, Alcinoique
 In cute curanda plus aequo operata iuventus,
 Cui pulchrum fuit in medios dormire dies, et 30
 Ad strepitum citharae cessatum ducere curam.
 Ut iugulent homines, surgunt de nocte latrones:
 Ut te ipsum serves, non expergisceris? atqui
 Si noles sanus, cures hydropicus; et ni
 Posces ante diem librum cum lumine, si non 35
 Intendes animum studiis et rebus honestis:
 Invidia vel amore vigil torquere. Nam cur,
 Quae laedunt oculum, festinas demere: si quid
 Est animum, differs curandi tempus in annum?
 Dimidium facti, qui coepit, habet; sapere aude, 40
 Incipe. Qui recte vivendi prorogat horam,
 Rusticus expectat dum defluat annis; at ille
 Labitur, et labetur in omne volubilis aevum.
 Quacritur argentum, puerisque beata creandis
 Uxor et incultae pacantur vomere silvae; 45
 Quod satis est cui contigit, hic nihil amplius optet.
 Non domus et fundus, non aeris acervus et auri
 Aegroto domini deduxit corpore febres,
 Non animo curas. Valeat possessor oportet,
 Si comportatis rebus bene cogitat uti. 50

— v. 23. *Circes* et mox *Penelopes* aliquot Codd. et Edd. Sed Cf. Benth. — v. 31. *cessantem ducere somnum* Benth. e Codd. quem Vid. coll. Gesner. et Iahn. — v. 32. *hominem* Benth. e Codd. Cf. Fea. — v. 34. *nolis . . . cures* plures Codd. *cures* etiam primae Edd. Vid. Benth. et Iahn. — v. 38. *oculum* Benth. e melioribus Codd. Alii *oculos*. — v. 41. Ita Benth. ex aliquot Codd. cum quibus conspirant plures apud Feam; sed plerique: *Vivendi qui recte prorog. hor. alii vivendi recte qui*. V. Benth.

Qui cupit aut metuit, iuvat illum sic domus et res,
 Ut lippum pictae tabulae, fomenta podagram,
 Auriculas citharae collecta sorde dolentes.
 Sincerum est nisi vas, quodcunque infundis, acescit.
 Sperne voluptates; nocet emta dolore voluptas. 55
 Semper avarus eget; certum voto pete finem.
 Invidus alterius macrescit rebus opimis;
 Invidia Siculi non invenere tyranni
 Maius tormentum. Qui non moderabitur irae,
 Infectum volet esse, dolor quod suaserit et mens, 60
 Dum poenas odio per vim festinat inulto.
 Ira furor brevis est; animum rege, qui nisi paret,
 Imperat; hunc frenis, hunc tu compesce catena.
 Fingit equum tenera docilem cervice magister
 Ire, viam qua monstret eques. Venaticus, ex quo 65
 Tempore cervinam pellem latravit in aula,
 Militat in silvis catulus. Nunc adhibe puro
 Pectore verba puer, nunc te melioribus offer.
 Quo semel est imbuta recens, servabit odorem
 Testa diu. Quod si cessas aut strenuus anteis, 70
 Nec tardum opperior nec praecedentibus insto.

EPISTOLA III.

AD IULIUM FLORUM.

Iulium Florum familiarem suum, tunc temporis inter comites
 Tiberii Neronis anno U. C. 734 in Orientem ab Augusto missi,
 ut Tigrani Armeniae restitueret regnum, percontatur, quid Tibe-
 rius, quid communes amici, quid ipse agat, (*vers.* 1—25.) ad
 sapientiae studium excitat (v. 25 — 30.), postremum ut cum Mu-
 natio, communi amico, in gratiam redeat amice hortatur. (v. 30—35.)

— v. 52. *podagram* Bentl. — *tomenta* conl. Buher. Antholog.
 lat. Burmanni Tom. II. p. 485. Cf. Doering. et Iahn. — v. 65. Ita
 Bentl. e Codd. quem Vid. Olim vulg. *Ire viam quam monstrat.* —
 v. 66. *laceravit in aula* Codd. aliquot Feae.

Iuli Flore, quibus terrarum militet oris
 Claudius Augusti privignus, scire laboro.
 Thracane vos, Hebrusque nivali compede vinctus,
 An freta vicinas inter currentia turres,
 An pingues Asiae campi collesque morantur? 5
 Quid studiosa cohors operum struit? Hoc quoque curo.
 Quis sibi res gestas Augusti scribere sumit?
 Bella quis et paces longum diffundit in aevum?
 Quid Titius, Romana brevi venturus in ora,
 Pindarici fontis qui non expalluit haustus, 10
 Fastidire lacus et rivos ausus apertos?
 Ut valet? ut meminit nostri? fidibusne Latinis
 Thebanos aptare modos studet, auspice Musa?
 An tragica desaevit et ampullatur in arte?
 Quid mihi Celsus agit? monitus multumque monen-
 dus, 15
 Privatas ut quaerat opes, et tangere vitet
 Scripta, Palatinus quaecunque recepit Apollo;
 Ne, si forte suas repetitum venerit olim
 Grex avium plumas, moveat cornicula risum
 Furtivis nudata coloribus. Ipse quid audes? 20
 Quae circumvolitas agilis thyma? non tibi parvum
 Ingenium non incultum est et turpiter hirtum.
 Seu linguam causis acuis, seu civica iura
 Respondere paras, seu condis amabile carmen;
 Prima ferēs ederae victricis praemia. Quod si 25
 Frigida curarum fomenta relinquere posses,
 Quo te coelestis sapientia duceret, ires.
 Hoc opus, hoc studium parvi properemus et ampli,
 Si patriae volumus, si nobis vivere cari.
 Debes hoc etiam rescribere, si tibi curae, 30

III, v. 4. *terras* pro *turres* Bentl. ex aliquot Codd. inprimis Blandiniano veterrimo. Cf. Fea et Iahn. — v. 6. *hoc* Bentl. e plurimis Codd. quibus accedunt Codd. Feae. Sed antiquissimae Edd. *haec*. Cf. Bentl. — v. 22. Ita Bentl. et Fea e plurimis Codd. *nec turpiter* plurimae Edd. *non turp.* Both. e Codd. Torrent. — v. 30. Codd. et vet. Edd. *si tibi* aut *sit tibi*. Bentl. quem Cf. *si tibi curae est*.

Quanta conveniat, Munatius, an male sarta
 Gratia nequidquam coit et rescinditur? At, vos
 Seu calidus sanguis seu rerum inscitia vexat
 Indomita cervice ferus, ubicunque locorum
 Vivitis, indigni fraternum rumpere foedus, 35
 Pascitur in vestrum reditum votiva iuvenca.

EPISTOLA IV.

AD ALBIUM TIBULLUM.

Scire avet, quid amicus agat, ad hilarem vitae usum hortatur, invitatur denique, ut se visat. Commendatur elegans epistolum praesertim hoc nomine, quod summi elegiarum scriptoris ingenium et vitae conditio tam belle ibi significatur (*vers. 6—11.*). Ad eundem scripta est Lib. IV. Od. 33.

Albi, nostrorum sermonum candide iudex,
 Quid nunc te dicam facere in regione Pedana?
 Scribere quod Cassi Parmensis opuscula vincat,
 An tacitum silvas inter reptare salubres,
 Curantem quidquid dignum sapiente bonoque est? 5
 Non tu corpus eras sine pectore. Di tibi formam,
 Di tibi divitias dederunt, artemque fruendi.
 Quid voveat dulci nutricula maius alumno,
 Qui sapere et fari possit quae sentiat, et cui
 Gratia, fama, valetudo contingat abunde, 10
 Et mundus victus, non deficiente crumena?
 Inter spem curamque, timores inter et iras,

— v. 32. *ac vos* Benth. e Codd. — v. 33. *versat* Codd. aliquot Feae et antiquissimae Edd.

IV, v. 9. Hanc lectionem Benth. ex optimis Codd. revocavit. Olim vulg. *Quam sapere et fari ut possit*. Plures Codd. Torrent. *Quin sap.* etc. Vid. Benth. — v. 11. Ita omnes Edd. cum maiore parte Codd. Aliquot tamen Codd. *Modus et victus*, unde Benth. coni. *Domus et victus*.

Omnem crede diem tibi diluxisse supremum:
 Grata superveniet, quae non sperabitur, hora.
 Me pinguem et nitidum bene curata cute vises, 15
 Quum ridere voles Epicuri de grege porcum.

EPISTOLA V.

AD TORQUATUM.

Invitat poeta amicum ad coenam frugalem et genialem, quo Iulii Caesaris natalem diem celebraturus erat, simulque ad hilarem et laetum vitae usum excitat, quod etiam in Od. 7 Libri IV. ad eundem scripta a poeta fieri videmus.

Si potes Archiacis conviva recumbere lectis,
 Nec modica coenare times olus omne patella,
 Supremo te sole domi, Torquate, manebo.
 Vina bibes iterum Tauro diffusa, palustres 5
 Inter Minturnas Sinuessanumque Petrinum.
 Sin melius quid habes, arcesse, vel imperium fer.
 Iamdudum splendet focus, et tibi munda supellex.
 Mitte leves spes, et certamina divitiarum,
 Et Moschi causam. Cras nato Caesare festus
 Dat veniam somnumque dies; impune licebit 10
 Aestivam sermone benigno tendere noctem.
 Quo mihi fortunam, si non conceditur uti?
 Parcus ob heredis curam nimiumque severus
 Assidet insano. Potare et spargere flores

— v. 13. *diluxisse* antiquissimae Edd. Sed Vid. Fea.

V, v. 1. *Archiacis* plurimi Codd. atque etiam Porphyrio; *Achaicis* aliquot Codd. Lambin. Torrent. Feae; aliorum, et omnes fere Edd. antiquiores Cf. Benth. et Fea. — v. 11. *extendere* Codd. aliquot Feae et vetustissimae Edd. Vid. Benth. — v. 12. *fortunam* Benth. ex aliquot Codd. *fortuna* Fea ex duobus MSS. Sed longe plurimi Codd. *fortuna*, quam lectionem Doeringius posita post *mihi* distinctione minori, servavit.

Incipiam, patiarque vel inconsultus haberi. 15
 Quid non ebrietas designat? operta recludit,
 Spes iubet esse ratas, in proelia trudit inertem,
 Sollicitis animis onus eximit, addocet artes.
 Fecundi calices quem non fecere disertum?
 Contracta quem non in paupertate solutum? 20
 Haec ego procurare et idoneus imperor, et non
 Invitus, ne turpe toral, ne sordida mappa
 Corruget nares; ne non et cantharus et lanx
 Ostendat tibi te; ne fidos inter amicos
 Sit, qui dicta foras eliminet; ut coëat par 25
 Iungaturque pari. Butram tibi Septiciumque,
 Et nisi coena prior potiorque puella Sabinum
 Detinet, assumam. Locus est et pluribus umbris;
 Sed nimis arcta premunt olidae convivia caprae.
 Tu, quotus esse velis, rescribe, et rebus omissis 30
 Atria servantem postico falle clientem.

EPISTOLA VI.

AD NUMICIUM.

Gentem Numiciam Romae floruisse certum est, cum Titus Numicius Priscus anni U. C. 285 Consul et Numicius Thermus sub Nerone praetor memorentur. Sed quis hic Numicius fuerit, ad quem Horatius hanc epistolam scripsit, nisi fortasse nomen fictum est, ignoratur. Quae poeta ibi praecipit, eo fere redeunt: Primum et maximum vitae beatæ praesidium eo continetur, ut plane nulla re, nedum his humanarum rerum ludibriis et sordibus, perturbemur (*vers.* 1—30); alterum est, ut caveamus, ne inconstantia misere fluctuemus. Ubi primum igitur videris, virtutem solam posse nobis animi tranquillitatem et vitam vere beatam praebere, hanc ipsam unice sequere (v. 30); sin autem secus senseris, praestat vel divitias (v. 32—48), vel populi favorem et honores

— v. 17. *inertem* multi Codd. Sed olim vulg. *inermem*. Cf. Fea.
 — v. 26. Ita Codd. Sed olim per Edd. vulgabatur *Brutum tibi Septimumque*. Cf. Benth. Fea, Iahn.

(— v. 58), adeoque luxuriam et voluptates (— v. 66) strenue sectari, quam trepidare in vitae rationibus, titubare, alia sentire et loqui, alia facitare.

Nil admirari prope res est una, Numici,
 Solaque, quae possit facere et servare beatum.
 Hunc solem, et stellas, et decedentia certis
 Tempora momentis, sunt qui formidine nulla
 Imbuti spectent. Quid censes munera terrae? 5
 Quid maris extremos Arabas ditantis et Indos?
 Ludicra quid, plausus, et amici dona Quiritis?
 Quo spectanda modo, quo sensu credis et ore?
 Qui timet his adversa, fere miratur eodem
 Quo cupiens pacto; pavor est utrobique molestus, 10
 Improvisa simul species exterret utrumque.
 Gaudeat an doleat, cupiat metuatne, quid ad rem,
 Si, quidquid vidit melius peiusve sua spe,
 Defixis oculis, animoque et corpore torpet?
 Insani sapiens nomen ferat, aequus iniqui, 15
 Ultra quam satis est virtutem si petat ipsam.
 I nunc, argentum et marmor vetus aeraque et artes
 Suspice, cum gemmis Tyrios mirare colores,
 Gaude quod spectant oculi te mille loquentem,
 Gnavus mane forum, et vespertinus pete tectum, 20
 Ne plus frumenti dotalibus emetat agris
 Mutus, et (indignum, quod sit peioribus ortus)
 Hic tibi sit potius, quam tu mirabilis illi.
 Quidquid sub terra est, in aprium proferet aetas,
 Defodiet condetque nitentia. Quum bene notum 25
 Porticus Agrippae et via te conspexerit Appi,
 Ire tamen restat, Numa quo devenit et Ancus.
 Si latus aut renes morbo tentatur acuto,

VI, v. 5. *spectant* Fea e paucis Codd. Sed Vid. Iahn. — v. 12. *metuatne* multae antiquissimae Edd, apud Feam. — v. 22. *Mutus* Bentl. e plurimis Codd. et binis Edd. principibus Loscheriana et Veneta restituit. Olim vulgabatur *Mucius* sine *et*. Vid. Bentl.

Quaere fugam morbi. Vis recte vivere? quis non?
 Si virtus hoc una potest dare, fortis omissis 30
 Hoc age deliciis. Virtutem verba putas, ut
 Lucum ligna? cave ne portus occupet alter;
 Ne Cibyrica, ne Bithyna negotia perdas.
 Mille talenta rotundentur; totidem altera porro, et
 Tertia succedant, et quae pars quadret acervum. 35
 Scilicet uxorem cum dote, fidemque et amicos,
 Et genus et formam regina pecunia donat,
 Ac bene nummatum decorat Suadela Venusque.
 Mancipiis locuples eget aeris Cappadocum rex;
 Ne fueris hic tu. Chlamydes Lucullus, ut aiunt, 40
 Si posset centum scenae praebere rogatus,
 Qui possum tot? ait; tamen et quaeram, et quot habeo
 Mittam. Post paulo scribit, sibi millia quinque
 Esse domi chlamydum; partem, vel tolleret omnes.
 Exilis domus est, ubi non et multa supersunt, 45
 Et dominum fallunt, et prosunt furibus. Ergo
 Si res sola potest facere et servare beatum,
 Hoc primus repetas opus, hoc postremus omittas.
 Si fortunatum species et gratia praestat,
 Mercemur servum, qui dictet nomina, laevum 50
 Qui fodicet latus, et cogat trans pondera dextram
 Porrigere. Hic multum in Fabia valet, ille Velina;
 Cui libet is fasces dabit, eripietque curule
 Cui volet importunus ebur; Frater, Pater, adde;
 Ut cuique est aetas, ita quemque facetus adopta. 55
 Si, bene qui coenat, bene vivit: lucet, eamus

— v. 31. Sic Codd. recentiores et Edd. principes Bentleio teste, qui ipse ex optimis suis Codd. dedit *putes*, et; Fea ex suis Codd. et aliorum *putas*, et. Vid. Benth. et Fea. — v. 42. *quod habeo* Codd. Lambin. — v. 50. *saevum* pro *laevum* Codd. Torrentii et pleraeque Edd. vett. Cf. Fea. — v. 51. *fodicet* Benth. revocavit ex membranis vetustioribus; alii Codd. et plurimae Edd. vett. *fodiet* aut *fodiat*. Cf. Benth. et Fea. — v. 53. *is fasces* Benth. e suis Codd. quibus accedunt Feae. Olim plurimae Edd. *hic fasc.* Vid. Benth. et Iahn.

Quo ducit gula; piscemur, venemur; ut olim
 Gargilius, qui mane plagas, venabula, servos
 Differtum transire forum populumque iubebat,
 Unus ut e multis populo spectante referret 60
 Fantum mulus aprum. Crudi tumidique lavemur,
 Quid deceat, quid non, obliti, Caerite cera
 Digni, remigium viliosum Ithacensis Ulixci,
 Cui potior patria fuit interdicta voluptas.
 Si, Mimnermus uti censet, sine amore iocisque 65
 Nil est iucundum: vivas in amore iocisque.
 Vive, vale; si quid novisti rectius istis,
 Candidus imperti; si non, his utere mecum.

EPISTOLA VII.

AD MAECENATEM.

Est haec epistola ex iis Horatii carminibus, unde egregium
 eius ingenium, candor incorruptus et ingenua libertas non minus
 quam amicitiae et grati animi sensus inprimis eluceat. Maecenas
 enim, qui poetae consuetudine nunquam non admodum delecta-
 retur et invitus semper a se dimitteret, cum aliquando Horatius
 etsi pollicitus intra paucos dies se rediturum, diutius urbe abesset,
 id aegre tulisse et subiratus esse videtur. Iam igitur poeta hanc
 epistolam scripsit, qua et hanc absentiam excusaret et omnino
 libere eloqueretur, qua ratione ab maiori amico se tractari vellet.
 Primum certiorum ibi facit Maecenatem, se nonnisi sequentis
 anni tempore verno ob valetudinis periculum Romam posse reverti
 (v. 1—12.). Tum ubi lepide significavit, se probe intelligere, quanti
 generosus Maecenatis animus et in beneficiis largiendis humanitas
 facienda sit (v. 12—24), diserte aetatem suam proveciorem et
 incertam valetudinem excusat, quod omnino non amplius in
 urbe tam assidue se detineri pateretur (v. 25—28.); atque fabula
 (v. 29—34.) et narratiuncula (v. 46—94) significat, adeoque aperto
 profitetur (v. 34—39), se omnia quae Maecenati deberet, red-
 dere malle, quam liberum otii usum serviendo amittere. Cum
 hac epistola conferes Sat. I, 6. Od. III, 29, 53.

Quinque dies tibi pollicitus me rure futurum,
 Sextilem totum mendax desideror. Atqui
 Si me vivere vis, recteque videre valentem:
 Quam mihi das aegro, dabis aegrotare timenti,
 Maecenas, veniam, dum ficus prima calorque 5
 Designatorem decorat lictoribus atris,
 Dum pueris omnis pater et matercula pallet,
 Officiosaque sedulitas et opella forensis
 Adducit febres et testamenta resignat.
 Quod si bruma nives Albanis illinet agris, 10
 Ad mare descendet vates tuus, et sibi pareet,
 Contractusque leget; te, dulcis anice, reviset
 Cum Zephyris, si concedes, et hirundine prima.
 Non, quo more pyris vesei Calaber iubet hospes,
 Tu me fecisti locupletem. — Vescere sodes. — 15
 Iam satis est. — At tu quantumvis tolle. — Benigne. —
 Non invisa feres pueris munuscula parvis. —
 Tam teneor dono, quam si dimittar onustus. —
 Ut libet, haec porcis hodie comedenda relinquis. —
 Prodigus et stultus donat, quae spernit et odit. 20
 Haec seges ingratos tulit, et feret omnibus annis.
 Vir bonus et sapiens dignis ait esse paratus,
 Nec tamen ignorat quid distent aera lupinis.
 Dignum praestabo me etiam pro laude merentis.
 Quod si me noles usquam discedere, reddes 25
 Forte latus, nigros angusta fronte capillos,
 Reddes dulce loqui, reddes ridere decorum, et
 Inter vina fugam Cinarae moerere protervae.
 Forte per angustam tenuis nitedula rimam
 Repserat in cumeram frumenti, pastaque rursus 30

VII, v. 13. Alii Codd. et Edd. quas Fea laudat *concedis* aut *concedas*. — v. 19. *relinquas* et *relinques* Edd. aliquot vet. Vid. Fea. — v. 22. *paratus* cum Cruquio revocavit ex optimis Codd. Bentleius, quem Vid. Plurimae Edd. veteres *paratum*. — v. 29. Omnes Codd. et vet. Edd. *vulpecula*, quod omnibus assentientibus mutavit in *nitedula* Benth. quem Vid. — v. 30. *camerum* Codd. plures Feae Cf. Benth. ad antecedentem versum.

Ire foras pleno tendebat corpore frustra.
 Cui mustela procul, Si vis, ait, effugere istinc,
 Macra cavum repetes arctum, quem macra subisti.
 Hae ego si compellor imagine, cuncta resigno.
 Nec somnum plebis laudo, satur altitium, nec 35
 Otia divitiis Arabum liberrima muto.
 Saepe verecundum laudasti; Rexque Paterque
 Audisti coram, nec verbo parcus absens.
 Inspice, si possum donata reponere laetus.
 Haud male Telemachus, proles patientis Ulixei: 40
 Non est aptus equis Ithace locus, ut neque planis
 Porrectus spatiis, neque multae prodigus herbae:
 Atride, magis apta tibi tua dona relinquam.
 Parvum parva decent. Mihi iam non regia Roma,
 Sed vacuum Tibur placet, aut imbelles Tarentum. 45
 Strenuus et fortis, causisque Philippus agendis
 Clarus, ab officiis octavam circiter horam
 Dum redit, atque Foro nimium distare Carinas
 Iam grandis natu queritur, conspexit, ut aiunt,
 Adrasum quendam vacua tonsoris in umbra, 50
 Cultello proprios purgantem leniter unguis.
 Demetri, (puer hic non laeve iussa Philippi
 Accipiebat,) abi, quaere et refer, unde domo; quis;
 Cuius fortunae; quo sit patre quove patrono.
 It, redit, et narrat: Vulteium nomine Menam, 55
 Praeconem, tenui censu, sine crimine notum;
 Et properare loco et cessare, et quaerere et uti,
 Gaudentem parvisque sodalibus, et lare certo,
 Et ludis, et post decisa negotia Campo.
 Scitari libet ex ipso quaecunque refers die 60
 Ad coenam veniat. Non sane credere Mena;
 Mirari secum tacitus. Quid multa? Benigne,

— v. 41. *Ithace* Benth. e Porphyryone. Olim vulg. *Ithacae*. Cf. Benth. — v. 50. *Abrasum* Fea e Codd. suis et pluribus Edd. vetustis. Cf. Gesner. — v. 56. *natum* Benth. ex duobus Codd. — v. 58. *lare curto* Benth. e duobus Codd. Cruq.

Respondet. — Neget ille mihi? — Negat improbus, et
te

Negligit aut horret. — Vulteiū mane Philippus
Vilia vendentem tunicato scruta popello 65
Occupat, et salvere iubet prior. Ille Philippo
Excusare laborem et mercenaria vincla,
Quod non mane domum venisset; denique, quod non
Providisset eum. — Sic ignovisse putato
Me tibi, si coenas hodie mecum. — Ut libet. — Ergo 70
Post nonam venies; nunc i, rem strenuus auge.
Ut ventum ad coenam est, dicenda tacenda locutus,
Tandem dormitum dimittitur. Hic ubi saepe
Occultum visus decurrere piscis ad hamum,
Mane cliens et iam certus conviva, iubetur 75
Rura suburbana indictis comes ire Latinis.
Impositus mannis arvum coelumque Sabinum
Non cessat laudare. Videt ridetque Philippus,
Et sibi dum requiem, dum risus undique quaerit,
Dum septem donat sestertia, mutua septem 80
Promittit, persuadet uti mercetur agellum.
Mercatur. Ne te longis ambagibus ultra
Quam satis est morer, ex nitido fit rusticus, atque
Sulcos et vineta crepat mera, praeparat ulmos,
Immoritur studiis, et amore senescit habendi. 85
Verum ubi oves furto, morbo periere capellae,
Spem mentita seges, bos est enectus arando:
Offensus damnis, media de nocte caballum
Arripit, iratusque Philippi tendit ad aedes.
Quem simul adspexit scabrum intonsumque Philippus, 90
Durus, ait, Vultei, nimis attentusque videris
Esse mihi. Pol, me miserum, patrone, vocares,
Si velles, inquit, verum mihi ponere nomen.
Quod te per Genium dextramque Deosque Penates

— v. 63. *neget* Benth. ex optimis suis Codd. Olim vulg. *negat*
quod servat Fea. — v. 69. *praevidisset* Ed. Glarean. Cf. Gesner.
— v. 93. *dicere nomen* Ed. Ven. et Glarean. aliae Cf. Fea. —

Obsecro et obtestor, vitae me redde priori. 95
 Qui semel adspexit, quantum dimissa petitis
 Praestent, mature redeat repetatque relicta.
 Metiri se quemque suo modulo ac pede verum est.

EPISTOLA VIII.

AD CELSUM ALBINOVANUM.

Certiolem facit Celsum Albinovanum comitibus Tiberii adscriptum (Cf. Epist. I, 3.), quomodo se habeat, et invicem quid ipse agat ex eo quaerit; postremum qua ratione se gerere debeat brevi admonitione significat.

Celso gaudere et bene rem gerere Albinovano,
 Musa rogata refer, comiti scribaeque Neronis.
 Si quaeret quid agam, dic, multa et pulchra minantem
 Vivere nec recte nec suaviter; haud quia grando
 Contuderit vites, oleamve momorderit aestus, 5
 Nec quia longinquis armentum aegrotet in agris,
 Sed quia mente minus validus quam corpore toto
 Nil audire velim, nil discere, quod levet aegrum,
 Fidis offenderar medicis, irascar amicis,
 Cur me funesto properent arcere velerno; 10
 Quae nocuere sequar, fugiam quae profore credam,
 Romae Tibur amem, ventosus Tibure Romam.
 Post haec, ut valeat, quo pacto rem gerat et se,
 Ut placeat iuveni, percontare, utque cohorti.
 Si dicet, Recte: primum gaudere, subinde 15
 Praeceptum auriculis hoc instillare memento:
 Ut tu fortunam, sic nos te, Celse, feremus.

— v. 96. *semel* restituit Benth. e Codd. aliquot; olim vulg. *simul*.

VIII, v. 5. *oleamque* a Benthio e Cod. in *oleamve* mutatum denuo tuetur Iahn. quem Cf. — v. 12. *venturus Tibure* plures Codd. Cruquii, Benthii, Feae. Vid. Benth. et Iahn.

Cense EPISTOLA IX.

AD CLAUDIUM NERONEM.

Elegantissimo epistolio perquam callide conscripto Septimium commendat.

Septimius, Claudii, nimirum intelligit unus,
 Quanti me facias. Nam quum rogat et prece cogit,
 Scilicet ut tibi se laudare et tradere coner,
 Dignum mente domoque legentis honesta Neronis;
 Munere quum fungi propioris censet amici: 5
 Quid possim videt ac novit me valdius ipso,
 Multa quidem dixi, cur excusatus abirem:
 Sed timui, mea ne finxisse minora putarer,
 Dissimulator opis propriae, mihi commodus uni.
 Sic ego, maioris fugiens opprobria culpaе, 10
 Frontis ad urbanae descendi praemia. Quod si
 Depositum laudas ob amici iussa pudorem,
 Scribe tui gregis hunc, et fortem crede bonumque.

EPISTOLA X.

AD FUSCUM ARISTUM.

Amico urbis amantiori vitae rusticae amoenitates, commoda, et, quae inde peti possit, animi tranquillitatem commendat. Cf. Sat. II, 6. Epist. I, 14.

Urbis amatorem Fuscum salvere iubemus
 Ruris amatores, hac in re scilicet una
 Multum dissimiles, at cetera paene gemelli,

IX, v. 2. *nam me rogat* Fea e duobus Codd. et Edd. vett. Ibidem Bothius ita coniungit *et prece cogit Scilicet*, Vid. Annotatt. coll. Iahn.

X, v. 3. *at cetera*, ex pluribus Codd. Benth. Olim vulg. *ad cetera*, quod denuo etiam suis Codd. confirmatum revocavit Fea, quem sequuntur Doering. et Iahn. *ob cetera* Ed. Zarott. Med. 1777.

Fraternis animis, quidquid negat alter, et alter,
 Annuimus pariter vetuli notique columbi. 5
 Tu nidum servas, ego laudo ruris amoeni
 Rivos, et musco circumlita saxa, nemusque.
 Quid quaeris? vivo et regno, simul ista reliqui,
 Quae vos ad coelum effertis rumore secundo;
 Utque sacerdotis fugitivus, liba recuso; 10
 Pane egeo iam mellitis potiore placentis.
 Vivere naturae si convenienter oportet,
 Ponendaeque domo quaerenda est area primum:
 Novistine locum potiore rure beato?
 Est ubi plus tepeant hiemes? ubi gratior aura 15
 Leniat et rabiem Canis, et momenta Leonis,
 Quum semel accepit solem furibundus acutum?
 Est ubi divellat somnos minus invida cura?
 Deterius Libycis olet aut nitet herba, lapillis?
 Purior in vicis aqua tendit rumpere plumbum, 20
 Quam quae per pronum trepidat cum murmure rivum?
 Nempe inter varias nutritur silva columnas,
 Laudaturque domus, longos quae prospicit agros.
 Naturam expelles furca, tamen usque recurret,
 Et mala perrumpet furtim fastidia victrix. 25
 Non, qui Sidonio contendere callidus ostro
 Nescit Aquinatam potentia vellera fucum,
 Certius accipiet damnum propiusve medullis,
 Quam qui non poterit vero distinguere falsum.
 Quem res plus nimio delectavere secundae, 30
 Mutatae quatient. Si quid mirabere, pones
 Invitus. Fuge magna; licet sub paupere tecto
 Reges et regum vita praecurrere amicos.

— v. 18. *depellat* Fea. e multis suis et aliorum Codicibus. Sed Cf. Torrent. — v. 19. *tapetis* pro *lapillis* coniecit Bentl. Cf. Fea.
 — v. 24. *expelles* Bentl. ex antiquissimis Edd. et longe plurimis Codd. Vulg. *expellat* etiam a Fea servatum. Cf. utrumque.
 — v. 25. *vestigia* Med. 1477. *fastigia* Codd. Cruq. Bos. Sax. Feae, idque Torrentius tuetur. — v. 27. Codices variant: *fucum*, *succum*, *sucum*. Vid. Fea. — v. 30. *plus aequo* Collatio Sax.

Cervus equum pugna melior communibus herbis
 Pellebat, donec minor in certamine longo 35
 Imploravit opes hominis, frenumque recepit.
 Sed postquam victor violens discessit ab hoste,
 Non equitem dorso, non frenum depulit ore.
 Sic, qui pauperiem veritus, potiore metallis
 Libertate caret, dominum vehet improbus, atque 40
 Serviet aeternum, quia parvo nesciet uti.
 Cui non conveniet sua res, ut calceus olim,
 Si pede maior erit, subvertet; si minor, uret.
 Laetus sorte tua vives sapienter, Aristi;
 Nec me dimittes incastigatum, ubi plura 45
 Cogere, quam satis est, ac non cessare videbor.
 Imperat aut servit collecta pecunia cuique
 Tortum digna sequi potius quam ducere funem.
 Haec tibi dictabam post fanum putre Vacunae,
 Excepto quod non simul esses, cetera laetus. 50

EPISTOLA XI.

AD BULLATIUM.

Bullatium curarum abigendarum causa, ut videtur, peregrinantem de itinere instituto percontatur, addit aurea praecepta de animi tranquillitate et felicitate non foris sed intus ratione et prudentia quaerenda.

Quid tibi visa Chios, Bullati, notaque Lesbos?
 Quid concinna Samos? quid Croesi regia Sardis?
 Smyrna quid, et Colophon? maiora minorane fama?
 Cunctane prae Campo et Tiberino flumine sordent?
 An venit in votum Attalicis ex urbibus una? 5

— v. 37. *violens victo* Coll. Sax. itemque Bentl. e coniectura; *postq. victor victo discessit* Editio Epistol. Horat. Cadomensis 1480. Cf. Bentl. et Fea. — v. 40. *vehit* Bentl. e Codd. Cf. Doering. — v. 41. *nesciat* Lambin. e Codd. *nesciit* Bothio in Annotatt. rectius videtur Cf. Iahn.

XI, v. 3. *minorave* Codd. aliquot Cruq. et Torrent.

An Lebedum laudas, odio maris atque viarum?
 Scis, Lebedus quid sit; Gabiis desertior atque
 Fidenis vicus: tamen illic vivere vellem,
 Oblitusque meorum, obliviscendus et illis,
 Neptunum procul e terra spectare furem. 10
 Sed neque qui Capua Romam petit, imbre lutoque
 Adpersus, volet in canpona vivere, nec qui
 Frigus collegit, furnos et balnea laudat,
 Ut fortunatam plene praestantia vitam.
 Nec, si te validus iactaverit Auster in alto, 15
 Ideirco navem trans Aegaeum mare vendas.
 Incolumi Rhodos et Mitylene pulchra facit, quod
 Paenula solstitio, campestre nivalibus auris,
 Per brumam Tiberis, Sextili mense caminus.
 Dum licet, ac vultum servat Fortuna benignum, 20
 Romae laudetur Samos et Chios et Rhodos absens.
 Tu, quamcunque Deus tibi fortunaverit horam,
 Grata sume manu, neu dulcia differ in annum,
 Ut, quocunque loco fueris, vixisse libenter
 Te dicas. Nam si ratio et prudentia curas, 25
 Non locus effusi late maris arbiter, aufert:
 Coelum, non animum mutant, qui trans mare currunt.
 Sternua nos exercet inertia; navibus atque
 Quadrigis petimus bene vivere. Quod petis, hic est,
 Est Ulubris, animus si te non deficit aequus. 30

 EPISTOLA XII.

A D I C C I U M.

Iccium, hominem avarum et de sorte sua querulum, etsi philosophiae studium affectaret, satis libere ut iam iis quae habeat contentus vivat hortatur; deinde Grosphum ei commendat; postremum de rebus in urbe actis certiore facit. De Iccio Cf. Od. I, 29.

— v. 18. *nivalibus austris* Collat. Sax. et Feac aliquot Codd. —
 v. 23. *neu dulc.* Benth. e Codd. restituit Vulg. *nec.*

Fructibus Agrippae Siculis, quos colligis, Icci,
 Si recte frueris, non est ut copia maior
 Ab Iove donari possit tibi. Tolle querelas;
 Pauper enim non est, cui rerum suppetit usus.
 Si ventri bene, si lateri est pedibusque tuis, nil 5
 Divitiae poterunt regales addere maius.
 Si forte in medio positorum abstemius herbis
 Vivis et urtica: sic vives protinus, ut te
 Confestim liquidus Fortunae rivus inauret;
 Vel quia naturam mutare pecunia nescit, 10
 Vel quia cuncta putas una virtute minora.
 Miramur si Democriti pecus edit agellos
 Cultaque, dum peregre est animus sine corpore velox:
 Quum tu inter scabiem tantam et contagia lucri
 Nil parvum sapias, et adhuc sublimia cures; 15
 Quae mare compescant causae; quid temperet annum;
 Stellae sponte sua, iussaene vagentur et errent;
 Quid premat obscurum Lunae, quid proferat orbem;
 Quid velit et possit rerum concordia discors;
 Empedocles, an Stertinium deliret acumen? 20
 Verum seu pisces, seu porrum et caepe trucidas,
 Utere Pompeio Grospho; et, si quid petet, ultro
 Defer; nil Grosphus nisi verum orabit et aequum.
 Vilis amicorum est annona, bonis ubi quid deest.
 Ne tamen ignores, quo sit Romana loco res: 25
 Cantaber Agrippae, Claudii virtute Neronis
 Armenius cecidit, ius imperiumque Phraates
 Caesaris accepit genibus minor: aurea fruges
 Italiae pleno defundit Copia cornu.

XII, v. 8. *sic vivis* Cod. Feae probante Both. Annotatt. —
 v. 20. *Stertini* Ed. Glarean. Cf. Fea et Both. Annotatt. — v. 22.
petet ultro, *Defer* Marklandius interpungit Cf. Both. — v. 27.
Phraates Both. e Codd. Torrent. *Tigranes* pro *Phraates* con-
 Bentl. infra ad Epist. XVIII, v. 56. — v. 29. Codd. varie: *dis-*
fundit, *diffundit*, *defudit*, *defundit*. Vid. Bentl. et Fea.

EPISTOLA XIII.

AD VINIUM ASELLAM.

Vinio Asellae tabellario, et, ut Wielandio videtur, rustico Sabino, cui carminum volumina ad Augustum perferenda tradiderat, iocose praecepit, quomodo satis belle et urbane hoc munere sibi mandato fungatur.

Ut proficiscentem docui te saepe diuque,
 Augusto reddes signata volumina, Vini,
 Si validus, si laetus erit, si denique poscet;
 Ne studio nostri pecces, odiumque libellis
 Sedulus importes, opera vehemente minister. 5
 Si te forte meae gravis uret sarcina chartae,
 Abiicito potius, quam quo perferre iuberis
 Clitellas ferus impingas, Asinaeque paternum
 Cognomen vertas in risum, et fabula fias.
 Viribus uteris per clivos, flumina, lamas. 10
 Victor propositi simul ac perveneris illuc,
 Sic positum servabis onus, ne forte sub ala
 Fasciculum portes librorum, ut rusticus agnum;
 Ut vinosa glomus furtivae Pyrrhia lanac;
 Ut cum pileolo soleas conviva tribulis. 15
 Ne vulgo narres te sudavisse ferendo
 Carmina, quae possint oculos auresque morari
 Caesaris; oratus multa prece, nitere porro.
 Vade, vale, cave ne titubes mandataque frangas.

EPISTOLA XIV.

AD VILLICUM SUUM.

Villicum suum, rei rusticae pertaesum, vitae rusticae commoda cum urbana vita comparatae docet. Sed vix credideris hanc epis-

XIII, v. 2. Olim plurimae Edd. *Vinni*, male. Vid. Bentl. — v. 14. Codices varie: *glomus*, *globos*, *glomus* unus Fabricii *glomen*. Vid. Bentl. et Fea. — v. 16. *Neu* ex uno suo Cod. Bentl.

tolam vere ad villicum scriptam esse, ut potius Horatius hoc commento ad ruris et urbis comparationem instituendam usus esse videatur.

Villice silvarum et mihi me reddentis agelli,
 Quem tu fastidis, habitatum quinque focis, et
 Quinque bonos solitum Variam dimittere patres,
 Certemus, spinas animone ego fortius, an tu
 Evellas agro, et melior sit Horatius an res. 5
 Me quamvis Lamiae pietas et cura moratur,
 Fratrem moerentis, rapto de fratre dolentis
 Insolabiliter: tamen istue mens animusque
 Fert, et amat spatiis obstantia rumpere claustra.
 Rure ego viventem, tu dicis in urbe beatum. 10
 Cui placet alterius, sua nimirum est odio sors.
 Stultus uterque locum immeritum causatur inique;
 In culpa est animus, qui se non effugit unquam.
 Tu mediastinus tacita prece rura petebas,
 Nunc urbem et ludos et balnea villicus optas. 15
 Me constare mihi scis, et discedere tristem,
 Quandocunque trahunt invisae negotia Romam.
 Non eadem miramur; eo disconvenit inter
 Meque et te; nam, quae deserta et inhospita tesqua
 Credis, amoena vocat mecum qui sentit, et odit 20
 Quae tu pulchra putas. Fornix tibi et uncta popina
 Incutiunt urbis desiderium, video, et quod
 Angulus iste feret piper et thus ocus uva,
 Nec vicina subest vinum praebere taberna
 Quae possit tibi, nec meretrix tibicina, cuius 25
 Ad strepitum salias terrae gravis: et tamen urges
 Iampridem non tacta ligonibus arva, bovemque
 Disiunctum curas, et strictis frondibus explēs.

XIV, v. 1. *mihi me reddentis* Cod. Barthii. Sed Vid. Benth. — v. 2. *an rus* coni. Dan. Heins. Cf. Benth. — v. 6. *moretur* Cod. Lambini, Feae, aliorum. — v. 7. *mirantis* pro *moerentis*, coni. Both. — v. 9. *avet* pro *amat* Benth. dedit coniectura. — v. 28. *deiunctum* Lambin. ex quatuor Codd.

Addit opus pigro rivus, si decidit imber,
 Multa mole docendus aprico parcere prato. 30
 Nunc, age, quid nostrum concentum dividat, audi.
 Quem tennes decuere togae nitidique capilli,
 Quem scis^a immunem Cinarae placuisse rapaci,
 Quem bibulum liquidi media de luce Falerni,
 Coena brevis invat, et prope rivum somnus in herba; 35
 Nec luisse pudet, sed non incidere ludum.
 Non istic obliquo oculo mea commoda quisquam
 Limat; non odio obscuro morsuque venenat:
 Rident vicini glebas et saxa moventem.
 Cum servis urbana diaria rodere mavis; 40
 Horum tu in numerum voto ruis. Invidet usum
 Lignorum et pecoris tibi calo argutus, et horti.
 Optat ephippia bos piger, optat arare caballus.
 Quam scit uterque, libens, censebo, exerceat artem.

EPISTOLA XV.

AD NUMONIUM VALAM.

Horatius Baiis, ubi valetudinis causa commorabatur, Veliam
 et Salernum iturus, ex amico de utriusque regionis coelo, co-
 pia, aqua, curiose quaerit, cum ibi genio indulgere et cutem
 bene curare sibi proposuisset. (*Vers. 1 — 25.*) Atque cum alias
 tenuem victum semper commendare et in villa sua etiam usur-
 pare soleret, se ispe ridet, qui nunc has delicias captet. (*Vers.*
26 usque ad fin.)

Quae sit hiems Veliae, quod coelum, Vala Salerni,
 Quorum hominum regio, et qualis via; (nam mihi Baias
 Musa supervacuas Antonius, et tamen illis
 Me facit invisum, gelida quum perluor unda

— v. 34. Hunc versum post vers. 32 collocandum censet Both.
 Cf. Iahn. — v. 43. *bos, piger* interpungit Benth. Cf. Fea.

XV, v. 4. *pervehor unda* Codd. duo Torrent. Cf. Fea.

Per medium frigus. Sane murteta relinqui, 5
 Dictaque cessantem nervis elidere morbum
 Sulfura contemni, vicus gemit, invidus aegris,
 Qui caput et stomachum supponere fontibus audent
 Clusinis, Gabiosque petunt et frigida rura.
 Mutandus locus est, et deversoria nota 10
 Praeteragendus equus. Quo tendis? non mihi Cumas.
 Est iter aut Baias, laeva stomachosus habena
 Dicet eques: sed equis frenato est auris in ore;)
 Maior utrum populum frumenti copia pascat;
 Collectosne bibant imbres, puteosne perennes 15
 Duleis aquae; (nam vina nihil moror illius orae.
 Rure meo possum quidvis perferre patique:
 Ad mare quum veni, generosum et lene requiro,
 Quod curas abigat, quod cum spe divite manet
 In venas animumque meum, quod verba ministret, 20
 Quod me Lucanae iuvenem commendet amicae;)
 Tractus uter plures lepores, uter educet apros;
 Utra magis pisces et echinos aequora celent,
 Pinguis ut inde domum possim Phaeaxque reverti;
 Scribere te nobis, tibi nos accredere, par est. 25
 Maenius, ut rebus maternis atque paternis
 Fortiter absuntis urbanus coepit haberi,
 Scurra vagus, non qui certum praesepe teneret,
 Impransus non qui civem dignoseeret hoste,
 Quaelibet in quemvis opprobria fingere saevus, 30
 Pernicies et tempestas barathrumque macelli,
 Quidquid quaesierat, ventri donabat avaro.
 Hic, ubi nequitiae fautoribus et timidis nil

— v. 5. *murteta* vetustiores Codd. Vid. Bentl. — v. 12. *stoma-*
chatus Codd. aliquot Feae, quem Cf. — v. 13. *equis* Bentl. et
 Fea e Codd. suis. Vulg. *equi*. — v. 16. *iugis aquae* Edd. vet.
 Sed Codd. partim *iugis* partim *duleis*. Vid. Fea. — v. 17. *quod-*
vis coni. Heinsius. Sed Cf. Bentl. — v. 30. *opprobria stringere*
 coni. Heins. Sed Cf. Bentl. — v. 32. *donarat* plures Codd. Bentl.
 Feae, aliorum. *donaret* Editio Cadomensis 1480 et Bentl. coni-
 ectura.

Aut paulum abstulerat, patinas coenabat omasi
 Vilis et agninae, tribus ursis quod satis esset; 35
 Scilicet ut ventres lamna candente nepotum
 Diceret urendos, corrector Bestius. Idem
 Quidquid erat nactus praedae maioris, ubi omne
 Verterat in fumum et cinerem, Non hercule miror,
 Aiebat, si qui comedunt bona, quum sit obeso 40
 Nil melius turdo, nil vulva pulchrius ampla.
 Nimirum hic ego sum: nam tuta et parvula laudo,
 Quum res deficiunt, satis inter vilia fortis;
 Verum, ubi quid melius contingit et unctius, idem
 Vos sapere et solos aio bene vivere, quorum 45
 Conspicitur nitidis fundata pecunia villis.

 EPISTOLA XVI.

AD QUINCTIUM.

Videtur epistola esse responsoria. Horatius enim, quem Quinctius Hirpinus, ut e primis epistolae versibus conicere licet, paulo curiosius de villae suae redditibus interrogasset, de hac quidem re nihil respondet, sed formam et situm villae describit (*Vers. 1 — 17*); deinde praecepta verae virtutis subiungit, neque ex rumore vulgi pendentis, neque in externa quadam actionum specie positae, sed in pectoris penetralibus a viro vere honesto, vere sapiente bonoque colendae. (*Vers. 18 usque ad fin.*). Addidit autem haec quidem praecepta, sive ut omnino hac opportunitate uteretur cum amico de re gravissima colloquendi, sive quod Quinctius Hirpinus fortasse hoc ipso vitio laboraret, ut videri bonus quam esse mallet.

Ne perconteris, fundus meus, optime Quincti,
 Arvo pascat herum, an baccis opulentet olivae,

— v. 34. Comma post *omasi* delevimus cum Bothio, quem Cf.
 — v. 35. *agnini* multi Codd. Vid. Fea. — v. 37. Edd. vett. et Codd. aliquot *correptus Bestius*; sed plures et meliores *correctus*. Bentleius ex uno Cod. Lambini *corrector*. Fea locum ita constituit: *Scilicet, ut ventres lamna candente nepotum Diceret urendos, correptus*. Bestius etc. Vid. Bentr. Both. Iahn. — v. 38. *Siquid erat* Bentr. e Codd. Torent.

Pomisne, an pratis, an amicta vitibus ulmo:
 Scribetur tibi forma loquaciter, et situs agri.
 Continui montes, nisi dissocientur opaca 5
 Valle; sed ut veniens dextrum latus adspiciat Sol,
 Laevum discedens curru fugiente vaporet.
 Temperiem laudes. Quid, si rubicunda benigni
 Corna vepres et pruna ferunt? si quercus et ilex
 Multa fruge pecus, multa dominum iuvat umbra? 10
 Dicas adductum propius frondere Tarentum.
 Fons etiam rivo dare nomen idoneus, ut nec
 Frigidior Thracam nec purior ambiat Hebrus,
 Infirmo capiti fluit utilis, utilis alvo.
 Hae latebrae dulces, et iam, si credis, amoenae, 15
 Incolumem tibi me praestant Septembribus horis.
 Tu recte vivis, si curas esse quod audis;
 Iactamus iampridem omnis te Roma beatum.
 Sed vereor, ne cui de te plus, quam tibi credas,
 Neve putes alium sapiente bonoque beatum, 20
 Neu, si te populus sanum recteque valentem
 Dictitet, occuitam febrem sub tempus edendi
 Dissimules, donec manibus tremor incidat unctis.
 Stultorum incurata pudor malus ulcera celat.
 Si quis bella tibi terra pugnata marique 25
 Dicat, et his verbis vacuas permulceat aures:
 Tene magis salvum populus velit, an populum tu,
 Servet in ambiguo, qui consulit et tibi et urbi,
 Iupiter: Augusti laudes agnoscere possis.

XVI, v. 3. *Pomisve* tres Codd. Martin. Silv. et Blandin. *po-*
misque coni. Both. in Annotatt. — *an pratis* e Codd. restituit
 Bentl. quem Vid. cum olim plurimae Edd. vulgassent *et pratis*.
 — v. 7. Ita plerique Codd. et vett. Edd. Alii Codd. quos enu-
 merat Fea *descendens*. Bentleius coniectura *decedens*. Cf. Bentl.
 et Fea. — v. 9. *ferunt* emendavit Bentl. quem Vid. Codd. et
 Edd. vett. *ferant*, et aliquot Feae *ferent*. — v. 10. *iuvat* Codd.
 aliquot Pulmann. Bentl. Feae; reliqui *iuvet*. — v. 14. *fluit aptus*,
et utilis Fea e multis Codd. et vett. Edd. Sequitur Iahn. — v. 15.
et (iam si credis) Bentl. — v. 30. *Cum cupias* Cod. Bos. Gotting.
 Collat. Sax.

Quum pateris sapiens emendatusque vocari, 30
 Respondesne tuo, dic sodes, nomine? — Nempe
 Vir bonus et prudens dici delector ego ac tu. —
 Qui dedit hoc hodie, cras, si volet, auferet; ut si
 Detulerit fasces indigno, detrahet idem.
 Pone, meum est, inquit; pono, tristisque recedo. 35
 Idem si clamet furem, neget esse pudicum,
 Contendat laqueo collum pressisse paternum:
 Mordear opprobriis falsis, mutemque colorem?
 Falsus honor iuvat, et mendax infamia terret,
 Quem, nisi mendosum et medicandum? Vir bonus est
 quis? — 40
 Qui consulta patrum, qui leges inraque servat;
 Quo multae magnaeque secantur iudice lites;
 Quo res sponsore, et quo causae teste tenentur. —
 Sed videt hunc omnis domus et vicinia tota
 Introrsus turpem, speciosum pelle decora. 45
 Nec furtum feci, nec fugi, si mihi dicat
 Servus: Habes pretium, loris non ureris, aio. —
 Non hominem occidi. — Non pasces in eruce corvos. —
 Sum bonus et frugi. — Renuit negitatque Sabellus.
 Cautus enim metuit foveam lupus, accipiterque 50
 Suspectos laqueos, et opertum miluus hamum.
 Oderunt peccare boni virtutis amore:
 Tu nihil admittes in te formidine poenae;
 Sit spes fallendi, miscebis sacra profanis.
 Nam de mille fabae modiis quum surripis unum, 55
 Damnum est, non facinus mihi pacto lenius isto.
 Vir bonus, omne forum quem spectat et omne tribunal,
 Quandocunque Deos vel porco vel bove placat,
 Iane pater, clare, clare quum dixit, Apollo:

— v. 38. Signum interrogandi tollit Bentr. quem Cf. — v. 40. *medicandum* e plurimis Codd. restituit Bentrleius, quibus accedunt Codd. Feae. In vet. Edd. vulgo *mendacem*. — v. 43. Ita Bentr. e Codice uno Blandinio; olim vulgo *Quo responsore*. Vid. Bentr. et Fea. — v. 46. *dicit* Bentr. e Codd. quem Cf.

Labra movet metuens audiri: Pulehra Laverna, 60
 Da mihi fallere, da iusto sanctoque videri;
 Noctem peccatis, et fraudibus obſice nubem.
 Quî melior ſervo, quî liberior ſit avarus,
 In triviis fixum quum ſe demittit ob aſſem,
 Non video. Nam qui cupiet, metuet quoque; porro 65
 Qui metuens vivet, liber mihi non erit unquam.
 Perdidit arma, locum virtutis deſeruit, qui
 Semper in augenda feſtinat et obruitur re.
 Vendere quum poſſis captivum, occidere noli;
 Serviet utiliter: ſine pascat durus, aretque; 70
 Naviget ac mediis hiemet mercator in undis;
 Annonae proſit; portet frumenta penusque.
 Vir bonus et ſapiens audebit dicere: Pentheu,
 Rector Thebarum, quid me perferre patique
 Indignum coges? — Adimam bona. — Nempe pecus,
 rem, 75
 Lectos, argentum; tollas licet. — In manicis et
 Compedibus ſaevo te ſub custode tenebo. —
 Ipſe Deu, ſimul atque volam, me ſolveth. — Opinor,
 Hoc ſentit: Moriar; mors ultima linea rerum eſt.

EPISTOLA XVII.

AD SCAEVAM.

Popolari rei publicae Romanae ſtatu vigente, honores, opes,
 totius denique vitae praefidia et ornamenta a liberi populi ſuf-
 fragiis erant petenda. Sed iam converſis rei publicae rationibus,
 haec omnia pauci divites cives aut potentia validi diſpensabant,
 atque adeo unus princeps. Qui igitur rem augere et laute vivere
 vellent, nec ipſi opibus valerent, ad eiſmodi maiores amicos ſe
 applicare ſolebant. Quod cum etiam Scaeva facere inſtituiſſet,

— v. 61. Ita Cruquius e Codd. Pleraque vett. Edd. *iuſtum ſanc-
 tumque*. Vid. Bentl. — v. 72. *penumque* Fea ex aliquot Codd.
 ſuis et Combii. Pleraque Edd. *penusque*. Vid. Fea.

Horatius cum eo de hoc genere consilia hac epistola communicat. Atque primum duplicem hanc vivendi rationem proponit, quarum utraque habeat quo se commendet, id est, liberum sed pauper otium et fructuosam principum amicitiam. (*Vers. 1 — 12.*) Deinde posterius hoc vitae genus quomodo salvo honore atque adeo cum decore aliquo sustineri possit, Aristippi exemplo ostendit. (*Vers. 13 — 42.*) Postremum monet amicum, ne ita peccet, ut plurimi ditiorum comites soleant, qui nimis rei augendae avidi importunis et impudentibus precibus pecuniam regibus suis extorquere non erubescant. (*Vers. 43 ad fin.*)

Quamvis, Scaeva, satis per te tibi consulis, et seīs
 Quo tandem pacto deceat maioribus uti,
 Disce, docendus adhuc quae censet amicus; ut si
 Caecus iter monstrare velit: tamen adspice, si quid
 Et nos, quod cures proprium fecisse, loquamur. 5
 Si te grata quies et primam somnus in horam
 Delectat; si te pulvis strepitusque rotarum,
 Si laedit caupona: Ferentinum ire iubebo.
 Nam neque divilibus contingunt gaudia solis,
 Nec vixit male, qui natus moriensque fefellit. 10
 Si prodesse tuis pauloque benignius ipsum
 Te tractare voles, accedes siccus ad unctum. —
 Si pranderet olus patienter, regibus uti
 Nollet Aristippus. — Si sciret regibus uti,
 Fastidiret olus, qui me notat. — Utrius horum 15
 Verba probes et facta, doce, vel iunior audi,
 Cur sit Aristippi potior sententia. Namque
 Mordacem Cynicum sic eludebat, ut aiunt:
 Scurror ego ipse mihi, populo tu: rectius hoc et
 Splendidius multo est. Equus ut me portet, alat rex, 20,
 Officium facio: tu poseis vilia rerum

XVII, v. 2. *liceat* pro *deceat* Codd. aliquot Feae. — v. 3. De interpunctione Cf. Benth. — v. 8. *laedat* Codd. aliquot Feae; *laedet* Codd. Torrent. — v. 18. *illudebat* Schol. Cruq. — v. 19. Bothius locum ita interpungit in Annotat. ut post *populo tu* punctum ponat, itemque post *rex*. Sed Cf. Iahn. — v. 21. Ita Lambinus dedit e Codd. cumque omnes fere sequuntur. Sed Fea lectionem aliorum Codd. et omnium fere ante Lambinum Editionum revocavit: *vilis: verum es*. Sed Cf. Both. Annotatt.

Dante minor, quamvis fers te nullius egentem.
 Omnis Aristippum decuit color et status et res,
 Tentantem maiora, fere praesentibus aequum.
 Contra, quem duplici panno patientia velat, 25
 Mirabor, vitae via si conversa decebit.
 Alter purpureum non expectabit amictum,
 Quidlibet indutus celeberrima per loca vadet,
 Personamque feret non inconcinuus utramque:
 Alter Mileti textam cane peius et angui 30
 Vitabit chlamydem; morietur frigore, si non
 Retuleris pannum: refer, et sine vivat ineptus.
 Res gerere et captos ostendere civibus hostes
 Attingit solium Iovis et coelestia tentat.
 Principibus placuisse viris non ultima laus est. 35
 Non cuivis homini contingit adire Corinthum.
 Sedit, qui timuit ne non succederet: esto:
 Quid, qui pervenit, fecitne viriliter? Atqui
 Hic est aut nusquam, quod quaerimus: hic onus horret,
 Ut parvis animis et parvo corpore maius; 40
 Hic subit et perfert. Aut virtus nomen inane est,
 Aut decus et pretium recte petit experiens vir.
 Coram rege sua de paupertate tacentes
 Plus poscente ferent. Distat, sumasne pudenter,
 An rapias: atqui rerum caput hoc erat, hic fons. 45
 Indotata mihi soror est, paupercula mater,
 Et fundus nec vendibilis nec pascere firmus,
 Qui dicit, clamat: Victum date. Succinit alter,
 Et mihi dividuo findetur munere quadra.
 Sed tacitus pasci si posset corvus, haberet 50
 Plus dapis et rixae multo minus invidiaeque.
 Brundisium comes aut Surrentum ductus amoenum,
 Qui queritur salebras et acerbum frigus et imbres,

— v. 30. *angui* restituit Benth. e Codd. quem Vid. Vulg. *angue*.
 — v. 43. *sua* Benth. ex uno Cod. cui accedit Cod. Fcae et Val-
 lart. Vulg. *suo*, quod tuctur Fca. — v. 49. *quadrans* Tres Codd.
 Pulman. Cruq. Comb.

Aut cistam effractam aut subducta viatica plorat,
 Nota refert meretricis acumina, saepe catellam, 55
 Saepe periscelidem raptam sibi flentis; uti mox
 Nulla fides damnis verisque doloribus adsit.
 Nec semel irrisus triviis attollere curat
 Fracto crure planum; licet illi plurima manet
 Lacrima; per sanctum iuratus dicat Osirin, 60
 Credite, non ludo; crudeles tollite claudum! —
 Quaere peregrinum, vicinia rauca reclamat.

EPISTOLA XVIII.

AD LOLLIVM.

Est huius epistolae ad Lollium (de quo Cf. Od. IV, 9. Epist. I. 2.) idem fere quod proxime praecedentis argumentum. Nam hic quoque disputat de ratione, quae in potentiorum amicorum usu sequenda sit, cum omnino omnibus, tum praecipue Lollio, qui ad Tiberium se applicuerat. Monet igitur amicum, ut viam teneat inter scurrilem assentationem et nimiam asperitatem mediam (*vers. 1 — 20*); deinde ut a pravis moribus sibi caveat, quos divites ut ipsi non reformident, ita in minoribus amicis reprehendant (*vers. 21 — 36*); ut arcana amici ne scrutetur (*vers. 37*); ut studiis maioris amici aliquantum cedat (*v. 39 — 66*), aliaque similia (*vers. 67 — 96*). Postremum ad sapientiae et virtutis studium in nulla vitae conditione unquam deponendum hortatur (*vers. 96 usque ad fin.*).

Si bene te novi, metues, liberrime Lolli,
 Scurrantis speciem praebere, professus amicum.
 Ut matrona meretrici dispar erit atque
 Discolor, infido scurrac distabit amicus.
 Est huic diversum vitio vitium prope maius, 5
 Asperitas agrestis et inconcinna gravisque,
 Quae se commendat tonsa cute, dentibus atris;
 Dum vult libertas dici mera, veraque virtus.

— v. 62. *vicinia cauta* coni. Markland. Cf. Fea.

XVIII, v. 8. Ita restituit Benth. cum Edd. ante eum ferunt *mera dici*.

Virtus est medium vitiorum, et utrinque reductum.
 Alter in obsequium plus aequo pronus, et imi 10
 Derisor lecti, sic nutum divitis horret,
 Sic iterat voces, et verba cadentia tollit,
 Ut puerum saevo credas dictata magistro
 Reddere, vel partes mimum tractare secundas:
 Alter rixatur, de lana saepe caprina 15
 Propugnat nugis armatus, scilicet ut non
 Sit mihi prima fides, et vere quod placet ut non
 Acriter elatrem, pretium aetas altera sordet.
 Ambigitur quid enim? Castor sciat an Dolichos plus;
 Brundusium Minuci melius via ducat, an Appi. 20
 Quem damnosa Venus, quem praeceps alea nudat,
 Gloria quem supra vires et vestit et ungit,
 Quem tenet argenti sitis importuna famesque,
 Quem paupertatis pudor et fuga, dives amicus,
 Saepe decem vitiis instructor, odit et horret: 25
 Aut, si non odit, regit; ac, veluti pia mater,
 Plus quam se sapere et virtutibus esse priorem
 Vult, et ait prope vera: Meae (contendere noli)
 Stultitiam patiuntur opes; tibi parvula res est:
 Arcta decet sanum comitem toga; desine mecum 30
 Certare. Entrapelus, cuicumque nocere volebat,
 Vestimenta dabat pretiosa: beatus enim iam
 Cum pulchris tunicis sumet nova consilia et spes;
 Dormiet in lucem; scorto postponet honestum
 Officium: nummos alienos pascet; ad imum 35
 Threx erit, aut olitoris aget mercede caballum.
 Arcanum neque tu scrutaberis illius unquam;
 Commissumque teges, et vino tortus et ira.
 Nec tua laudabis studia, aut aliena reprendes;
 Nec, quum venari volet ille, poëmata panges. 40

— v. 9. *reductum* aliquot Codd. et antiquissimae Edd. — v. 15.
 Ita cum Iahnio interpunxi. Cruquius e duobus Codd. *rixatus*;
 Muretus coni. *ricator*, idque ascivit Fea; Bentleius in fine versus
 addidit *et*. — v. 37. *illius* restituit Benth. e Codd. Olim vulg.
ullius.

Gratia sic fratrum geminorum, Amphionis atque
 Zethi, dissiluit, donec suspecta severo
 Conticuit lyra. Fraternis cessisse putatur
 Moribus Amphion: tu cede potentis amici
 Lenibus imperiis; quotiesque educet in agros 45
 Aetolis onerata plagis iumenta canesque,
 Surge, et inhumanae senium depone Camenae,
 Coenes ut pariter pulmenta laboribus emta;
 Romanis solenne viris opus, utile famae,
 Vitaeque et membris; praesertim quum valeas, et 50
 Vel cursu superare canem vel viribus aprum
 Possis. Adde, virilia quod speciosius arma
 Non est qui tractet; seis quo clamore coronae
 Proelia sustineas campestria: denique saevam
 Militiam puer et Cantabrica bella tulisti 55
 Sub duce, qui templis Parthorum signa refigit
 Nunc, et si quid abest, Italis adiudicat armis.
 Ac, ne te retrahas, et inexensabilis absis,
 Quamvis nil extra numerum fecisse modumque
 Curas, interdum nugaris rure paterno: 60
 Partitur lintres exercitus; Actia pugna
 Te duce per pueros hostili more refertur;
 Adversarius est frater; lacus, Hadria; donec
 Alterutrum velox Victoria fronde coronet.
 Consentire suis studiis qui crediderit te, 65
 Fautor utroque tuum laudabit pollice ludum.
 Protinus ut moneam (si quid monitoris eges tu)
 Quid, de quoque viro, et cui dicas, saepe videto.
 Percontatorem fugito: nam garrulus idem est,
 Nec retinent patulae commissa fideliter aures; 70
 Et semel emissum volat irrevocabile verbum.
 Non ancilla tuum iecur ulceret ulla, puerve,

— v. 46. *Aetoliis* plurimi Codd. *Aeoliis* Cod. Bos. Vid. Bentl. et Fea. — v. 56. *refigit* Bentl. e Codd. Olim vulg. *refixit*. Cf. Fea. Pro *armis* Bentl. coni. *arvis*; quem Vid. — v. 58. *abstes* Bentl. coniectura. Sed Cf. Fea.

Intra marmoreum venerandi limen amici;
 Ne dominus pueri pulchri caraeve puellae
 Munere te parvo beet, aut incommodus angat. 75
 Qualem commendes, etiam atque etiam adspice; ne mox
 Incutiant aliena tibi peccata pudorem.
 Fallimur, et quondam non dignum tradimus: ergo
 Quem sua culpa premet, deceptus omitte tueri;
 Ut penitus notum, si tentent crimina, serves, 80
 Tuterisque tuo fidentem praesidio: qui
 Dente Theonino quum circumroditur, ecquid
 Ad te post paulo ventura pericula sentis?
 Nam tua res agitur, paries quum proximus ardet;
 Et neglecta solent incendia sumere vires. 85
 Dulcis inexpertis cultura potentis amici,
 Expertus metuit. Tu, dum tua navis in alto est,
 Hoc age, ne mutata retrorsum te ferat aura.
 Oderunt hilarem tristes, tristemque iocosi;
 Sedatum celeres, agilem gnavumque remissi; 90
 Potores bibuli media de nocte Falerni;
 Oderunt porrecta negantem pocula, quamvis
 Nocturnos iures te formidare vapores.
 Deme supercilio nubem: plerumque modestus
 Occupat obscuri speciem, taciturnus acerbi. 95
 Inter cuncta leges et percontabere doctos,
 Qua ratione queas traducere leniter aevum,
 Ne te semper inops agitet vexetque cupido,
 Ne pavor, et rerum mediocriter utilium spes;
 Virtutem doctrina paret, naturane donet; 100
 Quid minuat curas, quid te tibi reddat amicum;
 Quid pure tranquillet, honos, an dulce lucellum,
 An secretum iter, et fallentis semita vitae.
 Me quoties reficit gelidus Digentia rivus,
 Quem Mandela bibit, rugosus frigore pagus, 105

— v. 80. *At penitus* Bentl. coniectura; *Ac* Cuning. Cf. Iahn.
 — v. 91. *Bentleius liquidus* pro *bibuli* e Codd. Fabricii et ex uno
 suo Codice *luce* pro *nocte*. Cf. Gesner et Fea.

Quid sentire putas? quid credis, amice, precari?
 Sit mihi, quod nunc est, etiam minus; et mihi vivam
 Quod superest aevi, si quid superesse volunt Dî;
 Sit bona librorum et provisae frugis in annum
 Copia; neu fluitem dubiae spe pendulus horae. 110
 Sed satis est orare Iovem quae donat et aufert:
 Det vitam, det opes; aequum mi animum ipse parabo.

EPISTOLA XIX.

AD MAECENATEM.

Duplex hominum genus, ut omnino egregiis scriptoribus accidere solet, Horatio importunum exstitit, id est, imitatorum et invidorum. Contra utrosque coram Maecenate, optimo earum rerum iudice, hac epistola causam suam agit. Primum igitur imitatores, servum pecus, graviter et acerba cum derisione exagitat (*ver. 1 — 20.*), simulque non sine generoso praestantiae suae sensu sua carmina proprio et Romanis antea incognito artificio facta cum istorum ineptiis contendit (*vers. 21 — 34.*) Deinde de malevolorum in se invidentia, eiusque causis exponit (*ver. 35 ad fin.*).

Prisco si credis, Maecenas docte, Cratino,
 Nulla placere diu nec vivere carmina possunt,
 Quae scribuntur aquae potoribus. Ut male sanos
 Adscripsit Liber Satyris Faunisque poëtas, 5
 Vina fere dulces oluerunt mane Camenae.
 Laudibus arguitur vini vinosus Homerus;
 Ennius ipse pater nunquam nisi potus ad arma.
 Prosiluit dicenda. Forum putealque Libonis

— v. 107. *et mihi* emendavit Benth. e Codd. Olim vulg. *ut mihi.*

— v. 110. *neu* Benth. e Codd. Vulg. *ne.* — v. 111. *ponit et auf.* Benth. e Codd. Cf. Fea. — v. 112. *det opes: animum mihi ego ipse parabo* Cod. Benth. quem Cf. et Ioannes Sarisberiensis Pol. III, 9.

XIX, v. 4. *Adscribit* Codd. aliquot Pulm. et Feae, atque plures Edd. vet.

Mandabo siccis, adimam cantare severis.
 Hoc simul edixi, non cessavere poëtae 10
 Nocturno certare mero, putere diurno.
 Quid? si quis vultu torvo ferus, et pede nudo,
 Exiguaeque togae simulet textore Catonem,
 Virtutenne repraesentet moresque Catonis?
 Rupit Iarbitam Timagenis aemula lingua, 15
 Dum studet urbanus, tenditque disertus haberi.
 Decipit exemplar vitiis inuitabile: quod si
 Pallerem casu, biberent exsangue euminum.
 O imitatores, servum pecus, ut mihi saepe
 Bilem, saepe iocum vestri movere tumultus! 20
 Libera per vacuum posui vestigia princeps:
 Non aliena meo pressi pede. Qui sibi fidit,
 Dux regit examen. Parios ego primus iambos
 Ostendi Latio, numeros animosque secutus
 Archilochi, non res et agentia verba Lycamben. 25
 Ac, ne me foliis ideo brevioribus ornes,
 Quod timui mutare modos et carminis artem:
 Temperat Archilochi musam pede mascula Sappho,
 Temperat Alcaeus, sed rebus et ordine dispar,
 Nec socerum quaerit, quem versibus oblinat atris, 30
 Nec sponsae laqueum famoso carmine neetit.
 Hunc ego, non alio dietum prius ore, Latinus
 Vulgavi fidicen: iuvat immemorata ferentem
 Ingenuis oculisque legi manibusque teneri.
 Scire velis, mea cur ingratus opuscula lector 35
 Laudet ametque domi, premat extra limen iniquus?
 Non ego ventosae plebis suffragia venor
 Impensis coenarum et tritae munere vestis;

— v. 10. *edixi* Bentleius emendavit e Codd. Bersmanni, Torrent.
 Lambin. atque uno suo, quibus accedunt plures Feae. Olim vulg.
edixit. Feae Cod. unus et Heinsius ex coniectura *edixit*. Vid.
 Bentr. — v. 15. *aemula coenu* Codd. apud Torrent. Cf. Fea. —
 v. 19. *bilem Ut mihi saepe iocum* Cod. Bentr. quem Cf. — v. 32.
Latinis pleraeque veteres Editiones. Vid. Fea.

Non ego, nobilium scriptorum auditor et ultor,
 Grammaticas ambire tribus et pulpita dignor: 40
 Hinc illae lacrimae. Spissis indigna theatris
 Scripta pudet recitare, et nugis addere pondus,
 Si dixi: Rides, ait, et Iovis auribus ista
 Servas; fidis enim manare poëtica mella
 Te solum, tibi pulcher. Ad haec ego naribus uti 45
 Formido; et luetantis acuto ne secer ungui,
 Displicet iste locus, clamo, et diludia posco.
 Ludus enim genuit trepidum certamen et iram,
 Ira truces inimicitias et funebre bellum.

EPISTOLA XX.

AD LIBRUM SUUM.

Quod nunc fere poetae facere solent, ut carminibus suis in vulgus prodituris praeludant, eaque peculiaribus versibus agmen ducentibus commendent lectoris, id Horatium in epistolarum volumine priori edendo hac extrema epistola facere videmus. Alloquitur ibi librum, et, ut Gesneri verbis utar, sub satirica et humili specie dicit hic non minora, quam Carin. III, 30.

Vertumnum Ianumque, liber, spectare videris,
 Scilicet ut prostes Sosiorum punice mundus.
 Odisti claves, et grata sigilla pudico;
 Paucis ostendi gemis, et communia laudas, 5
 Non ita nutritus. Fuge quo descendere gestis,
 Non erit emissio reditus tibi. Quid miser egi?
 Quid volui? dices, ubi quis te laeserit; et seīs
 In breve te cogi, quum plenus languet amator.

— v. 39. *adiutor et ultor* Codd. aliquot Feae et Coll. Sax. *actor* pro *ultor* Cod. Lambin. Vid. Bentl.

XX, v. 5. *descendere* correxit Bentleius, quem Vid. e Codd. et Ed. principe. Vulgata lectio erat *discedere*. — v. 7. *quis te* omnes fere Edd. vett. et multi Codd. quos enumerat Fea; *quid te* Bentl. cum magna parte Codd. — v. 8. *plenus cum* Bentl. ex uno Cod. itemque duo Codd. Feae. Sed Cf. Iahn.

Quod si non odio peccantis desipit augur,
 Carus eris Romae, donec te deserat aetas. 10
 Contrectatus ubi manibus sordescere vulgi
 Coeperis, aut tineas pascas taciturnus inertes,
 Aut fugies Uticam, aut vinctus mitteris Ilerdam.
 Ridebit monitor non exauditus; ut ille,
 Qui male parentem in rupes protrusit asellum 15
 Iratus: quis enim invitum servare laboret?
 Hoc quoque te manet, ut pueros elementa docentem
 Occupet extremis in vicis balba senectus.
 Quum tibi sol tepidus plures adimoverit aures,
 Me libertino natum patre, et in tenui re 20
 Maiores pennas nido extendisse loqueris,
 Ut, quantum generi demas, virtutibus addas;
 Me primis Urbis belli placuisse domique,
 Corporis exigui, praecanum, solibus aptum,
 Irasci celerem, tamen ut placabilis essem. 25
 Forte meum si quis te percontabitur aevum,
 Me quater undenos sciat implevisse Decembres,
 Collegam Lepidum quo duxit Lollius anno.

— v. 10. *deserit* Codd. Feae et Valart. plures antiquiores Edd. Bentr. *deseret* Codd. Feae et Valart. Ed. Mediol. 1477. — v. 13. *unctus mitteris* plurimae olim Editiones; sed Codd. plerumque *vinctus*. Vid. Bentr. et Fea. — v. 15. *detrusit* Ed. Glarean. Cf. Fea. — v. 19. *annos* pro *aures* Codd. aliquot Combii et Feae.

Q. HORATHII FLACCI
E P I S T O L A R U M
LIBER SECUNDUS.

EPISTOLA I.
AD AUGUSTUM.

Tres libri huius secundi epistolae consimilis quodammodo sunt argumenti, cum singulae ad poeseos studia pertineant. In prima enim antiquiores poetae Romani cum recentioribus aevi Augustei, atque omnino graecae poeseos historia et indoles cum romanae conferuntur; in altera narrat Horatius de suis poeseos studiis nunc quidem a se depositis atque de multorum suae aetatis poetarum perversitate et ineptiis; in tertia denique artis praecepta tradit. Atque huius quidem primae epistolae occasio, Suetonio teste (in Vita Horatii pag. 7.) inde nata est, quod Augustus disertis verbis hoc ab Horatio petivisset, ut ad se sermonem aliquem scriberet. Optime autem hoc potissimum argumentum poeta sibi sumsit, utpote ad principem scribens et elegantis iudicii et poetas egregios foventem et omnibus praesidiis ad romanas Musas excitandas et alendas instructum. Post splendidum exordium (*vers. 1 — 17.*), nimiam veterum poetarum admirationem exagitat, et ostendit, quam parum firmum et rectum sit eorum iudicium, qui poemata tantum ex vetustate aestiment. (*— vers. 49.*) Tum ubi hos ipsos antiquissimos Romanorum poetas enumeravit, de iisque breviter sententiam tulit (*— vers. 89.*), extremis quasi lineamentis descriptam, sed perquam ingeniose, Graecorum et Romanorum indolem vitaeque rationes inter se comparat (*— vers. 106.*), eo quidem consilio, ut démonstret, si Graecorum vetustissima quaeque carmina sint optima, hoc idem iudicium in Romanorum carminibus locum habere non posse. Deinde

cum antiquiorum Romanorum ingenio a subtilioribus Musarum artibus alieno non sine aliqua derisione fervidum studium componit, quo suae aetatis homines ad versus scribendos rapiantur, additque poeseos laudationem, in qua a iocosa et submissa tractatione usque ad sublimem gravitatem assurgit (— *vers. 138.*). Postea Augusto poeseos conditionem et rationem, qualis tunc Romae fuit, scenicae imprimis exponit (— *vers. 213.*), atque etiam reliquos poetas praeter scenicos principi commendat, eo potissimum nomine non negligendos, quia generosi et populi et principis intersit, praeclaros praeclare factorum praecones nancisci; (— *vers. 250.*) quod dum dicit sponte quasi et ipsa sermonis via ad eam excusationem defertur, quam haud semel in carminibus suis usurpat, se quidem tantis tamque splendidis rebus ab Augusto gestis imparem esse celebrandis.

Quum tot sustineas et tanta negotia solus,
 Res Italas armis tuteris, moribus ornes,
 Legibus emendes; in publica commoda peccem,
 Si longo sermone morer tua tempora, Caesar.
 Romulus, et Liber pater, et cum Castore Pollux, 5
 Post ingentia facta Deorum in templa recepti,
 Dum terras hominumque colunt genus, aspera bella
 Componunt, agros assignant, oppida condunt,
 Ploravere suis non respondere favorem
 Speratum meritis. Diram qui contudit hydram, 10
 Notaque fatali portenta labore subegit,
 Comperit invidiam supremo fine domari.
 Urit enim fulgore suo, qui praegravat artes
 Infra se positas: exstinctus amabitur idem.
 Praesenti tibi maturos largimur honores, 15
 Iurandasque tuum per nomen ponimus aras,
 Nil oriturum alias, nil ortum tale fatentes.
 Sed tuus hic populus, sapiens et iustus in uno,
 Te nostris ducibus, te Graiis anteferendo,

I, v. 2. *moenibus pro moribus coni.* Benth. — v. 6. *fata* Benth. ex coni. — v. 8. *oppida formant* ex uno Cod. Cuning. Sanad. Both. — v. 14. *positos* Fea ex duobus Codd. Sed Cf. Both. Annotatt. — v. 16. *numen* Benth. et Fea ex pluribus Codd. Cf. utrumque et Doering. — v. 18. *hoc pro hic* Benth. ex uno Cod. Cf. Iahn.

Cetera nequaquam simili ratione modoque 20
 Aestimat, et, nisi quae terris semota suisque
 Temporibus defuncta videt, fastidit et odit,
 Sic fantor veterum, ut tabulas peccare vetantes,
 Quas bis quinque viri sanxerunt, foedera regum
 Vel Gabiis vel cum rigidis aequata Sabinis, 25
 Pontificum libros, annosa volumina vatum,
 Dietitet Albano Musas in monte locutas.
 Si, quia Graecorum sunt antiquissima quaeque
 Scripta vel optima, Romani pensantur eadem
 Scriptores trutina, non est quod multa loquamur: 30
 Nil intra est oleam, nil extra est in nuce duri.
 Venimus ad summum fortunae, pingimus atque
 Psallimus, et luctamur Achivis doctius unctis.
 Si meliora dies, ut vina, poemata reddit,
 Scire velim, pretium chartis quotus arroget annus. 35
 Scriptor abhinc annos centum qui decedit, inter
 Perfectos veteresque referri debet, an inter
 Viles atque novos? excludat iurgia finis. —
 Est vetus atque probus, centum qui perficit annos. —
 Quid? qui deperit minor uno mense vel anno, 40
 Inter quos referendus erit? veteresne poetas?
 An quos et praesens et postera respuet actas? —
 Iste quidem veteres inter ponetur honeste,
 Qui vel mense brevi vel toto est iunior anno. —
 Utor permissio, caudaeque pilos ut equinae 45
 Paulatim vello, et demo unum, demo et item unum,
 Dum cadat elusus ratione ruentis acervi,
 Qui redit in fastos, et virtutem aestimat annis,

— v. 28. *Graiorum* Benth. ex trihus Codd. Cf. Fea et Both. Annot.
 — v. 29. *pensantur* Codd. duo Bersm. — v. 31. *olea* Bentleius
 coniectura, quem Cf. — v. 32. *summam* Codd. aliquot Bersm.
 et Feae. — v. 33. *scitius* pro *doctius* Fea ex Eutyche apud Putsch.
 p. 2179. — v. 39. *quia perficit* Both. cum Torrent. e Codd. —
 v. 46. Ita longe plurimi Codd. ferunt. Vetustae Edd. *demo etiam*
unum. Vid. Benth. et Fea. Duo Codd. Feae *demo itidem unum*
 quod probat Both. in Annotatt. et recepit Iahn. — v. 48. *in fas-*

Miraturque nihil, nisi quod Libitina sacravit.
 Ennius, et sapiens et fortis, et alter Homerus, 50
 Ut critici dicunt, leviter curare videtur,
 Quo promissa cadant et somnia Pythagorea.
 Naevius in manibus non est, et mentibus haeret
 Paene recens? adeo sanctum est vetus omne poëma.
 Ambigitur quoties uter utro sit prior, aufert 55
 Pacuvius docti famam senis, Accius alti:
 Dicitur Afranî toga convenisse Menandro;
 Plautus ad exemplar Siculi properare Epicharmi;
 Vincere Caecilius gravitate, Terentius arte.
 Hos ediscit, et hos arcto stipata theatro 60
 Spectat Roma potens, habet hos numeratque poëtas
 Ad nostrum tempus, Livi scriptoris ab aevo.
 Interdum vulgus rectum videt; est ubi peccat.
 Si veteres ita miratur laudatque poëtas,
 Ut nihil anteferat, nihil illis comparet, errat: 65
 Si quaedam nimis antique, si pleraque dure
 Dicere credit eos, ignave multa fatetur;
 Et sapit, et mecum facit, et Iove iudicat aequo.
 Non equidem insector delendave carmina Livi
 Esse reor, memini quae plagosum mihi parvo 70
 Orbilius dictare: sed emendata videri
 Pulchraque et exactis minimum distantia miror.
 Inter quae verbum emicuit si forte decorum,
 Si versus paulo concinnior unus et alter,
 Iniuste totum ducit venditque poëma. 75
 Indignor quidquam reprehendi, non quia crasse
 Compositum illepideve putetur, sed quia nuper;
 Nec veniam antiquis sed honorem et praemia posci.

tos Benth. e plurimis Codd. quibus accedunt Codd. Feae. Vulg. *ad fustos*. Vid. Benth. — v. 54. Signum interrogationis a Benthio additum, delet Fea. Sed Cf. Bothii. Annotatt. et Benth. — v. 63. *peccet*. Ed. Glarean. — v. 67. *cedit* Benth. ex uno Cod. *credat* Ed. Ven. et Glarean. — v. 69. *Laevi* Benthieus ex uno suo Cod. Itemque Coll. Saxian. et Porphyrio MS. apud Feam. — v. 75. *venitque* Benth. ex uno suo Cod.

Recte necne crocum floresque perambulet Attae
 Fabula si dubitem, clament periisse pudorem 80
 Cuncti paene patres, ea quum reprehendere coner,
 Quae gravis Aesopus, quae doctus Roscius egit:
 Vel quia nil rectum, nisi quod placuit sibi, ducunt;
 Vel quia turpe putant parere minoribus, et, quae
 Imberbi didicere, senes perdenda fateri. 85
 Iam Saliare Numae carmen qui laudat, et illud,
 Quod mecum ignorat, solus vult scire videri:
 Ingeniis non ille favet plauditque sepultis,
 Nostra sed impugnat, nos nostraqua lividus odit.
 Quod si tam Graecis novitas invisâ fuisset, 90
 Quam nobis, quid nunc esset vetus? aut quid haberet,
 Quod legeret tereretque viritim publicus usus?
 Ut primum positis nugari Graecia bellis
 Coepit, et in vitium fortuna labier aequa,
 Nunc athletarum studiis, nunc arsit equorum, 95
 Marmoris aut eboris fabros aut aeris amavit,
 Suspendit pieta vultum mentemque tabella,
 Nunc tibicinibus nunc est gavisâ tragoedis;
 Sub nutrice puella velut si luderet infans,
 Quod cupide petiit, mature plena reliquit. 100
 Quid placet aut odio est, quod non mutabile credas?
 Hoc paces habuere bonae ventique secundi.
 Romae dulce diu fuit et solenne, reclusa
 Mane domo vigilare, clienti promere iura,
 Cautos nominibus rectis expendere nummos, 105
 Maiores audire, minori dicere per quae
 Crescere res posset, minui damnosa libido.
 Mutavit mentem populus levis, et calet uno
 Scribendi studio: pueri patresque severi

— v. 85. Ita Benth. e Codd. Vulg. *imberbes* quod retinuit Fea.
 — v. 90. *Graecis* Benth. coniectura. — v. 92. *Quiritum* pro *viritim* Fea ex uno Cod. Fulv. Ursini. Cf. Iahn. — v. 105. *rectis* e Codd. Benthleius correxit, quem V. Alii Codd. et pleraeque olim Edd. *nominibus certis*. Codex Barthii (Advers. XXXVII, 18) *scriptos* habet pro *cautos*, idque praetulit Benth. — v. 109. Ita fere

Fronde comas vincti coenant, et carmina dictant. 110
 Ipse ego, qui nullos me affirmo scribere versus,
 Invenior Parthis mendacior, et, prius orto
 Sole vigil, calamum et chartas et scrinia posco.
 Navim agere ignarus navis timet, abrotonum aegro
 Non audet, nisi qui didicit, dare; quod medicorum
 est, 115

Promittunt medici tractant fabrilia fabri:
 Scribimns indocti doctique poëmata passim.
 Hic error tamen, et levis haec iusania, quantas
 Virtutes habeat, sic collige: vatis avarus
 Non temere est animus; versus amat, hoc studet
 unum; 120

Detrimenta, fugas servorum, incendia ridet;
 Non fraudem socio, puerove incogitat ullam
 Pupillo; vivit siliquis et pane secundo.
 Militiae quamquam piger et malus, utilis urbi,
 Si das hoc, parvis quoque rebus magna iuvare. 125
 Os tenerum pueri balbumque poëta figurat;
 Torquet ab obscenis iam nunc sermonibus aurem,
 Mox etiam pectus praeceptis format amicis,
 Asperitatis et invidiae corrector et irae;
 Recte facta refert; orientia tempora notis 130
 Instruit exemplis; inopem solatur et aegrum.
 Castis cum pueris ignara puella mariti
 Disceret unde preces, vatem ni Musa dedisset?
 Poscit opem chorus, et praesentia numina sentit,
 Coelestes implorat aquas docta prece blandus, 135
 Avertit morbos, metuenda pericula pellit,
 Impetrat et pacem, et locupletem frugibus annum.
 Carmine Dî superi placantur, carmine manes.
 Agricolae prisce, fortes, parvoque beati,

Codd. Sed Edd. veteres aliquot *puerique*. Vid. Benth. et Fea. —
 v. 111. *me* omittit Sax. quod placet Bothio. — v. 115. *melicorum*
 et *vers. seq. melici* Benth. coniectura. Cf. Both. Annot. et Iahn.
 — v. 124. *urbi est* Iahn. e Codd. Feae et Comb. — v. 129. *cor-*
reptor plures Codd. Vid. Fea,

Condita post frumenta, levantes tempore festo 140
 Corpus, et ipsum animum spe finis dura ferentem,
 Cum sociis operum et pueris, et coniuge fida,
 Tellurem porco, Silvanum lacte piabant,
 Floribus et vino Genium, memorem brevis aevi.
 Fescemina per hunc inventa licentia morem, 145
 Versibus alternis opprobria rustica fudit;
 Libertasque recurrentes accepta per annos
 Lusit amabiliter, donec iam saevus apertam
 In rabiem coepit verti iocus, et per honestas
 Ire domos impune minax. Doluere cruento 150
 Dente lacessiti; fuit intactis quoque cura
 Conditione super communi: quin etiam lex
 Poenaeque lata, malo quae nollet carmine quemquam
 Describi. Vertere modum, formidine fustis
 Ad bene dicendum delectandumque redacti. 155
 Graecia capta ferum victorem cepit, et artes
 Intulit agresti Latio: sic horridus ille
 Defluxit numerus Saturnius; et grave virus
 Munditiae pepulere; sed in longum tamen aevum
 Manserunt hodieque manent vestigia ruris. 160
 Serus enim Graecis admovit acumina chartis;
 Et post Punica bella quietus, quaerere coepit,
 Quid Sophocles et Thespis et Aeschylus utile ferrent.
 Tentavit quoque rem, si digne vertere posset,
 Et placuit sibi, natura sublimis et acer: 165
 Nam spirat tragicum satis, et feliciter audet;
 Sed turpem putat inscite metuitque lituram.
 Creditur, ex medio quia res arcessit, habere
 Sudoris minimum, sed habet Comoedia tanto
 Plus oneris, quanto veniae minus. Adspice, Plautus 170

— v. 142. Haec est vulgata lectio pluribus Codd. Pulmann. et Feae confirmata. Alii Codd. et Edd. vet. omittunt *et ante pueris* Vid. Benth. et Fea. — v. 145. *investa licentia* Benth. coniectura. Cf. Fea. — v. 167. Plurimae olim Edd. *putat in scriptis*, sed Codd. fere omnes *inscite*. Vid. Benth. qui dedit *inscitus* coniect. et Fea.

Quo pacto partes tutetur amantis ephebi,
 Ut patris attenti, lenonis ut insidiosi;
 Quantus sit Dossennus edacibus in parasitis;
 Quam non adstricto pereurram pulpita socco.
 Gestit enim nummum in loculos demittere, post hoc 175
 Securus, cadat an recto stet fabula talo.
 Quem tulit ad scenam ventoso Gloria curru,
 Exanimat lentus spectator, sedulus inflat.
 Sic leve, sic parvum est, animum quod laudis avarum
 Subruit aut reficit. Valeat res ludicra, si me 180
 Palma negata macrum, donata reducit opimum.
 Saepe etiam audacem fugat hoc terretque poetam,
 Quod numero plures, virtute et honore minores,
 Indocti stolidique, et depugnare parati,
 Si discordet eques, media inter carmina poscunt 185
 Aut ursum aut pugiles: his nam plebecula gaudet.
 Verum equiti quoque iam migravit ab aure voluptas
 Omnis ad incertos oculos et gaudia vana.
 Quatuor aut plures aulaea premuntur in horas,
 Dum fugiunt equitum turmae peditumque catervae; 190
 Mox trahitur manibus regum fortuna retortis;
 Esseda festinant, pilenta, petorrita, naves;
 Captivum portatur ebur, captiva Corinthus.
 Si foret in terris, rideret Democritus, seu
 Diversum confusa genus panthera camelo, 195
 Sive elephas albus vulgi converteret ora:
 Spectaret populum ludis attentius ipsis,
 Ut sibi praebentem mimo spectacula plura.
 Scriptores autem narrare putaret asello

— v. 173. *Dossennus* plures Edd. Vid. Both. — v. 178. *sedulus*
instat Coll. Sax. Cf. Gesner. Fea, Both. — v. 180. *ac reficit*
 Bentl. ex aliquot Codd. Cf. Fea. — v. 186. *plebecula* *plaudit*
 haud pauci Codd. Lambini, Feae, aliorum; recepit cum Fea
 Iahnus. — v. 187. *equiti* Bentl. coniectura. — v. 188. *ingratos*
oculos Bentl. coniectura Cf. Fea. — v. 196. *converterit* Bentl. e
 Prisciani Cod. Cf. Both. et Iahn.

Fabellam surdo. Nam quae pervincere voces 200
 Evaluere sonum, referunt quem nostra theatra?
 Garganum mugire putes nemus, aut mare Tuscum:
 Tanto cum strepitu ludi spectantur, et artes,
 Divitiaeque peregrinae; quibus oblitus actor
 Quum stetit in scena, concurrit dextera laevae. 205
 Dixit adhuc aliquid? — Nil sane. — Quid placet ergo? —
 Lana Tarentino violas imitata veneno.
 Ac ne forte putes, me, quae facere ipse recusem,
 Quum recte tractent alii, laudare maligne;
 Ille per extentum funem mihi posse videtur 210
 Ire poëta, meum qui pectus inaniter angit,
 Irritat, mulcet, falsis terroribus implet,
 Ut magus, et modo me Thebis, modo ponit Athenis.
 Verum age, et his, qui se lectori credere malunt,
 Quam spectatoris fastidia ferre superbi, 215
 Curam redde brevem, si munus Apolline dignum
 Vis complere libris, et vatibus addere calcar,
 Ut studio maiore petant Helicon virentem.
 Multa quidem nobis facimus mala saepe poëtae,
 (Ut vineta egomet caedam mea) quum tibi librum 220
 Sollicito damus aut fesso; quum laedimur, unum
 Si quis amicorum est ausus reprehendere versum;
 Quum loca iam recitata revolvimus irrevocati;
 Quum lamentamur, non apparere labores
 Nostros, et tenui deducta poëmata filo; 225
 Quum speramus eo rem venturam, ut simul atque
 Carmina rescieris nos fingere, commodus ultro
 Aressas, et egere vetes, et scribere cogas.
 Sed tamen est operae pretium cognoscere, quales
 Aedituos habeat belli spectata domique 230
 Virtus, indigno non committenda poëtae.
 Gratus Alexandro regi Magno fuit ille

— v. 210. Codd. aliquot *extensum* Vld. Fea. — v. 216. *curam impende brev.* Benth. ex uno Cod. Sed Cf. Fea et Doering. — v. 223. *irrevocati* libri veteres, teste Torrentio.

Choerilus, incultis qui versibus et male natis
 Retulit acceptos, regale nomisma, Philippos.
 Sed veluti tractata notam labemque remittunt 235
 Atramenta, fere scriptores carmine foedo
 Splendida facta linunt. Idem rex ille, poema
 Qui tam ridiculum tam care prodigus emit,
 Edicto vetuit, ne quis se, praeter Apellem,
 Pingeret, aut alius Lysippo duceret aera 240
 Fortis Alexandri vultum simulantia. Quod si
 Iudicium subtile videndis artibus illud
 Ad libros et ad haec Musarum dona vocares,
 Bocotum in crasso iurares aëre natum.
 At neque dedecorant tua de se iudicia, atque 245
 Munera, quae multa dantis cum laude tulerunt,
 Dilecti tibi Virgilius Variusque poëtae:
 Nec magis expressi vultus per aënea signa,
 Quam per vatis opus mores animique virorum
 Clarorum apparent. Nec sermones ego mallem 250
 Repentes per humum, quam res componere gestas;
 Terrarumque situs et flumina dicere, et arces
 Montibus impositas, et barbara regna, tuisque
 Auspiciis totum confecta duella per orbem,
 Claustraque custodem pacis cohibentia Ianum, 255
 Et formidatam Parthis te principe Romam;
 Si, quantum cuperem, possem quoque. Sed neque
 parvum
 Carmen maiestas recipit tua, nec meus audet
 Rem tentare pudor, quam vires ferre recusent.
 Sedulitas autem, stulte quem diligit, urget; 260
 Praecipue quum se numeris commendat et arte.
 Discit enim citius meminitque libentius illud,
 Quod quis deridet, quam quod probat et veneratur.
 Nil moror officium quod me gravat, ac neque ficto
 In peius vultu proponi cereus usquam 265

— v. 234. *nomisma* cum *Fea* dedimus, quem Cf. *Vulg. numis-*
ma. — v. 240. *cuderet aera* coni. Lambin. recipit Bentl.

Nec prave factis decorari versibus opto,
 Ne rubeam pingui donatus munere, et una
 Cum scriptore meo, capsula porrectus aperta,
 Deferar in vicum vendentem thus et odores
 Et piper et quidquid chartis amicitur ineptis. 270

EPISTOLA II.

AD IULIUM FLORUM.

Excusaturus se Iulio Floro (Cf. Epist. I, 3), quod nihil litterarum neque carminum ad eum miserit, primum lepida similitudine significat, se nihil proficiscenti amico promisisse, imo suam in scribendo pigritiam ingenue professum esse (*vers. 1 — 25*). De carminibus ridens respondet, se quondam nonnisi paupertate ad versus faciendos adactum, nunc quidem meliore fortuna utentem beatum otium his laboribus longe praeferre (*vers. 25 — 54*); deinde serio excusat aetatem suam, importuna lectorum fastidia, urbanae vitae impedimenta et turbas (*vers. 55 — 86*), et significat, se pertaesum esse omnis huius carminum pangendorum studii ob ineptos et misellos tot poetarum sui temporis ad favorem hominum et laudem captandam tumultus et legitimae artis ignorantiam, simulque saniora quaedam et severiora artis praecepta iis-opponit (*vers. 87 — 140*). Postremum studium, quod tam frequenter in his epistolis proficitur, sapientiae excusat, cui nunc relictis versuum lusibus unice deditus sit, atque aurea quaedam sanae rationis praecepta hoc ipso studio sibi comparata cum amico communicat (*vers. 141 ad fin.*).

Flore, bono claroque fidelis amice Neroni,
 Si quis forte velit puerum tibi vendere, natum
 Tibure vel Gabiis, et tecum sic agat: Hic et
 Candidus, et talos a vertice pulcher ad imos,
 Fiet eritque tuus nummorum millibus octo, 5

— v. 268. *operta* Codd. 5 Bersm. Gotting. alii; sequitur Bentl. Sed Cf. Gesner. et Fea. — v. 270. *inemptis* Codd. duo Fea, unus Cruq. et vett. Edd. aliquot, quos laudat Fea; idemque coniecerat Wakef.

Verna ministeriis ad nutus aptus heriles,
 Literulis Graecis imbutus, idoneus arti
 Cuilibet, argilla quidvis imitaberis uda:
 Quin etiam canet indoctum, sed dulce bibenti.
 Multa fidem promissa levant, ubi plenius aequo 10
 Laudat venales, qui vult extrudere, merces.
 Res urget me nulla; meo sum pauper in aere:
 Nemo hoc mangonum faceret tibi: non temere a me
 Quivis ferret idem: semel hic cessavit, et, ut fit,
 In scalis latuit metuens pendentis habenae. 15
 Des nummos, excepta nihil te si fuga laedat.
 Ille ferat pretium, poenae securus, opinor.
 Prudens emisti vitiosum; dicta tibi est lex:
 Insequeris tamen hunc, et lite moraris iniqua?
 Dixi me pigrum proficiscenti tibi, dixi 20
 Talibus officiis prope mancum, ne mea saevus
 Iurgares ad te quod epistola nulla veniret.
 Quid tum profeci, mecum facientia iura
 Si tamen attentas? Quereris super hoc etiam, quod
 Expectata tibi non mittam carmina mendax. 25
 Luculli miles collecta viatica multis
 Aerumnis, lassus dum noctu stertit, ad assem
 Perdiderat; post hoc vehemens lupo, et sibi et hosti
 Iratus pariter, ieiunis dentibus acer,
 Praesidium regale loco deiecit, ut aiunt, 30
 Summe munito et multarum divite rerum.
 Clarus ob id factum, donis ornatur honestis;
 Accipit et his dena super sestertia nummum.
 Forte sub hoc tempus castellum evertere praetor
 Nescio quod cupiens, hortari coepit eundem 35
 Verbis, quae timido quoque possent addere mentem:

II, v. 8. *imitabitur* Gotting. Codd. Torrentii et Feae, qui
 recepit in textum. — v. 11. *excludere* haud pauci Codd. Lambin.
 et Feae, quem Cf. — v. 16. *laedat* plurimi libri; alii *laedit*. Cf.
 Benth. et Fea. — v. 22. *rediret* magna Codd. pars; alii *veniret*.
 Cf. Fea. — v. 32. *ornatur opimis* Codd. aliquot Torrent. et Feae.

I, bone, quo virtus tua te vocat; i pede fausto,
 Grandia laturus meritorum praemia: quid stas?
 Post haec ille catus, quantumvis rusticus, Ibit,
 Ibit eo quo vis, qui zonam perdidit, inquit. 40
 Romae nutriri mihi contigit atque doceri,
 Iratus Graiis quantum nocuisset Achilles:
 Adiecere bonae paulo plus artis Athenae;
 Scilicet ut possem curvo dignoscere rectum,
 Atque inter silvas Academi quaerere verum. 45
 Dura sed emovere loco me tempora grato,
 Civilisque rudem belli tulit aestus in arma,
 Caesaris Augusti non responsura lacertis.
 Unde simul primum me dimisere Philippi,
 Decisis humilem pennis, inopemque paterni 50
 Et laris et fundi, paupertas impulit audax
 Ut versus facerem; sed, quod non desit, habentem
 Quae poterunt unquam satis expurgare cicutae,
 Ni melius dormire putem quam scribere versus?
 Singula de nobis anni praedantur euntes; 55
 Eripuere iocos, Venerem, convivia, ludum;
 Tendunt extorquere poëmata: quid faciam vis?
 Denique non omnes eadem mirantur amantque:
 Carmine tu gaudes; hic delectatur iambis;
 Ille Bioneis sermonibus et sale nigro. 60
 Tres mihi convivae prope dissentire videntur,
 Poscentes vario multum diversa palato.
 Quid dem? quid non dem? renuis tu, quod iacet alter;
 Quod petis, id sane est invisum acidumque duobus.
 Praeter cetera, me Romaene poëmata censes. 65
 Scribere posse, inter tot curas totque labores?
 Hic sponsum vocat, hic auditum scripta, relictis
 Omnibus officiis; cubat hic in colle Quirini,

— v. 46. *amovere* Codd. apud Palm. et Fearm. Cf. Both. — v. 63. *renuis quod tu* Benth. e Codd. — v. 65. *Romae mene* Codd. Valart. et quaedam Edd. vet. V. Fea. — v. 68. *in monte Quirini et in valle Quir.* Codd. aliquot Feae, quem Cf.

Hic extremo in Aventino, visendus uterque;
 Intervalla vides humane commoda. — Verum 70
 Purae sunt plateae, nihil ut meditantibus obstat. —
 Festinat calidus mulis gerulisque redemptor;
 Torquet nunc lapidem, nunc ingens machina tignum;
 Tristia robustis luctantur funera plaustis;
 Hac rabiosa fugit canis, hac lutulenta ruit sus: 75
 I nunc, et versus tecum meditare canoros.
 Scriptorum chorus omnis amat nemus, et fugit urbes,
 Rite cliens Bacchi, somno gaudentis et umbra:
 Tu me inter strepitus nocturnos atque diurnos
 Vis canere, et contracta sequi vestigia vatum? 80
 Ingenium, sibi quod vacuas desumsit Athenas,
 Et studiis annos septem dedit, insenuitque
 Libris et curis, statua taciturnius exit
 Plerumque, et risu populum quatit: hic ego rerum
 Fluctibus in mediis, et tempestatibus urbis, 85
 Verba lyrae motura sonum connectere digner?
 Frater erat Romae consulti rhetor, ut alter
 Alterius sermone meros audiret honores;
 Gracchus ut hic illi foret, huic ut Mucius ille.
 Quî minus argutos vexat furor iste poëtas? 90
 Carmina compono, hic elegos; mirabile visu
 Caelatumque novem Musis opus. Adspice primum,
 Quanto cum fastu, quanto molimine circum-
 Spectemus vacuum Romanis vatibus aedem.
 Mox etiam, si forte vacas, sequere, et procul audi, 95
 Quid ferat et quare sibi neccat uterque coronam.

— v. 71. *obsit* duo Codd. Cruq. Vid. Fea. — v. 75. *furit canis*
 Fea e Codd. Cf. Iahn. — v. 80. Ita plurimi Codd. et antiquis-
 simae Edd. Alii Codd. *contracta*, quae lectio post Lambinum plu-
 rimas Edd. occupavit. Bentleius coniectura *non tacta*, quem Vid.
 collato Fea. — v. 90. *Qui minus? Argutos vexat* etc. Both. Sed Cf.
 Iahn. — v. 92. *Sacratumque novem Mus.* Benth. coniectura, quem
 Cf. Bothius ita distinguendum censet: *Mirabile visu Caelatumque*
novem Musis opus, aspice primum etc. Vid. eius Annotatt. Fea.
 — v. 95. *vacat* Ed. Ven.

Caedimur, et totidem plagis consumimus hostem,
 Lento Samnites ad lumina prima duello.
 Discedo Alcaeus puncto illius: ille meo quis?
 Quis, nisi Callimachus? si plus adposcere visus, 100
 Fit Mimnermus, et optivo cognomine crescit.
 Multa fero, ut placem genus irritabile vatum,
 Quum scribo, et supplex populi suffragia capto:
 Idem, finitis studiis et mente recepta,
 Obturem patulas impune legentibus aures. 105
 Ridentur mala qui componunt carmina: verum
 Gaudent scribentes, et se venerantur, et ultro,
 Si taceas, laudant quidquid scripsere, beati.
 At qui legitimum cupiet fecisse poemā,
 Cum tabulis animum censoris sumet honesti; 110
 Audebit quaecunque parum splendoris habebunt,
 Et sine pondere erunt, et honore indigna ferentur,
 Verba movere loco, quamvis invita recedant,
 Et versentur adhuc intra penetralia Vestae.
 Obscurata diu populo bonus eruet, atque 115
 Proferet in lucem speciosa vocabula rerum,
 Quae priscis memorata Catonibus atque Cethegis,
 Nunc situs informis premit et deserta vetustas:
 Adsciscet nova, quae genitor produxerit usus.
 Vehemens et liquidus, puroque simillimus anni, 120
 Fundet opes, Latiumque beabit divite lingua,
 Luxuriantia compescet, nimis aspera sano
 Levabit cultu, virtute earentia tollet:
 Ludentis speciem dabit, et torquebitur, ut qui
 Nunc Satyrum nunc agrestem Cyclopa movetur. — 125
 Praetulerim scriptor delirus inersque videri,
 Dum mea delectent mala me vel denique fallant,
 Quam sapere et ringi. Fuit haud ignobilis Argis,
 Qui se credebat miros audire tragoedos,
 In vacuo laetus sessor plausorque theatro; 130

Cetera qui vitae servaret munia recto
 More; bonus sane vicinus, amabilis hospes,
 Comis in uxorem, posset qui ignoscere servis,
 Et signo laeso non insanire lagenae,
 Posset qui rupem et puteum vitare patentem. 135
 Hic ubi cognatorum opibus curisque reffectus
 Expulit elleboro morbum bilemque mæracō,
 Et redit ad sese: Pol, me occidistis, amici,
 Non servastis, ait, cui sic extorta voluptas,
 Et demtus per vim mentis gratissimus error. — 140
 Nimirum sapere est abiectis utile nugis,
 Et tempestivum pueris concedere ludum,
 Ac non verba sequi fidibus modulanda Latinis,
 Sed verae numerosque modosque ediscere vitae.
 Quocirca mecum loquor haec, tacitusque recordor: 145
 Si tibi nulla sitim finiret copia lymphae,
 Narrares medicis: quod quanto plura parasti,
 Tanto plura cupis, nulline faterier audes?
 Si vulnus tibi monstrata radice vel herba
 Non fieret levius, fugeres radice vel herba 150
 Proficiente nihil curarier. Audieras, cui
 Rem Di donarent, illi decedere pravam
 Stultitiam; et, quum sis nihilo sapientior, ex quo
 Plenior es, tamen uteris monitoribus isdem?
 At si divitiae prudentem reddere possent, 155
 Si cupidum timidumque minus te: nempe ruberes,
 Viveret in terris te si quis avarior uno.
 Si proprium est, quod quis libra mercatus et aere est,
 Quaedam, si credis consultis, mancipat usus:
 Qui te pascit ager, tuus est; et villicus Orbi, 160
 Quum segetes occat tibi mox frumenta daturas,
 Te dominum sentit: das nummos, accipis uvam,

— v. 152. Codd. *donarent*, *donarunt*, *donarant*. Benth. coniec-
 tura *donarint*. — v. 154. *rationibus isdem* plures Codd. quos
 enumerat Fea. — v. 161. *daturas* Benth. e Codd. Vulg. *daturus*
 quod servat Fea. Cf. utrumque.

Pullos, ova, cadum temeti: nempe modo isto
 Paulatim mercaris agrum, fortasse trecentis,
 Aut etiam supra, nummorum millibus emtum. 165
 Quid refert, vivas numerato nuper an olim?
 Em̄tor Aricini quondam Veientis et arvi
 Em̄tum coenat olus, quamvis aliter putat; em̄tis
 Sub noctem gelidam lignis calefactat aënum;
 Sed vocat usque suum, qua populus adsita certis 170
 Limitibus vicina refugit iurgia; tanquam
 Sit proprium quidquam, puncto quod mobilis horae,
 Nunc prece, nunc pretio, nunc vi, nunc morte suprema,
 Permutet dominos et cedat in altera iura.
 Sic, quia perpetuus nulli datur usus, et heres 175
 Heredem alterius velut unda supervenit undam,
 Quid vici prosunt aut horrea? quidve Calabris
 Saltibus adiecti Lucani, si metit Oreus
 Grandia eum parvis, non exorabilis auro?
 Gemmas, marmor, ebur, Tyrrhena sigilla, tabellas, 180
 Argentum, vestes Gaetulo murice tinctas,
 Sunt qui non habeant, est qui non curat habere.
 Cur alter fratrum cessare et ludere et ungi
 Praeferat Herodis palmetis pinguibus; alter,
 Dives et importunus, ad umbram lucis ab ortu 185
 Silvestrem flammis et ferro mitiget agrum,
 Scit Genius, natale comes qui temperat astrum,
 Naturae Deus humanae, mortalis in unum-
 Quodque caput, vultu mutabilis, albus et ater.
 Utar, et ex modico, quantum res poscet, acervo 190
 Tollam, nec metuam, quid de me iudicet heres,
 Quod non plura datis invenerit: et tamen idem

— v. 167. *quando pro quondam unus Cod. Feae; alii eiusdem quoniam.* — v. 171. *refugit Bentr. e Codd. Cf. Fea, qui tuctur refugit.* — v. 173. *morte est Codd. lectio, sed plurimae Edd. sorte. Vid. Bentr.* — v. 175. *Si quia Fea e Codd. et vett. Edd.* — v. 176. *Heredem alternis Bentr. coniectura. Cf. Fea.* — v. 182. *curat longe plurimi optimique Codd. Vid. Bentr. curet revocantur Both. et Iahn. e tribus Codd. Valart.*

Scire volam, quantum simplex hilarisque nepoti
 Discrepet, et quantum discordet parcus avaro.
 Distat enim, spargas tua prodigus, an neque sumtum 195
 Invitus facias neque plura parare labores,
 Ac potius, puer ut festis quinquatribus olim,
 Exiguo gratoque fruaris tempore raptim.
 Pauperies immunda domo procul absit: ego, utrum
 Nave ferar magna an parva, ferar unus et idem. 200
 Non agimur tumidis velis aquilone secundo;
 Non tamen adversis aetatem ducimus austris:
 Viribus, ingenio, specie, virtute, loco, re,
 Extremi primorum, extremis usque priores.
 Non es avarus: abi. Quid? cetera iam simul isto 205
 Cum vitio fugere? caret tibi pectus inani
 Ambitione? caret mortis formidine et ira?
 Somnia, terrores magicos, miracula, sagas,
 Nocturnos lemures portentaque Thessala rides?
 Natales grate numeras? ignoscis amicis? 210
 Lenior et melior sis accedente senecta?
 Quid te exempta levat spinis de pluribus una?
 Vivere si recte nescis, decede peritis.
 Lusisti satis, edisti satis, atque bibisti:
 Tempus abire tibi est, ne potum largius aequo 215
 Rideat et pulset lasciva decentius aetas.

— v. 199. *domus* Edd. primae et vulg. *domo* Cod. unus Feae, alter Pulm. *domu* aliqui eruditi viri apud Lambinum et ita Baxter, Gesner, alii; *immunda procul procul absit* Bentl. coniectura. — v. 206. *Cum vitio fuge rite; caret* etc. Codd. apud Torrentium, alii, pluresque vet. Edd. ut Mediolan. 1477. — v. 212. *levat* Bentl. e tribus Codd. Cruq. revocavit; itemque Codd. aliquot Feae. Vulg. *iuvat*. Vid. Bentl. — v. 216. *licentius aetas* duo Codd. a Bentleio laudati et aliquot Feae. Vid. Bentl.

EPISTOLA III.

AD PISONES

sive

DE ARTE POETICA LIBER.

Disputat in hac epistola Horatius de artis poeticae summis praeceptis, generibus, inprimis dramático, difficultate, via, ratione, de versuum denique scribendorum cacozelia. Quae quidem omnia non legitima tractatione et ad severiorem disputandi ordinem redacta profert, sed pro communi sermonum et epistolarum consuetudine, libero orationis cursu utens; verbo dicam, et si minus latine: singula capita non systematico ordine, sed quod in colloquendo et in literis scribendis plerumque fit, idearum associatione, id est, naturali cogitationum nexu et sponte nascente continuantur. Hoc inprimis tenendum est, ne ex his paginis, procul dubio egregiis et quas sana ratio ipsa dictasse videatur, integram artis doctrinam et sexcentas regulas extundere conemur, aut poetam huius loci totum ambitum complecti voluisse putemus. Etiam hoc notandum est, ea potissimum artis praecepta illustrari hic ab Horatio et inculcari, quae plerumque a vulgari poetarum grege negligi solent. Totius autem epistolae haec fere est descriptio: praecepta quaedam proferuntur de inventione, cuius rei caput est, ut carmen quodvis unum sit et convenientiam servet (*v. 1 — 37.*); alia de elocutione (*v. 38 — 73.*); diversa poeseos genera poetarum graecorum exemplis significantur (*v. 74 — 85.*); sequuntur generalia quaedam praecepta epici et dramatici generis inprimis communia (*v. 86 — 152.*); dramatici generis propria (*v. 153 — 285.*); de Romanorum poetarum studiis atque de causis cur minus felici quam Graeci successu gaudeant (*v. 286 — 332.*); denuo generalia quaedam praecepta de iusta brevitate et fingendi modo (*v. 333 — 346.*); postremum de carminum virtutibus et vitiis recte et severe diiudicandis, sive de severiore et sana critica facultate in suis et aliorum carminibus rite adhibenda (*v. 347 usque ad fin.*), ad quam quidem illustrandam sermo instituitur de poeseos difficultate (*v. 347 — 390.*) et dignitate (*v. 391 — 407.*), postremum de arte et studio cum naturae dotibus necessario coniungendo, quod nisi fiat caecum et ridiculum plerumque impetum relinqui (*v. 408 usque ad fin.*). Ceterum utrum Horatius, quae Wielandii est sententia, Pisonem iuvenem nimis ad versus faciendos proclivem, a poësi deterrere vo-

Inerit, an sine ulla alia causa peculiari cum amicis potest eos amantibus, quae de hac arte senserit, communicaverit, hoc quidem certis rationibus definiri non potest.

Humano capiti cervicem pictor equinam
 Iungere si velit, et varias inducere plumas
 Undique collatis membris, ut turpiter atrum
 Desinat in piscem mulier formosa superne,
 Spectatum admissi risum teneatis, amici? 5
 Credite, Pisones, isti tabulae fore librum
 Persimilem, cuius, velut aegri somnia, vanae
 Fingentur species, ut nec pes, nec caput uni
 Reddatur formae. — Pictoribus atque poetis
 Quidlibet audendi semper fuit aequa potestas. — 10
 Scimus, et hanc veniam petimusque damusque vicissim:
 Sed non ut placidis coeant immitia; non ut
 Serpentes avibus gementur, tigribus agni.
 Inceptis gravibus plerumque et magna professis
 Purpureus, late qui splendeat, unus et alter 15
 Assuitur pannus; quum lucus et ara Dianae,
 Et properantis aquae per amoenos ambitus agros,
 Aut flumen Rhenum, aut pluvius describitur arcus.
 Sed nunc non erat his locus. Et fortasse cupressum
 Scis simulare: quid hoc, si fractis enatat exspes 20
 Navibus, aere dato qui pingitur? Amphora coepit
 Institui; currente rota cur urceus exit?
 Denique sit quid vis, simplex duntaxat et unum.
 Maxima pars vatium, pater et iuvenes patre digni,
 Decipimur specie recti. Brevis esse laboro, 25

III, v. 2. *pennas pro plumas* Coll. Sax. *formas* Benth. coniectura, de qua Cf. Hocheder (*Horatius Buch über die Dichtkunst, erklärt von Hocheder. Passau. 1824*). — v. 3. *aut turpiter* Codd. Valart et Sanadon. ex ingenio. Cf. Fea. — v. 5. Markland. ita distinguit: — *teneatis? Amici, Credite, Pisones.* Cf. Iahn. — v. 8. *iunguntur spec.* Cod. Helmst. — v. 9. *redduntur, reddentur* Codd. aliquot Feae; *reddantur* Cod. Helm. et Ed. Zar. Cf. Fea. — v. 18. *Rhenus* Codd. Valart. *Rheni* plures Codd. quos enumerat Fea. Cf. Iahn. — v. 20. *expes* plures Codd. et vet. Edd. apud Feam. Cf. Iahn. — v. 23. *quidvis* Benth. et Fea e Codd. Vulg. *quodvis*.

Obscurus fio; sectantem lenia nervi
 Deficiunt animique; professus grandia turgēt;
 Serpit humi tutus nimium timidusque procellae;
 Qui variare cupit rem prodigialiter unam,
 Delphinum silvis appingit, fluctibus aprum. 30
 In vitium ducit culpae fuga, si caret arte.
 Aemilium circa ludum faber inus et unguēs
 Exprimet, et molles imitabitur aere capillos,
 Infelix operis summa, quia ponere totum
 Nesciet. Hunc ego me, si quid componere curem, 35
 Non magis esse velim, quam naso vivere pravo,
 Spectandum nigris oculis nigroque capillo.
 Sumite materiam vestris, qui scribitis, aequam
 Viribus, et versate diu, quid ferre recusent,
 Quid valeant humeri. Cui lecta potenter erit res, 40
 Nec facundia deseret hunc, nec lucidus ordo.
 Ordinis haec virtus erit et venus, aut ego fallor,
 Ut iam nunc dicat iam nunc debentia dici,
 Pleraque differat et praesens in tempus omittat.
 In verbis etiam tenuis cautusque serendis, 45
 Hoc amet, hoc spernat promissi carminis auctor.
 Dixeris egregie, notum si callida verbum
 Reddiderit iunctura novum. Si forte necesse est
 Indiciis monstrare recentibus abdita rerum,
 Fingere cinctutis non exaudita Cethegis 50
 Continget, dabiturque licentia sumta pudenter.
 Et nova fietaque nuper habebunt verba fidem, si
 Graeco fonte cadent, parce detorta. Quid autem

— v. 26. *lenia* Benth. e Codd. Vulg. *levia*, quod tueretur Fea. —
 v. 32. *faber unus* e Codd. Benthleius; eumque sequitur Fea. Sed
 Cf. Iahn. — v. 40. *pudenter* Cod. Comb. — v. 42. *haud ego*
 Fea e multis suis Codd. Cf. Both. Annotatt. — v. 43. De inter-
 punctione Vid. Benth. Olim sic: *Ut iam nunc dicat; iam nunc*
dehentia dici Pleraque differat etc. — v. 46. Hunc versum ante
 v. 45. in Codd. positum Benthleius in locum suum restituit. Ob-
 loquitur Fea; sed Cf. Both. Annotatt. — v. 49. *rerum: et* Lambin.
 — v. 52. *factuque* Benth. e Codd. Fabricii. — v. 53. *cadent*
 Lambin. Benth. multi Codd. Palm. Comb. Fea. Vulg. *cadant*.

Caecilio Plautoque dabit Romanus, ademtum
 Virgilio Varioque? Ego cur, acquirere pauca 55
 Si possum, invideor, quum lingua Catonis et Ennî
 Sermonem patrium ditaverit, et nova rerum
 Nomina protulerit? Licuit, semperque licebit,
 Signatum praesente nota producere nomen.
 Ut silvae foliis pronos mutantur in annos, 60
 Prima cadunt: ita verborum vetus interit aetas,
 Et iuvenum ritu florent modo nata vigentque.
 Debemur morti nos nostraque. Sive receptus
 Terra Neptunus classes aquilonibus arcet,
 Regis opus; sterilisque diu palus aptaque remis 65
 Vicinas urbes alit, et grave sentit aratrum;
 Seu cursum mutavit iniquum frugibus amnis,
 Doctus iter melius: mortalia facta peribunt;
 Nedum sermonum stet honos et gratia vivax.
 Multa renascentur quae iam cecidere, cadentque 70
 Quae nunc sunt in honore vocabula, si volet usus,
 Quem penes arbitrium est et ius et norma loquendi.
 Res gestae regumque ducumque et tristia bella
 Quo scribi possent numero, monstravit Homerus.
 Versibus impariter iunctis querimonia primum, 75
 Post etiam inclusa est voti sententia compos.
 Quis tamen exiguos elegos emisit auctor,
 Grammatici certant, et adhuc sub iudice lis est.
 Archilochum proprio rabies armavit iambo.

— v. 59. *procudere nomen* plures Codd. Lambin. Stephan. Valart. Bentleius e coniectura Luisini: *procudere nummum*. —
 v. 62. *virentque* Fea ex uno Cod. Cf. Hocheder. — v. 63. *de-*
bemus Codd. Priscian. apud Achill. Statium Cf. Bentl. ad v.
 68. — v. 65. Ita Codd. omnes, nisi quod in paucis est *ste-*
rilisque, nec non Grammatici veteres, qui hunc locum laudant.
 Tamen ob correptam syllabam finalem in *palus* viri docte ten-
 tarunt, ut Bentl. *sterilisve palus prius aptaque remis*; alii aliter.
 Sed Cf. Fea et Both. Annotatt. — v. 68. *mortalia cuncta perib.*
 Bentl. ex uno Cod. Cf. Hocheder. — v. 72. *vis et norma* Codd.
 Bersm. Feae et plures Edd. vet. — v. 77. *elegos commiserit*
 Codd. duo Feae. *actor* duo Codd. Feae.

Hunc socci cepere pedem grandesque cothurni, 30
 Alternis aptum sermonibus, et populares
 Vincentem strepitus, et natum rebus agendis.
 Musa dedit fidibus Divos, puerosque Deorum,
 Et pugilem victorem, et equum certamine primum,
 Et iuvenum curas, et libera vina referre. 85
 Descriptas servare vices operumque colores,
 Cur ego, si nequeo ignoroque, poëta salutor?
 Cur nescire, pudens prave, quam discere malo?
 Versibus exponi tragicis res comica non vult;
 Indignatur item privatis, ac prope socco 90
 Dignis carminibus narrari coena Thyestae.
 Singula quaeque locum teneant sortita decenter.
 Interdum tamen et vocem Comoedia tollit,
 Iratusque Chremes tumido delitigat ore:
 Et tragicus plerumque dolet sermone pedestri 95
 Telephus et Peleus, quum pauper et exsul, uterque.
 Proiecit ampullas et sesquipedalia verba,
 Si cor spectantis curat tetigisse querela.
 Non satis est pulchra esse poëmata; dulcia sunt,
 Et quocunque volent, animum auditoris agunto. 100
 Ut ridentibus arrident, ita flentibus adsunt
 Humani vultus. Si vis me flere, dolendum est
 Primum ipsi tibi; tunc tua me infortunia laedent,
 Telephe vel Peleu. Male si mandata loqueris,
 Aut dormitabo aut ridebo. Tristia moestum 105
 Vultum verba decent; iratum plena minarum;
 Ludentem lasciva; severum seria dictu.
 Format enim natura prius nos intus ad omnem
 Fortunarum habitum; iuvat, aut impellit ad iram,
 Aut ad humum moerore gravi deducit et angit; 110
 Post effert animi motus interprete lingua.
 Si dicentis erunt fortunis absona dicta,

— v. 92. *decentem* Bentr. e Codd. — v. 95. Punctum, quod vulgo post vocabulum *pedestri* collocant, sustulit Bentr. quem Vid. — v. 99. *pura esse poëmata* unus Cod. Bentr. quem Cf. — v. 101. *adsunt* longe plurimi Codd. *adsint* reliqui. Tan. Faber coni. *ad-ferent*, quod Bentr. tuetur.

Romani tollent equites peditesque cachinnum.
 Intererit multum, Davusne loquatur an heros;
 Maturusne senex an adhuc florente iuventa 115
 Fervidus; et matrona potens an sedula nutrix;
 Mercatorne vagus cultorve virentis agelli;
 Colchus an Assyrius; Thebis nutritus an Argis.
 Aut famam sequere, aut sibi convenientia finge,
 Scriptor. Honoratum si forte reponis Achillem: 120
 Impiger, iracundus, inexorabilis, acer,
 Iura neget sibi nata, nihil non arroget armis.
 Sit Medea ferox invictaque, flebilis Ino,
 Perfidus Ixion, Io vaga, tristis Orestes.
 Si quid inexpertum scenae committis, et audes 125
 Personam formare novam, servetur ad imum
 Qualis ab incepto processerit, et sibi constet.
 Difficile est proprie communia dicere: tuque
 Rectius Iliacum carmen deducis in actus,
 Quam si proferres ignota indictaque primus. 130
 Publica materies privati iuris erit, si
 Nec oirca vilem patulumque moraberis orbem;
 Nec verbum verbo curabis reddere fidus
 Interpres: nec desilies imitator in arctum,
 Unde pedem proferre pudor vetet aut operis lex. 135
 Nec sic incipies, ut scriptor cyclicus olim:
 Fortunam Priami cantabo et nobile bellum.
 Quid dignum tanto feret hic promissor hiatu?

— v. 113. *equitesque patresque* Benth. ex coniectura. — v. 114. *Divusne* Benth. e Codd. et denuo tuetur Both. in Annotatt. Sed Cf. Gesner. — *herusne* Lambin. *Heros* Fea pro nomine proprio servi habet. — v. 116. *et matr.* restituit Benth. e Codd. quibus accedunt Codd. Feae. Vulg. *an matr.* — *matrona parens* Fea e duobus Codd. Sed Cf. Both. Annotatt. — v. 120. Ita interpunxit Bentleius. Vulg. *finge. Scriptor honorat.* etc. Idemque coni. *Homereum* pro *honoratum*. Cf. Hocheder. — v. 129. *deducis* Fea e duobus Codd. Both. praesens *deducis* cum imperfecto *proferres* non posse coniungi censens, coniecit: — *deduxes in actus Quam sic proferres*. Sed Vid. Iahn. — v. 135. *referre* plures Codd. quos enumerat Fea. — v. 136. *cyclius* Benth. et Fea e Codd. — v. 137. *nobile regnum* Coll. Sax. — v. 138. *hic professor* duo

Parturiunt montes, nascetur ridiculus mus.
 Quanto rectius hic, qui nil molitur inepte: 140
 Dic mihi, Musa, virum, captae post tempora Troiae,
 Quí mores hominum multorum vidit et urbes.
 Non fumum ex fulgore, sed ex fumo dare lucem
 Cogitat, ut speciosa dehinc miracula promat,
 Antiphaten, Scyllamque, et cum Cyclope Charybdis. 145
 Nec reditum Diomedis ab interitu Meleagri,
 Nec gemino bellum Troianum orditur ab ovo.
 Semper ad eventum festinat, et in medias res,
 Non secus ac notas, auditorem rapit, et quae
 Desperat tractata nitescere posse, relinquit; 150
 Atque ita mentitur, sic veris falsa remiscet,
 Primo ne medium, medio ne discrepet imum.
 Tu, quid ego et populus mecum desideret, audi.
 Si plausoris eges aulaea manentis, et usque
 Sessuri, donec cantor, Vos plaudite, dicat: 155
 Aetatis cuiusque notandi sunt tibi mores,
 Mobilibusque decor naturis dandus et annis.
 Reddere qui voces iam scit puer, et pede certo
 Signat humum, gestit paribus colludere, et iram
 Colligit ac ponit temere, et mutatur in horas. 160
 Imberbis iuvenis, tandem custode remoto,
 Gaudet equis canibusque et aprici gramine campi;
 Cereus in vitium flecti, monitoribus asper,
 Utilium tardus provisor, prodigus aeris,
 Sublimis, cupidusque, et amata relinquere pernix. 165
 Conversis studiis aetas animusque virilis
 Quaerit opes et amicitias, inservit honori,
 Commisisse cavet, quod mox mutare laboret.
 Multa senem circumveniunt incommoda, vel quod
 Quaerit, et inventis miser abstinet, ac timet uti, 170

Codd. Feae. — v. 139. *parturiunt* Bentl. e Codd. Vulg. *parturiunt*. — v. 141. *moenia Troiae* Bentl. e Codd. Cf. Fea. — v. 154. *fautoris eges* Bentl. coniectura. — v. 157. *maturis dandus* Bentl. coniectura, itemque unus Cod. Feae. qui eam lectionem in textum recepit. Sed Cf. Iahn. — v. 161. *imberbus* Cod. Cruq. indeque Bentl. alii. Cf. Fea.

Vel quod res omnes timide gelideque ministrat,
 Dilator, spe longus, iners, avidusque futuri,
 Difficilis, querulus, laudator temporis acti
 Se puero, castigator censorque minorum.
 Multa ferunt anni venientes commoda secum, 175
 Multa recedentes adimunt. Ne forte seniles
 Mandentur iuveni partes, pueroque viriles;
 Semper in adiunctis aevoque morabimur aptis.
 Aut agitur res in scenis, aut acta refertur.
 Segnius irritant animos demissa per aurem, 180
 Quam quae sunt oculis subiecta fidelibus, et quae
 Ipse sibi tradit spectator. Non tamen intus
 Digna geri promes in scenam; multaue tolles
 Ex oculis, quae mox narret facundia praesens.
 Ne pueros coram populo Medea trucidet; 185
 Aut humana palam coquat exta nefarius Atreus:
 Aut in avem Progne vertatur, Cadmus in anguem.
 Quodcumque ostendis mihi sic, incredulus odi.
 Neve minor neu sit quinto productior actu
 Fabula, quae posci vult et spectata reponi; 190
 Nec Deus intersit, nisi dignus vindice nodus
 Inciderit; nec quarta loqui persona laboret.
 Actoris partes Chorus officiumque virile
 Defendat; neu quid medios intercinat actus,
 Quod non proposito conducat et haereat apte. 195
 Ille bonis faveatque et consilietur amicis,
 Et regat iratos, et amet peccare timentes;
 Ille dapes laudet mensae brevis, ille salubrem
 Iustitiam, legesque, et apertis otia portis;
 Ille tegat commissa, deosque precetur et oret. 200

— v. 172. *spe lentus, iners, pavidusque futuri* Benth. coniectura. Sed Cf. Gesner. — v. 174. Ita omnes Codd. Vid. Benth. Vulgo: *censor castigatorque*. — v. 185. *Ne pueros* e plurimis Codd. et antiquissimis Edd. restituit Benth. quem Cf. Olin vulgo: *Aec*. — v. 190. *spectanda* Codd. aliquot Feae, aliorum. Cf. Iahn. — v. 193. *auctoris* plures Codd. Feae et aliquot Pulm. Lamb. — v. 195. *amicis* Muret. indeque multae Edd. *amice* Codd. Lambini, Bersm. alii. — v. 197. *amet pacare timentes* e duobus Codd. Pulm. Benthleius. Cf. Doering.

Ut redeat miseris, abeat Fortuna superbis.
 Tibia non, ut nunc, orichalco iuncta, tubaeque
 Aemula, sed tenuis simplexque foramine paucō
 Adspirare et adesse Choris erat utilis, atque
 Nondum spissa nimis complere sedilia flatu; 205
 Quo sane populus numerabilis, utpote parvus,
 Et frugi castusque verecundusque coibat.
 Postquam coepit agros extendere victor, et urbes
 Latior amplecti murus, vinoque diurno
 Placari Genius festis impune diebus, 210
 Accessit numerisque modisque licentia maior.
 Indoctus quid enim saperet liberque laborum
 Rusticus, urbano confusus, turpis honesto?
 Sic praecae motumque et luxuriam addidit arti
 Tibicen, traxitque vagus per pulpita vestem: 215
 Sic etiam fidibus voces crevere severis,
 Et tulit eloquium insolitum facundia praeceps;
 Utiliumque sagax rerum, et divina futuri,
 Sortilegis non discrepuit sententia Delphis.
 Carmine qui tragico vilem certavit ob hircum, 220
 Mox etiam agrestes Satyros nudavit, et asper
 Incolumi gravitate iocum tentavit, eo quod
 Illecebris erat et grata novitate morandus
 Spectator, functusque sacris, et potus, et exlex.
 Verum ita risores, ita commendare dicaces 225
 Conveniet Satyros, ita vertere seria ludo;
 Ne, quicumque Deus, quicumque adhibebitur heros,
 Regali conspectus in auro nuper et ostro,
 Migret in obscuras humili sermone tabernas;
 Aut, dum vitat humum, nubes et inania captet. 230
 Effutire leves indigna Tragoedia versus,
 Ut festis matrona moveri iussa diebus,
 Intererit Satyris paulum pudibunda protervis,
 Non ego inornata et dominantia nomina solum,

— v. 202. *iuncta* plurimi Codd. et veteres Edd. Alii *vineta*. Vid. Benth. et Fea. — v. 208. *urbes* Fea c plurimis Codd. Vulg. *urbem*. Cf. Iahn. — v. 209. *luxior* Benth. coniectura. Cf. Hocheder.

Verbaque, Pisones, Satyrorum scriptor amabo; 235
 Nec sic enitar tragico differre colori,
 Ut nihil intersit, Davusne loquatur et audax
 Pythias, emuncto lucrata Simone talentum,
 An custos famulusque Dei Silenus alumni.
 Ex noto fictum carmen sequar, ut sibi quivis 240
 Speret idem; sudet multum, frustraue laboret
 Ausus idem. Tantum series iuncturaque pollet;
 Tantum de medio sumtis accedit honoris.
 Silvīs educti caveant, me iudice, Fauni,
 Ne, velut innati triviis ac paene forenses, 245
 Aut nimium teneris iuvenentur versibus unquam,
 Aut immunda crepent ignominiosaue dicta.
 Offenduntur enim, quibus est equus, et pater, et res;
 Nec, si quid fricti ciceris probat et nucis emtor,
 Aequis accipiunt animis, donantve corona. 250
 Syllaba longa brevi subiecta vocatur lambus,
 Pes citus; unde etiam Trimetris accrescere iussit
 Nomen iambeis, quum senos redderet ictus,
 Primus ad extremum similis sibi. Non ita pridem,
 Tardior ut paulo graviorque veniret ad aures, 255
 Spondeos stabiles in iura paterna recepit
 Commodus et patiens, non ut de sede secunda
 Cederet aut quarta socialiter. Hic et in Acci
 Nobilibus Trimetris apparet rarus, et Ennī
 In scenam missos cum magno pondere versus 260
 Aut operae celeris nimium curaue carentis,
 Aut ignoratae premit artis crimine turpi.
 Non quivis videt immodulata poëmata iudex;
 Et data Romanis venia est indigna poëtis.
 Idcircone vager, scribamque licenter? Ut omnes 265

— v. 235. *Satirarum* Codd. aliquot Feae et Helmst. — v. 237. *an audax* Codd. aliquot Feae, aliorum. — v. 243. *accedet* pauci Codd. Feae, idque mavult Both. in Annotatt. Sed Cf. Iahn. — v. 244. *educti* Codd. Feae, idque Markland. coniecerat. Cf. Fea. — v. 249. *fracti ciceris* plures Codd. et multae Edd. vet. Vid. Fea. — v. 258. *hic*, ut sit adverbium Both. in Annotatt. scribendum censet. — v. 260. *missus* Bentl. coniectura. Cf. Fea. — *cum magno* Bentl. e Codd. Vulg. *magno cum*. — v. 265. Ita Bent-

Visuiros peccata putem mea, tutus et intra
 Spem veniae cautus: vitavi denique culpam,
 Non laudem merui. Vos exemplaria Graeca
 Nocturna versate manu, versate diurna.
 At vestri proavi Plautinos et numeros et 270
 Laudavere sales. Nimium patienter utrumque,
 Ne dicam stulte, mirati; si modo ego et vos
 Scimus inurbanum lepido seponere dicto,
 Legitimumque sonum digitis callemus et aure.
 Ignotum tragicæ genus invenisse Camenæ 275
 Dicitur et plaustis vexisse poemata Thespis,
 Quæ canerent agerentque peruncti faecibus ora.
 Post hunc personæ pallæque repertor honestæ
 Aeschylus et modicis instravit pulpita tignis,
 Et docuit magnumque loqui nitique cothurno. 280
 Successit vetus his comoedia, non sine multa
 Laude; sed in vitium libertas excidit, et vim
 Dignam lege regi. Lex est accepta, chorusque
 Turpiter obticuit, sublato iure nocendi.
 Nil intentatum nostri liquere poetæ; 285
 Nec minimum meruere decus, vestigia Graeca
 Ausi deserere, et celebrare domestica facta,
 Vel qui prætextas, vel qui docuere togatas.
 Nec virtute foret clarisve potentius armis,
 Quam lingua, Latium, si non offenderet unum- 290
 Quemque poetarum limæ labor et mora. Vos, o
 Pompilius sanguis, carmen reprehendite, quod non
 Multa dies et multa litura coercuit, atque
 Præsectum decies non castigavit ad unguem.

leius locum e Codd. restitutum interpunctione adiuvit. Olim vulg.
an omnes. Fea et omnes merito a Bothio in Annotatt. castigatus.
 Doering. a verbis *Idcircone vager* orationem continuat et post
cautus demum interrogandi signum addit. — v. 270. *At vestri*
 maior Codd. pars, sed haud pauci *nostri*. Cf. Benth. — v. 272. *non*
dicam Cod. unus Fea alter Achill. Statii. — v. 277. *Qui canerent*
 Benth. coniectura. Cf. Gesner. — v. 294. *præsectum decies*
 Lambin. Benth. quem Vid. e Codd. Sed longe plurimi Codd.
perfectum idque restituit Fea, quem Cf. cum Both. et Iahn.

Ingenium misera quia fortunatius arte 295
 Credit, et excludit sanos Helicone poëtas
 Democritus, bona pars non unguis ponere curat,
 Non barbam, secreta petit loca, balnea vitat.
 Nanciscetur enim pretium nomenque poëtae,
 Si tribus Anticyris caput insanabile nunquam 300
 Tonsori Licino commiserit. O ego-laevus,
 Qui purgor bilem sub verni temporis horam!
 Non alius faceret meliora poëmata. Verum
 Nil tanti est. Ergo fungar vice cotis, acutum
 Reddere quae ferrum valet, exsors ipsa secandi: 305
 Munus et officium nil scribens ipse docebo;
 Unde parentur opes, quid alat formetque poëtam,
 Quid deceat, quid non, quo virtus, quo ferat error.
 Scribendi recte, sapere est et principium et fons.
 Rem tibi Socraticae poterunt ostendere chartae; 310
 Verbaque provisam rem non invita sequentur
 Qui didicit, patriae quid debeat, et quid amicis;
 Quo sit amore parens, quo frater amandus et hospes,
 Quod sit conscripti, quod iudicis officium, quae
 Partes in bellum missi ducis: ille profecto 315
 Reddere personae scit convenientia cuique.
 Respicere exemplar vitae morumque iubebo
 Doctum imitatore, et vivas hinc ducere voces.
 Interdum speciosa locis morataque recte
 Fabula, nullius veneris, sine pondere et arte, 320
 Valdius oblectat populum meliusque moratur,
 Quam versus inopes rerum nugaeque canorae.
 Graiis ingenium, Graiis dedit ore rotundo
 Musa loqui, praeter laudem nullius avaris.
 Romani pueri longis rationibus assem 325
 Discunt in partes centum diducere. — Dicas,

— v. 302. *purgo* aliquot Codd Lambin. et Feae, nec non plures
 Edd. vett. — v. 312. *quod debeat, et quod* Coll. Sax. et Cod. unus
 Feae. — v. 318. *vivas* maxima pars Codd. et priscarum Edd. habet,
 unde restituit Bentleius, quem sequitur Fea. Olim vulg. *veras*.
 — v. 319. *speciosa iocis* Cod. Achill. Stat. et duo Bersm. item-
 que Edd. Ven. Glarean. aliae. Cf. Fea.

Filius Albinus, Si de quincunee remota est
 Uncia, quid superet? — Poterat dixisse: Triens. — Eu!
 Rem poteris servare tuam. Redit uncia, quid fit? —
 Semis. — An, haec animos aerugo et cura peculî 330
 Quum semel imbuerit, speramus carmina fingi
 Posse linenda cedro, et levi servanda cupresso?
 Aut prodesse volunt aut delectare poëtae,
 Aut simul et incunda et idonea dicere vitae.
 Quidquid praecipies, esto brevis, ut cito dicta 335
 Percipiant animi dociles, teneantque fideles.
 Omne supervacuum pleno de pectore manat.
 Ficta voluptatis causa sint proxima veris:
 Ne, quodcunque volet, poscat sibi fabula credi,
 Neu pransae Lamiae vivum puerum extrahat alvo. 340
 Centuriae seniorum agitant expertia frugis;
 Celsi preatereunt austera poemata Rhamnes.
 Omne tulit punctum, qui miscuit utile dulci,
 Lectorem delectando pariterque monendo.
 Hic meret aera liber Sosis, hic et mare transit, 345
 Et longum noto scriptori prorogat aevum.
 Sunt delicta tamen, quibus ignovisse velinus.
 Nam neque chorda sonum reddit, quem vult manus et mens,
 Poscentique gravem persaepe remittit acutum;
 Nec semper feriet quodcunque minabitur arcus. 350
 Verum ubi plura nitent in carmine, non ego paucis
 Offendar maculis, quas aut incuria fudit,
 Aut humana parum cavit natura. Quid ergo est?
 Ut scriptor si peccat idem librarius usque,
 Quamvis est monitus, venia caret; ut citharoedus 355

— v. 328. *superet* Bentr. e Codd. Alii Codd. *superat et superest*. Vid. Fea. — *poterat* Bentr. ex Codd. Vulg. *poteras*. — v. 330. *An* Bentr. ex aliquot Blandin. Alii Codd. et Edd. *at haec vel ad haec*. — v. 339. *Ne* Bentr. e plurimis Codd. et antiquissimis Edd. Vulg. *Nec*. Cf. Bentr. — v. 350. *quocunque* plures Codd. Bersm. et Fea. — v. 353. *ergo est* longe plurimi Codd. et principes Edd. Alii omittunt *est*. Vid. Bentr. et Fea. Posteriorem lectionem defendit Both. — v. 355. *quamvis sit* Cod. Achillis Statii. — *ut citharoedus* revocavit e Codd. Bentr. quem Cf. Vulg. *et*.

Ridetur, chorda qui semper oberrat eadem:
 Sic mihi, qui multum cessat, fit Choerilus ille,
 Quem bis terve bonum cum risu miror; et idem
 Indignor, quandoque bonus dormitat Homerus.
 Verum operi longo fas est obrepere somnum. 360
 Ut pictura, poësis: erit quae, si propius stes,
 Te capiat magis, et quaedam, si longius abstes.
 Haec amat obscurum; volet haec sub luce videri,
 Iudicis argutum quae non formidat acumen:
 Haec placuit semel, haec decies repetita placebit. 365
 O maior iuvenum, quamvis et voce paterna
 Fingeris ad rectum, et per te sapis, hoc tibi dictum
 Tolle memor: certis medium et tolerabile rebus
 Recte concedi: consultus iuris et actor
 Causarum mediocris abest virtute disertis 370
 Messalae, nec scit quantum Cascellius Aulus;
 Sed tamen in pretio est: mediocribus esse poëtis
 Non homines, non Di, non concessere columnae.
 Ut gratas inter mensas symphonia discors
 Et crassum unguentum, et Sardo cum melle papaver 375
 Offendunt, poterat duci quia coena sine istis:
 Sic animis natum inventumque poëma iuvandis,
 Si paulum a summo decessit, vergit ad imum.
 Ludere qui nescit, campestribus abstinet armis,
 Indoctusque pilae discive trochive quiescit, 380
 Ne spissae risum tollant impune coronae:
 Qui nescit, versus tamen audet fingere! — Quidni?
 Liber et ingenuus, praesertim census equestrem
 Summam nummorum, vitioque remotus ab omni. —
 Tu nihil invita dices faciesve Minerva; 385
 Id tibi iudicium est, ea mens: si quid tamen olim

v. 358. *terve* Benth. ex uno Cod. reliqui *terque*. — v. 359. Per
 interrogationem hic versus inferendus esse videtur, et insuper
 scribendum *indigner*. Merito enim Fea in vulgari interpunctione
 offendit. — v. 360. *operi longo* e Codd. et vet. Edd. Benth. quem
 Cf. Vulg. *opere in longo*. — v. 362. *capiat* Lambin. Benth. Fea.
 Vulg. *capiet*. — *adstes* Fea ex uno Cod. Sed Cf. Both. Annotatt.
 — v. 371. Plures Edd. *Casellius*. Sed Vid. Fea. — v. 378. Ita
 maxima Codd. pars. Sed plures Edd. *a summo*. Vid. Fea.

Scripseris, in Meti descendat iudicis aures,
 Et patris, et nostras, nonumque prematur in annum,
 Membranis intus positis. Delere licbit,
 Quod non edideris: nescit vox missa reverti. 390
 Silyestres homines sacer interpretsque Deorum
 Caedibus et victu foedo deterruit Orpheus,
 Dictus ob hoc lenire tigres rabidosque leones:
 Dictus et Amphion, Thebanac conditor arcis,
 Saxa movere sono testudinis, et prece blanda 395
 Ducere quo vellet. Fuit haec sapientia quondam,
 Publica privatis secernere, sacra profanis,
 Concubitu prohibere vago, dare iura maritis,
 Oppida moliri, leges incidere ligno.
 Sic honor et nomen divinis vatibus atque 400
 Carminibus venit. Post hos insignis Homerus,
 Tyrtaeusque mares animos in Martia bella
 Versibus exacuit. Dictae per carmina sortes,
 Et vitae monstrata via est, et gratia regum
 Pieriis tentata modis, ludusque repertus, 405
 Et longorum operum finis: ne forte pudori
 Sit tibi Musa lyrae solers, et cantor Apollo.
 Natura fieret laudabile carmen, an arte,
 Quaesitum est. Ego nec studium sine divite vena,
 Nec rude quid possit video ingenium: alterius sic 410
 Altera poscit opem res, et coniurat amice.
 Qui studet optatam cursu contingere metam,
 Multa tulit fecitque puer, sudavit et alsit,
 Abstinit venere et vino. Qui Pythia cantat
 Tibicen, didicit prius, extimuitque magistrum. 415
 Nec satis est dixisse: Ego mira poemata pango;
 Occupet extremum scabies; mihi turpe relinqui est,


— v. 387. *Meti* scripsimus cum Iahn. quem Cf. Plurimae Edd. *Meti*; sed in Codd. varie: *Mecti*, *Maecti*, *Mettii*, *Mattii* Vid. Benth. et Fea. — v. 394. *urbis* e plurimis Codd. et antiquissimis Edd. Fea, quem Vid. Vulg. *arcis*. — v. 402. *Dircaeusque mares* Codd. aliquot et primae Edd. Cf. Fea. — v. 410. *possit* Benth. e Codd. Olim vulg. *prosit*. — v. 416. *Nec* Benth. e Codd. Vulg. *Nunc*, quod denuo defendit Fea. Alii Codd. aliquot *Non* et *Num*.

Et, quod non didici, sane nescire fateri.
 Ut praeco, ad merces turbam qui cogit emendas,
 Assentatores iubet ad lucrum ire poeta 420
 Dives agris, dives positis in fenore nummis.
 Si vero est, unctum qui recte ponere possit,
 Et spondere levi pro paupere, et eripere atris
 Litibus in.plicitum, mirabor si sciet inter-
 Noscere mendacem verumque beatus amicum. 425
 Tu seu donaris, seu quid donare voles cui,
 Nolito ad versus tibi factos ducere plenum
 Laetitiae; clamabit enim, Pulchre! bene! recte!
 Pallescet super his; etiam stillabit amicis
 Ex oculis rorem; saliet, tundet pede terram. 430
 Ut quae conductae plorant in funere, dicunt
 Et faciunt prope plura dolentibus ex animo: sic
 Derisor vero plus laudatore movetur.
 Reges dicuntur multis urgere culullis,
 Et torquere mero, quem perspexisse laborant, 435
 An sit amicitia dignus: si carmina condes,
 Nunquam te fallant animi sub vulpe latentes.
 Quintilio si quid recitares, Corrige sodes
 Hoc, aiebat, et hoc. Melius te posse negares,
 Bis terque expertum frustra, delere iubebat, 440
 Et male tornatos incudi reddere versus.
 Si defendere delictum, quam vertere, malles,
 Nullum ultra verbum aut operam insumebat iuanem,
 Quin sine rivali teque et tua solus amares.
 Vir bonus et prudens versus reprehendet inertes, 445
 Culpabit duos, incomitis allinet atrum
 Transverso calamo signum, ambitiosa recidet

— v. 423. *artis* Cod. Feae et alter Valart. idemque Bentr. coniecerat.
 Sed Cf. Fea. — v. 431. *quae conductae* Kirchmanni (De funerib. II,
 6) coniecturam etiam Marklando probatam recepit Fea. Cf. Hoche-
 der. — v. 435. *prospexisse* Fea e Codd. sed iure a Both. in Annot.
 reprehensus. — *laborant* Bentr. cum Codd. et rett. Edd. Vulg. *la-
 borent*. — v. 441. *ter natos* Bentr. coniectura. Acron et Porphyrio
 legisse videntur *formatos* a Cuning. aliis receptum. Cf. Gesner. Fea
 et Both. Annotatt.

Ornamenta, parum claris lucem dare coget,
 Arguet ambigue dictum, mutanda notabit;
 Fiet Aristarchus; non dicet: Cur ego amicum
 Offendam in nugis? Hae nugae seria ducent
 In mala derisum semel exceptumque sinistre.
 Ut mala quem scabies aut morbus regius urget,
 Aut fanaticus error, et iracunda Diana,
 Vesanum tetigisse timent fugiuntque poëtam,
 Qui sapiunt; agitant pueri, incautique sequuntur.
 Hic, dum sublimis versus ructatur et errat,
 Si veluti merulis intentus decidit auceps
 In puteum foveamve, licet, Succurrite, longum
 Clamet, io cives! ne sit, qui tollere curet.
 Si curet quis opem ferre, et demittere funem,
 Quî scis, an prudens huc se proiecerit, atque
 Servari nolit? dicam, Siculique poëtae
 Narrabo interitum. Deus immortalis haberi
 Dum cupit Empedocles, ardentem frigidus Aetnam
 Insiluit. Sit ius liceatque perire poëtis.
 Invitum qui servat, idem facit occidenti.
 Nec semel hoc fecit; nec, si retractus erit, iam
 Fiet homo, et ponet famosae mortis amorem.
 Nec satis apparet, cur versus faetitet; utrum
 Minxerit in patrios cineres, an triste bidental
 Moverit incestus: certe furit, ac velut ursus
 Obiectos caveae valuit si frangere clathros.
 Indoctum doctumque fugat recitator acerbus;
 Quem vero arripuit, tenet occiditque legendo,
 Non missura cutem, nisi plena cruoris, hirudo.

— v. 450. *Non* Benth. secundum Codd. Vulg. *nec*. — v. 457. *si*
blimes plures Codd. et vett. Edd. indeque olim vulgata per plu-
 rimas editiones lectio. Vid. Fea. — v. 458. *sic veluti* duo Codd.
 Bersm. — v. 461. *si curet quis* Benth. e Codd. et vett. Edd. Vulg.
si quis curet. Ed. Zar. *curret*. -- v. 462. *proiecerit* restituit Benth.
 ex maxima Codd. parte et vett. Edd. consentiente Fea. Vulg. *de-*
iecerit.





LT Horace
H8113Ze Opera omnia;
2 vol. in 1.

DATE.	NA
May 12 '50	Wm. Brewster

